



O P E R E
 DEL PROPOSTO
 LODOVICO ANTONIO
 MURATORI
 GIA' BIBLIOTECARIO
 DEL SERENISSIMO SIGNORE
 DUCA DI MODENA.
 TOMO QUINTO.



IN AREZZO MDCCLXVIII.
 PER MICHELE BELLOTTI Stampat. Vesc. all' Insegna del PETRARCA.

CON LICENZA DE' SUPERIORI.

ANTONII LAMPRIDII DE SUPERSTITIONE VITANDA, SI-
VE CENSURA VOTI SANGUINARIII IN HONOREM IM-
MACULATAE CONCEPTIONIS DEIPARAE EMISSI, A
LAMINDO PRITANIO ANTEA OPPUGNATI, ATQUE A
CANDIDO PARTHENOTIMO THEOLOGO SICULO IN-
CASSUM VINDICATI.

FERDINANDI VALDESHII EPISTOLAE, SIVE APPENDIX AD
LIBRUM ANTONII LAMPRIDII DE SUPERSTITIONE
VITANDA, UBI VOTUM SANGUINARIUM RECTE OP-
PUGNATUM, MALE PROPUGNATUM OSTENDITUR.



AD LECTOREM

PRECES AUCTORIS.



I quisquam ad hoc Opusculum legendum accedet, certe duplex hominum genus erit. Alterum eorum, qui Sanguinari-um Votum nunquam susceperunt, suo-que nondum examini subjecerunt. Ab his nihil mihi, nihil lucubrationi huic timendum est. Immo ut ad illorum Tribunal potissimum causa ista deferretur, in votis mihi esset; quum enim in neutram partem hactenus eorum iudicia declinarint, nemo aequius quam illi & rationes perpendere, & sententiam hac de re ferre possit. In classe ista, ni fallor, potiore Catholicorum partem videre mihi videor. Alterum illorum est, qui jam se huiusmodi Voto obstrinxerunt, & quanquam plerique sine ullo examine in illud censerint, mentibus tamen praecoccupatis insum tueri, quacunque ratione possint,

suum ducent. Non querelae, non iratae tantum voces ab iis expectandae, sed & quidquid humana sagacitas, & potentia praestare queat ad eliminandum, opprimendumque Librum, in re praesertim Pietatis, suis oppositum placitis. Sed si quid meae preces possunt, qucuilibet supplex rogo, ut antequam ad haec legenda se conferat, secum reputet, quanto honore, quove amore digna sit Veritas. Hanc enixe expiscari, hanc anteferre, idque libenter, opinionibus suis, est hominis bene compositi, seque ac sua recte amanti. Si sapias amicum dicas, non hostem, qui te vera aut meliora doceat. Quod non ideo dictum velim, quasi a Lectore exigam, ut antea persuasum habeat, a me stare Veritatem, quam sententiae meae rationes exceperit. Id unum ego precibus meis concessum velim, ut pacato duntaxat animo Lector ista legat, hisque in limine lectionis praeconcepas tantisper sponat Opiniones, easdem recepturus e vestigio, nisi me propiora vero, sive solidiora tradentem agnoverit. Porro iniquum foret mihi irasci, quod tacentibus aliis istam ego provinciam susceperim. Interest profecto Reipublicae Catholicae in examen adduci, quidquid novitii occurrit in Doctrina Fidei, magnique momenti est in Doctrina Morum. De Vita hominum in eo Voto agitur. Num id tibi leve, num contemnendum videatur? At inquis: Pietatem sententia mea praefert. Audio. Sed quid si Superstitionem? Huic adversari, totisque obsistere viribus, insistere, si potes, quin verae Pietatis, quin rectae Rationis sit opus. Reliquum ergo est, ut uno Veritatis amore ductus pacifice haec legas, in eam denique concessurus sententiam, quam non Affectus, sed Regina ipsa Veritas amplectendam suadebit.



PRAEFATIO.



VIGINTI & septem jam excurrunt Anni, ex quo primum prodiiit Lutetiae Parisiorum Tractatus meus de *Ingeniorum moderatione in Religionis negotio*, alibi postea recusus. Ibi Libro II. Cap. VI. pag. 254. palam prodidi, improbari mihi eorum consilium, qui vovent se daturos Sanguinem pro tuenda sententia, tribuente immunitatem ab Originali culpa Beatissimae Virgini Mariae. Nullus me livor, nullius odium, me ad hujusmodi Votum improbandum permovit. Una illius, ut mihi videbatur, & adhuc videtur, deformitas verba censurae aliqui placidae ministravit. At post complures annos, hoc est Anno 1729. emerfit tandem Siculus Scriptor, immo Theologus, & *sacrae Theologiae Professor*, qui sub nomine *Candidi Parthenotimi* in arenam adversus me descendit, edita Panormi *Dissertatione Theologica*, cui titulus *Votum pro tuenda immaculata Deiparae Conceptione ab oppugnationibus Lamindi Pritanii vindicatum*. Sero ad me delatus est Libellus, isque etiam me invenit aliis negotiis, curisque distentum, e quibus Eruditorum Respublica, si Deus dabit, aliquando fructum recipiet. Alienum praeterea me sentiebam a suscipienda ejusmodi pugna, non quod putarem, quidquam ereptum veritati ac soliditati sententiae meae; sed quod jam longa experientia didici, adeo composita esse, immo male disposita ingenia, animosque mortalium, ut quam

semel

semel opinionem imbuerunt, atque firmarunt, fere semper retineant, ac potissimum si concertationibus res agatur. In incendium quippe maximum facile tunc erumpunt homines; & amore sui, suaeque famae tutela urgente ita abripiuntur, ut Veritatem vel ante pedes positam saepe non agnoscant. Jam judicantur pro illa sententia, firmumque ei assensum praebuere, immo & alios docuere: molestissimum deinde est, atque intolerandum, judicare contra ingenium proprium, contra se ipsum. Stat ante oculos existimationis propriae periculum; mentemque agitat ac premit durum illud phantasma: quid de me docti, quid Populus ipse dicturus est, si vincar, eoque plus, si me visum fatear? Quare effugia omnia quaerunt; ratiunculas quasque sibi oblatas arripiunt; & quum nihil aliud superest, invidiam adversario creant; odiumque hominum, si quo pacto possunt, in eum concitant. Nullam denique artem, nulla externa auxilia negligunt, quibus importunum Censorem opprimant, atque consternant. Quod mirum est, ea infelicitate saepe homo laborat, dum gravi adeo affectuum tumultu in pugnis literariis exaestuatur, ut minime se putet a Veritate, aut Justitia, aut Caritate discedere, vel quum iniquae causae patrocinium suscipit, & contumelias, atque calumnias telorum loco in hostem usurpat. Equidem nescio, num gravius doleam naturae nostrae corruptionem, an ipsius Veritatis quotidiana vulnera, sive pericula, quam tamen omnes & amare, & sincero animo inquirere proptemur.

Et haec quidem tacite concinebam mihi. At ubi factum est mihi aliquantulum otii, simulque recogitare coepi, non de re levis momenti, sed de hominum Vita quaestionem obortam fuisse, aliquid rursus decrevi mandare literis, quod ad hujusmodi controversiam dirimendam opportunum atque utile non tantum videatur mihi, sed & ab aliis conferri possit. Accessit etiam & amicorum aliquot impulsus, putantium, non omnium esse agnoscere, in quo deficiat Parthenotimi Dissertatio; ac rei publicae consequenter interesse, si forte is doctrinam minime probandam tueatur, ab ea adoptanda detertere ceteros Catholicorum filios. En ergo onus fubeo. Uter ex nobis rectius fenderit, decernet postquam haec legerit, quisquis nullo partium studio ductus inter me atque illum aequus iudex sedebit. Et pari quidem facie ambo pedem haecenus contulimus larvatus ego, larvatus & ille. Nimirum, ut unusquisque, neutiquam spectata in alterutro humilitate, aut splendore nominis, sed una rationum vi, sententiam liberis votis ferre possit. Miretur autem Lector, cur haec de me in

Præ-

Praefatione pag. XIV. scripserit *Parthenotimus*: Ille quidem latere sub *Lamindi Pritanii* nomine maluit; quoniam id fecerit consilio, nil confert ad praesentem controversiam indagare. Lepide profecto, quum aequè & ipse latere sub *Candidi Parthenotimi* nomine maluerit. Ubi is nobis revelarit, quoniam id fecerit consilio, tunc & ipse a me responsum habebit. Attamen quando is semetipsum oblitus, mihi paene crimen inferre videtur pag. 103. *Lamindum* discitans *hominem recentem, qui vero sub nomine apparere veritus est*, hunc etiam locum topicum censoriae illius prurigini mature eripiam. Itaque lubens, apertum volo urgenti *Parthenotimo*, sub *Lamindi Pritanii* Anagrammatico nomine latere *Antonium Lampridium*. Quod quum revelo, habebit nihilominus in *Lampridio* Theologus Siculus hominem obscurum, & vix notum de nomine, uti is *Pritanium* pag. 75. appellavit: neque Opus erit, *Panorinitanos* iratis redarguere verbis, quasi nimium deferant auctoritati *Lamindi Pritanii*, uti jam fecit idem *Parthenotimus* pag. 101. ubi in haec fulmina erumpit: *Erras, quisquis es, Lamindi additus jurare in verba Magistri, si unquam credis, quod Orbi Catholico Lamindus sit ille bonus vir Horatii,*

Quo multae, magnaeque secantur Iudice lites.

Bono sit animo *Parthenotimus*: siue cum *Pritanio* antiquo, siue cum nupero *Lampridio* manus conferat, ei certamen erit cum homine vix noto de nomine, & qui rationibus tantum, non vero sui nominis maiestate pugnet. Sed jam itineri nos committamus.

Dixi, offerre heic se nobis rem non levis momenti; immo maximi dicendum mihi fuit: id quod nullo negotio unusquisque, dum tantillum consideret, vel me tacente deprehenderet. Non agitur heic de privata cuiusquam hominis Opinione, in latebris conclusa, & paucis nota: quanquam & in istam exerere arma cuicumque liceret, quoties eam adversari rectae doctrinae persuasum haberet. Agitur de Opinione, quae jam in editis Libris disseminata est, quae Populis integris ingenii conatu e sacris suggestis suadetur, inculcatur, tanquam eximium Christianae Pietatis experimentum, & quam-propagare nonnulli quantis possunt viribus adhuc pergunt. Mutinae auditus est mihi sacer quidam Orator, e Campania ad nos profectus, Populo sublime ejusmodi (ut is putabat) sacrificium pluribus commendans. Suasit quidem, at non persuasit: doctis interea mirantibus atque improbantibus informem illius zelum atque sententiam. Nunc tibi aliquantisper finge, sanguinariam hanc Opinionem pugnare cum Dogma-

tis

tis Catholicae Ecclesiae: teterrimum jam sentis monstrum in Italiam investum, & fieri posse, ut plura hominum millia ad mortem sine ratione incitentur, & horreant cunctorum animi ad incautam hanc & temere quaesitam mortalium carnificinam. Nam quod nullus nunc timor instat caedium, ac nondum natum credere fas est Tyrannum quemquam hac de causa in Catholicam gentem debacchaturum, propterea innoxiam atque ferendam hujusmodi Opinionem immerito quicquam censeat. Si imprudens, si temeraria est, continuo abjicienda, ac ejuranda est, ne altas radices agat, quas comprimere, ac evelle-
re, quum velis, non liceat; & ne probare nunc videaris, quod aliquando sis abominaturus. At enim, inquires, & nunc, & futuris quibusque temporibus stat ac stabit haec opinio, utpote solidis fundamentis nixa. Ita censes, & bona fide, ut arbitrari. An ita judicaturi sint alii, sitque deinceps omnibus judicandum, investigatum nunc pergo. Interea ne tu quidem inficias ire potes, quin gravissimi ponderis sit hoc argumentum, maximique referre, non perfunctorie, sed attenta meditatione, in illud aciem intellectus converti, ut qui haecenus a Voto isto effundendi Sanguinem sibi caverunt, si forte illud temeritate nequaquam carere perspiciant, eo diligentius in posterum ab eo sibi caveant; & contra qui incaute illud concepere, prudenter suae conscientiae consulere possint. Grandis flagitii reus esset Theologus, qui vel unum e Fidelibus sua doctrina impelleret ad Mortem temere subeundam. Quid postea, si integrum Populum?



INDEX CAPITUM

QUAE IN HOC LIBRO CONTINENTUR.



C A P U T P R I M U M.

Decreta Romanorum Pontificum, & Concilii Tridentini servanda in Quaestione de Immaculata Deiparae Conceptione. In quo sita Controversia inter Pritanium & Parthenotimum. Votum de tuenda, voce & calamo, sententia favente Immunitati Mariae laudatum. Improbatur Votum Sanguinarium pro illius tutela. Pag. 1.

C A P U T I I.

Pietatis Nomine propugnatum frustra a Parthenotimo Votum Sanguinarium. Vera Pietas cum ceteris Virtutibus iungenda. Inter Defectum & Excessum posita. Virii utriusque exempla. Pag. 11.

C A P U T I I I.

Vita hominum quam pretiosum Dei donum. De illa custodienda ac minime prodigenda, naturale ac divinum praeceptum. Quando mors potius eligenda. Joannis Baptistae, aliorumque exempla commendata. An Carthusiano in discrimine vitae comedendae sint carnes? Sancti Elpbegi, aliorumque exempla in examinem adducta. Pag. 20.

C A P U T I V.

Ut Vita prudenter detur, pro Bono Majori, & aeque Certo danda est. Exempla mortis imprudenter electae. Tenuitas pii operis consideranda, nec contra leges Prudentiae quisquam in mortem incurrat. Pag. 31.

C A P U T V.

Ad leges sanctissimas minime spectat effusio Sanguinis pro tuenda Immunitate Virginis. Neque ad tutelam Sanctitatis Mariae: Aliud Pietas Intrinseca, aliud Opinativa. Ad quamnam ex his referenda sententia Scotistica de Conceptione Virginis. Pag. 33.

C A P U T V I.

Minime immunis a crimine, qui vitam daret pro tuenda sententia Scotistica, ac si Fidei Dogma foret. Castrensis & Vasquii in hanc Tom. V. rem

K rem auctoritas. Temere quoque agat, pro cuius tutela, quando nihil aliud sit nisi Opinio, in mortem incurrere velis. Pag. 39.

CAPUT VII.

Quae vera & germana Pietas sit. Pium est propugnare sententiam, quae statuit expertem maculae Deiparam. Impium pro ea sententia occumbere velle. Opiniones piae laudandae, laudanda earum tutela. Sed minime pro illis Sanguine suo pugnare. Persuasio Veritatis nevisquam idonea ad honestandum Vorum Sanguinarium. Neque Probabilitas. Pag. 45.

CAPUT VIII.

An certa sit Sententia Scotistica de illibata Virginis Conceptione. Non ferenda opinio de Certitudine huiusmodi sententiae, ubi de Vita hominum agitur. Nondum ista excessit fines humanarum Opinionum. Aliud Certitudo Objectiva, aliud Persuasio Certitudinis. Pag. 55.

CAPUT IX.

Sententiae Scotisticae minime tribuenda Certitudo formidinem quamvis excludens. Quae Romanae Ecclesiae intentio sit in statuendo Falso Conceptionis. Quantum a Falsitate quavis abhorreat Ecclesia. Vincibilis Ignorantia ac Error tribuentium Certitudinem Intrinsecam Scotisticae Opinioni. Non haec hucusta e Sanctis Patribus. Ecclesia Romana tantummodo ut Probabilem & Piam eandem Sententiam agnoscat. Pag. 62.

CAPUT X.

Unde persuasum multis, dubitationem omnem de veritate sententiae Scotisticae sublata fuisse. E confictis in Hispania quibusdam Historicis. En aliis iidem monumentis commenticiis. Pag. 72.

CAPUT XI.

Basileensis Concilii auctoritas perperam hic adhibita. Uti & Tridentini & Gersonii. Adulterinae Laminae Granatenses quam acriter propugnatae, & ab Apostolica Sede tandem damnatae. Pag. 79.

CAPUT XII.

Communis olim Theologorum sententia contraria Scotisticae. Gabrielis Saavedrae temerariae quaedam Conclusiones. Pag. 87.

CAPUT XIII.

Vorum Sanguinarium contra leges Prudentiae susceptum. Neque ei Probabilitas suffragatur. Neque pietas Opinativa, quae ipsi inest. Quid Pie aliquid credere significet. Pag. 96.

CA.

CAPUT XIV.

Alius Honor Intrinsicus, alius Opinativus. Alia Sanctitas Intrinsicæ, alia Opinativa. An statuendum fastigium devotionis erga Virginem in suenda Scotistica sententia. Datur & Cultus Opinativus. Mendacii probum ab ea Opinione eliminatum. Pia Credulitas, Pia Persuasio explicantur. Pag. 104.

CAPUT XV.

Votum Sanguinarium non ferendum, quia hominum Opiniones æquas Veritatibus divina Fide credendis. Effugia Parthenotimi præoccupata. Idem Votum in Apostolicæ Sedis injuriam conceptum. Scandalo futurum hostibus Ecclesiæ Catholicæ. Neque ejus pondus votentibus satis perspectum. Præterea illusorium. Pag. 113.

CAPUT XVI.

Martyrii Spes Voti Sanguinariî amatoribus perperam facta. Sancti Thomæ, & Cardinalis Capisucci in banc rem doctrina. Pro veritate sententiæ Scotisticæ revera Votentes se Vitam daturos pollicentur. An Theopoli Raynaudi sententia de Vita danda pro eadem sententia improbatæ Romæ fuerit. Pag. 124.

CAPUT XVII.

An dare Vitam liceat, ne sententiam de Immunitate Mariana damnemus. Quid in casu isto agendum. Accuratus tamen negotiorum istud perpendendum. Pag. 135.

CAPUT XVIII.

Falsa crimina Lamindo Prisanio imposita a Parthenotimo. Qui Visionarium se prodit. Revelatio tributa Dominico a Jesu Maria Carmelitæ expenditur. Pag. 141.

CAPUT XIX.

Sanguinarium Votum Romæ, & alibi insuetum, quia improbatum. Parthenotimus Consuetudinis clypeo illud frustra tuetur. Senecæ auctoritate abutitur. Suarii doctrina de Votis ad Vitæ discrimen sese extendentibus explicata. Cardinalis de Lugo inivisus in controversiam nostram petractatus. Pag. 148.

CAPUT XX.

Thomistica de Conceptione Sententia ne ipsa quidem Certa. Potest & ipsa esse honorifica Virgini. Gersonii locus a Parthenotimo adductus, contra ipsum militans. An erret judicium putantis, licere mortem oppetere pro iusula Scotisticæ Sententiæ. An ab hæresi excusari possit, negans Christum Filium naturalem Dei. An ante Eccle-

Ecclesiae definitionem credere quaedam licet spectare ad Fidem Divinam. Pag. 153.

C A P U T XXI.

Carillatoris nota Pristano perperam a Parthenotimo iniusta. Inquisitioni Hispanicae an iuste tributa ab ipso quaedam Infalibilitatis species. Aliae Parthenotimi cavillationes. Pag. 166.

C A P U T XXII.

Confusio a Parthenotimo somniata in Lamindi censura. Nullum Herodotus ex ea censura ministrari posse scandalum, sed quidem e Voto Sanguinario. Neque Lamindus Doctores Catholicos, Theologosve Scholasticos traducit. Pag. 172.

C A P U T XXIII.

Theologorum auctoritas commendata. Sed non omnes certi ad Veritatem duces. Quid Amor Factionis, quid Amor Novitatis audere soleat. Excedi etiam posse in extollendis Deiparae prerogativis. Immo ea etiam via in Errorem ac Haeresim Pietas intemperans & pervicax prolabi potest. Pag. 180.

C A P U T XXIV.

DEBITUM Peccati Originalis Veteres omnes in Virgine agnovere. Quando coepta est tribui eidem ab ipso Immunitas. Patrum & Theologorum chorus concors adversans huiusmodi sententiae. Pag. 187.

C A P U T XXV.

Sententia excludentium Debitum a Virgine concordi Traditione Patrum eversa. A praestantioribus Theologis improbata. Nihilominus Censura Civitas adducta ad Votum de tuenda Sanguine suo eandem Debiti exclusionem. Ex hoc temerario Voto, quae consuetudines fluant. Pag. 211.

C A P U T XXVI.

Cur Pristanus in Voto Sanguinario Superstitionem timuerit. Quid sit Superstitio. Ab ista cavendum praecipue viris doctis. Ejus facies in novitio isto Voto deprebensa. Quid Panormitanis Civibus in hocce negotio agendum. Pag. 219.



DE SUPERSTITIONE VITANDA.

CAPUT PRIMUM.

*Decreta Romanorum Pontificum, & Concilii Tridentini servanda in
Quaestione de Immaculata Deiparae Conceptione. In quo sita Con-
troversia inter Primitivum & Parthenotimum. Vorum de tutanda;
voce & calamo, sententia favente Immunitati Marianae laudatum.
Improbatur Vorum Sanguinarium pro illius tutela.*



ED. antequam in argumentum ipsum invadam,
praeoccupanda difficultas est, quae instituenti di-
sputationem de *Voro Sanguinario* e vestigio occur-
rit. Nempe fieri non posse, ut sententia de Con-
ceptione Immaculata Sanctissimae Virginis saepe
non recurrat, quum super ipsa sententia innitatur
Vorum, de quo sermo nobis futurus est. Delica-
ta profecto materies, pluribus Romanorum Pontificum edictis, poe-
nisque non unius generis circumsepta: quae omnia heic innuere tum
ad meam, tum ad legentium cautelam necessarium duxi. Primus Si-
xtus IV. Papa anno 1483. edita Constitutione, *Grave nimis*, ana-

Tom. V.

A

thema

thema statim incurrendum indixit cuicumque praesumentem affirmare; eos, qui crederent, aut tenerent Dei Genitricem ab Originalis peccati macula, sua Conceptione praeservatam fuisse, propterea alicujus Haeresis labe pollutos fore, vel mortaliter peccare. Deinde Pontifex idem simili poenae ac censurae subiecit eos, qui ausi fuerint asserere, contrariam Opinionem tenentes, videlicet gloriosam Virginem Mariam cum Originali peccato fuisse conceptam, Haeresis crimen, vel peccatum incurere mortale, cum NONDUM sit a Romana Ecclesia, & Apostolica Sede decisum. Subinde sacrum Concilium Tridentinum Sessione V. Constitutionem Sixti confirmavit, inquit: *Declarat tamen haec ipsa Sancta Synodus, non esse suae intentionis, comprehendere in hoc Decreto, ubi de Peccato Originali agitur, Beatam & Immaculatam Virginem Mariam Dei Genitricem; sed observandas esse Constitutiones felicis recordationis Sixti Papae Quarti sub poenis in eis Constitutionibus contentis, quas innovat.* Praeunte potissimum Sancto Pio V. & Cardinali Pallavicino in Historia Concilii Tridentini novimus, ne tunc quidem definitum aliquid fuisse de celebri ista Quaestione, sed eam in illo statu relictam fuisse, in quo jacuit sub Sixto IV. Successit idem Sanctus Pius V. Pontifex Maximus, qui anno 1570. edita Constitutione *Super speculana*, ut cohiberet contentiones & scandala in Populo, quae hujus quaestionis occasione quotidie oriebantur, edixit, *Quatenus nemo cujuscumque ordinis, gradus, conditionis, vel dignitatis existat, in popularibus Concionibus, vel ubi promiscua virorum & mulierum multitudo convenire solet, de hujus controversiae alterutra parte disputare, rationibus, vel Doctorum auctoritate, asserendo propriam sententiam, & contrariam refellendo, aut impugnando, vel de hac ipsa quaestione, cujusvis pietatis aut necessitatis praetextu, vulgari sermone scribere vel dicere praesumat. Qui contra fecerit, Suspensionis poenam a divinis absque nova declaratione ipso facto incurrat &c.* Infra addit: *Ceterum QUAMDIU per Apostolicam Sedem altera pars definita non fuerit, oppositaeque sententia condemnata, liceat viris doctis, in publicis Academiae disputationibus &c. ubi scandali nulla subest occasio, de illa quaestione differere, & argumentis utramlibet partem vel asserere, vel impugnare; dum tamen neutra veluti erronea praedicetur, serventurque illa omnia, quae a dicto Sixto praedecessore nostro statuta sunt &c.* Praeterea perstringit ibi Sanctus Pontifex illos, qui, cum de gloriosae Virginis Mariae Conceptione sermo inciderit, tam pertinaciter pro alterutra parte contendunt, ac si de illis Dogmatibus esset, quae corde credere ad iustitiam, & ore confiteri ad salutem necessarium est. *Quibus*

bus illud Propbetæ convenire videtur: Dicunt, ait Dominus, cum ego non sum locusus; cum Sancta Romana Ecclesia omnium Ecclesiarum Magistra, & doctrinæ disciplinæ, de ea bucusque non definierit, nemo ABSQUE TEMERITATE praejudicare, vel alterius partis sententiam damnare potest; & quasi desint præclarissima Inventricis gratiæ (hoc est Virginis Deiparæ, quam hoc titulo Sanctus Bernardus, ac alii donant, utpote quæ invenit ineffabilem gratiam apud Deum, qualem nulla filiarum Adam unquam consequuta est, aut consequetur) merita, quæ nec Angelica quidem Lingua satis digne referri possunt; & cum (an potius quasi?) ex illo uberrimo fonte, pureoque aquarum viventium non (aut non hæc expungendum) possint saluberrimas haurire aquas, quibus Populus magna cum utilitate, atque dulcedine reficeretur: ad dissipatas cisternas occurrunt, stultas videlicet, & sine disciplina quæstiones, quæ generant lites, quas nec frequens multitudo intelligere, nec viri sapientes, qui capiunt, utiliter percipere valeant. Præsertim, quoniam, ut experimento didicimus, ipsorum Concionatorum, qui ad quæstiones huiusmodi proponendas facilius erumpere solent, maior numerus materiæ difficultatem prorsus Ignorantes, neque intelligentes, quæ loquuntur, aut de quibus affirmant, simplicium animos Indiscretæ Devotionis obtentu, vel potius loquacitatis & ostentationis affectu, ad tumultus & similitates concitant &c. Hæc Sanctus Pius V. cuius Constitutio in Bullario Romano legitur.

Verum quum rixæ nihilominus & scandala in dies graviora hæc de causa ferverent, Paulus V. Pontifex Maximus anno 1616. edita Constitutione Regis pacifici, tenorem Bullarum Sixti IV. & Pii V. referens, atque confirmans, poenis jam propositis addidit contra inobedientes privationem facultatis concionandi, publice legendi, seu docendi & interpretandi, & vocis activæ & passivæ in quibuscumque electionibus. At quia ne sic quidem serpenti morbo satis efficax medicina parata fuerat, Gregorius XV. Pontifex Maximus anno 1622. Decretum edidit, numero 29. in Bullario Romano, in quo perspectis scandalis, jurgiis, & dissensionibus, quæ manabant ex unicuique relicta libera facultate tenendi, atque etiam asserendi utramque partem; propterea volens huiusmodi scandalis ex debito sui muneris, providere, decrevit ac præcepit omnibus & singulis &c. ut in posterum, DONEC articulus huiusmodi a Sancta Sede Apostolica fuerit decisus, vel per Sanctitatem suam, & Sedem Apostolicam fuerit aliter ordinatum, non audeant in publicis concionibus, lectionibus, conclusionibus, & aliis quibuscumque actibus publicis asserere, quod eadem Beatissima Virgo fuerit.

concepta cum Peccato Originali. Contrafacientes autem eadem Sanctitas sua voluit & declaravit subiacere debere, & subiecit Censuris & poenis contentis in supradictis Constitutionibus suorum praedecessorum, & sua, ipso facto incurrendis. Per huiusmodi tamen provisionem Sanctitas sua non intendit reprobare alteram Opinionem, nec ei ullum prorsus praedictum inferre, eam relinquens in eisdem statu & terminis, in quibus de praesenti reperitur &c. Ulterius sub eisdem Censuris & poenis mandans, quod negantium Opinionem, videlicet quod non fuerit concepta cum Originali Peccato, in praedictis publicis actibus asserentes aliam Opinionem, non impugnent, nec de ea aliquo modo agant, vel tractent. Sed nulla favorabilior Constitutio pro sententia affirmante Deiparam immunem a Culpa Originali adferri potest, quam quae ab Alexandro VII. Pontifice Maximo anno 1661. promulgata fuit. Cujus exordium est: *Solicitudo omnium Ecclesiarum*. Ibi summus Pontifex haec habet: *Sane verus est Christi fidelium erga ejus Beatissimam Matrem Virginem Mariam Pietas, sensientium, ejus animam in primo instanti creationis, atque infusionis in corpus fuisse speciali Dei gratia & privilegio, intuitu meritorum Jesu Christi ejus Filii, humani generis Redemptoris, a macula Peccati Originalis praeservatam immunem: atque in hoc sensu ejus Conceptionis Festivitatem solemniter ritu colentium & celebrantium. Crevisque horum numerus, atque huiusmodi cultus, post editas a felicis recordationis Sixto Papa IV. praedecessore nostro in ejus commendationem Apostolicas Constitutiones, quas sacrum Concilium Tridentinum innovavit, atque observari mandavit. Aucla rursus & propagata fuit Pietas haec & cultus erga Deiparam, post erecta hoc nomine, approbantibus Romanis Pontificibus, Monasteria Religiosorum Ordinum, & Confraternitates, ac concessas ab iisdem Indulgentias, ita ut accedentibus quoque plerisque celebrioribus Academiis ad hanc sententiam, jam fere omnes Catholici eam complectantur. At quia non obstantibus Praedecessorum edictis, pergebant in Hispania aliqui contrariae illius Opinionis assertores tum privatim, tum publice praefatam sententiam aut impugnare, aut vellicare, & favorem a Romanis Pontificibus cultui & Festo secundum illam praesitum ita interpretari, ut frustrentur; immo Ecclesiam Romanam huic sententiae & cultui, juxta illam Beatae Virginis exhibito, favere negant: propterea Pontifex offensionibus, jurgiis, & scandalis, quae inde timebantur, obviare volens, subdit: Nos considerantes, quod Sancta Romana Ecclesia de intemeratae semper Virginis Mariae Conceptione Festum solemniter celebrat, ac speciale ac proprium super hoc Officium olim ordinavit juxta piam, devotam, & laudabi-*

adabilem institutionem, quae a Sixto IV. praedecessore nostro tunc emanavit; volentesque laudabili huic pietati, & devotioni, & Festo, ac cultui secundum illam exhibito in Ecclesia Romana &c. favere, nec non rueri Pietatem & Devotionem hanc colendi & celebrandi Beatissimam Virginem, praeveniente scilicet Spiritus Sancti gratia a Peccato Originali praeservatam &c. Decreta a Romanis Pontificibus praedecessoribus nostris, & praecipue a Sixto IV. Paulo V. & Gregorio XV. edita in favorem sententiae asserentis, animam Beatae Mariae Virginis in sui creatione, & in corpus infusione, Spiritus Sancti gratia donatam, & a Peccato Originali praeservatam fuisse, nec non in favorem Festi & cultus Conceptionis ejusdem Virginis Deiparae secundum PIAM ISTAM SENTENTIAM, ut praefertur, exhibiti innovamus, & sub Censuris & Poenis in eisdem Constitutionibus contentis observari mandamus. Et insuper omnes & singulos, qui praefatas Constitutiones & Decreta ita pergent interpretari, ut favores per illa dictae sententiae, & Festo, seu cultui secundum illam exhibito frustrentur, vel qui hanc eandem sententiam, Festum, vel cultum in disputationem revocare, aut contra ea quoquo modo, directe vel indirecte, aut quovis praetextu, etiam Desinibilitatis ejus examinandae, sive Sacram Scripturam, aut Sanctos Patres, sive Doctores glossandi, vel interpretandi, denique alio quovis praetextu, seu occasione, scripto, seu voce, loqui, concionari, tractare, disputare, contra eam quicquam determinando, aut asserendo, vel argumenta contra ea asserendo, & insoluta relinquendo, aut alio quovis execrabilis modo differendo, ausi fuerint; praeter poenas & Censuras in Constitutionibus Sixti IV. contentas, quibus illos subjiciendos volumus, & per praesentes subjicimus, etiam concionandi, publice legendi, seu docendi, & interpretandi facultate, ac voce activa & passiva in quibuscumque electionibus privatos esse volumus &c. Denique addit: Veranus autem, Sixti IV. Constitutionibus inhaerentes, quempiam asserere, quod propter hoc contrariam Opinionem tenentes, videlicet gloriosam Virginem Mariam cum Originali Peccato fuisse conceptam, Haeresis crimen, aut mortale peccatum incurrant, cum a Romana Ecclesia, & ab Apostolica Sede nondum fuerit hoc decisum, pro ut Nos nunc MINIME DECIDERE volumus aut intendimus. Quin potius contrariam illam Opinionem Haeresis, aut Peccati Mortalis, aut impietatis damnare audentes, praeter poenas, quibus eos subiecit Sixtus IV. alique praedecessores nostri Romani Pontifices, gravioribus aliis poenis subjicimus, quas in contrafacientes huic nostrae Constitutioni superius infliximus.

Haec fusius fortasse quam opus esset a me repetita hoc in loco videri

videri cuiquam possint. At ego illa cum sub meis, tum sub Lectorum oculis volui; nihil enim enixius cupio, quam ea, qua par est, veneratione omnia intacta servare in ejusmodi disputatione Romanorum Pontificum praecepta, eorumque menti ac imperio demisse me in omnibus conformare. Non ergo heic disputatio erit, fuerit ne concepta, an secus, sine labe Originali gloriosissima Dei Mater Maria. Una inter me, ac Parthenotimum controversia est ac erit, utrum amplectenti sententiam de Immunitate Virginis ab Originali peccato liceat Vovere ac jurare, se pro hujus sententiae patrocinio Sanguinem quoque & Vitam, quoties occasio ferat, daturum. Quaestionem hanc nemo Romanorum Pontificum attigit, liberumque propterea cuicumque futurum est in ejus examen ferri; immo utile, ac necessarium Christianae Reipublicae nemo non sentiat, ne forte sub specie Pietatis temere Christi fideles Vitae discrimen subeant. Quamobrem, uti jam fassus fueram in Libro de Ingeniorum Moderatione, iterum lubentissime fateor, sententiam patrocinantem Immaculatae Conceptioni Virginis non solum *Piam*, sed *summe Piam* in Ecclesia Dei esse. Rectissime faciunt, qui eam Populo in publicis Concionibus, aut editis Libris deprædicant, atque commendant. Neque adversus illam quoquomodo dimicare amplius licet, quanquam liceat aliter sentire in intimis cordibus. Parendum est Pontificibus, Christiani Populi Magistris, qui non aliam potiorem viam hactenus invenire ad avertendas similitates, & ad arcenda scandala, quae olim crebro inter Theologos Catholicos ob ejusmodi controversiam fluebant. Ab eorum Decretis ne latum quidem unguem discedere mihi quoque animus, ac firma voluntas est. Hoc unum ergo mihi propositum est, videlicet ostendere, ab iis Decretis reapse deflexisse ac desectere, qui pro Sanguinario Voto, aut olim, aut nunc propugnant; quippe abutentes silentio, contrariae parti indicto, licere fortasse sibi putant quidquid volunt, quasi Romani Pontifices, dum pia sententiae favent, licentiam quoque tribuerint quidlibet superaddendi, neminique futurum fas sit contra haec superaddita hiscere, vel quum a veritate & rectitudine doctrinae Catholicae aberrare creduntur. Exemplum dabo, quod postea fusius infra recurrit. Theologis quibusdam parum visum fuit docere, Virginem Sanctissimam ab Originali Culpa, singulari inter filios Adam privilegio, praeservatam fuisse, quod sane laudandum est: illam etiam a Debito ejusdem Culpaë immunem fuisse contenderunt, quod hanc sententiam gloriosiore Virgini censerent. At gravior, meliorque Theologorum chorus adversus Opinionem istam incaluit,

HOR.

nonnulli gravi etiam nota inusserunt. Ita superadditum est sententiae de Immaculata Virginis Conceptione Votum de ipsa tuenda, vel Sanguine effuso, quod hisce verbis ego antea indicaram Libro Secundo, Capite Sexto, de Ingeniorum Moderatione. *Satis quibusdam non fuit, calamo & rationibus Immaculatam Deiparae Conceptionem tueri: quod procul dubio cum vera Pietate consonat. Nescio quid etiam illustrius invenisse sibi sunt visi, quo suum in Virginem testarentur obsequium. Sacramento videlicet se se obstrinxerunt, atque voverunt, se pro huiusmodi Opinione tuenda Sanguinem, & Vitam daturos, quociens occasio posceret.*

Heic mihi se obvium e vestigio facit Pathenotimus pag. 10. scribens, non legi in *Academiarum formulis, quas fere omnes refert Læsius de Conceptione a §. 1412. particulam illam Usque ad Sanguinem.* Egregie sane. Multas ego illi gratias habeo, quod minime rogatus, rem factus sit peropportunam ad controversiam hanc dirimendam; idque Lectores animadvertant velim diligentissime, neque excidere e memoria sinant. Si Academiae, in quibus Theologorum, ac Litteratorum hominum potior pars numerari solet, a Voto Sanguinario abstinuerit, legitime inde argumentari licet, non alia de causa ab eo abhorruisse doctissimos illos viros, nisi quod illius deformitatem ac temeritatem probe sentirent. Quin devotione erga Virginem excellant omnes ii Sapientum coetus, nemo neget, nemo sibi non persuadeat. Attamen voverunt ii quidem se tutaturos piam sententiam. Dum autem Sanguine testari illam fugerunt, jam satis indicarunt, ultra germanae Pietatis metas sibi videri, Vitam quoque velle pro illa ponere. Proinde vel ex hoc ipso intelligat Lector, me in acie non stare contra Opinionem per Catholicorum Regna & Academias placide exceptam, sed contra paucorum persuasionem, cui si forte adverteretur Catholicae Ecclesiae doctrina, obsistendum est, ne morbus propagetur. Quod autem Parthenotimus de tot Academiis liberalissime confessus est, ne ipsum, rogo, pigeat idem perpendere in tot celeberrimi & Sanctissimi Instituti sui Sociis per Italiam, Galliam, Hispaniam, & Germaniam diffusis. Non is, ut reor, credat, aut distitet, tot viros doctissimos (ut alios aliorum Ordinum Theologos summe pios praeteream) Pietate erga Deiparam paucis Siculis suis concedere. Tuentur & illi concordi studio sententiam Immaculae Conceptioni Virginis faventem, & quantum possunt Devotionem erga ipsam Dei Matrem tum in se, tum in aliis alunt & augent. Cur vero non & ii *Magnanimum Votum* emittunt, quo glorioso nomine suum Votum Siculus Theologus exornat? Ita me Deus amet, non quod minori affectu

festu in Mariam Sanctissimam ferantur, sed quod majori cura sanctorum doctrinam scrutentur, ejusque Voti minime sibi ignoti confectaria perversa agnoscant, & abominentur. Addit Parthenotimus, non deesse, qui Votum de Vita danda concipiant; Equites enim de Calatrava hoc pacto vovent. *In qua CERTISSIMA VERITATE tuenda ad honorem tantae Virginis usque ad Mortem decertabimus.* Ita Equites Sancti Jacobi Votum edunt *Descendendi hanc VERITATEM non solum intra privatos nostros parietes, sed etiam publicis animo & ore, Vita & Morte, juxta uniuscujusque sexum & conditionem.* Haec ille, e certis, ut puto, monumentis deprompta adfert. Auctor Hitor. Controversi. Conception. nullam de Sanguine effundendo ab iis Equitibus mentionem habet, & fortasse verba illa *Vita & Morte* tantum significant *in vita & in Morte*. Praeterea die 16. Novembris anno 1624. ut constat e Lib. 1. Cap. 8. Libri, cui titulus *Palermo Divoto*, Auctore Canonico Antonio Mongitore, Viro ex aliis etiam Libris notissimo, *Illustrissimus Senatus Panormitanus Immaculatam Conceptionem vel ipso Sanguine defensurus, ejusque privilegium jejunio celebrandum suscepit.* Neque segnius, addit Parthenotimus, *hanc animi constantiam professsa est pietas Capituli Primariae Metropolitanae Ecclesiae Panormitanae anno 1698. in haec verba vovendo Ac etiam si opus fuerit, usque ad Sanguinis & Animae effusionem, Dei gratia cooperante, defensuros spondemus.* Praeterea pergit Parthenotimus: usque ad Sanguinis effusionem, post emissam professionem Fidei, vovent, jurantque, quosquos in Canonicorum ejusdem Metropolitanae Ecclesiae numerum referuntur. An ita se res habeat, videat nobile illud Canonico-rum Collegium. Equidem apud praelaudatum Mongitorem hoc unum reperio additum Formulae Fidei apud eos & reliquos consuetae. *Insuper ego idem N. sponte profiteor, & affirmo, Beatissimam Virginem Mariam Dei Genitricem absque Originalis peccati macula in primo instanti concepam. Et hanc VERITATEM me non modo nunquam impugnaturum sed in privatis etiam colloquiis, & publice, dum spirabo, opportune docturum esse & propugnaturum, juxta Decreta Summorum Pontificum jam edita, aut deinceps edenda.* Denique subdit Parthenotimus. *Ad Sanguinem usque, vel ipso Sanguine, se primaeum Virginis candorem millies defensuros promiserunt Episcopus Cephaleranus, Siciliae Regni Praefes; Dominus Franciscus Gisulfo, & post ipsum Frater Dominus Martinus de Rbedin Siciliae Prorex.* Expectabam ego gravissimorum Theologorum nimbum, qui suo calculo, ac professione, Sanguinarium Votum probassent, suaque auctoritate me ac ceteros ab eo alie-

alienos absterrent. At videant reſſi rerum aſtimatores, quibus Theologis, quibus exemplis nitatur Votum tanti ponderis, quale eſt profundandae Vitae. Immo quando Equaeſtris Ordinis Viri heic memorantur, qui ſeſe huiusmodi Voto obligant, agiturque de militariſus viris, inquirendum foret, num ita vovendo eorum animus ſit tolerandae duntaxat mortis pro pia ſententia, an etiam inferendae aliis, & in arma ruendi, ſi quis contra ſentiret. Poſtremum enim hoc quantopere a recta ratione abſonum foret, nemo monitore me indiget, ut illico perſpiciat. Interea mihi rogandus eſt Siculus Theologus, ut edicat, quare Joanettinus Doria S. R. E. Cardinalis, Archiepiſcopus Panormitanus, & Prorex Siciliae, anno 1624. & Dux de Infantado Siciliae Prorex anno 1655. & Martinus de Leon, & Cardenas Archiepiſcopus Panormitanus, & Dux de Offuna anno 1656. & Dux de Alcala anno 1701. & Franciſcus de Judice S. R. E. Cardinalis anno 1702. & Marchio de Bedmar anno 1705. & Dux Sexti anno 1707. Siciliae Proreges, quum Votum tuendae Scotiſticae Sententiae nuncuparunt, quod eorum verbis conceptum reſert ante memoratus Mongitor, nullam de fundendo Sanguine pro illa mentionem fecerint. E Pieratis tepore ſi quiſquam reponat, vix credendum. Veriſimilius eſt, ab eo illos abſtinuiſſe, quod paucorum praedeceſſorum neque exemplis, neque Opinione moverentur. Unum proinde illi praefſtitere Votum de tuenda ſententia: quod & Academiae praefſtant; at Sanguinem pro Fidei duntaxat articulis, ſi oporteret, fundendum ſervarunt.

Duplex ergo Votum concipi poteſt pro tutela Immaculae Conceptionis Mariae: alterum tenendi ac defendendi ſententiam illi faventem, neque contrariam amplectendi aut docendi; alterum impendendae etiam Vitae in huius ipſius ſententiae patrocinium. Audi nunc Parthenotimum numero X. Hanc, ait, *Votorum diſtinctionem Laminus omiſit. Ejusmodi omiſſio muneri Moderatoris Ingeniorum neſcio an congruere poſſis.* At hinc mature diſcere Lector poterit, an rectum e Theologo noſtro ſit ſperandum iudicium, quando in ipſius quaestionis veſtibus caecutientem ſe prodit. Haec mea prima verba Libro II. Cap. VI. de Ingenior. Moderation. quae repetere juvat, atque opus eſt. *Satis quibusdam non fuit, calamo & rationibus Immaculatam Deiparae Conceptionem tueri: procul dubio cum vera pietate conſonat. Neſcio quid etiam illuſtrius inveniriſſe ſibi ſunt viſi, quo ſuum in Virginem reſtarentur obſequium: Sacramento videlicet ſe ſe obſtrinxerunt, atque voverunt, ſe pro huiusmodi Opinione tuenda Sanguinem & Vitam daturus, quoties occaſio poſceret. Novitium certe Martyrum genus.* &c.

Tom. V.

B

Quid


Quid est ergo quod Parthenotimus ait, me non *distinguere*, me *non explicare mentem meam*, an *pium sit defendendae Virgineae Immunitatis Forum extra mortis periculum*? Si calamo & rationibus tuentes Immaculatam Virginis Conceptionem laudo; si unice verba mea feruntur in illos, qui *Sanguinem* se daturos pro eadem Sententia pollicentur, quis continuo non perspiciat, mihi primum Votum minime improbari, alterum vero neque mihi, neque aliis probandum credi? At morem geramus homini quaerenti nodum in scirpo. Itaque dico, Prudenter agere, qui voce & scriptis propugnatorios se vovent sententiam eximentem a Peccato Originali Deiparam; Prudentius agere, qui eandem sententiam tumentur, sed Voto omisso; Prudentissime denique agere Academias, si pacis causa tutelae ejusdem sententiae Votum adjungunt. Primi commendandi, quod Piae, atque admodum Probabili Opinioni studium suum addicunt, in cujus Probabilitate asserenda non falluntur. Secundi, ut reor, Prudentiores, quod eandem protegentes sententiam, libertatem ingenii sibi servant, quam multis aut imperium Principum, aut aliae humanae causae ademerunt. Videlicet nescii, quo inclinaturum aliquando sit judicium definitivum Apostolicae Sedis, & Veritatis super omnia cupidi, quam post acrius & sincerius studium deprehendere aliquando possent in opposita sententia, Probabili & ipsa, nolunt ita sese obligare ad patrociniū unius Opinionis, ut integrum sibi non sit, infirmioribus perspectis rationibus in contrariam (quod faciunt meliora edocti Sapientes) desistere. Demum laudanda maxime Academiarum Prudentia, quod ad Scotisticam sententiam amplectendam ac profitendam sese obstrinxerint, ut ita e Scholis removerentur jurgia & scandala, olim e conspectu utriusque Opinionis progenita: quae causa etiam Romanae Sedis prudentiam adduxit olim ad eripiendam vocem Thomisticae Sententiae, eamque uni relinquendam Scotisticae. Haec autem nil rei habent cum *Voto Sanguinario*, quod unum & Lamindo Pritanio, & praesenti Opusculo argumentum scribendi praebeuit.

Ceterum majoris eruditionis copiam optassem in Theologo Siculo, dum tanquam certum propinat Lectoribus suis, Academiam Parisiensem anno 1346. tam tenaciter triumphis ac sententiae Joannis Duns Scoti Doctoris subtilissimi adhaesisse, ut sese *Voto ac Sacramento* obstrinxerit, ad eam in posterum tuendam, atque docendam. *Academiam*, inquit, *vovisse, ferunt antiquae tabulae, quas integras refert Raynaudus Tom. VIII. pag. 280. anno 1346.* Atqui in Decreto, quod idem Raynaudus adfert, disertis verbis scriptum est, *quaestionem hanc*
paucos

paucos post annos in sacro Basileensi Plenario Concilio agitatam fuisse. Qui ergo ad annum 1346. aut 1396. spectare potuit Facultatis Parisiensis Decretum? Errorem hunc etiam erravit Wadingus in Annalibus Minorum, quem propterea falsi postulavit Natalis Alexander, ejusdem Facultatis Doctor in Histor. Ecclesiastic. Tom. VII. pag. 150. ubi ostendit, anno duntaxat 1497. Academiam Parisiensem primum imperasse alumnis suis Juramentum de tuenda sententia Immaculatae Conceptionis; neque solidis fundamentis niti decantatam illam disputationem ac triumphum Joannis Scoti, qui etiam non ea, quam Vulgus credit, confidentia sententiam suam proposuit, ac tutatus est, sed eximia moderatione, scribens: *Si auctoritati Ecclesiae, vel auctoritati Scripturae non repugnet, videtur Probabile, quod excellentius est attribueri Mariae.* Paria habet Du-Pinius Doctor & ipse ejusdem Facultatis, in Biblioth. Scriptor. Ecclesiastic. Tom. XI. ubi de Joanne Scoto loquitur.

C A P U T II.

Pietatis nomine propugnatum frustra a Parthenotimo Votum Sanguinarium. Vera Pietas cum ceteris Virtutibus jungenda. Inter Defectum & Excessum posita. Vitii utriusque exempla.

NICUM ergo Votum de Sanguine fundendo pro tutela sententiae statuentis Virginem sine labe conceptam, hisce ego verbis aggressus fueram Lib. II. Cap. VI. de Ingenior. Moderatione: *Novitium certe Martyrum genus, quod nusquam Majores nostri somniarunt, nunquam posteris nostri, si quidquam sapiunt, probent. Neque Evangelium; neque ratio recta nos docent, adeo levibus de causis animam prodigere. Non pro Opinionibus nostris, sed pro divinitus revelatis, legibusque sanctissimis, profundendus est Sanguis. Hominum enim Opiniones tam falsum quam verum complecti possunt, & hominis parum prudentis est pro incerta Opinione (quae falsa esse potest, & certe necessario defendenda non est) ultro jugulum offerre carnifici. Ad ista respondet Parthenotimus pag. 18. Quis unquam somniavit, pro incerta Opinione fas esse jugulum offerre Carnifici? At mori pro Pietate, quae certo inest Actui Opinativo, ut se morituros spondent pie voventes, & Majores nostri*

nostri docuere, & Posteris nostri, dummodo dociles, discant. Infra addit. Non Martyr esset pie vovens, quia assentitur Immaculae Beatae Virginis Conceptioni, nec pro ejusdem directa Certitudine, quae nondum est de Fide, mortem oppeteret: sed pro defensione Sanctitatis Marianae, quae Virtutem Religionis sapit: & haec est illa Veritas, pro qua moreretur. Subdit etiam. Virtutis opus est, Virginem ut a labe immunem venerari, quia pium est, ipso satente Pristano. Virtutis opus est, vovere actum Virtutis, & Votum servare. Vovete & reddite. Quid ergo impedimento esse potest, ut pro his Virtutis actibus mortem quis subeat, & MARTYR nuncupetur? Vel ipse Pristianus non negat, pro legibus sanctissimis fundendum esse Sanguinem. Numquid inter leges sanctissimas non est, Virginem venerari? Virginem venerari ut Sanctam? & exequi Deo promissam venerationem erga ejus Matrem? Haec Parthenotimus. Grandia hercle nomina, & quae mentem oculosque feriunt Lectorum. Mori pro defensione Sanctitatis Marianae: mori pro Pietate: mori pro Virtutis actibus; nemo istis neget gloriosum Martyris nomen. Ita Parthenotimus edicit. Qui leviter doctrinis Theologicis imbutus est, immo & qui iis operam diutissime dedit, nisi consistat, nisi haec singula meditatione intenta perpendat, minime intelliget, quam tenebrosa, quam inania sint ista: fortassis etiam, quamquam ab hisce novis Martyribus admittendis interna se sentiat formidine absterri, dubitare tamen primum incipiet, an excipiendi potius sint, quam repellendi. Curabo ego, quantum meae vires ferent, ut nemini fucum faciant merae voces; & an jure ad quaestionem nostram dirimendam magnifica haec verba adhibeantur, ut spero, ostendam.

Et primo *Pietatis* nobilissimum nomen, quando illud in hanc rem Parthenotimus usurpavit, ne ego quidem refugio; atque illud accipio pro Virtute docente ac reddente cultum debitum Deo, nostro omnium parenti, ejusque beatis Servis. Nam et si cum cultum praescribere, atque exercere spectet ad Virtutem Religionis, teste tamen Sancto Thoma (post Sanctum Augustinum) 2. 2. Quaestio. 101. Artic. 3. *Pietas*, magistra cultus debiti parentibus & patriae, transferatur excellentius ad Deum, quia Deus excellenter dicitur Pater noster. Promiscue ergo liceat heic mihi nominibus Religionis & Pietatis uti; sed ita ut praecipue Pietatis vocabulo significare velim eam devoti ac bene affecti animi propensionem, quam vulgaris Lingua appellat *Devotione*. Animadvertendum autem est, *Pietatem*, reliquarum Virtutum more, in medio consistere debere; quippe circum obfident illam quoque duo extrema vitiosa, nimirum *Defectus* & *Excessus*. Ad haec, ut Pie-

ut Pietas dicenda sit germana Catholici hominis Virtus, necesse est, ut cum *Veritate*, cum ceteris *Virtutibus*, cum *Praeceptis Dei* & *Ecclesiae*, arctissimum foedus ineat, uno verbo, cum doctrina, quam Catholica Romana Ecclesia, errandi nescia, tradit. Necesse vero super omnia est, ut eam *Prudentia* ducat, omnium Virtutum futura comes. Si ex his aliquid desideretur, grandibus quidem buccis nonnulli *Pietatem* sonabunt, suisque Ritibus aut Opinionibus sanctum hoc nomen obtendent; & nihil minus quam Pietas vera ac laudanda in iis occurreret. Nam datur etiam *Pietas falsa*, *Pietas imprudens*, *Pietas superficialis*, & non solida; & quae interdum *Pietas* creditur, *Error* est, *Temeritas* est, *Superstitio* est, *Fanaticismus* ac *Deliramentum* est, sub specie videlicet Pietatis pestis aliqua in Mundum inuenta. Haec autem monstra modo ex Ignorantia ac simplicitate nimia prodeunt, modo ex aestu ultra fines exuberante Ingenii, sive Devotionis. Utrumque sane extremum solcite cavendum vitandumque homini Christiano. Praestabit tamen exemplo aliquo meliori in lumine collocare materiam, alioquin utilissimam, atque ampliorem, quam primo aspectu videatur, & dignam prae multis aliis, quae iusto aliquo Tractatu exhauriatur.

Devotus erga *Christum Dominum* animi affectus, ejusque Amor, ac in illum spes, & ad eum preces, quanti sint ponderis, neque utilitatis tantum, sed & necessitatis homini ad coelestia, atque ad perennem in ejus Regno vitam adspiranti, vel tirones Catholicae Religionis norunt. Atque utinam nos, ac totus exardesceret Orbis *Amore Jesu*. Ipse via nobis ad Coelum, ipse propitiatio pro peccatis nostris: per ipsum nobis datur quidquid in Regno Dei habemus, quidquid speramus; & sine ipso nihil boni salutaris, nihil salutis. Quamobrem, qui in hujus amore proficit, praecipuo Christianae Religionis officio fungitur, & per tramitem rectum, ad divina ac sublimia contendit. Ac propterea in paucorum mentem suspicio subeat, posse cum hoc beatissimo ac necessario Amore, & cum tanto Pietatis dogmate commisceri aliquem ex Defectu errorem. Attamen & hic error occurrere potest (atque utinam inter possibilia tantum numeretur) non quod satis amari, satis coli, satis exorari a nobis possit divinus iste Redemptor, sed quod solus a nonnullis ametur interdum atque invocetur. Profecto rarum inter Catholicos invenies, qui Deum Unum & in personis Trinum non fateatur, seque ejus sacro nomine saepe non signet, & *Gloria Patri* &c. quotidie etiam non recitet; haec enim ab ineunte aetate aut a parentibus, aut in Catechismi schola didicere. Verum
sive

sive quod excelsum divinae Trinitatis Mysterium pueri nihil intelligentes ebiberint, & doctrinam hancce ad majores annos deducti nunquam amplius explicari audiant; sive quod unum Christum in Eucharistia, sacrisque Imaginibus passim spectent, Deum vero invisibilem excogitare, aut retinere nesciat; sive etiam quod interdum audiant nonnullos ex iis, qui sacra tradunt, in Concionibus, aut in Poenitentiae foro unum fere semper alloqui Christum, & ab eo culparum veniam, & beneficia petere: fieri potest, ut rudis minervae homines, aut sagaces etiam in Seculi rebus, sed incuriosi in divinis, etsi millies quoque Deum aut memorent, aut ab animarum Pastoribus memorari audiant, sub hoc tamen nomine Christum tantummodo concipiant, & de ipso uno omnia dici arbitrentur. Consequenter etiam fieri potest, ut aliqui unam tantummodo adorent ineffabilis Triadis personam, ad illam unam amore ac precibus ferantur, neque unquam cogitent de ejus divino Patre, & Spiritu Sancto, hoc est de Trinitate necessario nobis credenda, atque adoranda. At quis non intelligat, quam informis & manca, atque aliena a principiis Christianae Religionis esset ejusmodi Pietas? Si de salute aeterna hominis Theologi dubitant, aut actum putant, cujus Fides aperte integram Triadem non amplectitur: quid de eo dicendum, qui non integram etiam veneraretur & amaret? qui Filium Dei, consubstantialem quidem, ejusdemque naturae cum Patre & Spiritu Sancto, adoraret, aeternum vero illius Patrem, divinitatis principium, & omnium conditorem & rectorem, minime agnosceret, aut nunquam recogitaret, nunquam coleret, nunquam invocaret? *Haec est vita aeterna* (inquit de patre suo ipse Dominus, Joannis Cap. XVII. vers. 3.) *ut cognoscant te solum Deum verum, & quem misisti Jesum Christum.* Atque in hunc finem potissimum Filius Dei missus est, ut Patrem suum clarificaret, atque ut Mysterio sacrae Triadis aperto, humanum genus excitaretur ad agnitionem, amorem, & adorationem non Geniti tantum, sed & Ingeniti, & Procedentis. Proinde rite faciunt, qui tum suo exemplo, tum praedicatione ita Populum ad amorem sanctissimum Domini nostri Jesu Christi veri Dei, verique Hominis, sollicitant, atque accendunt, ut simul doceant, quam impense amandus quoque & invocandus sit illius ineffabilis Pater; ne Christianus, dum unum curat, sibi desit in altero praecipuo sanctae Religionis nostrae officio. Depraedicanda quoque indefinenter spes in divinum Mediatorem Dei & hominum Christum Jesum, a quo omnia, per quem omnia, in quo omnia. Sed ea cautela, ut Populus sibi nunquam persuadeat, ignorari ac negligi posse amo-

amorem, spem, & confugium ad coelestem ejus Patrem, ad quem nos eruditura pleraque suas orationes Ecclesia convertit, adjecta in fine efficacissima clausula illa, se petere ac sperare quae petit *Per Dominum nostrum Jesum Christum*; & ad quem ipse divinus Magister noster nos docuit dirigendam esse caelestem illam, ac omnium sanctissimam Orationem *Pater Noster* &c. Solemni hoc ritu edocti intelligimus, fundendas saepissime esse preces ad immaculatum illum Agnum, qui peccata Mundi tollit, ac praecipue quum ad ejus Mensam venerabundi accedimus. Sed simul saepissime etiam genua esse flectenda, ac preces deducendas ad Patrem Domini nostri Jesu Christi, patrem misericordiarum, qui amore unigeniti & consubstantialis Filii sui, hominis pro nobis facti, nos adoptavit in sortem filiorum Dei, illiusque meritis gratiam omnem in nos est effusus. Saepissime etiam adorandum atque invocandum omnipotentem Deum, quo nomine tres beatissimae Triadis personas intelligimus. Heic neminem e doctis peccare in Pietatem ex Defectu puto; at potest Populus non satis eruditus.

Contra, obnoxia quoque Excessibus est ipsa *Pietas*, nisi doctissimam Ecclesiae Catholicae diligenter vestiget, & prae oculis habeat. Dogma Catholicum est, justum & laudabilem esse honorem Sanctis exhibitum, & quum fert occasio, cultum eis impendere jubemur, & negare crimen foret; cultum, inquam, Dulciae Beatis illis Dei Servis, & Hyperdulciae sanctissimae Virgini parenti Salvatoris nostri. Eorum quoque pro nobis implorare opem ac intercessionem apud Deum, & *bonum*, & *utile* est, ut decrevit sacrosancta Synodus Tridentina. Quapropter laudanda Devotio & Pietas erga illos, suadenda quoque omnibus eorum invocatio; nam si vel piorum viventium precibus nos commendare & licet & prodest; quanto plus licebit ac proderit praesidium apud Deum petere ab iis, qui ad illius aulam jam adsciti, ejus gratia ac beneficentia mirum in modum fruuntur, & quam Caritatem in terris coluerunt, longe uberius in coelis exercent? Maxime vero & amore & veneratione digna beatissima Redemptoris nostri Mater, quam *gratia* novimus *plenam*, & cui *magna fecit Qui Potens est*, ut divina Scriptura testatur. Mater Dei est: quale majus elogium proferas? & in amanda & honoranda illa quis e Christi Fidelibus non certet? Eam quoque orare filiali affectu, ut pro nobis Deum exoret, utilissimum & decentissimum est, quum plura per ejus intercessionem ac merita, Filii sui meritis conjuncta, nobis beneficia a Deo speranda sint, quam reliquorum Sanctorum precibus. Anathema sit cuicumque, Devotionem ac Pietatem veram erga Deiparam & Sanctos improbanti sive minuenti. Ve-

ti. Veram dixi; potest enim & haec ipsa Devotio erga illam ceteroque Sanctos excedere fines ab Ecclesia statutos, & in Superstitionem etiam dilabi. Ea de causa *Honor Reginae judicium diligit*, ajebar Sanctus Bernardus Epistola 174. significaturus judicio utendum esse ac modo vel in ipsa Virgine honoranda; & celebratum illud antiquorum *Ne Quid Nimis*, locum in ejus quoque cultu esse habiturum. Certe Bernardum in honore ac amore Virginis sanctissimae frigidum ac se-gnem nemo appellabit. Atque huc respiciens Theophylus Raynaudus vir doctissimus (Diptych. Marian. Caut. 2.) in nonnullis damnavit aliquem *Deiparae amorem intemperatum, ac minime probandum*. Subdit; *Hanc erga Sanctos intemperantiam amoris & honoris, vigere maxime erga Deiparam in iis, qui illam non secundum Scientiam diligunt & colunt*. Quam sententiam atque censuram ille confirmat auctoritate Petri Cellensis, Sanctorum Anselmi, Bernardi, Epiphani, ac aliorum, quorum verba repetere in praesentia nihil attinet. Itaque cum Ecclesia dicimus, colendos esse Sanctos, potissimum vero peculiari honore & amore prosequendam Deiparam, singulari Dei privilegio supra reliquos Sanctos, & supra Angelos ipsos exaltatam tum dignitate tum sanctitate. Sed & ipsa Ecclesia cavendum docet, ne huc se ingerat error, sive ex ignorantia, sive ex intemperanti Devotionis ardore, sive e novitatis desiderio, ne alias peiores causas commemorem. Si quis enim sibi, aut aliis, exempli causa, persuaderet, devotionem solum erga Sanctum aliquem, ac praecipue erga Christi Matrem, tanti futuram vigoris, ut de evitanda subitanea morte, aut morte in peccatis, aut de Infernis poenis minime subeundis, firmam, cautionem praebeat: errabit profecto, & ultra limites Pietas temeraria excurret. Gravius etiam a vera Pietate desisteret, si hanc fiduciam in superficiali quadam devotione constitueret, qualis esset diurna aliquot precum recitatio, labiis tantum perfoluta, dum interim in flagitiis vivit, certamque nihilo fecius sibi sponderet in coelis sedem. Errabit etiam, quotiescunque honores, Deo debitos, improvide Sanctis, ipsique Deiparae impendat; errabit, qui nulla posse nisi per eos, & in primis per Virginem Sanctissimam impetrari a Deo beneficia doceat, aut credat; errabit, qui laudibus immodicis Sanctos oneret, eosque Deo pares facere videatur. Plura alia praetereo. At haec improbat, haec damnat Catholica Ecclesia. Habemus, quid illa statuerit de Sanctorum Invocatione. Ad hanc normam exigenda nostra devotio, & in vocatio, & laudes eorum; neque sinendum, ut affectus pius exorbitet, aut opiniones ab ea discordes invehantur, sive *nurriantur*. Certe

sacrum

sacrum Tridentinum Concilium Sessione XXV. postquam mandavit, ut Fideles diligenter instruantur *de Sanctorum intercessione, invocatione, Reliquiarum honore, & legitimo Imaginum usu*, quorum omnium germanam proponit atque explicat doctrinam, haec subdit: *In hac autem sanctas & salutare observationes si qui abusus irrepererint, eos prorsus aboleri Sancta Synodus vehementer cupit, ita ut nullae falsi dogmatis imagines, & rudibus periculosi erroris occasionem praebentes, statuatur.* Haec regula Fidei, expressa e divinis Scripturis, & Traditione Patrum; atque huc si recentiores Haeretici sincera voluntate oculos converterent, a tot calumniis temperarent, quibus in Catholicorum Ecclesiam utuntur, non alia de causa, quam quod interdum deprehendant aut in rudi popello, aut in parum castigatis nonnullorum Libris, quasdam Pietatis anomalias & excessus, quos plenis buccis crepant, in concionibus aut Libris editis, ludicrum ex his genti suae spectaculum facientes. Quo in genere impiae ac ridendae eruditionis excelluit nostris temporibus Missionius quidam Calvini Scriptor, dum iter per Italiam a se susceptum descripsit, ne quid dicam de nupero falsae Reformationis Apologista Jacobo Picenino, sive quisquis sit ille impius Catholicae Ecclesiae hostis & accusator. Plumbea haec tela sunt; nosse quippe & fateri coguntur vel ipsi Heterodoxi, non e privatorum ritibus ac opinionibus, sed ex ipsa Ecclesiae doctrina, in Conciliis potissimum & Catechismis firmata, deducendum esse, quid eadem Ecclesia tradat, ac sentiat. Nemo tamen e nostris neget, quin cederet in singularem Ecclesiae utilitatem, si universam hanc aeruginem deterfam e regionibus nostris cerneremus; semperque optandum esse, ut docti ea haec severitate & circumspectione utantur, quam praeaudata sacra Synodus exigit, ne ulla falsi dogmatis, ullave Superstitionis & periculosi erroris occasio rudibus praebeatur.

Fuit mihi olim amica contentio cum Viro non minus Pietate quam Doctrina spectatissimo. Laudabam ego in illo animum effusum in obsequium & affectum erga Deiparam. Quis enim in Ecclesia Catholica non laudet & amet colentem & amantem illam, cujus encomium Angelus in Evangelio contexere coepit, & quam Sancti Patres ornare laudibus non cessant? Ejus cultus, amor, & honor, ad Fidem Catholicam spectat. Verum minime, mihi in illo probabatur, ita extollere Devotionem erga Mariam, ut sine ista speranda salus aeterna non foret, & cum ista Coelum e manibus Fidelium elabi nequiret. Asserebat ille in hanc rem Sancti Anselmi verba: *Sicut, o Beatissima Virgo, omnis a te aversus, & a te despectus, necesse est, ut intreat.*

Tom. V.

C

ita

ita omnis ad se conversus, & a se respectus, impossibile est, ut integrent. Similia sunt & alia ejusdem Sancti verba e Libro de quatuor Virtutibus Beatae Mariae deprompta: *Impossibile est, ut aliquis homo ad eam conversus, & ab ea respectus damnetur.* A Sancto quoque Augustino (ita ille addebat) eadem Beatissima Virgo in Sermone XVIII. de Sanctis appellatur *Spes unica peccatorum.* Ac de ipsa dicitur Eccli. XXIV. vers. 31. *Qui elucidant me, vitam aeternam habebunt;* & alia, quae commemorare superfluum foret. Quibus ex verbis ultra quam par esset, ut mihi videbatur, auditoribus suis fiduciam Regni coelestis adipiscendi faciebat, dum ejusmodi devotioni ac laudibus Virginis quisque insisteret. Contra ego aiebam, componenda haec esse cum vera sanctissimae Ecclesiae nostrae doctrina, atque ita explicanda, ut adversus eam nulla ex parte pugnent. Non ignorasse Sanctum Anselmum, quae hac de re sententia Ecclesiae foret, neque censendum ab ea discedere voluisse. Si quid crudum nimiumque exciderit Sanctis viris, sive devotionis fervore, sive Oratoria licentia in laudandis Sanctis, emolliendum esse ad canonem Orthodoxae doctrinae, & nihil verbis iis insitendum, sed eorum intentioni, ut scite monuit Cardinalis Bellarminus Lib. I. de Sanct. Beatit. Cap. XVII. aliique Theologi Polemici. Neque omnes Sanctos in Sanctorum Patrum coetum esse inferendos; & quamquam eum honorem Sancto Anselmo deferre malimus, illius tamen verba sano illo sensu accipienda & explicanda esse, quem supralaudatus Theophylus Raynaudus, haec ipsa Anselmi, aliorumque similia loca expendens, sapienter, & secundum Ecclesiae mentem iis tribuit in Diptych. Marian. Punct. x. num. 37. pag. 237. Quod est ad Sancti Augustini locum, etsi prodesse multum nobis possit apud Deum patrocinium Sanctorum, ac praesertim Deiparae: Fidei tamen dogma esse, praecipuum & maximum Christianae Spei fundamentum in misericordia & clementia Dei, ac in meritis divini Redemptoris nostri esse collocandum; usque adeo ut quidquid ii nobis impetrant a Deo, impetrent per Christum Dominum nostrum. *πᾶσα γὰρ ἡμῶν ἐλπίς ἐν Χριστῷ:* omnis namque spes nostra sita est in Christo, aiebat Sanctus Cyrillus Alexandrinus in Concilio Ephesino Cap. V. pag. 313. Editionis Labbeanæ; atque ad Fidei Dogma spectat appellare *Jesus Christum Spem nostram*, uti jamdiu Apostolus in 1. ad Tim. 1. 1. ipsum appellavit. Haec doctrina Catholicae Ecclesiae, cujus verba sunt in Concilio Tridentino Session. XIV. Cap. VIII. *Omnis gloriatio nostra in Christo est, in quo vivimus, in quo meremur, in quo satisfacimus, facientes fructus dignos poenitentiae, qui ex illo*
vint

vim habent, ab illo offeruntur Patri, & per illum acceptantur a Patre. Quare illud de Maria dictum *Spes Unica Peccatorum*, si cum rigore acciperetur, sententiam completeretur a Fide omnino absouam, quippe quae in injuriam divini ipsius Mediatoris eviderenter vergeret. Ad haec minime tribuendus est, uti neque a doctis Viris tribuitur, Sancto Augustino Sermo ille, uti ex editione Patrum Benedictinorum constat. Denique illud ipsum verbum *Unica* mitiori illic significatione accipiendum, ut non *Unum* seu *Solum* significet, sed ut *Grande*. Suis nimirum precibus Deipara Virgo prae omnibus aliis Sanctis spem nobis uberiolem facit veniae a Deo per Jesum Christum impetrandae. Ita Natalis Alexander Ordin. Praedicator. in Append. Tom. II. Theolog. Dogmat. Epist. 49. *operae pretium duxit exponere, quid significant in Salve, Regina, verba illa Spes nostra salve; ne in Errorem Fideles inducantur, & ne vera Devotio in Superstitionem degeneret.* Praeterea nihil confici posse ex iis divinarum Literarum verbis. *Qui me elucidant, vitam aeternam habebunt.* In illo enim Ecclesiastici loco ad literam sumto, de *Virtute Sapientiae* agitur, non de Maria; de *Sapientia Dei*, aut de *Verbo Dei*, increata *Sapientia*, non de Christi Matre. Quod si Ecclesia Capitulum illud, ut & alia e veteris Testamenti Libris hausta, legit in Virginis beatissimae festis diebus, id ob eam causam facit, quod Mysticus & Symbolicus sensus interdum insignes & incomparabiles Virtutes, praerogativas, ac merita Virginis jam aliunde nota, adumbrare potest, uti complures e Catholicis jamdiu ostenderunt. Ceterum si quisquam insistere, & supraedificare vellet Mystico sensui verborum illorum, quasi literaliter ea de Virgine pronunciata fuissent, ibique fundare praerogativam non aliunde notam Ecclesiae ac certam, is profecto in nubibus aedificaret; immo divinis Libris abuteretur, in quibus non quod nos pie optamus, sed quod litera sonat, ac Traditio Patrum agnoscit, Deus edocere nos voluit. Propterea etsi complures ad Deiparam secundum Mysticum sensum referant verba illa Cant. iv. 7. *Tota pulchra es amica mea, & macula non est in te.* Ecclesia tamen hisce nunquam usa fuit, aut utetur ad fundandum Dogma aliquod; quippe constans Ecclesiae Catholicae regula est, e literalis Scripturae sensu, non vero e Mystico & Symbolico petendas esse Veritates divinitus revelatas. Denique recte nos agere, si devotionem erga Sanctos, & praesertim erga Sanctorum Reginam, Populo suadeamus & commendemus; sed hoc non sine prudentia ac moderatione faciendum, ne incertam aut periculosam doctrinam disseminemus; aut ne indocti haec statuunt praecipuum suae Pietatis negotium;

tium; negligentque amorem & obsequium, quod debemus ante omnia, & super omnia, & ex praecepto, Creatori & Conservatori nostro Deo, ac Mediatori Dei & Hominum Christo Jesu. Haec & alia amice disputata sunt; atque ut in altero profunda Humilitas ac Docilitas cum ceteris Virtutibus certabat, ita gratias mihi amice monenti habuit, & egit, ac in meam sententiam concessit, idque opere deinde confirmavit.

C A P U T I I I.

Vita hominum quam pretiosum Dei donum. De illa custodienda ac minime prodigenda, naturale ac divinum praeceptum. Quando mors potius eligenda. Joannis Baptistae, aliorumque exempla commendata. An Cartusiano in discrimine vitae comedendae sint carnes. Sancti Elphegi, aliorumque exempla in examen adducta.

NIHIL est ergo quod Parthenotimus *Votum Sanguinarium* magnifico *Pietatis* titulo tueri se posse putet, nisi prius certum habeat ac faciat, *Pietatem* hanc cuncta germanae *Pietatis* lineamenta complecti; quippe datur etiam *Pietas* imprudens, temeraria, sanatica, a qua cavendum nobis, Theologiae Catholicae documenta concordia clamant. Atque haec eadem consideratio cadit in Theologorum ipsorum varias Opiniones. *Pietatem* praeferre possunt, piaque appellare primo aspectu liceat; si vero componantur cum aliis inconcussis Theologiae Catholicae dogmatibus, iisque adversari deprehenduntur, tunc frustra adhibeas *Pietatis* nomen ad avertendam ab ejusmodi Opinionibus notam erroris, fabulae, imprudentiae, superstitionis. Multum hac de causa debet Literatorum ac Fidelium Respublica Cl. V. Theophilo Raynaudo e Societ. Jesu, quem supra laudavi, & qui mihi non semel laudandus occurreret. Is enim imperterritus calamo duobus Tomis, quibus titulus est *Heteroclitica spiritualia ac terrestria*, aggressus Opiniones non Vulgi tantum, sed & eorum, quorum munus est alios doctrina coelesti imbuiere, plurima somnia, falsas, aut periculosas sententias; atque certe minime laudabiles deprehendit, atque repressit. Addidit insuper & alium Tomum, *Diptrycha* videlicet *Mariana*, quibus exorbitantem nonnullorum *Pietatem*, ac Opiniones non ferendas de praerogativis sanctis-

sanctissimae Virginis exagitavit, quanquam nemini is concederet Devotione & Pietate in Deiparam ipsam. Haec ille edidit non sine utilitate & plausu totius Ecclesiae; quae qui diligenter evolvat, temporis profecto prodigus non erit; intelligetque, nullo negotio in *Anomalias Pietatis* (quo nomine recte utitur idem Raynaudus) Christianorum Devotionem ac Zelum sine scientia abripi posse. Quare antequam Sculus Theologus obtenderet Voto suo venerandum *Pietatis* nomen, dispiciendum ei fuit, num inter Anomalias Pietatis numerandum quoque ejusmodi Votum foret. At, inquit ille, Pritanius ipse cum reliquis Catholicis, quin sententia de Immaculata Conceptione Virginis, *summe pia* sit, non negat, immo diserte fatetur. Qui ergo mortem oppetat pro illa tuenda, Sanguinem prudenter ac legitime dabit, quippe dabit pro causa pia; atque adeo pro *Pietate*, quae procul dubio Virtus est, occumbet. Haec illius argumentatio, splendidis terminis, & eo aspectu veritatis concepta, ut mirum non sit, si in illa conquiescat is Scriptor, & postquam illudi ab ea se passus est, illusionem forte eandem in alios quoque parum attentos transfuderit. Verum quanta lateat in ejus argumentatione aequivocatio & falsitas, meum erit aperire, & suo loco prodere, quid *Pietas* in sententiis significet, & quam inani effugio Parthenotimus declinare censuram sui Voti contendat. Statuamus interea Quaestionem, quae re vera ipsum contra me ad arma excitavit: Nempe, *An liceat homini Christiano vovere se daturum Sanguinem & Vitam pro tuenda Sententia Scorsistica de Conceptione*. Affirmat Parthenotimus, Pritanius negat. Quae rationes Pritanium ad negandum impellant, nunc Judicibus aequis perpendendas offero. Atque ante omnia statuendum est, eam esse mentem voventium mortem pro tutela sententiae hujus, scilicet se ita credere *Veram ac Certam* eandem sententiam, ut prompti sint ad eam suo Sanguine testandam. Germanum hoc & verum est Voti illius objectum, non vero sententiam hujusmodi tantummodo esse *Piam* ipsae voventium formulae evincunt. Supra vidimus Vota ab Equitibus Calatravae, & sancti Jacobi concepta, atque ab ipso Parthenotimo adducta, videlicet *de Certissima Veritate tuenda; Defendendi hanc Veritatem*. Neque alia mens est reliquis voventibus; se illam sententiam nunquam dimissuros, & semper defensuros, quanquam sine *Sanguinis* mentione: nam & isti ad illud Votum feruntur, persuasione ducti, se propugnaturus *Veritatem*, quam inesse ei sententiae credunt, sive eam putent *Certam*, sive *Probabilem* tantummodo ac *Piam*: quod faciunt quicumque circumspecto judicio in Veritatis inquisitione procedunt. Quantum vero

a Ca-



a Catholicae doctrinae luce atque ab Ecclesiae mente ejusmodi Votum Sanguinarium abſit, luculentius perſpiciemus, ſi aliqua prius praemittantur.

Primo igitur ſtatuo, maximum bonorum temporalium omnium eſſe *Viſam* naturalem hominis, ſive maximum appetibilem inter bona corporalia; & contra omnium terribiliſſimum inter mala temporalia eſſe *Mortem* naturalem. Proinde Vita noſtra pretioſior eſt quam honor & fama, & res exteriores, uti docet Sanctus Thomas 2. 2. Quaeſt. 73. Art. 3. Secundo, Vitam nobis adimere ſemper graviſſimum crimen eſt, ſemper Malum; adimere vero aliis, regulariter eſt crimen, idque graviſſimum. Homicidium quippe a Deo atque Natura vetitum eſt, primumque locum tenet inter Peccata in proximum commiſſa. Tertio, a legibus ipſius Naturae ac Dei homo jubetur non ſolum ſibi manus nunquam inferre ad mortem ſibi conſciſcendam, ſed etiam caute ſervare propriam Vitam, neque eam ſcienter periculo exponere, neque arbitrio ſuo aliis tollendam offerre. Poſtremae hujus conſclusionis ratio maniſeſta eſt; nam, ut ait idem Angelicus Magiſter 2. 2. Quaeſt. 64. Art. V. *Vita eſt quoddam donum divinis homini attributum, & ejus poſeſtati ſubjectum, qui occidit, & vivere facit. Et ideo qui ſe ipſum Vita privat, in Deum peccat: ſicut qui alienum ſervum interficit, peccat in dominum, cujus eſt ſervus; & ſicut peccat ille, qui uſurpat ſibi judicium de re ſibi non commiſſa. Ad ſolum enim Deum pertinet judicium Mortis & Viſae.* Haec ille de interimente ſemetipſum, ſed ratione, quae etiam militat contra ſubeuntes arbitratu ſuo necem ab aliis, immo & exponentes ſe ſine juſta cauſa periculo evidenti necis. Donum enim grande ſibi a Deo collatum cuſtodire debent, neque illud ſine injuria veri Domini, id eſt Dei, in maniſeſtum diſcrimen, aut in mortem certam adducere poſſunt. Quippe contra Virtutem Juſtitiae peccant; peccant & in Virtutem Caritatis, qua quilibet ſe ipſum diligere debet. Quid enim diſfert ab interimente ſe ſuis manibus, eligens mortem ab alienis ſine neceſſitate, ſine legitima cauſa? Quid, qui ſe ultro in flumen aut in incendium praecipitat, ab eo diſfert, qui ab alio praecipitari ſe vult & curat? Illud eſt ſe phyſice, ac immediate necare, hoc ſe necare moraliter & mediate. Quarto, quum tamen praeceptum cuſtodiendae Vitae affirmativum ſit, legitimae cauſae occurrere poſſunt, cur interdum liceat non ſervare Vitam, immo & Mortem eligere ab aliis intentatam ſit opus. Haec leges doctrina Eccleſiae ſuppeditare debet. Sunt autem hujusmodi, Si agitur de cavendo *Malo Certo*, quod

in comparatione Mortis corporalis longe majus sit; tunc non solum licet; sed necesse est Vitae praesentis jacturam subire. Quare quum peccare in Deum, ejusque in nos iram provocare, sit omnium Majorum maximum: potius offerre caput securibus jubemur, quam Vitam servare, si servanda est cum aperta Dei offensione. Veniat impius mortem nobis comminando, nisi Catholicam Fidem, aut unum ex ejus articulis ejuremus, nisi Idolis sacrificemus, aut falsum testimonium dicamus, aut alia patremus, quae Lege Dei certa prohibentur: Minime obtemperandum est: fortiter Vita est danda. Mandat quippe Dominus, Matthaei vers. 28. ut nolimus *timere eos, qui occidunt Corpus, Animam autem non possunt occidere*; sed potius *timeamus eum, qui potest & Animam & Corpus perdere in gehennam*. Sunt etiam quaedam gravissimae & sanctissimae leges Ecclesiae, pro quibus servandis Vitae minime parcendum est: qualis est obligatio non revelandi Confessionem Sacramentalem, aliaeque Leges, pro quarum tutela gloriosam mortem oppetiere Sanctus Thomas Cantuariensis, Sanctus Joannes Nepomucenus, & alii. Constat enim, Ecclesiae mentem esse, ut harum gravissimarum legum custodia, quoties necessitas exigat, amor vitae nostrae anteponatur. Certissimae sunt nobis ac notissimae hujusmodi leges; etiam cum vitae periculo sunt observandae. Ad haec dantur Opera quaedam Virtutis, spectantia ad Religionem, aut ad Caritatem erga proximum, ad quae etsi divina aut Ecclesiastica lex Christianum minime obliget, certum tamen est e doctrina Ecclesiae, haec adeo placere Altissimo, ut liceat pro iis exponere sese periculo Mortis, immo ipsam mortem subire, aeternamque a Deo mercedem inde sperare; aut saltem ejus sunt generis Opera ista, ut ex consensu Theologorum mors aeterna prudenter eadem facientem nequaquam maneat. Exempli causa eligere potius mortem ab impio inferendam, pro Virginitate amore Dei servanda; aut mortis discrimini sese exponere, Caritate impellente pro juvandis peste infectis, pro praedicanda Fide Christi inter Infideles, aliaque id genus. Universi autem conatus Parthenotimi eo collineant, ut ad hanc ipsam regulam deducatur *Votum Sanguinarium*, & sub ejus umbra defendatur. Is quidem fatetur, sententiam de Immunitate Mariana non esse de Fide, ac propterea neminem ad eam Sanguine propugnandam adigi: quum tamen *opus Virtutis, Pietatis, Caritatis, Honestatis* sit. eam tueri, propterea contendit, licere in ejus defensione Vitam quoque impendere, atque ob egregium hoc facinus praemium esse sperandum in coelis. At quantopere haec Opinio a Veritate atque a Doctrina

Doctrina

Strina Ecclesiae abhorreat, an ostendere nunc possim, sensim Lectores, nullo partium studio corrupti, judicabunt.

Ad hoc enim ut Vita nostra obijci periculis gravibus ultro ac licite possit, eoque magis, ut certae morti destinetur in casibus, in quibus neque ab ulla Divina, neque ab Ecclesiastica lege id facere jubemur: necesse est, ut legitima ratio id faciendum suadeat, & *Prudentiae* leges in re tanta exactissime observentur. Scilicet *Bonum*, quod effusione Sanguinis & Vitae quaerimus, futurum est *Bonum Certum* ac *Majus* ipsa nostra temporali Vita. *Prudentia* quippe Virtus est, quam ducem & comitem ceterae Virtutes habere debent, ejusque lumine cuncta sapientis Christiani opera regenda sunt. Hanc Prudentiam Deus ipse nobis praescribit, & Ecclesia summopere custodiendam jubet. Christo Domino praecipiente curandum est, ut simus *Prudentes sicut serpentes*; & Apostolus ad Roman. XVI. vers. 19. ait: *Volo vos sapientes esse in bono, & simplices in malo*. Et quid, quaeso, Consilia, Opera, Opinionesque hominum erunt, si sine Prudentia incantur, quae ab Augustino delinitur *appetendarum rerum & vitandarum scientia*, & Virtus, *qua dignoscimus inter Bonum & Malum*? Si ergo dat homo Vitam suam corporalem pro consequendo Bono Certo, simulque Praestantiore: tunc prudenter agit, legitimamque causam habet incurrendae Mortis, quum Prudentis sit commutare, si velit, minus Bonum cum majori, dum utrumque sit certum. Contra ubi Vitae nostrae conservatio majus Bonum sit, quam alterum, quod quaerimus; aut Incertum sit ipsum Bonum, quod quaerimus; tunc Sapientiae ac Prudentiae legibus injurius est, ac se ipsum inconsulte laedit, immo aperte Deo displicet ac peccat, qui Certo Bono, hoc est Vitae, renuntiat, pro Incerto Bono; aut minus, inferiusve Bonum eligit, dimisso majori. Ad hosce Canones componere se debet cura Vitae nostrae, simulque Pietas, quae nisi legibus istis regatur, in vitium & ipsa degenerabit; atque evadet, uti supra innuimus, Pietas imprudens ac temeraria; interdum quoque a Superstitione ac Fanaticismo non aberit. Ad haec Prudentiae munus atque obligatio est, non tantum eligere Bonum Certum, atque comparatione Majus, sed etiam circumspicere circumstantias agendi, hoc est Tempus, Locum, modum &c. Fieri enim potest, ut ratione ejusmodi circumstantiarum Bonum illud aut desinat esse Certum, aut non retineat majoris pretii praerogativam, quae primo occurrerat. Utique Pium opus est Orationi insistere, atque in sacris Templis incruento Sacrificio devote interesse. Nego neget, quin hoc sit Certum Bonum, & Majus quam secularibus nego-

nego-

negotiis operam dare. Verum ubi agatur de viro, qui labore manuum suarum alimenta filiis praestare debet; aut de femina, cui onus custodiendi parvulos filios, aut nobiles filias, incumbit; aut de Magistratu, cujus est Populo sollicitudo ac indefinenter ministrare iustitiam: si tempus immoderate in Templo sive in Oratione impendunt, Pium erit quidem illorum Opus, sed simul imprudens, & culpabilis dicenda erit eorum Pietas. Ratione nimirum circumstantiarum Certum ac Majus Bonum, quod est ad illos, erit quaerere victum liberis, curamque habere diligentioris familiae aut muneris sui, quam piis illis occupationibus tantum temporis dare. Illud, non istud, exigit ab iis Deus; ac propterea Pietatis nomine ii frustra methodum suam excusarent.

Congerit haec Parthenotimus exempla, quibus ostendat, non solum licere, sed laudabile esse mortem oppetere pro Virtute, pro Pietate, pro Honestate operis alicujus. Haec libenter accipimus, visuri nunc, an ex his subsidium rite possit peti ad dealbandum Sanguinarium Votum. Primum est Sancti Joannis Baptistae, qui non Martyr est, quia passus est, Herodem esse adulterum; nec pro certitudine adulterii mortem subiit; sed pro illius reprehensione, quae Virtus est. *Ecce haec est illa Veritas, pro qua occisus est Joannes, ut loquitur Divus Gregorius.* Haec Theologus Siculus pag. 19. Utique Martyr Praecursor, utique pro reprehensione Herodis is vita exutus: ut nihil in ejus Martyrio desideratum sit Veritatis, Justitiae, atque Prudentiae. Circumstantias respice. Pro reprehensione occisus est; sed addendum pro reprehensione criminis certi, & scandali certi inde manantis; & quod praecipue animadvertendum, pro reprehensione, quam uti Propheta, atque homo missus a Deo, facere potuit ac debuit. Iis quippe non secus ac Hieremias, destinatus a Deo, ut evelleret, destrueret, & disperderet, & aedificaret, atque plantaret. Proinde impellente Deo, suo muneri est functus, ac pro lege Veritatis, pro aequitate, pro iustitia occisus, ut ait Sanctus Augustinus Enarrat. in Psalm. CXL. Nunc etiam si quisquam Episcoporum, quibus animarum cura divinitus commissa est, Regem adulterum aut homicidam redargueret (quod Sanctus Ambrosius ac alii fecere) si ob id interficeretur, gloriosa morte periret, dum tamen Prudentiae legibus satisfecisset, circumstantiis bene perspectis, propter quas reprehendendi obligatio cessare potest, aut ipse reprehensor imprudens videri. Contra, si quis privatus homo, nullus fultus auctoritate, Regem adulterii aut homicidii argueret, praecipue si palam, atque in se iram illius propterea provocaret: nemo

sapiens illum laudaret, immo temeritatem ac zelum sine prudentia in illo quique deprehenderet. Secundo, quoties Christianus mallet vitam dare, ut Virginitatem amore Dei servaret, ejusque custodiam Matrimonio, ne dicam fornicationi, anteponeret, laudabile opus Fortitudinis, Religionis, ac Prudentiae exerceret. Virginitatis amor ex amore Dei procedens, testante Apostolo, & concinente Ecclesia, praestantius Bonum est quam Nuptiae; & quidem Bonum Certum, ita ut pro illo conservando recte Vita impendatur. Terrio, inquit Parthenotimus pag. 63. *Carthusianus dum non pro Veritate, sed pro custodia veteris religiosae consuetudinis a carnibus abstinet, & mavult mori, quam carnibus vesci*, ex Theologorum consensu laudandus est, ac Numini placebit. Haec ille, sed nulla distinctione adhibita, & quasi nulla inter Theologos sit de hujusmodi casu disputatio. Nam ubi aegritudine vexetur Carthusianus, censeturque Medicus, eum moriturum, nisi carnibus vescatur, prudentissime religiosus vir faciet, si abstinere ab iis pergat, dummodo alii adsint cibi, quibus pasci possit. Falsum quippe est, homini mortem obventuram, nisi carnibus vescatur, quum tanta non sit virtus solis carnibus, ut aegrotantem a morte eximere possit, quando, ut suppono, ad vitam sustentandam alii cibi praeter carnes tunc non desint. Deinde statuendum prius est, sitne apud Carthusianos abstinentia a carnibus Votum ab Apostolica Sede probatum, an religiosa tantum Consuetudo; quae inspectio diversitatem sententiae secum feret. Verum sub alio aspectu casus hic est exhibendus.

Et praestet imprimis audire Thomam Tamburinum Siculum Soc. Jesu, ita scribentem Lib. VI. Explicat. Decalog. Cap. II. §. I. ubi Homicidium sui damnat. *Neque, ait, opponas, Carthusianos, vel in periculo mortis laudabiliter, sive ex Voto, sive ex pia Consuetudine a carnibus abstinentes, Ita Fagund. Lib. V. in Decalogum Cap. XI. num. 19. & 20. citans Sayrum, aliosque. Azor. part. II. Cap. III. quaest. 13. & 14. Ne hos, inquam, opponas. Nem pari modo affirmo cum Thoma Sanchez in Consil. Lib. I. Cap. I. Dub. 34. (cui addi potest Filliucjus Tract. XXIX. Cap. V. in Decalogum) eos debere in periculo mortis carnes comedere, si alius aptus cibi absit, ut si essent in deserto, ubi nonnisi carnes haberi ex venatione possint &c. Scio, Joannem Sanchez Diss. 3. num. 7. Gerson. Tract. de tempor. Carbusi. Probabiliter sentire, etiamsi nulli alii sint cibi, atque adeo in necessitate extrema, posse, immo & teneri suum Votum (si tamen Votum est, ut sentit Lessius Lib. II. Cap. 3. D. 2. n. 12. Nam si sit mera regula, ut putat Gerson. loco citato, & Thom. loc. cit. num. 2. certum est non tene-*

teneri) a carnibus abstinendo custodire: quia saepe licitum est ob justam causam (ut esset heic ob conservandam religiosam disciplinam, publicumque bonum ac fervorem suae Religionis) non conservare vitam: quod non est occidere se (ajunt) directe vel indirecte. Verum prior sententia mihi magis placet. Adde & Cardinalis Bellarmini votum, qui Lib. II. Cap. XXXII. de Monachis haec habet. Dices, si jejunii lex, aut Votum, corporis valetudini vehementer noceat, potest, ac debeat non servari: cur igitur non idem dicatur de Voto Continentiae? Respondeo non esse eandem rationem Jejunii & Continentiae: nam cibus ordinatur per se ad salutem individui; idcirco illo non uti, cum necesse est ad salutem conservandam, Vitium est, non Virtus, proinde nec Voti materia. Et Lessius Lib. IV. Cap. III. Dubit. 2. testatur, a multis Doctoribus censi Invalidum & Illicitum vovete, se nullo eventu, etiamsi mors impenderet, carnes esurum. Videat ergo Parthenotimus, an rem certam nobis propinet, dum licere putat Carthusiano, vel in casu certi & extremi periculi vitae, abstinere a carnibus. Quod plus est, Gersonius ipse, qui in calce Opusculi *De non esu carnum* apud Carthusiensens Tom. II. Oper. pag. 717. inclinare videtur in sententiam affirmativam, in Libello tamen Regular. Moral. Tom. III. pag. 94. diserte scribit. *Votum Carthusiense de non esu carnum; Votum insuper aliorum Religiosorum de multis observationibus duris, alias licitis; Votum denique particularium personarum de certis cibis non edendis in aeternum, in certis casibus necessitatis extremae, probabiliter, si Vota haec tenerentur, imminetis, DEBENT IMMUTARI.* Non enim licet alium contra Dei Praeceptum occidere; quanto minus se ipsum? Secludimus tamen in omnibus scandalum pusillorum. Immo Auctor idem in praelaudato ipso Opusculo *De non esu*, Conclusionem secundam ita efformat, ut licere neget Carthusiano, in extrema cibi necessitate posito, a carnibus abstinere, si nihil aliud sibi offeratur ad vescendum, quam carnes. Quare in hanc ille sententiam concesserit, referre juvat, Lectoresque rogo, ut attente hoc animadvertant. Si diceret aliquis (ita is subdit) quod potius eligere habebit mori fame; dicere eundem oportebit ex consequenti, quod in se ipsum manus injiciet, & fuimet eris occisor; juxta illud vulgatum Augustini: *Pasce fame morientem, Si non pavisti, occidisti.* Nec ad se minus, quam ad alios Praeceptum hoc extenditur. Praeterea Consuetudo aut Constitutio generalis Ecclesiae de non comedendo carnes in die Veneris, non obligaverit ad sui observationem in casibus prioribus extremae necessitatis; immo nec excusaverit aliquem ab homicidio, qui quum posset salvare vitam per

esum carniū, se, vel aliū mori spontanee permitteret abstinendo: secludendo tamen semper casum grandis scandali in Fide, de quo dicitur postea. Porro de Votis idem est argumentum. Est autem fundamentum radicale praefatae rationis in hoc, quoniam a Lege Divina nulla Lex aut Obligatio pure humana potest absolvere, aut excipere, vel instituire, quod non observetur. Sed haec est Lex Divina, Non occides, Deuter. XX. 13. a qua Lege non legitur per aliquod aliud divinum Jus facta exceptio, ita ut pro observatione Constitutionis aut Consuetudinis pure humanae supervenientis, eam transgredi liceret, & se mori sinere esset. Alia addit Gerfonius, apud eum legenda, quae praetereo, quum haec satis sint ad infirmendam eorum Opinionem, qui contrarium sentiunt. Atque haec diligenter adnotanda, utpote magni ponderis ad controversiam dirimendam, quae inter Parthenotimum & me agitur. Eo in loco Gerfonius objectionem sibi opponit, nec solvit; curabo ego pro viribus infra, ut ei faciam satis.

Quarto addit Parthenotimus pag. 81. *Captus a Barbaris Elpbe-
gus Cantuariæ Episcopus noluit, appenso ingenti litro, vitam redime-
re. Caesus a Barbaris est. Hinc suborta dubitatio, an Elpbe-
gus Martyr esset. Martyrem non esse, contendit Lanfrancus (Cantuariensis &
ipse postea Archiepiscopus, & vir doctissimus.) eo quidem nomine,
quod immoderatum litrum negasset. E contrario Martyrem eam ob cau-
sam esse, ruitus est Divus Anselmus, quia pro iustitia Elpbe-
gus dicitur occubuisse: dum, ne latrones ditaret, suas deglubere noluit oves.
Nec ullus comparuit Pritanius, qui Divi Anselmi Opinionem supersti-
tionis accusaret. Nullus fane prodiit, neque prodibit Pritanius, qui
Sancto Elphego Martyrii gloriam neget, aut Sancti Anselmi iustae
sententiae adversetur. Sed prodibit quidem contra Parthenotimum, un-
dique conradentem laudanda & sancta exempla, ut Opinionem suam
minime laudandam incautis gratam efficiat. Accipe Eadmeri verba in
Vita Sancti Anselmi Lib. I. Agebat Beatus Lanfrancus, ab inimicis
Dei Paganis factam Elphego potestatem se redimendi; at immensam pro
hanc ab eo pecuniam expetisse, quam quia nullo pacto poterat habere,
nisi homines suos eorum pecunia spoliaret, & nonnullos forsitan in visae
mendicitati subjugaret, elegit vitam perdere, quam eam tali modo cu-
stodire. Tum Anselmus ita respondit. Palam est, quod is, qui ne lo-
ve quidem contra Deum peccatum admittat, mori non dubitat; multo
maxime mori non dubitaret, priusquam aliquo gravi peccato Deum ex-
cubaret. Et revera gravius peccatum videtur esse, Christum negare,
quam quemlibet terrenum Dominum, pro redemptione vitae suae, homi-
nes*

nes suos per ablationem pecuniae illorum ad modicum gravare. Sed hoc, quod minus est, Elphegus noluit facere: Multo igitur minus Christum negaret, si vesana manus cum ad hoc mortem intendendo constringeret. Unde datur intelligi, miram pectus eius iustitiam possedisse, quando vitam suam maluit dare, quam sprete Caritate proximos suos scandalizare. Nec immerito, ut reor, inter Martyres computatur, qui pro tanta iustitia mortem sponse sustinuisse veraciter praedicatur. Addit Eadmerus, causam necis Beati Elfegi non illam solam, sed aliam fuisse ista antiquiorem. Nam non ideo tantum quia se pecunia redimere noluit, sed etiam, quia Paganis persecutoribus suis, Civitatem Cantuariam, & Ecclesiam Christi in ea sitam concremantibus, Cruesque suos atroci morte necantibus, Christiana libertate obistere, eosque a sua infidelitate convertere nisus est, ab eis captus, & crudeli exanimatione est occisus. Et profecto haec potior causa, immo germana, referendi inter veros Martyres Elphegi. Sed consistamus in unica Sancti Anselmi rationatione. Supponit ac praemittit, Elphegum Peccati reum fuisse futurum, si redemptionem suam tam gravi suorum hominum incommodo procurasset; neque Scandalum abfuturum, si tam caro emisset sui corporis liberationem. Hoc autem etsi non tam grave Peccatum fuisset, quam Christum negare, Peccatum tamen esse non desisset. Atqui Christianae Legis dogma est, mortem potius subeundam, quam Peccato vel levi in Deum consentire: Ergo recte inferebat Anselmus, Elphegum sancte elegisse mortem, & pro tanta iustitia sanctissime vitam sibi eripi passum fuisse. Accedat nunc Parthenotimus, & quaeso dicat, num Peccatum sit non credere immunem ab omni macula Conceptionem Mariae? Exploratum est, inquiet, ut puto, inter Catholicos, nullum heic occurrere Peccatum. Immo si quisquam forte contenderet, locum heic esse Peccato, sciat se anathemate constrictum, quo Romani Pontifices percellunt quencumque affirmantem, *Haeresis aut Peccati* reos esse, qui Mariam credunt cum Labe Originali conceptam. Frustra igitur huiusmodi exemplo Sanguinarium Votum, nimum ab eo diversum, cohonestari posse confidit.

Quinto, Parthenotimus pag. 98. ait. *Velis nolis Lamindus, cum Theologis necesse est consentiat, quod extra Fidei aleam licitum sit snere, se occidi, ni velit damnare Militem, qui ne a statione discedat, ab hostium manipulo perimatur. Ni velit christianum strenuumque pectus criminari, quod ut peste affectis inserviat, ipsa contagione necetur.* Infra addit. *Fidei perfusa lumine Christiana Theologia statuit, quod in carcerem, maxime iustum, redeat, qui iuraris, se illuc rediturum, quan-*

quanquam esset ibi occidendus. Quod est ad inservientes amore Dei pestilentia infectis, immo quod est ad quoscunque alios, qui eadem Caritate ducti, Proximo aut aegrotanti aut periclitanti opem ferunt, ut ei salutem Animae procurent, immo interdum & Corporis, uti in Nosocomiis accidit. Dogma Fidei est, eis in tam laudabili Christianae Caritatis exercitio morientibus ingens in Coelis paratum esse praemium. Rectissime quippe Minus Bonum, idest corporalis Vita nostra impenditur, ut Proximo nostro inde Certum ac Majus Bonum obveniat. Quo tamen in ministerio summe pio Prudentia quoque est adhibenda; scilicet tam generosis Christianis Caritate ferventibus, sollicitè & quantum fieri potest, custodienda est propria vita ac salus, tum ut Caritati, quam quisque habere debet erga se ipsum, satisfiat, tum etiam ut reliquis indigentibus idem subsidium conferri diutius possit. Ad Militem vero quod attinet, eligentem in excubiis sibi demandatis mori, non ille tantum, sed & ceteri milites in bello regulariter se licite exponunt certo vitae discrimini, immo quoties occasio se exhibet, sese exponere debent, sive ex pacto licite inito cum Principe legitimo, sive quia id exigit conservatio Reipublicae, quae Certum ac Praestantius Bonum est, quam Vita privati hominis. Exemplum vero carcerem repetentis, in quem se rediturum juramento pollicitus fuerat, etiam si esset ibi occidendus, ad regulam supra notatam referendum est: nempe eligendam esse mortem, ne in Deum peccemus. Jusjurandum quippe iuste interpositum fraudari sine injuria Dei in illo casu non potest. Publica fides praeterea humani commercii Certissimum Bonum est, immo ejus pretii, ut anteposenda sit illius conservatio conservationi Vitae. Quare non solum redire in carcerem tunc licet, sed opus est ei, qui rediturum se juravit; ipsumque redire, & mortem tolerare, si ita casus ferat, Virtutis opus est appellandum. Atque haecenus exempla a Parthenotimo adhibita, quibus honestari Vorum Sanguinarium posse, ille sibi persuadebat. Verum quam inani successu, jam partim intelleximus, & partim infra intellegemus.

C A P U T I V.

Ut Vita prudenter detur, pro Bono Majori, & aequae Certo danda est. Exemplum mortis imprudenter electae. Tenuitas pii operis consideranda, ne contra leges Prudentiae quisquam in mortem incurrat.



REGULAM posuimus, videlicet ad hoc ut Prudenter homo pretiosum Vitae corporalis depositum sibi eripiendum aliis offerat, cum laude apud homines, & merito apud Deum, aut saltem sine Peccato, duo concurrere debere. Alterum, ut Bonum, quod per mortem corporis apperimus, sive servatum volumus, sit *aequae Certum* atque ipsius Vitae nostrae conservatio. Alterum, ut sit *Majus ac Praestantius Bonum*, quam conservatio ejusdem Vitae. Si enim agitur de Bono duntaxat pari, cujusmodi foret, Vitam suam dare, ne alter propria privetur, tunc disputationes multae incurrere possunt, quas delibare nihil in praesentia refert. Ex hac autem Regula fluit consequenter altera: Videlicet, tunc Temere ac Imprudenter, idest sine laude ac merito, immo non sine Peccato, exponi Viram nostram certae neci, quoties Bonum per eam expetitur, sive servandum, sit leve ac Minus, quam Bonum ipsius Vitae, aut non sit aequae Certum, atque est ejusdem Vitae conservatio. Tanti enim ex institutione Naturae, atque ex ipsius Dei praecepto, facienda est Vita nostra (ingens sane Bonum nobis a Deo commodatum) ut illam abjicere, nosque ultro mortem subire pro leviori ac Minori Bono, aut error non ferendus, aut crimen etiam sit. Idque in operibus ipsis *Pietatis* ac *Religionis* locum habet, in quorum consideratione contristam nunc volo orationem meam. Nimirum opera dantur, quae certissime ad Pietatem spectant, & nihilominus ejus non sunt ponderis, ut fas sit, aut laudabile sit, Vitam potius exponere gladio, quam illa omittere, dummodo tamen contemptus Religionis, & grave Scandalum inde absit; Nulla dubitatio est, quin sancta sit Oratio Angelica, sive *Ave Maria*, & sancta precandi formula *Rosarium* sanctissimae Virginis; certissimum quoque est, piam & sanctam rem esse Orationis illius, atque Rosarii recitationem ex devotione factam. Finge tibi Tyrannum, aut furiosum quenquam, comminantem ense exerro mortem recitanti, ni cesset, & cessare nolen.

lenem interfici. Prudens ne existimabitur, qui sine ulla necessitate pium illud opus peragens, mortem potius elegerit, quam filere? Neutiquam sane. Exigebat Prudentia, ut ille ea occasione ab opere quam pio desisteret, quum in aliud tempus & locum differri posset pium illud opus; neque tanti sit ipsum, ut profusione Vitae, quam nobis Deus servandam mandavit, sit peragendum. Dixi, dum secludatur contentus Religionis & grave Scandalum. Si enim constet, Tyrannum recitationem illam ideo vetare, quod impiam rem putet Orationem Angelicam, sive Rosarium; tunc non licebit solum, sed opus erit pati potius se trucidari, quam a pia illa recitatione desistere; nam in iis, quae ad doctrinam Fidei spectant, non datur parvitas materiae. At secluso ejusmodi contemptu, & ex alio fine interdicta recitatione illius Orationis, Prudenti homini desistendum tunc est, & Vita servanda; quum nihil detrimenti in Religionem, nihil Scandali in Populum inde sit obventurum, atque alia ratione commode possit eidem Devotionis operi satisfieri. Ita visitare sacras Aedes, uti ibi preces ad Deum fundantur, Pium opus procul dubio est. Si quis igitur statuatur visitare Templum, & quanquam monitus latrones latere in itinere, qui sine misericordia certissime viatores spolient, ac trucidant, obfirmato tamen animo proficisci velit, mortemque incurrat; Imprudens erit illius Pietas, ac temere is mortem subibit. Quod plus est, etiamsi Votum in ejusmodi piis non magni momenti operibus intercedat; tunc obligatio Voti cessat; ut si quis voverit invisere verno tempore Lauretanum Templum, & non fallax nuntius habeatur, infestari quotidie a Turcis, aut a faevis praedonibus viam, itur aut captivitas, aut mors certa proficiscenti iuste sit formidanda: complendum minime tunc erit Votum, atque ad tempora pacatiora reservanda erit illius solutio, aut illius petenda commutatio. Quod si quis Votum conciperet peregrinationis sacrae, quanquam certo praenotet, se in certum libertatis aut vitae discrimen adducendum: Votum illud erit nullum, utpote Prudentia repugnante emissum. Ratio est, quam supra Gersonius attulit, nempe nullam obligationem pure humanam posse nos absolvere a Lege divina. Est autem divina Lex, nos Vitam nostram debere ab imminente certoque periculo arcere; & tunc solum opus esse eam ultro dare, ne peccemus; aut licere eam dare, si commutanda sit cum Certo ac Majori Bono. Atqui visitare illam sacram Aedem non est opus pium tanti ponderis, ut sit captivitas aut mors eligenda, ne ab illo desistamus, quum Pietati nostrae erga Beatam Virginem in alia sacra Aede consuli prudenter tunc possit,

fit, aut ad meliora tempora differri pium illud opus. Quae haftenus dixi, auctoritate firmantur Martini Magistri in Tract. de Fortitud. Quaest. V. ubi & is agnoscit quaedam opera Virtutis ac Pietatis tam parvae necessitatis & utilitatis, ut non liceat secundum distamen rationis pro iis se exponere morti, & ratio ipsa nos doceat, esse omit-tenda. Cardinalis autem Cajetanus in 2. 2. quaest. 124. art. V. idem fufius confirmat, scribens, *opera Bona ex suo genere tantum non esse universaliter opera Virtutis, nisi sint etiam Bona ex circumstantiis, quoniam bonum consurgit ex integra causa. Immo si absque debitis circumstantiis fiant, Mala moraliter sunt, quoniam false sunt contra Prudentiam, quae forma est Virtutum Moralium* &c. Proinde & is statuit, non opus Virtutis tunc fieri, sed Peccatum, moriendo pro illo opere, quod e circumstantiis definit esse opus Virtutis.

Atque ad hanc ipsam regulam referendum puto, quod Gersonius idem sibi objiciebat, dum quaereret, an Carthusiano liceat eligere potius mortem, quam carnibus vesci in extrema necessitate cibi: *Quum etiam non vovens, ait, possis licite pati mortem pro conservatione Castitatis perpetuae, quamvis hoc pati nequaquam obligetur, vellem, ut nobis darent diversitatem rationis in Castitate & Sobrietate, quare non utrobique eris similis hujus divini Praecepti transgressio: Non occides.* Haec mihi ratio diversitatis creditur: nimirum esse quidem pium, & sanctum opus tam Virginitatis & Castitatis conservationem pro Dei amore, quam abstinere a carnibus intuitu ipsius Dei; non idem tamen esse pretium utriusque operis. Praestantissimum enim Bonum est, teste Apostolo, Conciliis, ac Patribus, Castitatem Deo dicare, unde uberes fructus spiritualis vitae emanare solent; at quanquam abstinencia a carnibus sit Bonum ac laudandum opus, longe tamen altero inferius est, neque in genere abstinenciae tanti est, ut cum Castitate perpetua sit aequiparandum. Idque patet ex ipsius Ecclesiae ritu; nam etsi illa praecipiat abstinere a carnibus Feria Sexta, & Sabbato, atque in Vigiliis, si tamen iis diebus Mortis periculum immineat homini, nullum alium cibum praeter carnem habenti, tunc ei non solum licet, sed opus est ab interitu Vitam suam eripere comedendo carnes. Aliter faciendo peccaret, si monitus in electione mortis per-vicaciter persisteret. Contra semper laudabit Ecclesia quoscunque vitam ponentes pro Castitate Deo dicata, hoc est eximium illud spirituale Bonum praefereutes Vitae suae corporalis conservationi. Ad haec renuntiari Castitati non potest, nisi peccando, aut nubendo. Primum nullo pacto licet; alterum per usum debiti matrimonialis custodiam

Castitatis plenae perpetuo tollere potest; Castitatis inquam, omnem actum venereum propter amorem Dei averfantis. Verum etsi Carthusianus, in extrema necessitate positus, carnes comedat, ut mortem tunc evitet, poterit necessitate sublata reliquum vitae agere sancte ab iisdem carnibus abstinendo.

Exempla haec pauca, quibus alia id genus adjicere nullo negotio unusquisque possit, jam satis sunt ad agnoscendum, quam dubio ac fragili scuto Sanguinarium Votum Parthenotimus tuendum susceperit, dum inquit, licere, ac laudabile esse *pro Pietate mori*. Quod pium sit aliquod Opus, non continuo sequitur, prudenter aut licite pro illo Vitam posse impendi, & potissimum si alteram conditionem repetamus, Christiano homini necessariam, ut secundum Prudentiam, neque temere, aliis occidendum se praebeat. Nimirum necesse est, ut Bonum, pro quo subeunda mors est, non solum pretio superet Bonum Vitae nostrae, sed etiam sit aequae ac illud Certum. Si enim Incertum ac dubium Bonum sit, quocum commutanda est Vita, quis rogo non Imprudentem, aut Fanaticum, aut Dementem eum appellet, qui Bonum tam pretiosum & Certum, & cuius possessio manu tenetur, quale est Vita nostra, deponere sponte velit, ut Bonum consequatur, de quo dubitatio est, an existat, & fieri potest, ut nunquam existat? Ad haec Certissimum est divinum Praeceptum servandae, & non projiciendae Vitae nostrae, quum nos domini illius non simus sed Deus; ita ut in Deum peccet, qui sine certa & legitima causa a Deo probata iacturam illius facere velit. Quomodo ergo non injustitiae, non temeritatis, ac imprudentiae arguendus erit, quicumque Mortem eligat pro re, quae Incertum est an placeat Deo, quum nullum Dei Praeceptum aut Consilium adsit de praefendendo objecto illo conservationi Vitae nostrae? Certum est divinum Praeceptum de non sacrificando Idolis, de non neganda Fide Christi, de non fornicando, uno verbo de non peccando. Certum est divinum Consilium de Castitate Deo dicanda, laudante Domino illos, qui se castraverunt propter Regnum coelorum, & praeferente Apostolo eandem conjugio. Certum Consilium, interdum & Praeceptum Caritatis de procuranda Vita spirituali Proximo nostro. In hisce casibus veri ac prudentis Christiani est Vitam impendere, si occasio id postulet, quia Certum quidem Vitae nostrae Bonum datur, sed datur pro altero Bono aequae Certo, ac insuper majori ac praestantiori, quam Vita nostra; aut evitatur Morte nostra Malum Certum, simulque longe majus, quale est Peccatum. Constat etiam, ita agentibus paratam esse in coelis in-

gen-

gentem a Deo remuneratore mercedem. Haec certa. Attamen plerumque in Prudentiam peccaret, qui palam praedicare Christi Fidem inter Turcas vellet. Cur quaeso? nisi quia esset incertum, an quidquam spiritualis fructus inde consequeretur, & contra esset certa illius mors, certoque discrimini exponerentur reliqui Fideles in Turcarum ditione degentes. Et quanquam norit unusquisque Fidelium, confiteri Christum coram hominibus, Vitamque dare pro ejus nomine esse gloriosum opus Amoris Dei & Fortitudinis, cui non deerit aeternum ac ingens a Deo praemium: attamen ne arbitrio quidem nostro dare Vitam pro Christo licet, sed tum solum quum certum est, Deum exposcere a nobis, aut gratum habiturum esse hujusmodi sacrificium. Olim minime laudati, immo improbati fuere Christiani; atque e Martyrum Diptychis nonnunquam exclusi, qui sponte, ac sine necessitate, sese Tyrannis necandos offerebant; & contra ii tantum commendati, qui mortem non improvide quaesitam, & quam evitare alia ratione non poterant, nisi peccando in Deum, forti, invictoque animo pro Deo tolerabant. Sunt in hanc rem Clementis Alexandrini, Origenis, Athanasii, Nazianzeni, aliorumque Patrum verba diserta.

C A P U T V.

Ad leges sanctissimas minime spectat effusio Sanguinis pro tuenda Immunitate Virginis. Neque ad tutelam Sanctitatis Mariae. Aliud Pietas Intrinseca, aliud Opinativa. Ad quamnam ex his referenda sententia Scitifica de Conceptione Virginis.



ACCEDAMUS nunc tandem ad Quaestionem, quae huic Oportulo causam dedit. Censet Parthenotimus, non solum licere, sed laudabile esse, jugulum carnifici offerre pro tuenda Veritate sententiae, excludentis a Deipara maculam Originalis peccati; immo tanti pretii ac meriti futurum hoc opus, ut Martyris nomen negandum non sit pugili tam generoso. Contra sentio ego, non solum laude indignum, eoque magis Martyrii corona atque appellatione, sed ne licere quidem. Cum legibus haecenus propositis conferantur illius rationes. Hoc est perpendatur, num tutela sententiae Scitificae sit Bonum Majus ac praestantius Vita nostra, ac insuper Bonum aequae Certum ac eadem

dem Vita. *Vel ipse Priscianus* (repeto Parthenotimi verba pag. 18.) *non negat pro legibus sanctissimis fundendum esse sanguinem. Numquid inter leges sanctissimas non est Virginem venerari? Virginem venerari ut sanctam?* Ita ille, ejusque paralogismus facile quisque sentiat. Nam ubinam quæso sunt *sanctissimæ leges*, Christiano Populo mandantes, ut credant Virginem sine labe fuisse conceptam? Conscius sibi est vel ipse Parthenotimus, nullam hæc legem occurrere. Liberum est Catholicis e duabus Opinionibus contrariis illam amplecti, quam magis piam ac Veritati propiorem arbitrentur. At, inquit, *numquid inter leges sanctissimas non est Virginem venerari?* Procul dubio. Consequentiam nunc infer: Ergo credere ac tueri sententiam Scotisticam lex est Ecclesiæ Catholiciæ. Quis non intelligat, quam claudio seu nullo pede argumentum procedat? Venerari Virginem lex profecto sanctissima est. At nulla lege jubentur Catholici eam quoque credere sine originali culpa conceptam. Nam & qui contra sentiunt, Virginem venerantur, & cultui erga illam debito nulla ex parte defunt. Ad hæc: quando Parthenotimi ratiocinatio vim habitura hæc esset, & lex universalis ab eo producta complecti deberet hunc etiam casum singularem venerandæ Virginis, eam credendo in Conceptione immaculatam: nonne is videt, non sibi tantum, sed omnibus Catholicis eligendam esse mortem pro tuenda eadem sententia, ne venerationi erga Deiparam desit? At istud ab omni veritate alienum est, neque id Parthenotimus ipse diffitetur. Ergo prima ejus ratio extra officinam rectæ ratiocinationis fabricata est.

Addit ille eadem pagina 18. *Non Martyr esset pie vovens, quia assentitur Immaculatae Beatæ Virginis Conceptioni, nec pro ejusdem directæ Certitudine, quæ nondum est de Fide, mortem oppeteret, sed pro defensione Sanctitatis Marianæ, quæ Virtutem Religionis sapit: & hæc est illa Veritas, pro qua moreretur.* Alterum paralogismus habemus. En ejus argumentatio. Defendere Sanctitatem Mariæ spectat sine dubitatione ad Virtutem Religionis; & qui Sanctitatem Mariæ suo sanguine testatur, recte facit, & Martyr certissime fuerit. Atqui tueri suo Sanguine sententiam faventem Immunitati Marianæ, idem est ac tueri Sanctitatem Mariæ. Ergo hanc sententiam suo Sanguine propugnans, recte facit, atque inter Martyres numerabitur. Hæc, puto, Theologi Siculi mens & argumentatio, neque alia esse potest. Et sane si syllogismus veritate nititur, longe Majus Bonum est propugnare Sanctitatem Virginis, quam parcere Vitæ nostræ. Verum falsitate omnino laborat Minor. Ecquando enim Catholica Ecclesia sen-

fenfit, pendere Sanctitatem Mariae ex illius exemptione ab Originali peccato? Sancta & Sanctissima semper fuit, est, & erit supra omnes mulieres, supra omnes Sanctos, & Angelos, Beatissima parens Salvatoris nostri, sive fuerit, sive non fuerit concepta sine originali peccato. Tot quoque in coelis cum Christo regnantes ut Sanctos colimus, quorum Sanctitati nihil detraxit, aut detrahit, incurrisse culpam primi parentis. Neque sine temeritate dices, derogari Sanctitati Virginis ab iis, qui contrariae sententiae de illius Conceptione adhaerent. Nam & isti nemini conoedunt in fovenda ac promovenda veneratione erga Reginam Sanctorum; eosque non Apostolica tantum Sedes, & Ecclesia universa ut pios & orthodoxos Catholicos habet; amat, arque honorat: secus actura, si Mariae Sanctitati contraria illa opinione aliqua ex parte officeretur. Adcedit, quod si Deiparae Sanctitas cum Scotistica sententia connexa reapse foret, uti opinari videtur Theologus noster, inde rursus consequeretur, non Parthenotimo tantum, sed & Catholicis omnibus dandam esse Vitam pro tuenda eadem sententia Scotistica, quippe jubemur cuncti Sanctitatem praecelsae Genitricis Dei capite etiam nostro tueri. Quis autem hoc unquam somniavit? Sophismate igitur laborat altera haec etiam argumentatio Siculi Scriptoris; immo si intime expendatur, in gravem injuriam vergit Apostolicae Sedis, perinde quasi non satis ei curae sit de Virginis honore; ejusque Sanctitatem minui, aut laedi sinat a tot Catholicis, qui Thomisticam sententiam Scotisticae praeferunt in ejusmodi Quaestione. Plura non addo; infra enim haec eadem consideratio recurrit.

Tertio Parthenotimus idem pag. 18. nobis edicit, mortem oppetere pro tutela sententiae a se propugnatae, non aliud esse, quam *mori pro Pietate, quae certo inest actui Opinativo, ut se morituros spondens pie:voventes pro Immaculata Conceptione*. Verum & heic latet ingens aequivocatio, quam necessaria distinctio proderit! Non enim idem est *Pietas*, quae inest Dogmati Fidei, & actui Intellectus, credentis illud certum de Fide; ac *Pietas*, quae inest objecto tantum Probabili & actui Opinativo de re illa probabili. Prima est *Pietas intrinseca*, absoluta, & quae connexa ita est cum objecto, ut istud nunquam possit esse non Pium, & actus credentis non Pius. Altera vero *Pietas Opinativa* est, & quodammodo conditionata, sive *extrinseca*, & quae cum objecto ita conjungitur, ut separari ac tolli etiam possit. Vim enim suam sive firmam, sive infirmam recipit praedicatum *Pietatis a Veritate*, quae aut certa, aut incerta inest rebus sacris sive motivis affirmandi sive negandi aliquid de iis rebus. Nunquam non

Pium

Pium erit credere, Mariam fuisse semper Virginem, Mariam fuisse Matrem Dei, quia id *Verum* semper fuit, neque *Falsum* unquam id esse potest. At quae in Opinione adhuc versantur, saepe quidem *Pia* credere possumus, & vere *Pia* sunt non ratione certae ac stabili Veritatis, sed unius tantum Probabilitatis, quae sane potest Veritatem complecti, exemta tamen non est a formidine Falsitatis. Postremi hujus generis est sententia de Immaculata Virginis Conceptione, quae certe *Pia* est, sed conclusa intra limites Probabilitatis, hoc est innixa motivis Veritatis probabilibus, non ita consequenter firmis ac evidentibus, ut omnis formido abfit, ne aliquando possit apparere non Vera, atque adeo non *Pia*. Quod accideret, si forte Apostolica Sedes, quae judicium de hac re haecenus suspendit, sibi reservavit, contrariam sententiam cum divinis Scripturis ac Traditione concordi Patrum aliquando consentientem inveniens, eam inter Dogmata Fidei referret. Proinde recte quidem *Piam* appellamus Scotisticam de Conceptione sententiam; minime tamen *Pietas* haec aequiparanda est *Pietati*, quae inhaeret objectis ad Fidem spectantibus, atque intrinseca Veritate nixis; & praesertim quum nemo Fidelium vetetur *Piam* quoque credere oppositam sententiam, immo diserte sub anathematis poena illam prohibeamur appellare *Impiam* sive *Haeticam*. Adde, nos animadvertisse, dari *Opera* quaedam Intrinsece etiam & non Opinative *Pia*, non tanti tamen momenti, ut pro iis faciendis morti Vitam nostram exponere liceat. Quanto ergo minus licebit pro *Pietate Opinata*?

Nam *Pietas* ista opinione innixa, Probabilibus quidem fulcitur motivis, & sufficientibus, ut *Pium* nos facere opus credamus, ei sententiae adhaerendo. At neutiquam immutabili Certitudine constat, quum *Certum* non sit objectum, in quod illa fertur. Proinde non arbitretur Parthenotimus, se per hanc rimam evadere posse; hoc est non putet, sub specioso nomine *moriendi* pro *Pietate*, Sanguinarium a se posse Votum honestari. Ita moriens, adhuc pro Opinione quidem *Pia*, sed semper pro Opinione Vitam profunderet, Interea animadvertant velim Parthenotimi, clientes, jam confessum fuisse illorum Magistrum, non licere Sanguine asserere sententiam Scotisticam *tamquam Veram & Certam*: Nam & ipse agnoscit, nondum illam excessisse e finibus humanarum Opinionum, atque errori propterea obnoxiam esse posse, quando consentit, haberi de ea posse *actum* duntaxat *Opinativum*. Animadvertant etiam, quo effugio ille declinandam curaverit sui Voti censuram, contendendo videlicet, voveri Sanguinem non pro *Veritate*

tate

tate ac Certitudine ipsius Sententiae, sed pro *Pietate*, quae inest *Actui Opinativo*: quod tamen discipuli ejus ignotum plane sibi fatebuntur, ut puto, quum formulae voventium rotundis verbis exprimant tutelam non *Pietatis*, sed *Veritatis*, quae inesse certo creditur eidem sententiae. Haec signa labantis causae quis neget? Et praecipue quum ipsa Pietas hujus sententiae *Opinativa* sit, neque ejus vigoris, ut pro ea tuenda fas sit commutare Bonum Certissimum humanae Vitae. Quod stuporem augeat, verba tantum dare Theologus noster videtur, quandoquidem veluti oblitus *actus* sui *Opinativi*, alibi contendit, nobis persuasum esse posse, Scotisticam sententiam Certam esse, idque a Voti Sanguinari sectatoribus necesse esse ut credatur, si mortem sine Peccato, offente se occasione, tolerare velint. Accedit, quod ipse ex aliorum opinione alio in loco insinuat, posse etiam *divina Fide* credi Certam ejusmodi sententiam. Quare duas ego Conclusiones hanc in rem praemittendas censui.

C A P U T VI.

Minime immunis a crimine, qui vitam daret pro tuenda sententia Scotistica, ac si Fidei Dogma foret. Castrensis & Vasquii in banc rem auctoritas. Temere quoque agat, qui pro ejus tutela, quando nihil aliud sit nisi Opinio, in mortem incurrere velit.

PRIMO igitur statuo: *Temere quoque acturum, & graviter peccaturum, qui Mortem veller subire pro tuenda sententia de Immunitate Mariana, ac si ea esset Fidei Dogma.* Non heic multum immorabor; nam vel me tacente quisquis Christianae eruditionis rudimenta hausit, probe etiam novit nunquam spectasse, neque spectare ad Dogmata Fidei supranaturali credenda sententiam eandem. Proinde fallaci motivo, fallaci persuasione ductus, imprudenter vitam proiceret, qui eam ob causam sive fiduciam ultro in agone periret. Nostrium non est, Articulos Fidei, & Dogmata Ecclesiae procudere; sed quidem id munus est Ecclesiae, quae falli non potest. Et quoniam nemo ignorare potest, aut debet, in censum Dogmatum Fidei sententiam hanc post tantas ac tot disputationes nunquam fuisse investam, intolerandae propterea temeritatis ac superbiae, & consequenter Peccati reus esset, qui eam per-

pervaciter esse vellet, qualis non est, suumque judicium praeferret Prudentiae ac Scientiae summorum Pontificum & Ecclesiae. Graviori etiam censura tantam audaciam perculerunt celebres duo inter Theologos viri, atque ambo nihilominus Scotisticae sententiae propugnatores. Horum verba referre non inutile erit ad praesentem quaestionem; eaque ipsis Auctorum verbis accipere Lectorem non taedebit. Primus est Alphonsus de Castro Ordinis Minorum, qui anno 1547. suum Librum *de justa punitione Haereticorum* scripsit, & Carolo V. Imperatori dicavit. Quaerit ille Lib. I. Cap. VIII. *An ille sit dicendus Haereticus, qui alicujus hominis Opinionem tam firmiter tenet & docet, ac si esset Articulus Fidei; & ita pro illius Opinionis defensione est Mori paratus, sicut faceret pro illis, quae ad Fidem pertinere noscuntur.* En quae sit illius sententia. Ego quidem non dubitarem, saltem dicere Haereticum, propterea quod ille talis errat in Fide, & Pertinaciter. Omnis autem, qui post susceptum Baptismum Pertinaciter circa Fidem errat, concordi omnium recte sapiensium sententia censetur Haereticus. At, quod iste talis erret in Fide, quia forte aliquis dubitabit, dubitationis causam tollam testimonio Augustini, qui Errorum definiens in *Enchiridio* ad Laurentium Cap. XVII. sic ait: „ Nihil aliud est errare, quam Verum putare, quod Falsum est; Falsumque quod Verum „ est: vel Certum habere pro Incerto, Incertumque pro Certo, sive „ Falsum sit, sive Verum. “ Haec ille. Iste, qui alicujus Opinionem putat esse Catholicam Fidem, & tam firmo animo illam Opinionem ac Fidem Catholicam tuetur, Incerta tenet pro Certis. Ergo juxta Augustini sententiam errat. Praeterea iste sic sentiens, eo ipso Ecclesiae Catholicae contumeliam facit, & illam in Fide errare putat; quia illa, quae juxta istius sententiam sunt Certissima, Ecclesia tenet pro Incertis. Errat ergo judicio istius Ecclesia: quia, ut Augustinus dicit, errare est, Certum habere pro Incerto. Haec autem de Ecclesia, quae divino semper illustratur spiritu, quisquis putaverit, Haereticus ab omnibus Catholicis censetur: Merito igitur ille dicitur Haereticus, qui alicujus hominis Opinionem tam obstinato animo, ac Fidem Catholicam tuetur. Ita de Castro. At si quis forte minus intelligat, quid sit *Opinio hominis*, dubitetque, an veniat sub ejusmodi appellatione comprehendenda *Opinio* de Immaculata Virginis Conceptione, rursus idem Theologus loquatur. Is enim veluti futurorum praeficius, homines nondum natos praesensisse videtur, qui pro eadem Opinione Sanguinem se daturus voverent, eosque propterea his aliis verbis, seu telis, maturatione deterruit. *Ut autem (ita ille) clarius ostendamus exemplo, ali-*
quod

quod ob oculos proponere decrevi. Ecclesia nihil de Conceptione Deiparae Virginis hactenus definivit, an fuerit cum Peccato Originali, aut sine illo, concepta; sed libere cuique dimittis, ut, quam volueris de hac re, teneat Opinionem. Sic enim definivit Sixtus Pontifex huius nominis Quartus in Extravaganti, quae incipit Grave nimis: quam Decretalem Extravagantem Concilium Tridentinum Sess. IV. confirmavit. Si quis stante hac Ecclesiae definitione, alterutram Opinionem tam firmo animo sueretur, ut illam putaret esse Fidem Catholicam, & admonitus de hac re, in eadem nihilominus sententia tam pertinaciter perseveret, ut pro illa sit Mortem Subire Paratus: hic talis ABSQUE UL-
LA DUBITATIONE erit censendus HAERETICUS: quia Ecclesiae definitioni sic parere refugit, ut illam errare pertinaciter credat, quum ea, quae istius iudicio sunt Certa, illa (idest Ecclesia) pro Incertis teneat &c.

Commentario meo non indigent tam perspicua Alphonsi de Castro verba. Iis adtexo nunc & quae hanc in rem scripsit gravissimus alter Theologus & Societate Jesu, quem indicasse est. Nimirum Gabriel Vasquez in 3. p. S. Thomae Quaest. 27. Artic. 2. Disputat. 117. Cap. 14. eandem Castrii sententiam sub compendio sibi proponit, post pertractatam summa cum moderatione Quaestionem de Virginis Conceptione, atque in haec verba loquitur: Mibi MAXIME probatur sententia Alphonsi. Quis enim neget, cum errare contra Fidem Manifeste, qui affirmat, a Deo esse Revelatum, & divina Fide credendum, quod iudicat Ecclesia, nondum sufficienter declaratum esse, ut tanquam Revelatum ad Fidem Catholicam pertinere possit? Certe Ecclesia non definivit in praesenti Controversia, (idest de Conceptione Deiparae) Revelatum esse a Deo, aut de Fide esse, quod neutra pars sit a Deo ullo modo Revelata, aut quod utraque Incerta sit, neque divinae Revelationi subesse possit, ut aliquando definiri queat. Sed iudicavit, nondum esse sufficienter declaratum per Ecclesiam, ut tanquam Dogma Fidei a Deo vere Revelatum a Fidelibus credatur. Ad Ecclesiam autem, tanquam ad infallibilem Regulam Veritatis pertinet, unum ab altero secernere, hoc est credendum divina Fide, an non credendum divina Fide. Ac proinde qui dicit, aliquid esse credendum divina Fide, quod Ecclesia definit nondum esse credendum hac Fide, contra Regulam Veritatis & Fidei nostrae opinatur; ac proinde si scienter ita opinetur, HAERETICUS EST. Quum autem Ecclesia definit, nondum satis explicatum esse aliquid, ut credatur divina Fide, Revelationem habet a Deo. Nam Deus per Ecclesiam utroque modo no-

bis revelat Veritatem, nempe id, quod sufficienter declaratum est, & definitum, ut credatur, & id, quod nondum sufficienter declaratum, & definitum est, ut tanquam Dogma Fidei a Fidelibus babeatur: sed libere de illo opinari licet. Castrensis, & Vasquii sententiam probat etiam contra Suarium Theophilus Raynaudus in Diptychis Marianis.

Consisto heic, & e vestigio fateor, non semel Parthenotium protestatum fuisse, sibi loco Dogmatis divina Fide credendi non esse sententiam, propugnatricem Immaculae Conceptionis. Is etiam negat, Votum Sanguinarium ideo conceptum, quod ejusmodi sententia Certa de Fide a votentibus credatur. Mihi contra non videtur, & ne aliis quidem videbitur, esse haec mens ejusmodi Votum concipientibus. Ut infra patebit, non aliunde originem traxit hoc Votum, nisi e quorundam Theologorum Hispanorum persuasione, quibus Scottistica sententia ad tantam Certitudinem visa est deducta, ut laudandus foret, immo *Martyr* esset dicendus, qui pro ejus Veritate mortem obiret. Nam & Granadus, & alii scribere, posse Christianum divina Fide credere, sine labe Virginem fuisse conceptam, quoties sibi persuadeat, id fuisse a Deo revelatum. Et nostris temporibus Viva in Trut. Theol. ad Proposit. XXI. damnatam ab Innocentio XI. haec ait: *Equidem censeo, posse Immaculatam Virginis Conceptionem Fide divina credi ab eo, cui moraliter constat, eam esse implicite in Scriptura revelatam.* Quippe, ut idem scribit, *haec probabilissime, immo etiam cum morali Certitudine ex Scripturis eruitur, & est proxime definibilis a Pontifice, praesertim post decretum Alexandri VII. decernentis, cultum Conceptioni Virginis exhiberi ab Ecclesia secundum piam sententiam, quam fere omnes Catholici amplectuntur.* Arripe hanc praemissam: tum ei alteram adijunge e Cardenas in Crisi Theol. Tract. I. Disput. 9. num. 265. *Post Bullam Alexandri VII. quosquos de Conceptione scripserunt (praeter Caramuclem, & Murciam) affirmarunt, Sententiam piam esse in statu Certitudinis, non Fidei (scilicet manantis ex Dei revelatione, quae sit ab Ecclesia Fidelibus proposita) sed Moralis, Physicae, & Metaphysicae.* Ergo secundum ista principia inferre quisque poterit: Quicumque firmam Certitudinem de ea sententia habent (ii autem praecipui sunt, qui Votum Sanguinarium edunt pro ejus tutela) possunt credere, atque ut ego opinor, revera credunt Fide divina Virginem sine labe fuisse conceptam. Quod si ita est, videant illi, quae se subducere possint censurae Castrii, Vasquii, & Raynaudi. Neque enim ad eam enervandam prodest asserre Constitutionem Alexandri VII. quum luce meridiana clarius sit, eum mi-

nime retulisse inter Fidei Dogmata sententiam Scotisticam, atque injurios esse Pontifici illi, quando contradictionem in ejus Bullam invehere videntur, quasi is controversiam hanc dirimendam Sanctae Sedis reservavit, & nihilominus eam diremerit, favendo iis, qui sententiam Scotisticam tenent, & secundum illam celebrant Festum Conceptionis. Quoniam vero Parthenotimus agnoscit, non esse hanc sententiam ex iis, quae ad Fidei Dogmata pertinent, ac tacite etiam improbare illos videtur, qui morti sese offerrent pro sententia hujusmodi, contendendo eam esse de Fide; progrediamur.

Dico ergo secundo: *Temere isidem alturum, & peccaturum, qui Vitam suam impendere vellet pro defendenda eadem sententia, quando eam putet, minime Certam esse, neque spectare ad Fidei doctrinam.* Et ratio est, quia sententia Scotistica, etiam post Alexandri VII. Constitutionem, nondum supergressa est limites humanarum Opinionum; ac propterea ita Certa esse non potest, ut excludat omnem formidinem Erroris. Contra Certum de Fide est Praeceptum servandae Vitae nostrae, & de hoc nemo dubitat. Quum vero Certum quoque sit, & extra controversiam positum, Imprudentiae, Temeritatis, & Peccati Reum fore, qui pro Incerto Bono Certum commutet: necessario consequitur, Temere atque Illicite mortem eligi pro tutela ejusdem sententiae. Rursus, ex quo aliquid intra limites humanarum Opinionum concluditur, nunquam potest esse ejus pretii atque momenti, ut aequet pretium tanti faciendum Vitae nostrae. Ex quo enim subesse potest Error Opinioni illi, quantamcunque speciem majestatis ac pulchritudinis objectum gerat, Minus semper erit Bonum istud (quandoquidem Certi nondum sumus, aut esse interim nequimus, quin possit esse Falsum) prae Bono Certissimo, ac summe pretioso Vitae nostrae, cujus curam novimus solícite commendatam, immo sub poena gravis Peccati mandatam nobis a Deo fuisse. Supra vidimus, frustra memorari a Parthenotimo exempla quaedam laudatissima eligentium mortem, quamvis directè in iis de abjurandis Fidei Dogmatis non agatur. Illa nempe tunc jure laudata, quando pro aequo Certo, simulque Majori Bono, Vita datur: quod in casu nostro nequaquam accidit. Atque heic Parthenotimus capitis sibi cari Conclusionem me addere sinat. Is est nuper mihi laudatus Theophilus Raynaudus e Societate Jesu, doctissimus & celebris Scriptor, quem fortassis ego pluris quam Parthenotimus ipse, facio. Itaque ille in Tractat. de Martyrio per Pestem, Part. II. Cap. 2. num. 18. quarens, quid dicendum sit de oppetente mortem *pro motivo non aperte*

idoneo, aut dubio, haec edicit. Statuendum est, Vitam TEMERE, nec absque SCELERE, atque adeo sine Martyrii fructibus abjiciendam pro assertione alicujus Propositionis, cujus Veritas non sit in Ecclesia prorsus rata, ita ut non sit exploratum, quod ejus assensus a FIDE edicatur. Quum ergo exploratum sit, ipso Parthenotimo fatente, non edici a Fide assensum sententiae de Immunitate Virginis; certumque sit, ejus Propositionis Veritatem in Ecclesia Dei ratam non esse, hoc est. Firmam & Certam: quid aliud restat, nisi Temeritatis & Sceleris reum esse, qui pro ejusmodi sententia tutanda Sanguinem & vitam fundere velit? Neque pluribus fortasse heic opus, quum in eandem ferme Conclusionem universalem conveniat vel ipse Parthenotimus, scribens pag. 15. Nullus Theologorum est, quod ego sciam, qui asserat, posse quempiam honeste (hoc est licite) mori ob causam Immaculae Conceptionis, si haec tantum sit Opinio, & pro mera ipsa Opinione Sanguinem profundere quis velit. Idem ab eo infra pag. 18. repetitum videas, & quidem non sine animi commotione. Quis, ait, unquam somniavit, pro incerta Opinione fas esse jugulum offerre carnifici? Immo addit haec praesertim nobis adnotanda: At mori pro Pietate, quae certo inest Actui Opinativo, ut se morituros spondent pie votantes (Sanguinem pro Immaculata Conceptione) & Majores nostri docuere, & Posteris nostri, dummodo dociles, discent. Quibus verbis diserte fatetur, eos, qui Voto Sanguinario sese obstringunt, minime vitam dare velle pro Actui Opinativo de Immunitate Virginis, quem ne ipse quidem praestare potest nixum fundamento Certo, & in Ecclesia rato; sed quidem pro Pietate quae certo inest Actui Opinativo. Lectores rogo, ut confessionem hanc Parthenotimi e mente sua, suisque ex oculis elabi non sinant. Jam enim multum itineris progressi sumus, quando Theologus noster factus est, non licere mori pro Opinione, neque revera suos Votantes pro Actui Opinativo de Conceptione Immaculata morti sese tradere.



C A P U T VII.

Quae vera & germana Pietas sit. Pium est propugnare sententiam, quae statuit experiem maculae Deiparam. Impium pro ea sententia occumbere velle. Opiniones piae laudandae, laudanda earum sueta. Sed minime pro illis Sanguine suo pugnare. Persuasio Veritatis nevisquam idonea ad honestandum Votum Sanguinarium. Neque Probabilitas.

SED quia sacrum nomen *Pietatis* exeruit Parthenotimus, ac sub ejus umbra confidit, ut vidimus, Sanguinarium suum Votum a censura se posse vindicare, jam res poscit, ut dilucidius explicem, quid hoc nomine significetur, ne fucum nobis faciant speciosae quaedam voces, quarum non bene perspecta significatio lites parit, & bene perspecta dirimit. *Pietas* ergo, quae apud Graecos *εὐσέβεια*, *verum cultum* significat, atque a Sancto Augustino in Epistola CLV. olim LII. dicitur *verus Dei cultus*. Quidquid igitur pertinet ad verum Dei cultum, qui etiam complectitur honorem debitum Deiparae, ceterisque Sanctis, & rebus sacris, *Pium* recte appellatur. *Pietas* autem, uti Virtus, seu uti donum Dei, est *habitualis dispositio animae, qua prompte mobilis est a Spiritu Sancto ad habendum filialem affectum ad Deum, ut ad patrem, eumque colendum, & amandum, ea ratione, qua ipse vult a nobis coli & amari*. Additamentum feci verbis Angelici Doctoris 2. 2. Quaest. 121. Artic. 1. Pietatem definientis, utpote nobis nunc necessarium. Sed sollicite animadvertendum est, non tantummodo *Pium* dici, quidquid certo per Fidem credimus, sed etiam, quod probe & prudenter verisimilibus rationibus ducti opinamur placere Deo, sive sententiis, sive actionibus nostris. *Pietatis* etiam nomine intelligere possumus obsequium & affectum nostrum erga Deiparam, cujus *Veneratio* & *Cultus* revera ad ipsum Deum refertur, & inter munera Christianae Religionis enumeratur, quum in sanctissima illa & benedicta supra omnes mulieres, dona Dei effusiora, quam in reliquos Sanctos, venerari nos jubeat Ecclesia, aut gratum habeat. Quum vero, ut supra monui, Parthenotimus praesenserit, temere Bonum Certum vitae nostrae profundi, nisi hoc demus pro consequendo aequae Certo ac Majori Bono;

no; & rursus animadverterit, ejusmodi Certitudinem desiderari posse in Veritate Sententiae Scotticae: eo tandem se recepit, ut diceret, *Pietatem* esse illud Bonum Certum, pro quo Voti Sanguinarii fautores putant licere sibi Vitam commutare. Quis enim neget, quin *Pia* sit Scoti sententia, quando *Piam* Alexander VII. ut alios omittam, eam appellavit? Ad haec venerari Virginem, ejusque privilegia & gloriam depraedicare atque tueri, *Pietatis* opus est, illudque *Certum*. Ergo pro isto Certo Bono prudenter & cum laude jugulum Tyranno offeratur. *Certe*, inquit ille pag. 59. *facinus est Opiniones aequare Veritatibus Fidei. At Vovens, non pro Opinione, sed pro Deiparae Cultu moreretur*. Et pag. 58. *Etiam Religio Virtus est: ad Religionem, aut ad Virtutem huic affinem (idest ad Pietatem) pertinet Virginis Cultus*. Et pag. 19. *Virtutis opus est, Virginem ut a labe immunem venerari, quia Pium est, ipso fatente Pristano*. Ita ille, unicam denique rationem statuens honestandi Voti Sanguinarii in speciosissimo nomine *Religionis, Pietatis, Cultus Deiparae*. Neque dubito, quin primo aspectu ejusmodi rationem complures acceperint, ut aureum, legitimumque numisma. Sed quid, si & hoc adulterinum, falsumque, ad lydium lapidem Logicae verae, ac verae Theologiae agnoscamus?

Et sane ad hoc ut hominum sententiae ac opera sint actus verae ac germanae Pietatis atque Virtutis, debent, uti praefatus sum, versari in *Cultu vero veri Dei*, ejusque Sanctorum; hoc est exhibere Deo, ac Beatis civibus caeli Cultum illum atque honorem, qui a Deo ipso per Ecclesiam probetur, eique placeat. Si enim Deo aut, Coelitibus, alium honorem, cultumque exhibemus, qui a Deo diserte, sive ab Ecclesia improbetur: non amplius vera, sed spuria est nostra Pietas; neque Virtus, sed Vitium, & quandoque Peccatum & Impietas in Opinionibus, Operibusque nostris deprehendetur. Notissimum est facinus Collyridianorum, qui Mariae sacrificium offerebant. Nempe, ut scribit Sanctus Epiphanius Haeresi LIX. sive LXXIX. *mulieres quaedam currum sive sellam quadratam adorantes, ac linseo desuper extenso, sollemni tempore per aliquot dies panem proponunt, & in Mariae nomen offerunt. Tum ad unam omnes illo vescuntur*. Liquido non constat, in quo situm foret muliercularum illarum delirium; attamen quum ex hujusmodi actione aut constaret, aut probe inferretur, illas uti Deum habere, ac adorare Mariam: propterea Epiphanius in eas invehitur, earumque stolidam aut impiam oblationem execratur, in haec tandem verba definens: *Maria in honore sit; Dominus adoretur*. Pium opus se peragere, ut puto, arbitrabantur mulieres illae: at quia opus

opus illud a Deo minime probabatur, etsi affectus bonus fortassis erat, actio tamen non Pia, sed Impia evadebat. Quare omnes intelligunt, Parthenotimum nihil pro sua causa agere, quum licere ait, ac laude dignum esse, mortem oppetere pro tuenda sententia Scotistica de Conceptione Virginis, quia illud est mori pro *Pietate* pro *Cultu*, pro *Veneratione* Deiparae. Adhuc enim inquirendum atque ostendendum restat, num pro illa sententia mori sit verus Cultus ac Veneratio Mariae, hoc est, an Opus sit a Deo per Ecclesiam probatum, ac Deo gratum. Heic rhodus, heic saltus. Certissimum quippe est, spectare ad Religionem Catholicam Cultum Beatissimae Matris Dei; at minime Certum est, quaecunque homines sentiunt, aut agunt pro illius Cultu ac honore, placere Deo, ac Virgini ipsi; quum multa quoque sint, quae Christiani sensere, scripsere, aut egere, persuadentes sibi, se honorem deferre Virgini; & nihilominus aut temeritate ac imprudentia, aut superstitione, aut impietate non caruerunt eorum Opiniones atque opera. Vide *Diptycha Mariana*, mihi semper laudanda, Theophili Raynaudi e Societate Jesu. Felicia nimirum forent deliramenta omnia in Religionis negotio, si eis per portam, quam nimis amplam Parthenotimus aperuit in sacrarium Pietatis ingredi liceret. At heic Siculus ingeminet: Nonne & tu fateris, *Pium* esse amplecti, docere, ac tueri sententiam excludentem a Virgine labem Originalem? Utiq; & lubens repeto. Ergo subdet ille, *Pium* quoque, & Pietatis opus erit, Vitam pro ejus sententiae tutela impendere. Consequentiam nego, & addo: Immo scelus erit, & a Pietate alienum, atque adeo imprudens facinus, simulque Peccatum, Sanguine suo eandem propugnare sententiam.

Animadvertendum quippe est, occurrere heic duas Quaestiones inter se plane diversas. Prima, *an Pium sit tueri voce & scriptis sententiam de Immunitate Virginis*. Altera, *an Pium sit, eandem Sanguine etiam & Vita tueri*. Prima affirmative resoluta, sine dubitatione Certa est apud omnes Catholicos, firmata nimirum suffragio Apostolicae Sedis, ea tamen conditione, ut eam tueamur, non uti Fide divina credendam, sed uti Probabilem ac Piam. Altera negative resolvenda est: non enim ullum Ecclesiae suffragium pro ea adferri potest; neque haec cum superiore confundenda est; & perperam fluere ista creditur ex altera. Nam in istam Propositionem novum subjectum, atque illud illicitum, confertur, per quod omnino immutatur innocens ac honesta qualitas prioris Propositionis. Nimirum *Pium* & innoxium est, pugnare voce & scriptis pro sententia Scotistica, quia teste Romana

mana Ecclesia nondum constat, an eadem adversetur Scripturae Sacrae, immo cohaerere cum ea posse videtur: licitumque propterea est ac laudabile, tenere interea, ac docere (uti fit in tot aliis Quaestionibus Theologicis) quod Verisimilius ac Probabilius creditur, quando certa Veritas adhuc obtineri non potest. Nullum vero inde manat incommodum in Ecclesiae doctrinam, nullum in Reipublicae tranquillitatem ac regimen, sicuti neque manat e tot aliis Quaestionibus & Quodlibetis (ut appellant) quae a multis Seculis agitantur in Scholis. At alterius plane generis est tutela Immaculatae Conceptionis, quando eam vis Sanguine ac Morte tua propugnare. Etenim Pium non est, immo est Impium, prodigere Bonum Certum ac pretiosum Vitae nostrae pro Opinione, seu pro Bono Incerto ac Minori, quam ipsa Vita. Pium est, ac Virtutis opus, ut exemplo utar, e propriis fortunis Eleemosynam propter Dei amorem pauperibus praebere. Contra desinit esse Pietas, ac Scelus evadit, Eleemosynam conferre inopi e bonis non nostris, eorum domino minime consentiente. Quia non sunt facienda Mala, ut eveniant Bona; neque licet furari, ut Eleemosynam faciamus. Pium est, sacrarum Reliquiarum possessionem sibi procurare. At eas dolo aut vi aliis eripere (quod olim in more fuit) crimine & Impietate non caret. Ita Pietatis ac Religionis opus est tueri rationibus sententiam de Conceptione Scotisticam; nefas contra est illam tueri Sanguine nostro, quia Mandatum Dei *Non Occides* obstat: & Suicidii reatum non effugit, qui alienis manibus occidendum se offert sine necessitate, sine Ecclesiae suffragio, atque a deo suo tantum arbitrio, atque imprudenter, ut Opinionem videlicet propugnet, cujus est adhuc Veritas dubia. Quonam ergo abeat decantatum suum *Mori pro Pietate, Mori pro Cultu, ac Veneratione Virginis*, ex his intelligere potest Parthenotimus: intelliget saltem, qui sine ullo amore ac odio ista meditetur. Ille verus est Dei & Virginis Cultus, quem Ecclesia probat: Vitam vero dare pro Opinionibus, nunquam probavit Ecclesia, Prudentiae magistra. Quod si non est verus Deiparae cultus, Vitam pro incerta adhuc sententia Scotistica impendere, consequenter neque erit vera Pietas, sed quidem facinus imprudens, & in quo non immerito Superstitionis vitium sapientes timeant, aut intueantur.

Ut autem evidentiis Lector perspiciat, quam falsam Regulam Parthenotimus in sententiae suae praesidium adsciverit, illius confectaria perversa perscrutari pergamus. Innumera sunt Miracula, & Acta Sanctorum, in divinis Libris minime comprehensa; innumerae sunt
eorum

eorum Reliquiae; innumerae Opiniones Theologicae in Scholis, aliaque multa ad Historiam Ecclesiasticam spectantia. Quotiescunque verisimili ratione spectare ista noscantur ad cultum & gloriam Dei atque Sanctorum; neque appareat figmenta esse, aut repugnare doctrinae Ecclesiae: possunt haec omnia in censum venire *Pietatis*. Et quamquam divina Fide credenda non sint, *Opiniones* tamen *Piae* ac laudabiles sunt; easque Ecclesia aut laudat, & gratas habet, favoreque & Indulgentiis interdum prosequitur; aut saltem tolerat, quia etsi materialis aliquis populi Error sese iis immiscere possit, nihil tamen iste orthodoxiae Religionis officere potest. Si legitima foret producta a Parthenotimo Regula, jugulum pro his omnibus offerre liceret. Et quidni? Eset hoc *Mori pro Pietate, quae certo inest actui Opinativo*, ut is ait pag. 18. Eset actus *Virtutis, Religionis, Cultus Dei, aut Sanctorum*, ut is alibi scribit. Verum abeat ac absit e Christi Fidelium mentibus enormis haec Regula, & fallacissima doctrina, quae aut stoliditatis, aut Superstitionis, aut Fanaticismi dedecus ac reatum, aut saltem Imprudentiae culpam saepe in nos derivare posset. Habemus enim Opiniones non paucas de una re contrarias in Scholis, quales sunt, exempli causa, de Quaestione illa: *An etiamsi Adam non peccasset, Verbum Divinum sumturum carnem humanam fuisset*: & quales peperit celebris controversia de *Auxiliis*, sive de *Gratia & Libero Arbitrio*. Contrariae autem Opiniones istae, quia ad cultum Dei pertinent, atque ad sacram doctrinam, neque in Fidei Dogmata ulla ex iis impingere censetur, *Probabiles* propterea ac *Piae* appellari non injuria possunt ac debent. Quid ergo Catholici, eoque magis quid Heterodoxi dicerent, si quos cernerent pro hisce oppositis sententiis tuendis Vitam vovere, aut reapse Mortem subire? Omnium animos, ut puto, horror invaderet. Ad haec inter tot objecta *Pietatis Opinativae* fieri non potest quin multa, aut saltem aliqua ex iis Errori sint obnoxia, & Falsitatem contineant. Vastum ac insigne Opus percurrere, hoc est, Acta Sanctorum a Patribus Antuerpiensibus Societatis Jesu collecta ac illustrata. Ibi occurrent non una unius Sancti Corpora, & multiplicatae per varios Populos eadem sacrae Reliquiae, quibusque contententibus legitima ac vera esse sacra illa Coelitus pignora, quae ipsi possident. Et sane unicuique licet habere suis honorem, veteremque de iis Opinionem Piam tueri. Immo Apostolica ipsa Sedes Indulgentias, alioque favores non raro eam ob causam diversis iis Populis atque Reliquiis elargitur. Da nunc mihi homines, qui pro tuenda Pia ac Probabili Opinione, quam fovet de Sanctorum suorum

Lipſanis, mori etiam eligant: nonne meridiano Sole clarius eſt, ex illis aliquos pro Errore ac Falſitate Vitam daturos? Unum tantummodo ex iis ſacris Corporibus aut pignoribus Verum ſit, cetera Falſa, neceſſe eſt. Fortaſſis etiam interdum ne unum quidem e controverſis præſtare Verum ac Certum poterimus. Eorum ergo, qui pro hiſce Opinionibus prodigi forent Vitæ, quis non argueret Zelum ſine ſcientia, Pietatem ſine Prudentia? Aut depravatæ imaginationis, aut temerariæ pervicaciæ facinus eſſet mors eorum ſpontanea. Et niſi invincibilis ignorantia illos excuſaret, reos ſe proderent male cuſtoditi Depoſiti, & quidem pretioſi, ſibi a Deo crediti, quando illud pro Errore perderent.

Uſus autem & hoc ipſo argumento fuerat Pritanius, quum contra Votum Sanguinarium ſcripſit, in hæc verba loquens Lib. II. Cap. VI. pag. 256. Editionis Pariſienſis. *Et tamen ſi hoc ſerendum eſt, non video, quæ in immenſum protendere non liceat novum hoc Martyrii genus. Nam & alii vitam vovebunt, atque exponunt, quo exempli cauſſa Lauretanam Aedem ſuſtineant Servatoris Conceptione illuſtratam revera fuiſſe; & Franciſco Aſſiſſinati, atque Catharinæ Senenſi, Stigmata fuiſſe divinitus impreſſa, & ab aliis Sanctis viris miracula quædam procul dubio fuiſſe patrata. Quod certe in Eccleſia Dei nunquam tolerandum, ne idem divinis atque humanis habeatur honor, neve temere, & pro Mendacio interdum projiciatur pretioſa hominum Vita.* Heic inſurgit Parthenotimus, atque inter cetera reſpondet pag. 79. *In primis homo, qui non moderatè ingeniū tantum, ſed Moderator ingeniorum videri vult, caſtigatius, reverentiusque hoc loco loqui debuit; & non Mendacii nomine ſugillare directam ipſam ſententiam de Virginis Immunitate, etiamſi permitteremus eſſe meram Opinionem.* Sed parcat Parthenotimus mihi verenti, ne docti Panormitani, immo & reliqui Literarum cultores, ad hunc locum continuo exclament: Quæ Theologum iſtum idoneum ad hocce nodos extricandos, & Veritatem in quæſtione iſta detegendam arbitremur, quando is ſibi videre viſus eſt, Pritanium Mendacii nomine ſuggillantem directam ipſam ſententiam de Virginis Immunitate? Proſtant ejus verba. Caecutiut oportet, qui Pritanii verba non videt cadere in Opiniones Pias, a Scotiſtica de Conceptione omnino diverſas. Harum infinitus eſt numerus; & quum inter eas aliquæ ſaltem Falſo niti poſſint motivo, etiamſi Piae dicantur, quicumque pro iis tuendis occumberet, pro Mendacio occumberet. Hæc in omnium oculos incurrunt, præterquam unius Parthenotimi, qui quum calumniam heic dedita opera ſtruere voluiſſe credendus

dus non sit, fateatur saltem, se non ea tranquillitate animi & ingenii ad controversiam istam accessisse, quae ad Verum e Falso discernendum necessaria est. Ego interea perpendam, quae is habet de Lauretana Aede; inquit enim pag. 76. *Si cui persuasum sit, Deiparae benedictum esse tueri, quod Lauretana Domus fuerit servatoris Conceptione illustrata, esset item honestum hanc ob causam mori. Lauretanae Domus exemplum, quo Lamindus adversus pie Voventes utitur, in Lamindum pie Voventes hoc pacto remittunt. Honestae mortis periculum subires, ut barbarum arceret militem, qui Lauretanae Domui minaretur excidium: & nedom quia dulce & decorum pro patria mori, Horat. Od. 2. verum etiam, quia pro servanda ab excidio Domo, quae fecit Servatoris Conceptione illustrata, moreretur. Cur ergo honestum non erit mortis subire periculum, immo & mori, ut ab omni labe defendatur Immunitas Virginis? Disparitatem exempli nemo non videat. Licitum est, omnium Theologorum consensu, non Lauretanam tantum, sed & reliquas sacratas Aedes, & patriam, & vitam propriam, immo & fortunam suas tueri cum periculo etiam vitae propriae, si eis injustus aggressor excidium inferre velit. Parum dixi: licet etiam injustum ipsum aggressorem remove, inferendo ei mortem, dum fiat cum moderamine inculpatae tutelae, & de re maximi momenti agatur. At qui in Lauretana Domo tuenda mortem incurreret, Vitam non daret pro tutela pie Opinionis suae, sed pro defendendo celebri illo Christianae Pietatis loco, ejusque sacra Imagine, atque thesauro: quae omnia quum Certa sint ac pretiosa bona, propterea pro iis exponere periculo Vitam licet. Contra, si tutor iste Lauretanae Aedis, sine armis, sine spe ac animo pugnandi, sese objiceret Turcarum turmae, sacrum illum locum invadenti, barbaris indicens, prius se trucidandum, quam fores intrent; Vitam temere ac imprudenter projiceret. Excusandus fortasse foret, non certe laudandus, quippe neque ad tutelam sacratissimae Aedis, neque ad tutelam pie Opinionis suae, se trucidandum offerret impiis, sed ut improvido Zelo suo sine ulla necessitate aut utilitate satisfaceret.*

Verum nihil est quod ad emendicatum atque inopportunum exemplum Parthenotimus heic recurrat. Teneat germanum, quod Lamindus proposuit. Si Tyrannus (quod Deus avertat) Panormi Parthenotimum ipsum ad suum tribunal deductum interrogaret, an credat quae de origine Lauretanae Domus feruntur, mortem minatus, si credat. Satis ille jam prodidit, quatenam futura foret responsio sua; nempe se nihil horum pro certo habere, officiose recusaturum dulce

donum mortis sibi a Tyranno oblatae pro tutela tam Piae Opinioni. At inquit ille: mihi persuasum non est, sive propugnetur, sive non propugnetur haec Opinio, crescere quidquam posse, aut minui Virginis honorificentiam. Ceterum *si cui persuasum sit, Deiparae honorificum esse, tueri Opinionem de origine illius sacri loci, esset bonum hanc ob causam mori*. Animadvertant heic Lectores, in quo Theologus noster statuatur causam, cur honesta ac laudanda foret hominis mors, videlicet in *Persuasione* de re grata Deo ac Virgini. Principium utique fallacissimum, quia sine ulla restrictione propositum. Si enim *Persuasio* sufficit, quam in cerebro suo procudere quisque potest, pro adducenda prudenter in discrimen Vita sua; jam nulla erit anilis fabula, nulla Superstitiosa Devotio, nullus in Pietate excessus, quem quilibet non censeat se posse legitime vel moriendo tueri. Circumcelliones ipsi non amplius damnandi, sed commendandi forent, uti & qui Idola Ethnicorum sine ulla necessitate frangerent, aut Turcarum Mescitas incenderent. Videat Parthenotimus, quot & principiis suis absurda consequantur, & saniora quae nos doceat. At qui prudentem *Persuasionem*, reponet ille, volui heic designare. Ut lubet. Attamen sapientes iterum ei instabunt his verbis: Et si *Persuasio* prudens, quod aliquid placeat, sive honorificum sit Deo & Sanctis, sufficiat, ut Opinionem unam alteri praeferamus, ac voce & scriptis tutemur: nunquam tamen sufficiet, ut pro nostra illa Opinione defendenda in necem nostram conspiremus. Hoc enim pacto pro tuendis contrariis de una eademque re Opinionibus, Christi Fidelibus Vitam suam vovere fas esset, quum persuasum tam istis, quam illis esse possit, sententiam suam honorificam esse, aut placere Deo & Sanctis. At quis hoc ferat in sanctissima ac prudentissima Religione, quam profitemur? Ad haec: si sufficit ista *Persuasio*, jam in manu privatorum hominum jus propriae Vitae relinquitur: atque ut sunt fere omnium superba, simulque levia multorum ingenia, plerique contentent, se prudenter opinari, sibi *prudentem esse Persuasionem*, atque adeo licere sibi pro illa in mortem ruere. Anne haec toleranda, quum tam facile Vita possit hac ratione pro *Errore* profundi? Nusquam gentium sane. Parthenotimo ipsi, ut reor, Fanatici, Imprudentes saltem, viderentur Colonienfes, qui freti spisso Opere P. Crombachii, ac Opinione Majorum, pro tuenda Historia Undecim millium Virginum, aut pro trium Regum Magorum Corporibus ad se adveniens, carnifici collum offerrent: aut Hispani, qui pro tuendis tot Sanctis, nulli veterum notis, & nihilominus in eorum Martyrologium

a Tamayo intrusis, & a Cardoso in Lusitanicum, ex auctoritate duntaxat quorundam Chronicorum (bone Deus, qualium!) hoc est Flavii Dextri, Liutprandi, Juliani Toletani &c. fortiter, sed temere occumberent. Non ergo deducendum jus voluntariae cladis nostrae per aliorum manus e *Persuasione* nostra, quum Sapientia Proverb. III. edicat nobis: *Ne innisaris Prudentiae tuae*; neque iudicio proprio in re tanti momenti fidendum sit; sed tantummodo petendum istud jus e voce Ecclesiae, falli nesciae, quae Dogmata & casus statuit prudentissime impendendi Vitam nostram, si occasio ferat. At haec nunquam profecto decrevit, neque decernet, licere pro Opinionibus jugulo nostro pugnare, quantumcumque persuasum sit nobis placere illas, atque honorificas Deo & Sanctis esse. Prudentiae quippe & rectae Rationi adversabitur, pro sententiis, de quarum Certitudine certos nos Ecclesia non fecerit, Certum & pretiosum pignus Vitae profundere.

Attamen heic Voti Sanguinarij patronus aurem mihi velleit, iniquiens pag. 60. *Quod si Laminus Prudentiam inde impugnet, quod in Re Incerta hic versamur: egregie fallitur. In primis memineris fas est, ad prudenter operandum non requiri perfectam Certitudinem.* „Materia moralis (quae plerumque est materia Prudentiae), talis est, quod non est ei conveniens perfecta Certitudo „docuerat D. Thomas Sect. „3. in Lib. I. Erbic. Aristot. Subscribit Divo Thomae Divus Antoninus I. part. tit. 3. cap. 10. §. 10. „Certitudo, quae requiritur „in materia morali, non est Certitudo evidentiae, sed probabilis conjecturae“. Haec Parthenotimus. Fuissem hercle miratus, si Theologus noster clypeum quoque non arripuisset e ditissimo Probabilismi armamentario. Nimirum, si illum audimus, etsi Certitudinem evidentiae non habeat sententia de Immaculata Virginis Conceptione, *Probabilitas* tamen in ea neutiquam desideratur. Atqui Prudenter operatur, qui in materia morali, deficiente Certitudine evidentiae, Probabili conjectura se regit: Ergo Prudenter Vita dabitur pro tuenda Probabili hac sententia. An ita argumentari velit Parthenotimus, perspicax Lector dignoscet. At nobis Theologus iste doctrinam heic propinat, quam ne ipsi quidem laxiores Probabilistae docere sunt ausi. Repetendum quippe est, Probabile esse, Virginem fuisse sine labe conceptam, quum ad conciliandam huic Opinioni justam ac solidam Probabilitatem prudentes conjecturae concurrant, ita ut merito liceat ei intellectu & affectu adhaerere, quamvis contraria altera Opinio vigeat, cui ne sua quidem Probabilitas deest. Sed hoc minime est, quod nunc quaeritur. Altera nos controversia exercet, nempe: An Probabile sit, licere

licere mori pro tuenda hac, aliisque id genus Opinionibus Probabilibus. In proposito autem argumento Parthenotimus supponit nunc, nos *in re Incerta* versari. Hoc & ego contendo, quod est ad Veritatem sententiae Scotisticae; tum nego, Probabile unquam fuisse, aut esse posse, licere subire certum discrimen Vitae nostrae pro Opinionibus Incertis; neque enim intrinsecae rationes, neque extrinseca auctoritas a temeritate absolvit, qui Certo & Maximo Bono sciens sese Certo privat pro contestando Incerto Bono. Addo, etiamsi Probabilitas aliqua extrinseca adesset Voti Sanguinarij patronis ex improvida assertionem alicujus Theologi, non posse tamen Speculativam hanc Opinionem in Praxim sine peccato deduci. Et ratio est, quia agitur de periculo, immo de Certitudine gravis damni, sequendo heic Opinionem Probabilem, relicta tutiori. Quippe ex una parte Certum Malum, illudque summi momenti, sine necessitate incurritur, quum quis ultro animam ponit pro tuenda Opinione Probabili; at ex altera parte Bonum, quod moriendo quaeritur; Probabile tantummodo est, & minime Certum. In Voto Sanguinario nequaquam Vita impenditur pro Certo ac evidenti honore Virginis: nondum enim Ecclesia nos docuit, Deum revera voluisse Mariam maculae Originalis expertem. Damnavit Innocentius XI. in Proposit. I. affirmantes: *Licetum esse in Sacramentis conferendis sequi Opinionem Probabilem*. Statuunt & ipsi Probabilitate, peccare *Judicem* sequentem in judicando sententiam Probabilem, contempta tutiore ac probabiliori: uti & *Medicum* exhibentem aegro Pharmacum Probabile, quando alterum novit, ac praesto habet, Probabilius & tutius ad salutem aegrotanti adferendam. Quae rationes militant, cur damnetur in hisce casibus tum Sacerdos, tum Judex, & Medicus, aequae saltem militant contra eligentes pro re Incerta iacturam propriae Vitae, hoc est maximi Boni a Deo nobis collati, cujus domini non sumus, & cujus cura & conservatio sub gravi praecepto nobis ab ipso Deo mandatur. Quare quicumque sub Probabilissimi umbra aditum hominibus aperit ad projiciendam temere Vitam suam, nescio quci effugere possit ac debeat fulmina Apostolicae Sedis. Agitur-ne de re exigui momenti, quum de Vita hominum agitur?

C A P U T V I I I.

An Certa sit sententia Scotistica de illibata Virginis Conceptione. Non ferenda opinio de Certitudine hujusmodi sententiae, ubi de Vita hominum agitur. Nondum ista excessit fines humanarum Opiniorum. Aliud Certitudo Objectiva, aliud Persuasio Certitudinis.



UAM infirmo ac inani patrocinio suam haftenus causam tutatus fuerit Parthenotimus, vidimus. Plures ille vias, nunc istam, nunc illam tentavit, ut a Sanguinario suo Voto censuram, si quo posset pacto, averteret; at nondum, quantum quidem mihi videtur, ullam aptam invenit. Quod potissimum Lector animadvertat velim, curavit ille hucusque perquam sedule, ne quisquam sibi persuaderet, Votum illud emitti pro *Veritate* ac *Certitudine* Sententiae Scotisticae, diserte scribens, voventes tantummodo Sanguinem & Vitam polliceri pro *Pietate*, pro *Honore*, pro *Veneratione*, & *Cultu* Virginis. Idem ab illo repetitur pag. 61. iis verbis: *Deinde non semel jam diximus, rem, pro qua vovent, de quo loquimur, vitam profunderet, videlicet Honestatem tuendi Piam Sententiam.* Nunquam est ausus dicere pro *Veritate*, pro *Certitudine*, pro *Evidentia* piae sententiae. Sed Proteum nunc intuere in omnes formas sese vertentem, ne quid praetermittat, ex quo speretur nutantis sui Voti ac doctrinae tutela. Is ergo probe praesentiens, quamdiu intra fines Opinionum consistat Pia sententia, neque ea Certa sit voventibus, avolare leves in auras, quidquid ipse haftenus excogitavit pro honestando suo Voto: non uno in loco clientibus suis insinuat, Sententiam de Immaculatae Deiparae Conceptione, non amplius Probabilem, sed *Certam* esse. Negaveram ego hanc Certitudinem. Is vero pag. 20. eam nos assequi posse ait *per Theologos*, inter cetera scribens. *Numquid homo suadet sibi Certam esse Immaculatae Virginis Assertionem, quia ipse fallax Certam sibi esse dicis? Nequaquam, sed quia id insinuant Patres, docent Theologi, fert communis sensus, suadent alia id genus argumenta: quae ea sunt, ut faciant, ne creatura fallacissima, seu quae falli maxime potest, in praesenti fallatur.* Tum distinguit triplicem Certitudinem: primam, quae sit ex divina Revelatione jam per Ecclesiam proposita. Hanc sen-

ten-

tentiae Scotisticae non adesse fatetur. Secunda oriri potest e divina Revelatione, sed quae non sit Fidelibus per Ecclesiam proposita; atque hanc etsi Parthenotimus amplecti non videatur, ita tamen proponit, & auctoritate Gersonii & Granadi fulcit, ut sibi libertatem retineat eandem amplectendi, hoc est divina Fide credendi, sine labe Virginem fuisse conceptam, cum sibi persuadeat id fuisse a Deo revelatum. Tertiam denique Certitudinem sententiae Scotisticae tribuit, quam Plerique, ait, adstruunt; videlicet non ortam ex pura Dei Revelatione in Scripturis contenta, & clare sibi nota, sed ex consensu Academicorum, ex universalibus Patrum locutionibus, aliisque non paucis, quae hic referre, non est praesentis institui. Multos enumerat ita sentientes, usque adeo ut scribere Veritus non sit Joannes de Cardenas in *Crisi Theolog. Tract. 1. Disput. 9. num. 2. 5. Post Bullam Alexandri VIII. quosquor de Conceptione scripserunt (praeter Caramuclem & Murciam) affirmarunt, sententiam piam esse in statu Certitudinis, non Fidei, sed Moralis, Physicae, & Metaphysicae*. Ita Parthenotimus, qui in tertia ista Opinione quiescit. Et ne quis dubitet, quid hac in re sentiant, qui Voto Sanguinario sese obstringunt, ait pag. 54. *Existimat Lamindus, quod pie voventes, & Voti Pietatem commendantes solummodo opinentur, Virginem ab Originali labe fuisse praeservatam. Sed in eruditione Theologica hoespes est, aut videri vult. Nam Theologorum plerique Certum id putant & tuentur. Addit pag. 62. Pie voventes ac jurantes jam sibi non ut Probabilem, sed Certam persuadent primaevoam Virginis Immunitatem. Denique pag. 78. haec habet: Qui vovet Virginis Immunitatem tueri, necesse est, ut persuadeat sibi, quod re ipsa Virgo immunis fuerit a macula. Gratiae sint Parthenotimo, qui disertis tandem verbis significat, quae sit sua, & quae sit Voventium mens in emittendo Voto de fundendo Sanguine pro Immunitate Virginis.*

Profecto neque illi, neque cuicumque alii Scotisticam sententiam veluti Certam tuenti, ac voventi etiam illius tutelam, quidquam obfistere mihi animus est, dum in ore & scriptis ejusmodi tutela consistat. Hanc sententiam laudavi, iterum laudo, non uti Certam, sed uti Probabilem ac Piam. Non enim desunt graves conjecturae & congruentiae ad eam persuadendam; & quamvis explicite non habeatur in Scripturis sacris, neque in Sanctorum Patrum scriptis, implicate tamen contineri posse in iis videtur. Neque contrariam sententiam explicite habent divini Libri. Quod si Patrum sententiae Immunitatem hanc a Deipara excludere videntur, curant ejusdem patroni, ut illo-

illorum dicta explicent, sibi que minime contraria ostendant. Denique piaë huic Sententiae favent Romani Pontifices. Quare etsi Certa reputaretur a multis, immo ab innumeris, nullum ex hac persuasione in Ecclesiam, nullum in ejus doctrinam, uti neque in Rempublicam incommodum fluere. Nam ut ait Ephraem Antiochenus apud Photium Codice 228. *Disputatio illa de quaestionibus ad Fidem minime spectantibus, recte quidem se habeat, si opus sit finem veritatis assequantur. Sin autem ab eo excidant, id quidem non bene successerit: non tamen in exitum animae vergit.* At quando nonnulli super istam Opinionem, & illius, ut sibi videtur (qualiscunque ea sit) Certitudinem superaedificare volunt, ejusque firmitatem adeo extollere, ut pro ea, non secus ac pro Veritatibus ad Fidem pertinentibus, animam ponere decernant, aliosque ad idem faciendum sollicitant: novum hoc additamentum ingentis, immo maximi momenti res est, in quam intentus sit quilibet oportet, ejusque examen suscipere, tum Ecclesiae, tum Reipublicae plurimi interest, ne detrimentum grave aut nunc, aut aliquando in Ecclesiam ipsam & Populum ex hujusmodi doctrina emanet. Etenim si Opinionum fines nondum excessit Sententia Scotistica, & nihilominus Christi Fideles vident, non deesse Theologos, qui sentiant ac suadeant, posse licite pro illa Vitam impendi, dum sibi homo persuadeat, Certam eandem esse: jam ad credendum induci possent, licere Christiano etiam pro *Opinionibus* tutandis animam ponere (quod falsum omnino ac imprudens est) aut sufficere *Persuasionem*, ut Certum sit, quod adhuc *Dubium* est, atque in linea Opinionis adhuc conclusum; simulque eandem Persuasionem satis esse, ut Christianus eligat mori, ac inde speret laudem ac praemium a Deo, immo & nomen *Martyris*. At hoc sane, ut vidimus, minime in Ecclesia Dei tolerandum, quum *Persuasio* ista in rebus ac sententiis ad Fidem minime spectantibus ducere possit incautos ad propugnandum non minus Verum, quam Falsum, Vitamque fundendam aequè pro Errore ac Veritate. Beatissima profecto nunc est pax Ecclesiae, abestque a temporibus & oculis nostris ferale spectaculum illud, quo Fideles, uti olim, pro doctrina Fidei animas generose & prudenter ponebant, ita nunc pro sententia Scotistica de Conceptione atrocissimis tormentis & gladiis Vitam imprudenter exponant. Sed quid, si aliquando id contingeret, neque a temeritate excusari possent sponte pro causa ista ruentes in mortem? Nonne probris onerandus esset, qui non unum hominem sed integros Populos ad supplicium contra mentem Dei & Ecclesiae adduxisset? Nonne reliqua Christico-

larum gens rectius edocta, & a Sanguinario Voto abstinens, hosce tam improvide occumbentes miraretur ac doleret, veluti mentis inopes, aut ab imprudenti Devotionis aestu miserrime extra orbitam abreptos? Quare & Ecclesiae Catholicae decus, & Reipublicae ab omnibus curanda utilitas, poscit, ut ejusmodi doctrina sine mora adamussum Veritatis exigatur, ac potissimum postquam Parthenotimi studio eam palam protectam, ac longe lateque jam disseminatam sentimus. Quod mihi majores etiam animos facit, Apostolica Sedes nunquam agnovit *Certam* eorum sententiam, qui pro incontaminata Virginis Conceptione pugnant; eoque minus quidquam protulit, quo tolerare, nedum probare censenda sit novum hoc, atque ut ego reor, novitium ac falsum Martyrii genus. Probat Ecclesia uti *Piam* sententiam Opinionem de Immunitate Mariana, proba & ego. Vetat eandem impugnari, non impugno. Id unum mihi sumo, illam ostendere minime *Certam*, aut saltem non ita *Certam*, ut prudenter, ac sine temeritate & peccato pro ea Sanguis effundi possit. Hoc minime veruit Sancta Sedes; immo si ex hoc ipso examine tandem constabit, Sanguinari Voti patronos abuti favore, quem Ecclesia pia sententiae impertitur, illudque Votum cedere in ipsius Ecclesiae injuriam, atque in perniciem publicam; spes mihi est, non solum aequo animo, sed etiam grato excipiendum hunc meum, qualiscunque sit, pro ipsius Ecclesiae doctrina & gloria laborem.

Itaque praemitto duo certissima in Quaestione de Conceptione Virginis. Alterum est, potuisse Deum eximere a Peccati Originalis macula Matrem futuram divini Filii sui. Qui negare hoc auderet, omnipotentiae Dei contumeliam inferret. Alterum est, aequè potuisse Deum sinere; ut Virgo non diversa a reliquis Adami filiis conditione conciperetur, eam mox sanctificaturus. Quod ubi sivisset, & contigisse pateret, summa adhuc esset Mariae Sanctitas, summa & dignitas; neque ulli, nisi impudenti ac impio in mentem veniret, minoris facere Deiparam, quam hactenus universa Christianorum Respublica fecerit, aut aequitatem desiderare in Deo. Non enim consilia Dei, consilia hominis: quod & ipse per Isaiam Cap. LV. vers. 8. denuntiavit, inquit: *Non enim cogitationes meae, cogitationes vestrae: neque viae vestrae, viae meae, dicit Dominus.* Utra vero ex hisce viis Deo placuerit in Conceptione Deiparae, & quid revera tunc operatus fuerit omnium conditor Deus, non e ratiunculis ingenii nostri est eruendum, sed ex ipsius Dei Revelatione, sive scripta in sacratissimis Libris, sive per Traditionem Patrum ad nos transmissa. Et quidem

reve-

revelaverit ne Deus, an non, jam per quinque vel sex Secula disputatur, & adhuc sub Judice lis est. Porro neque ignota Ecclesiae haec disputatio, neque ab ea neglecta; immo notissima, quando tot jam Bullae Pontificum hac de re prodierunt, ipsumque Tridentinum Concilium quaestionem sub oculis habuit. Quid tamen inde? Sixtus ipse IV. Pontifex, Ordinis Minorum, qui primus legitimum de celebri hujusmodi controversia decretum emisit, quanquam ante Pontificatum pro Scoti sententia Librum scripsisse feratur, nihil tamen aliud decrevit, nisi ut nemini liceret eam Sententiam Haeresis aut Impietatis arcessere; idemque de contraria constituit. Exploratum pariter est, subsequutos quoque Pontifices incertam reliquisse utramque Sententiam, quamvis ad evitanda contentionis scandala Thomisticae patronis silentium prudentissime indixerint. Hinc autem duo principia fluunt inconcussa. Primum est, tam sententiam faventem Immunitati Virginis, quam adversantem, tenebris adhuc circumfederi in Ecclesia, & versari adhuc utramque in Incertitudine apud Apostolicam Sedem, quae veri, falsi, ac dubii constituta a Deo fuit index & iudex; falli nescia. Secundum est, in incerto esse, ac futurum esse, quamnam in partem inclinatura erit Ecclesia, si quando maturius examen quaestionis hujus suscipere velit, ac definitivam proferre sententiam.

Quamobrem ubi quempiam audimus, cui Certa sit alterutra ex hisce sententiis, animadvertendum e vestigio est, triplicem dari Certitudinem. Prima est *Fidei Divinae*, quum nempe sine ulla dubitatione credimus aliquid a Deo revelatum, testimonio Ecclesiae, quae columna est & firmamentum Veritatis, innixi. Secunda est Evidentiae, quam Philosophi *Objectivam* appellant, videlicet quum objectum adeo clara ac certa demonstratione & cognitione ab Intellectu apprehenditur, ut aliter esse non possit, neque aliter excogitari. Ejusmodi Certitudinem in compluribus, immo & innumeris tam Physicis & Metaphysicis, quam Moralibus notionibus reperimus; atque haec evidentia Intellectum tanta efficacia determinat, ut pariat cognitionem certam atque infallibilem, excludatque omnem merito suspensionem Erroris. Tertia est Certitudo *Persuasionis*, quae *Subjectiva* in Scholis nuncupatur hoc est, quum Evidentia & Certitudine objectiva deficiente, Probabilibus propositionibus nihilominus firmum praestamus assensum, non quod evidenter intrinsecam Veritatem objecti intueamur, sed quod rationes pro illa propositione tam fortes, debiles vero pro contradictoria aut contraria propositione, sese nobis offerunt, ut Intellectus noster in illa non Veritate certa, sed apparentia Veritatis, con-

quiescat, ac se falli vix posse putet. Postrema haec Certitudo locum item habet in plurimis, immo innumerabilibus notionibus tum speculativis, tum practicis, Scientiarum, & Artium, humanique commercii. Veritatem enim nudam, sive Certitudinem Evidentiae, saepissime assequi possibile non est; ac propterea satis est Intellectui arripere Verisimile ac Probabile, sive Probabilius, quando ipsam certam ac evidentem Veritatem non potest. Et quidem ultra quam vulgo credatur, vastissimum est regnum Opinionis. Haec autem *Certitudo Persuasionis*, quae aliud denique non est, nisi *Persuasio Certitudinis*, trepidationem saltem aliquam, ne Error idem Persuasioni subsit, secum semper adducat oportet, quum Evidentia absit, ac propterea obiectum possit esse aliud ab eo, quod nobis apparet, ac nobis persuademus. Tor hominum Judicia, sive in Theologicis, sive in Physicis, atque in actibus humanis, perpende. Praeter illa, quae ex Evidentia cognoscimus, aut Fide Divina infallibiliter credimus, innumera sunt alia, de quibus judicamus, & quae multis, non satis circumspecte Veritatem inquirentibus, Certa etiam videntur. At in postremis hisce quanta Incertitudo! quanta Erroris facilitas! Immo non desunt, qui scribant, ipsam Evidentiam ac Certitudinem Moralem composibilem, ut ajunt, esse cum Falsitate. Proinde Sapiens istis nunquam tam firmum praebet assensum, ut certissimam Veritatem, sive *Certitudinem Objectivam* assequutum se credat, deponatque omnem errandi metum. Qui vero improvide & inconsulte agit, pro Certis quotidie plurima immerito habet, minime animadvertens, judicium suum ex ignorantia proficisci, aut ex neglecto maturiori examine, aut ex animi affectibus Intellectum fascinantibus, aut denique ex praesumptione ac superbia: quum contra alii cautius, ac majori sinceritate & diligentia agentes, eadem aut Falsa credant, aut saltem Dubia ac Incerta agnoscant.

Venio nunc ad geminas de Conceptione Virginis oppositas sententias; ac puto mecum me habiturum concordem Parthenotimum, asserentem, neutram posse sibi tribuere Certitudinem Fidei aut Evidentiae. Ergo superest, ut quam ipse Certitudinem de Scotistica Sententia profert, non aliam appellare possimus, nisi *Certitudinem Persuasionis*. At haec ipsa sine formidine saltem aliqua Erroris esse non potest, ut diximus; & consequenter verbis quidem ea sententia veluti *Certa* a nonnullis appellatur, at re ipsa nihil aliud est, quam *Opinio*, quae formidinem Erroris semper conjunctam habet, aut habere debet. Parthenotimus ipse pag. 18. *Actum Opinativum* habere se fatetur de Immaculata Conceptione, contendens, tantummodo, *Pietatem*,

tem, Veritatem illam esse, pro qua morentur Voto Sanguinario addicti, & quae certo inest *Actui Opinativo* de ipsa Conceptione. Tum pag. 62. scribit: *Pie Voventes ac jurantes, jam sibi non ut Probabilem, sed Certam Persuadent primaeuam Virginis Immunitatem.* Ac proinde apud Voventes sita est in *Persuasione* Certitudo illa, non vero in objecti Evidentia, ejusque cognitione; & per consequens Erroris metum excludere non potest, nec debet, prout fatebitur quicunque prudens ac sapiens est. Ita tot aliis Propositionibus Scolasticae & Moralis Theologiae, Physicae, Metaphysicae, Historiae &c. adhaeret Intellectus, servata tamen prudenti aliqua dubitatione, nunc majori, nunc minori, Verum ne, an Falsum sibi persuaferit. Quare nihil est, quod Theologus noster clientibus suis depraedicet, *plerisque Certam* videri Scotisticam Sententiam. Certam quippe ii ipsi ita habere credendi sunt, ut non abjiciant omnem Erroris ac Falsi metum. Et quidni? quum ne ipse quidem Parthenotimus alibi audeat asserere, se illam habere pro *Certa*. Ei tantummodo sufficit dicere pag. 28. *Non est igitur adeo clarum, ut sibiimet Pritanus blanditur, quod pia sententia sit Opinio, & mera Opinio, cui subesse possit Falsum.* Sed quando is etiam Joannem de Cardenas adduxit, scribentem, *sententiam* *piam esse in statu Certitudinis, non Fidei, sed Moralis, Physicae, & Metaphysicae*, uti jam asseruerant tres Hispanici Scriptores ab ipso de Cardenas commemorati; atque haec a Parthenotimo adducuntur, ut animus addatur voventibus Sanguinem & Vitam pro ejusmodi sententia: non haec sane toleranda, utpote semina doctrinae, quae in apertum abusum vergunt decretorum Apostolicae Sedis, & credulitatem falsam, & Martyres antea ignotos invehere in Catholicorum Rempublicam possunt. Neque enim Summi Pontifices vetando, ne Scotistica sententia impugnetur, vetuerunt etiam, ne impugnaretur quicunque contra Ecclesiae Romanae mentem Decreta Apostolica interpretatur, atque iis abutitur, ad impellendum temere in mortem nimis credulos Christi Fideles,

CAPUT IX.

Sententiae Scotisticae minime tribuenda Certitudo formidinem quamvis excludens. Quae Romanae Ecclesiae intentio sit in statuendo Festo Conceptionis. Quantum a Falsitate quavis abhorreat Ecclesia. Vincibilis Ignorantia ac Error tribuentium Certitudinem Intrinsicam Scotisticae Opinioni. Non haec hausta e Sanctis Patribus. Ecclesia Romana tantummodo ut Probabilem & Piam eandem Sententiam agnoscit.



ICO ergo, deliria esse piae Phantasiae asserta haec Cardenae, neque eum de temeritatis culpa excusari posse, dum Scotisticae sententiae Certitudinem tribuit *Moralem, Physicam, Metaphysicam*, ubi is suadere velit, aut Evidentiam cum ista Certitudine conjungi, aut nullam amplius supereffe dubitationem de Veritate ejusmodi sententiae: nosque ita certos de ea esse, uti certi sumus, Alexandrum Magnum, ac Julium Caesarem Romanorum Imperatorem olim vixisse, & cras Solem oriturum; & unum cum duobus junctum facere tria. Universae enim Catholicorum Respublica evidenter novit, ejusmodi *Evidentiam ac Certitudinem* desiderari in sententia Scotistica; immo novit, ipsam evidenter in *Incertitudine* positam, postquam Ecclesia, disputationis conscia, ita sententiam illam probavit, ut suam vim & credibilitatem contrariae nunquam ademerit. Et quidem obtestor ego Proceres in primis omnes Ecclesiae Romanae, tum doctos quoslibet viros, ut edicant, an quisquam Romanorum Pontificum litem istam haecenus diremerit. Negabunt omnes, & Cardenam aut ridebunt, aut audaciae damnabunt, quod ex institutione Festi Conceptionis (cujus tum ipse, tum Parthenotimus pag. 41. ajunt, *obiectum esse praeservationem Virginis ab omni macula ex Alexandri VII. Bulla*) contendere, ascendisse Scotisticam sententiam ad statum *Certitudinis Moralis, Physicae, & Metaphysicae*. Immo e praemissis suis plus quam ille intendit potuisset inferre, videlicet Festo Conceptionis a Romana Sede probato, sententiae quoque eidem accessisse Fidei divinae Certitudinem: quod tamen minime factum omnes agnoscunt, neque ipse Cardenas diffitetur. Quod ergo hac in re verum est, Festus dies Conceptionis-

ptionis ante aliquot Secula institutus a Singularibus quibusdam Ecclesiis; a Sixto IV. deinde probatus fuit, & peculiari etiam Officio ornatus; demum vero a Sancto Pio V. ad universam Ecclesiam propagatus. Verum sub Innocentio X. ex occasione cujusdam Decreti sacrae Inquisitionis Romanae, interdicentis appellari *Festum Immaculae Conceptionis*; acris disputatio renovata est, contendentibus quibusdam, sub nomine *Conceptionis* nihil aliud ab Ecclesia celebrari posse ac debere, quam *Sanctificationem* Virginis, non vero *Praeservationem*. Hispanico- rum querelis ac precibus fatigatus Alexander VII. anno 1661. controver- siam hac ratione sustulit. Nimirum de mente Ecclesiae, quod est ad illud Festum, nihil statuit; sed quidem eorum Fidelium *Pietatem* commendavit, qui *secundum piam sententiam*, tribuentem *Dei- parae* in primo instanti Immunitatem a macula peccati Originalis, & *in hoc sensu* ejus Conceptionis Festivitatem solemnī ritu colunt & celebrant; & volens *laudabili huic Pietati, & devotioni, & Festo, & cultui secundum illam exhibito favere*, licitum decernit Festum celebra- re, cultumque Conceptioni ejusdem *Deiparae secundum piam istam sententiam* exhiberi; praecipiens, ne quisquam audeat illorum Pietati ac intentioni adversari. Sed ne unum quidem verbum addidit Ponti- fex, quo alios improbaret, qui secundum alteram sententiam sub di- versa consideratione *Sanctificationis* solenne habent Festum illud. Quare etsi aliquando Decretum Apostolicae Sedis Emanaret (hoc autem possibile nemo neget) quo Thomistica sententia de Conceptione Vir- ginis ad Fidem spectare statueretur; attamen ita res composita est, ut adhuc illud Festum in suo vigore una cum suo Officio, ac Indulgentiis conservandum foret. Interea quid de hoc Festo, cujus causa nobis insularum olim ac nuper Heterodoxi, quasi sibi Ecclesia contrad- dicat, dum Festum celebrat, & nihilominus pro Incerta sententiam habet, responderint insignes duo S. R. E. Cardinales, de Polemica Theologia optime meriti, juvat heic repetere. Primus est celeberrimus Cardinalis Bellarminus, Societatis Jesu, (cujus verba etsi Cardenas temere falsitatis arguit, supposito falso ipse innixus) ita loquitur Lib. III. de Cultu Sancto. Cap. XVI. Dico secundo, fundamentum hujus Festi praecipuum non esse Conceptionem Immaculatam, sed simpliciter Conceptionem Matris Dei futurae. Qualiscumque enim fuerit illa Con- ceptio, eo ipso quod Conceptio fuit Matris Dei, singulare gaudium af- fert Mundo ejus memoria; tunc enim primum habuimus pignus certum redemptionis. Alter vero est Clarissimus S. R. E. Cardinalis Vincen- tius Ludovicus Gotti, Ordinis Praedicatorum, nunc vivens, purpura- ti Se-

ti Senatus ornamentum, qui in Libris de vera Christi Ecclesia contra Piceninum Haereticum Part. II. Tom. II. Art. XIV. §. V. post Bellarmini verba haec addit: *Huc respexit Clemens XI. in sua Constitutione pro ipso Festo die VI. Decembris 1708. Cujus Conceptio gaudium annuntiavit universo Mundo. Atque ut nemo in animum inducat, voluisse illum hoc facto dirimere controversiam, non illud appellat Festum Immaculae Conceptionis Beatae Virginis Mariae, sed Festum Conceptionis ipsius Beatae Mariae Virginis Immaculae.* Certum porro est, & ab aliis praecedentibus Pontificibus Immaculae titulum detractum fuisse e Conceptionis Festo. Neque exemplo caret ejusmodi genus Festi; nam Graeci, ut erudite monuit idem Cardinalis Bellarminus, celebrant a multis Seculis Festum Conceptionis Sancti Joannis Baptistae, quem tamen nemo credit a contagione culpae originalis praeservatum. Ac proinde etsi Graeci ipsi Festum quoque celebrant Conceptionis Sanctae Annae, quam nos Conceptionem Virginis appellamus, nihil ad rem facit exemplum hujusmodi, quum & hoc factum videamus de Joanne Baptista. Adde & a Latinis omnibus idem Praecursoris Festum per plurima Secula celebratum fuisse die XXIV. Septembris; nam ut Cl. V. Daniel Papebrochius e Soc. Jesu adnotavit ad diem XXIV. Junii in Act. Sanctor. Cap. 2. §. 2. Festum Conceptionis Joannis Prodrumi, diversum ab ejus Nativitate, inscriptum est vetustis omnibus Latinis Martyrologiis, Hieronymi, Bedae, Adonis, Ussardi, Norikeri, Rabani. Nec invenio, qui Festum illud omiserit notare ad diem XXIV. Septembris, ante Bellinum de Padua, hoc est usque ad annum 1498. Vide etiam Kalendarium ad calcem Agnelli Ravennatis editum Part. I. Tom. II. Rer. Italicar. pag. 218. ubi idem Festum commemoratur. Quamobrem recte quidem faciunt, qui secundum piam Scoti sententiam Festum celebrant Conceptionis Deiparae; sed nihil ibi insistendum, ut Certitudo aliqua sententiae ipsi concilietur. Hac de re vide praesertim, quae differuntur a celebri Scriptore Societatis Jesu, mihi jam non semel laudato, & saepius infra laudando, qui in Corona Aurea Roman. Pontif. Veritat. VIII. pag. 153. inter alia scribit de Conceptione immaculata Beatae Virginis: *Quamvis certum sit, eam non esse de Fide; quia tamen pium est, & admodum probabile, autem etiam moraliter certum, Beatae Virginis Conceptionem fuisse expertem originariae noxae: merito Ecclesiae Rectores religiosum ejus cultum omnibus Fidelibus praescripserunt.* Quippe, ut is ait, cultus ejusmodi ex prudenti judicio deferretur. Addendum praeterea est, ne unum quidem verbum in Missa & Officio Conceptionis habe-

haberi, unde immunitas Virginis ab Originali peccato deduci firmiter possit; immo illic haberi, quod secus suadere videatur. Nam inter Lectiones Octavae fragmentum legitur Epistolae S. Leonis Magni Papae, hisce verbis ad Pulcheriam Augustam: *Nisi enim novus Homo, factus in similitudinem carnis peccati, nostram susciperes vestustatem, consubstantialis esse dignaretur & Matri, Naturamque sibi nostram, SOLUS A PECCATO LIBER, uniret &c.*

Neque tamen heic stetit quorundam confidentia: nam uti nuper memoratus Cardenas scripsit (quod repetere necesse est) *Theologi praecipue Hispani, jamdiu ostendunt, etiam ante Bullam Alexandri VII. hanc sententiam non esse in gradu Probabilitatis, sed ascendisse ad omnimodam Certitudinem, non Fidei, sed Moralem, Physicam, & Metaphysicam: post Bullam autem Alexandri VII. sententiam piam esse multo evidentiorum.* Immo inter paucos suos Scriptores Bellarminum quoque recenset, qui tamen disertis verbis Lib. IV. Cap. XV. de amiss. Gratiae statuit: *Non haberi apud Catholicos pro re Certa & explorata, ac Fide Catholica tenenda, Beatam Virginem sine peccato fuisse conceptam.* Tum id solum contendit, *Non esse hanc ipsam Opinionem temerariam, sed Piam admodum ac Probabilem, atque adeo contraria sententia Probabiliorum.* Quae plena modestia ac moderatione nemo non videt. Atque hoc unum sufficere posset ad prodendum, quam caute in reliquis adjungenda sit iis fides, qui tanta confidentia *Certitudinem Moralem, Physicam, & Metaphysicam* de sententia Scottistica, nimis incaute genti, & contra Ecclesiae mentem, olim venditarunt, & quidem ante ipsam Alexandri VII. Bullam. Sed undenam nata ejusmodi Certitudinis persuasio? Libere dicam, e fraudibus, quas nonnulli contexuerunt olim, ea spe fortasse ducti, sibi fas esse quidquid vellent etiam temere comminisci, ac inepte effutire, quum obstructa essent ora contra sentientibus. Sed basilice falluntur, qui ita Summorum Pontificum Bullas, ac mentem interpretantur, ut putent, ne licere quidem ulli hiscere, si quando figmenta & commenta exeruntur in patrocinium causae alioqui bonae atque laudabilis: ac praecipue si quisquam iis abutatur, ut Populum Fidelem in mortem inconsultam miserrime impellat. Felices nimium imposturae forent, si palam prodire possent, revelari, & argui palam a nemine possent. Quis non videat, gravem injuriam sanctissimae Sedi Apostolicae inlatum iri ab eo, qui in animum induceret, atque contenderet, silentio indicto uni factioni per Ecclesiam, alteri relictam fuisse licentiam quidlibet audendi, hoc est fingendi atque mentiendi? subla-

tumque omnibus etiam jus haec ipsa detegendi atque accusandi? Nemo quippe ignorat, quantopere Ecclesia ipsa exsecratur quaecunque in Religione figmenta. Neque illa Veritatis custos unquam patrocinata est, aut patrociniabitur Falsariis, eorumque foetibus abominandis. Praecipue vero quum agitur de Dogmate persuadendo atque statuendo (re videlicet omnium gravissima & delicatissima) uti horrendum facinus est heic aliquid falsi adhibere aviditate victoriae referendae, ita in summum dedecus ac opprobrium Catholici Populi cederet, si pacificus & liber cursus hiscé ludibriis apud nos permetteretur, & nemini liceret adversus illa insurgere. Atque hoc ipsum accidisse in Conceptionis Quaestione, & in Hispania praesertim, brevi ostendemus.

Ne quis tamen heic fallatur, neve ego minus videam morigerus erga Summorum Pontificum Bullas, quibus venerationem ac obedientiam deberi ab omnibus, atque a me in primis, agnosco: antequam ultra procedam, monitum haec pauca Lectorem volo. Nempe adesse tanti ponderis rationes, congruentias, & conjecturas pro Immunitate Virginis (*Probabiles tantum, congruentesque rationes* eas appellat loco nuper laudato celebratissimus Cardinalis Bellarminus) ut *Probabilem* eam innumerorum mentibus reddiderint; Certitudinem vero illam, quam per vetustiora Secula sententia contraria sibi tribuere videbatur, & ipsam ad *Probabilitatis* limites deduxerint. Quare non immerito, donec accuratius perpendantur utriusque Opinionis momenta, Romani Pontifices decrevere, neutram ex iis inhonesta aliqua gravius censura esse confingendam. Has ego rationes veneror, has intas volo, utpote quas Sixtus IV. alique Pontifices impugnari noluerunt. At si quis Probabilitate ista, quam etiam majorem contraria credere ac appellare cuique licet, minime contentus, alia fabricat non probata ab iisdem Pontificibus, & praeter, immo contra eorum mentem, audet adeo Certam, exploratam, indubitatamque depraedicare ejusmodi sententiam, ut pro ejus tutela morituris vitam aeternam, immo & coronam Martyrii polliceatur: insurgendum quibusque doctis est, & serio examine novae hujus doctrinae, ejusque consecrationum suscepto, succurrendum est Populo in omnem credulitatem prono, ne imprudenter ferali carnificinae se tradat, & ne incaute Incertum pro Certo assumens, & somniata Certitudine fretus, Verissimum, Certissimum, ac Evidens bonum Vitae suae profundat. Itaque ajo, si quisquam in eum finem, ut Christi Fideles pertrahat ad asserendam Sanguine suo Scotisticam sententiam, eam *Moraliter*, aut *Physice*, aut *Metaphysice* Certam esse contendit, in *Errore* versari, eoque

eoque *vincibili*; & *Ignorantia* laborare, eaque *vincibili*. Quod aliquis rerum Christianorum minus peritus, atque in Theologia hospes credere possit, pertinere aliquid ad Fidem, quod revera non pertineat, ac pro tali sententia, quam is Invincibiliter Veram credat, mortem subire cum laude possit ac debeat, si occasio poscit, & ego concedo. At ejus Error ac Ignorantia tum solum Invincibilis dicenda, ac proinde excusanda erit, quum diligentiam, quam potest, ante adhibuerit, ut erudiat a doctis de vera Ecclesiae doctrina. Hanc enim o-mittens, temere is ac imprudenter morti se tradet. Verum quod Viri docti putent, aliisque persuadeant, tam exploratam esse Veritatem Immunitatis Marianae, ut non solum liceat, sed opus summae Virtutis sit pro ea tuenda gladiis impiorum se offerre, *Vincibilis* est, atque inexcusabilis hic error, ipsique jubentur prius diligenter, ac deposito omni privato affectu investigare, num revera subsistat in Objecto, an tantummodo in Persuasionem suam ejusmodi Certitudo. Theologi quippe ignorare non possunt, aut non debent, praeter *Firmitatem Intellectualem* provenientem e clara ac evidenti cognitione objecti, dari etiam *Firmitatem Affectivam*, hoc est quum Voluntas aliquo rapta affectu imperat assensum Intellectui, & vult ut credat, quae sibi proponit: cujusmodi Firmitatem passim in Haeticis deprehendimus, qui pertinaciter credunt vera falsissima Sectae suae Dogmata. Nullo autem negotio Error hic atque Ignorantia deponetur in quaestione de Immunitate Deiparae, si debita non parcat diligentiae. Nam quis, rogo, Certitudinem hanc hauriat e *decretis Romanae Ecclesiae*, quando evidens est, Incertam adhuc esse apud illam utramque de Conceptione sententiam? Neque haec Certitudo e *divinis Scripturis* peti potest, quum ex ipsorum hujus sententiae tutorum confessione nullus divinarum Literarum locus adferatur, unde saltem explicite doceamur, Virginem originalis maculae expertem fuisse. Mysticus vero, Allegoricus, & Typicus sensus nunquam aptus fuit ad fundandum Dogma de divina Revelatione, non aliunde nota.

Neque Certitudo haec e *Patribus* exspectanda, uti Parthenotimus censuit, postquam Petavius Vir Cl. e Societate Jesu, quantacunque diligentia usus in deducenda ex iis Catholicae Ecclesiae doctrina, ubi de Conceptione Virginis agit, hoc est Lib. XIV. Cap. II. de Incarnat. nullum ex antiquis Patribus adducendum pro ea sententia novit; immo quos ipse depromsit, in contraria sententia fuisse aut fatetur, aut suspicatur. Et quandoquidem Ferdinandus Quirinus de Salazar anno 1618. vel 1622. spissum Opus edidit pro Defensione Immaculatae

Conceptionis, in quo multa congeffit Sanctorum Patrum loca pro eadem sententia, idque & alii postea praestitere, quid de illorum labore sentiat Doctissimus Theologiae Dogmaticae restaurator, aut parens, non est omittendum. *In eorum vero plerisque (ita ille scribit) usi Pietatem, & ornandae sanctissimae Dei Matris conatum & studium probare soleo: sic in illa quaestione tractanda, diligentiam & Criticam sagacitatem requiro. Nam nec in citandis Auctoribus FIDEM, ac delectum adhibent, qui omnium maxime necessarius est; & quos ex antiquitate idoneos arcessunt, eorum dicta FALSIS interpretationibus, & alienis ab eorum mente detorqueunt. Non est necesse de singulis hoc loco dicere. Porro neque ex universalibus Patrum assertionibus ea Certitudo manare potest, quum idem Petavius animadverterit, inferri nihil posse & Latinorum Patrum dictis, aut e Graecorum versionibus, Intemcratam aut Immaculatam appellantis Deiparam, quum ejusmodi Voces aut inviolatam Virginitatem, aut ab omni iniquatione peccati actualis, etiam levissimi, immunitatem significare possint. En ejus verba: Etenim si quid apud veteres, Graecos praefertim, increpuit, quod Beatam Virginem ἀχαρτον, ἀφάρτον, ἀπλάρτον, idest illibatam, incorruptam, impollutam, & id genus alia sonare videtur: in hoc tanquam secundo Mercurio sibi oblatum involant, & ad rem suam accommodant; sed non est consequens. Siquidem illi etiam, quibus placuit, originali contractam labe fuisse Virginem, partim in utero ipso, antequam nasceretur, partim sub ipsum Redemptoris conceptum, tanta gratiae sanctissimaeque copia superfusam esse putant, ut omnes originalis morbi reliquiae, cum ipso, qui dicitur, fomite Concupiscentiae, sanatae, vel in perpetuum compressae fuerint &c. Frustra igitur sunt, qui iis & similibus ex vocabulis, quae summam in Beata Virgine munditiam, integritatemque significant, confectum sibi negotium putant, ut apud quos ista repererint, eos sibi in testimonium asciscant illius, quem probare volunt, intacti, immaculatique Conceptus.*

Demum ad eam Certitudinem persuadendam frustra commemoratur *Academiarum & Populorum Consensus*; etenim postquam e prudenti Ecclesiae decreto sublata est contrariae sententiae fautoribus loquendi & scribendi facultas, campusque liber unis Scortificae patronis est relictus: incertum est, quid Viri docti revera de hujusmodi Quaestione sentiant. Nam quod pleraeque Academiae hanc amplectantur, id factum, quia aut hanc Probabiliorum altera, aut magis Piam arbitrantur: quo more tot alia in Scholis propugnantur, quae Probabilia tantum esse, non Certa creduntur. Et sane referri huc possunt,

sunt Caramuelis verba in Theolog. fundament. num. 312. fund. V. latiori significatione ab eo concepta, sed a me restricta ad solam quaestionem de persuasione Certitudinis. *Hodie, cujus opinionis sint Doctores, nescimus. Nam si qui contrariam tenent, praecipiuntur tacere, aut loqui nobiscum, qui piam defendimus. Ego quam opinionem habeam, scio; quam habeas, nescio. Nec ex verbis eam colligere possum; nam si forte severam teneas, nec licite, nec impune illam prodes. Et si prudens sis, malles in materia Probabili (damnare enim haereseos piam sententiam, delirare est) & te accommodare Superiorum disflamini, quam coram Deo in conscientia, coram Mundo in honore & commoditate pati iacturas & censuras.* Quanquam haec sunt superflua, quum fateatur Parthenotimus ipse pag. 77. *diffensionis compescendae causa nuncupata fuisse Vota ac iuramenta Academicarum, quemadmodum in Hispaniis pro Immaculatae Conceptionis defensione accepimus nuncupata.* Ac proinde non quod Certam sine formidine Erroris eam sententiam putent, Academiae censendae sunt ei adhaerere, sed quod unam illam tradi posse in Scholis, Apostolicae Sedi obsequentes animadvertunt. Facultas ipsa Parisiensis, quae Seculo XV. ac praecipue vigente Basileensi Concilio, adeo fervida fuit in tuenda Scoti sententia, ac deinde Maldonato Viro Cl. e Societate Jesu neganti hujus sententiae Certitudinem, negotium non leve facessivit, aestum illum jamdiu deposuit, agnovitque & in ista controversia, quantum praestit non tantum auctoritas, sed & sapientia Romanae Ecclesiae, quae decretum Concilii Basileensis de Conceptione Virginis expunxit, & pro nihilo habuit. Ita vero ab eo fervore declinavit celebris illa Academia, ut nullam crearet Joanni Launojo molestiam, qui circiter annum 1675. Librum edidit mihi minime visum, sed ut ajunt, temerarium adversus eandem sententiam: quam Parisiensium Theologorum indolentiam dolet Auctor Historiae de Controversia Conceptionis. Denique etiam si daretur recentiorum consensus in istam sententiam, inde tamen inferri illius Certitudo nequit, quum vel ipsi Scotisticae Opinionis Sectatores Probabilem & Piam agnoscant etiam Opinionem oppositam, eamque apud antiquiores *Communem* fuisse non negent, quanquam nunc suam magis Piam ac Probabiliorum, quam altera, arbitrentur.

Quod tamen omnium maxime considerandum est, semper inelutabile illud argumentum recurrit, nunquam tribui posse sententiae Scoticae Certitudinem *Moralem*, neque *Physicam*, neque *Metaphysicam*, quoties ab ista Certitudine exclusam velis omnem Erroris formidinem, ex quo Ecclesia Romana Veritatis magistra pergit adhuc

eam

eam considerare, uti Incertam ac Dubiam, eamque duntaxat habet; ut Probabilem ac Piam. Quo posito, Incertum quoque sit oportet, si quando dirimere velint controversiam istam Summi Pontifices, utram e duabus sententiis decreturi sint ad Fidei doctrinam pertinere: quod sibi ipsis reservarunt statuendum. Gregorius etiam XV. anno 1622. hisce verbis scripsit ad Regem Catholicum, instantem & urgentem, ut Immaculatam Conceptionem definire dignaretur: *Cum nondum aeterna Sapientia Ecclesiae suae tanti mysteriorum penetralia patefecerit, in Dei, Romanorumque Pontificum auctoritate debent fideles Populi conquirere.* Quid est ergo, quod nonnulli acquiescere nolentes Pontificum auctoritati, incauto Populo tanta confidentia annuntiant, Revelatam implicate fuisse in divinis Libris & Patrum scriptis Immunitatem Marianam, idque jam ascendisse ad omnimodam Certitudinem, *Moralem, Physicam, & Metaphysicam?* Nonne hoc est, apud domesticos, eoque magis apud hostes, arguere, aut traducere veluti caecos & obstinatos non solum adversae sententiae sectatores, sed & socios ipsos, qui eam tantummodo Probabilem censent? Nonne hoc est, Romanam Ecclesiam exponere probris, quasi ipsa aut prae ignorantia illud non videat, quod tamen in oculos audacium ejusmodi Doctorum incurrit; aut defectu Pietatis erga Deiparam, post tot Secula, post tot Populorum, & Regum preces, uti Incertam adhuc & Dubiam vigere sinant adeo celebrem controversiam? Abeat ergo somniata ista Certitudo, & firma stet illa tantum pia Probabilitas, quam in sententia Scotistica agnovere Summi Pontifices, omnesque Catholici agnoscunt. Et ubi Parthenotimus veritatem hanc discere a me nolit, discat saltem a semetipso, dum pag. 55. scribit: *Existimat Lamindus, quod pio voventes, si solum opinarentur, Virginem ab originali labe praeservatam, voverent defendere ut veram certamque Virginis praeservationem.* Etiam hic decipitur; quandoquidem duntaxat iidem putarent, quod dum falsitas ignota est, & apparens pro Veritate stat praeservationis, licitum & honestum sit illam defendere. Istud autem neque periculosum neque falsum est; etenim si deprebenderetur Veritas, & haec esset in sententia Piae contraria, *Votum desineret: cum ad mentem & decreta Summorum Pontificum mos sit vovendi ac jurandi.* Hic quaelo Lector consistat, atque animadvertat, consequi ex hujus Theologi doctrina, neque periculosum, neque falsum esse vovere etiam Sanguinem & Vitam pro tuenda Immunitate Mariana, tametsi duntaxat apprehendatur ut Opinio: nam, ut is ait, *dum Falsitas ignota est, & apparentia pro Veritate stat praeservationis, licitum & honestum est illam defendere.*

fendere. Dixi, istud consequi ex ejus doctrina; sed reapse id ipse directe docere mihi videtur; nomine enim *Vovensium* significat eos, qui animam pro pia sententia tuenda se posituros jurant. At erit eorum, qui e specula vigilant, ne periculosa & falsa dogmata venditentur in Ecclesia Dei, considerare, an tolerandus sit qui doceat: *licium esse ac honestum pro Opinionibus tuendis ulro mortem subire*; idque ea ratione firmet, quod *dum Falsitas ignota est*, satis est *Apparentia Veritatis* ad legitime ruendum in gladios. Quis sapiens non videat, quam periculosa & falsa sit hujusmodi doctrina? Quantum vero ad illos attinet, quos Parthenotimus ait, vovere Vitam pro pia Sententia, quia *Certam ii ipsi putant & tuentur*, potuisset ac debuisset ipsemet fallaciam deprehendere ritus hujus ac voti. Nonne fatetur ipse hoc in loco, fore ut Votum continuo evanesceret, si *deprehenderetur Veritas, & haec esset in sententia Piae contraria, cum ad mentem & decreta Summorum Pontificum mos sit vovendi ac jurandi*? Nonne idem repetit pag. 71. voventes non aliter nuncupare Vota, quam sub hac, quam passim exprimunt, formula: *juxta Summorum Pontificum Decreta jam edita, aut deinceps edenda*? Ut omnes intelligunt, nihil aliud significat ejusmodi protestatio, nisi se tandiu tutaturos eam sententiam, quandiu illam tueri sinet Romana Ecclesia; atque ab ea se illico recessuros, ubi secus ab ipsa Ecclesia decerneretur. Veniat ergo Parthenotimus, aut quisquam alius, *Certitudinem* sine formidine tribuens defensoribus Scotisticae Sententiae. Ipsa eorum Vota ac juramenta oppositum clamant. Fieri non potest, quin sit *Opinio* sententia illa, cujus adhuc *Veritas* aut *Falsitas* ignota est: quod & fateri coactus est illius tutor Parthenotimus, agnoscens, definitionem hanc judicio Sanctae Sedis esse reservatam, & posse per novum ejusdem Sedis decretum constare, *Veritatem esse in sententia Piae contraria*. Interim vero, dum pendet ejusmodi judicium, si quis e Vovensibus Sanguinem funderet pro tuenda Scotistica sententia: nonne patet, ipsum pro *Opinione* Vitam profuturum, idest imprudenter, temere, & peccando, ut supra ostendimus, atque ut Parthenotimus pag. 18. sentiri & ipse videtur, scribens: *Quis unquam somniavit, pro Incerta Opinione fas esse jugulum offerre Carnifici*? Discant ergo Sanguinarii Voti clientes a praeceptore suo, abesse a Voto suo *Certitudinem* Intrinsecam, Objectivam, Moralem, Physicam, & Metaphysicam, quando cras potest a Romanis Pontificibus deprehendi *Veritas* in contraria Thomistarum sententia; ac proinde Votum suum tantummodo fuisse aedificatum super *Apparentiam Veritatis*, cui subesse etiam potest *Falsum*;

sum; eaque de caussa se tradere torroribus & licioribus pro tuenda Opinione hac, idest Apparentia illius Veritatis, a temeritate ac peccato excusari non posse.

C A P U T X.

Unde persuasum multis, dubitationem omnem de veritate sententiae Scotisticae sublatam fuisse. E consiliis in Hispania quibusdam Historicis. Ex aliis iidem monumentis commenticiis.

SED quei, denique postules, factum est, tam firmo assensu Scotisticae de Conceptione sententiae adhaeserint nonnulli, atque inter eos non pauci doctrina Theologica exculti? Ad Populum quod attinet, non est heic numerandum illius suffragium; is enim credit, quod audit, neque contrariae sententiae adhuc vigentis rationes unquam audit. De unis ergo doctis est interrogatio. Iterum repeto, quod. Eruditi omnes in Italia, Germania, & Gallia norunt, sed Parthenotimo, & aliis sub alio coelo viventibus adhuc ignotum videtur: repeto, inquam, ut Siculorum, quos magni facio, multumque diligo, necessitati succurram: Fraudes, figmenta, falsaeque interpretationes, quae sese in istam intrudere controversiam, rationibusque legitimis, quas Theologi melioris notae pro Immunitate Virginis attulere, & quas non solum Probabiles ac Pias agnovit, sed etiam intuitu pacis impugnandas, vetuit Apostolica Sedes, sese addiderunt: in caussa fuere, cur Certitudinem, ignotam adhuc Romanae Ecclesiae, omnibusque rite Eruditis, nonnulli sibi persuaserint se intueri in eadem sententia. Non est una auri sacra fames, quae mortalia pectora ad infanda pertrahat. Interdum & hoc facit immoderata gloriae & existimationis cupiditas. Atque utinam nullum hujus veritatis exemplum in Pietatis regno haberemus. In *Pietatis*; inquam, *Opinativae*; non in *Fidei*, ac *solidae* sive *Invinsecae Pietatis*; postremum enim hoc firmum semper fuit, firmumque semper erit ex promissione Dei, neque portae Inferi adversus illud praevalerunt. Itaque dico, non defuisse olim in Hispania homines, qui hac aviditate gloriae mirum in modum successi, & potissimum cupientes videri apud Populum tum doctrina, tum Pietate erga Sanctissimam Dei Genitricem praestare contrariae sententiae fautoribus, nihil intentum

tatum reliquere, ut victores evaderent in controversia de ejusdem Conceptione. Fieri id non posse recte illi perspiciebant solis rationibus Probabilibus, quas ad ea usque tempora docti viri adhībuerant, & Ecclesia uti verisimiles ac pias exceperat, atque probarat. Quare ad aliam vincendi rationem se contulerunt: congersere quippe e veterum monumentis multa, additisque falsis interpretationibus, eadem in rem suam pertraxere. Multa etiam confinxere; neque enim nova sunt eorum detestanda exempla, qui mentiri pro gloria suae patriae, immo & pro Pietate, non erubuerunt, fortassis etiam licere putarunt. Et quidem tanto successu progressu temporis peracta res est, ut non Populo tantum, sed & piissimis Regibus Catholicis persuasum plane fuerit, nihil dubitandum amplius de Veritate Scotisticae sententiae; immo ejus tutelam ac propagationem esse peculiare officium ac debitum (*Impegno* nos appellamus) generosae Hispaniae gentis, quum Veritatem & Cultum istius Mysterii Hispania, prima omnium, peculiari privilegio ab Apostolis acceperit. Notum est, quantum regionum illarum Populi, quibus & Lusitanos jungo, amore gloriae ferveant, ac potissimum ad hanc inhiare in Pietatis rebus, & recta Fide Catholica in sinu suo conservanda. Sed simul notum est, felicissimam illam gentem, quae acutissimi ingenii viros parit, totque insignes Theologos, duobus praecipue postremis Seculis, Ecclesiae dedit, non adeo felicem semper fuisse in melioris Criticae, solidaeque Eruditionis cultura. Itaque illuc interdum non difficilis aditus ipsi imposturae fuit, dum Pietatis faciem haec praeferebat. Neque vero ibi desiderati unquam fuere gravissimi viri, subactio judicio, & Eruditione praeclari; sed non semper eis licuit nimium praecipiti minus doctorum torrenti obfistere ubi res erat de augenda aut minuenda gloria Nationis. Satiùs propterea illi duxerunt sibi sapere, & publica odia vitare, aut etiam silere sunt jussi.

Et ne quis putet, me temere heic loqui, uno exemplo rem confirmabo. Anno 1594. cura Hieronymi Romani de la Higuera famosi Impostoris, coepit se ostendere apud Hispanos Chronicon *Flavii Dextri*, cujus Historici mentio est apud Sanctum Hieronymum; idemque post aliquot annos etiam publici juris factum fuit. Successere deinde alia veterum Chronica aut Opuscula felicissime reperta, atque e tenebris eruta, *Marci Maximi*, *Braulionis*, *Liurprandi*, *Juliani Tolentani*, *Auberri Hispanensis*, & *Helecae*. Nihil gloriosius visum fuit magnanimae genti, quam tot patriae suae antiquitates, tot Sanctos antea ignotos e pretiosis hūc promptuariis accipere. At scripta haec nil

aliud erant, quam solemnes male feriatorum hominum imposturae; atque adversus illa non unus in Hispania ipsa insurrexit. Sed nihil profuit. Adeo afflatus gloriae animos reliquorum invasit, ut meliores diutius stare in acie, immo aliquid contra hircere periculosum deprehenderint. Rem accipe ab egregio Scriptore Hispanico, qui extra Hispaniam suae gentis honori consuluit, hoc est a Nicolao Antonio, cujus Bibliothecam veterem Hispanicam edidit Romae insignis vir Joseph Cardinalis de Aguirre, qui & ipse ejusmodi figmenta Tomo II. Concil. Hispan. Dissertat. III. libera sinceritate sugillavit. Inquit autem Nicolaus Antonius Hispalensis Canonicus, & Sancti Jacobi Eques, Lib. II. Cap. VIII. *Visa in publica hominum luce illustrium hominum virorum, alias celebrium, tam propria secundaque rebus Hispaniae nostrae monumenta, veluti ex orci faucibus crepta, mirum quantum exultare, subsultare omnes, qui aliquo honoris sensu, Pietatisque tangerentur, statim fecere; provincias, urbes, Ecclesiarum Collegia sacra; Religiosorum hominum coetus efferre se, ac nova sibi delata in gremium, clarissimorum civium, sodalium, tutelarium, inclytarum actionum gestorumque olim famae celebris ornamenta iactare, conferreque invicem & gratulari: tanquam si Pyrenaei salus igne iterum correpti, Hispaniae, quanta est, fines omnium metallorum liquefactorum torrentibus inundavissent. Addit infra: At quamvis huic facilitati res tam novas credendi, non unus aut alter ex nostris, cui dextra in parte mamillae cor saliver, indignatus, continere intra prudentiae limites Civium nostrorum Philauriam, quae vere Judicii omnes faciebat partes tam verbis praesentes, quam scripto per litteras diu procuravissent: victi demum, suppressique, & quasi tacere compulsi sunt, praevalente suffragiorum numero, ac lenocinante caeco Patriae amori novae mercis cupiditate. Nisi quod ante aliquot annos re penitus considerata, casusque repertis non quidem levibus suspicionis argumentis, negotium poene jam apud nos confectum retractari coepit, advocata ad partes libere sentiendi, qua rationis compotes sumus, ac dicimur, facultate; fereque jam eo res processit, ut admoneri se nostri Cives non aegre patiantur, a novis his Chronologis Historiae nostrae non laetas vires, sed rumorem inditum; & quae turgida & inflata sit, habitiorem falso apparere. Haec Nicolaus Antonius: quem excessisse limites moderatae Censurae quum ait Auctor Historiae de Conceptione, vereor ne risum Eruditorum commoverit, quibus nemini adulari mos est, sed unam Veritatem scrutari, eamque intrepide annunciare. Si verum est, Hispanos haud aegre nunc pati, se de spuria origine hujusmodi Chronicorum moneri, spe-*

randum est fore, ut aequo etiam animo patiantur se admoneri de falsis monumentis, quae in quaestionem de Conceptione Virginis irrepere. Vereor tamen, ut hoc omnibus persuadeam. Nam etsi adulterinos illos foetus aut abjecerint, aut impugnarint Joannes Baptista Perez, & multi e Societate Jesu doctissimi Viri, Petrus Ribadeneyra, Joannes Mariana, Ferdinandus de Salazar, Cornelius a Lapide, Melchior Inchofer, Philippus Labbe, atque in primis Clarissimi Patres ex eadem Societate, Bollandus, Henschenius, Papebrochius, ceterique, qui Antuerpiae Acta Sanctorum a tot annis illustrant; & licet Marchio de Mondexar in suis Dissertation. Ecclesiast. imposturam meridiano sole clarius prodiderit; attamen teste praelaudato Cardinali Aguirrio, *imperatorum hominum, aut semidoctorum vulgus, immo etiam alias doctorum nonnulli, in oppositum clamant, voluntque, ea scripta esse cedro digna & veneranda.* Et clamabunt, dum severiori Criticae diligentorem operam navent, discantque Veritatis amorem Patriae suae amor praepone. Et revera prodiiit anno 1727. Tomus I. Historiae Academiae Regiae Lusitanae, atque ibi pag. 100. quaeritur, quis futurus sit usus ejusmodi Scriptorum, *Dextri, Liutprandi &c.* Multis statuitur eorum pretium. *Et quid refert, ajunt, quod Scriptores nonnulli eorum Historias impugnant? Alii Auctores aequae bonae notae easdem probant, ac propugnant.* Et numquid non pro illis pugnarunt, ut ii memorant (sed meliorum judicio pro dealbando Aethiope) Bivarius, Carius, Tamayus, Higuera, Ramirez de Prado, Morenus de Vargas, Joannes Marques in Defensorio Augustiniano, Quintanadvegas in Sanctis Hispalensibus, & undecim docti Viri in Martyrologio Lusitano efformando? En quid faciat immodica gloriae sitis, & quo pascantur interdum homines etiam ingenii sublimis, qui non decus Literaturae, sed dedecus, tanto ardore sibi mercantur.

Age vero paucis innuamus nonnulla, quae aut adulterinae originis producta fuere, aut falsis interpretationibus depravata, per vim pertractata fuere in subsidium Hispanicae potius, poene dixi, quam Scotticae sententiae. Nam etsi ea sint Eruditis notissima, fortasse tamen alicui minus perito supervacanea non erit brevis illorum commemoratio. Primo itaque venditarunt *Concilium Apostolorum*, in quo definita fuit Immunitas Deiparae ab Originali Peccato. Sofa, Velasquez, & Messias de la Cerda referunt Apostolorum in hanc rem effata, e Granatensibus Laminis, de quibus infra sermo erit, ut puto, excerpta. Sanctus Andreas dixit: *Quando totum humanum genus damnatum fuerat, totum perierat, totum privatum fuerat hereditate: tu sola Vir-*

go a communi omnium damnatione praeservata fuisti. Sancto Matthaeo haec verba tribuuntur: *O Maria Immaculata, scyrpus es nodo carens. Multiplicabuntur festivitates tuae, augebuntur festa tua.* Sanctus item Thomas haec addidit. *Es Adae peccato praevisto non fuisti cum aliis omnibus condemnata.* Denique Sanctus Mathias ait: *In peccato concepta non fuit; omni gratia, & omni sapientia fuit impleta; neque ulum donum creaturae conveniens fuit illi denegatum.* Ineptissimas habes imposturas, quas exsecratur quicumque honorem Ecclesiae vere amat. Et nemo sane e doctis, nisi desipiendo, fidem adiunxit Concilio, a pertissime in gratiam Conceptionis confecto. Nam quod apud Surium in Actis Sancti Andreae ad diem 30. Novembris Sanctus idem Apostolus dixisse traditur, nempe: *Quomodo de Immaculata terra factus fuerat homo primus, qui per lignum praevagationis mortem intulerat: necessarium fuit, ut de Immaculata Virgine natus Christus perfectus homo, qui est Dei Filius, vitam aeternam, quam perdiderant omnes, repareret:* praeterquam quod Acta illa sunt dubiae fidei, nihil ea verba ad Conceptionem Beatae Mariae faciunt, quam *Virginem Immaculatam, Virginem Inviolatam*, non nos tantum, sed antiqui etiam omnes agnovere, hoc est Virginem ante partum, in partu, & post partum.

Secundo, ut in Hispanorum corda altius infigeretur Immaculatae Conceptionis tutela, quasi peculiare decus illius gentis, persuasum est Regibus piissimis ac Populo, institutum fuisse vel ab ipsis Apostolis in Hispania Festum ejusdem Conceptionis, & a Sancto Jacobo praecipue depraedicatam fuisse praeservationem Deiparae. Flavius Dexter, Sancto Hieronymo synchronus, de quo nuper sermo fuit, in suo Chronico ad annum 308. haec scripsit: *A Jacobi praedicatione celebratur in Hispania Festum Immaculatae & Illibatae Conceptionis Dei Genitricis Mariae.* Cujus pretii sit Chronicon Dextri, nihil attinet, ultra monere. Alter Scriptor, qui Seculo VI. floruisse fingitur, in scenam prodit, nempe *Marcus Maximus Episcopus Caesaraugustanus*, cujus haec verba ex Hymno quodam referuntur. *Haec, idest Deipara Virgo, jam Jacobo Apostolo, & suo consanguineo, Aedem jubet conficere cunctis manentem Seculis. Ostendit ille se bilarem, suoque natalisio Conceptionis aureae semple manent encomia. Conceptionis hinc diem Jacobus Hispanos docet, & praedicat, cum ceteri, ab omni labe liberam. Hinc mos habet principium, hunc celebrandi jugiter Populis Iberis diem, qui perdurat usque bodie.* Et iste putidissimus est Scriptor, in officina tantum Higuerae natus Seculo XVI. Profertur & Charta, si Superis pla-

cer,

cet, vetustissima, exarata videlicet Seculo VII. in qua Wamba Hispaniae Rex donat Abbati Sancti Salvatoris Villam & Ecclesiam Libiae ea conditione, ut quotannis celebret Festum Conceptionis Beatae Mariae, Hispanis praedicatae a Sanctissimis viris, Jacobo, Petro, & Paulo, Apostolis Domini. Quis, rogo, impudentem imposturam & heic non sentit? Praeterea e Chronico edito ab Hispanis Liutprandi, qui Seculo X. floruisse dicitur, ad annum 676. insigne hoc testimonium profertur: *Beatissima sedes de Columna (del Pilar) in Urbe Caesaraugustana, quae constructa est iussu Virginis a Beato Jacobo, cum in Hispania praedicavit Anno XXXVII. a Nativitate Domini, & consecrata ejusdem Immaculae Conceptioni (quam omnes Apostoli praedicaverunt ubique) hoc tempore celeberrima, multorum peregrinorum conubernio visitatur.* Delirum tantummodo caput haec in hominum commercium attulisse potuit; & fane Pseudo Liutprandi istius Chronicon jam ab omnibus Eruditis, praeterquam ab Hispanis, exhibitum est. Additur & Julianus Toletanus, qui anno 1037. vixisse fertur. Ita ille in Chronico jam edito anno 1618. *Erat Bernardus Archiepiscopus Toletanus, Beatae Virginis devotissimus, qui faciebat celebrare Festum ejusdem Dominae cum magna devotione, & fecit celebrare devotius Festum Immaculae Conceptionis ejus, quod praedicavit in Hispania Sanctus Jacobus, & incoepit ab Apostolis in Concilio decernentibus.* Idem quoque in Advers. num. 395. ait: *Traditio ab Apostolis in Concilium congregatis, Beatam Virginem Mariam Peccato Originali incontactam esse.* Sed & iste Scriptor, ejusque Chronicon, ab Eruditis omnibus, si paucos Hispanos excipias, jamdiu sententiam damnationis subiere, & inter manifesta commenta exulant.

Tertio, Segovienfis Ecclesia anno 1621. publico juramento & voto testata est, se a temporibus Apostolorum per hereditatem accepisse Traditionem publici Cultus Immaculae Conceptionis; seque didicisse a Beato Hierosbeo discipulo Sancti Pauli, & primo Episcopo Segovienfi, tueri, ac celebrare Illibatam Conceptionem Deiparae. Paria testata est iisdem temporibus Ecclesia Abulensis, principium hujus Traditionis referens ad Sanctum Secundum discipulum Apostolorum. Tolosanam quoque Ecclesiam antiquissimis temporibus idem Festum celebrasse ajunt, ejusque festivitatis mentionem occurrere in: *Missali Mozarabico*, & in Martyrologiis Sancti Hieronymi, Bedae, & Usuardi atque in vetustissimo *Kalendario Capuano*: quae omnia merae fabulae ab Eruditis dignoscuntur. Si ejusmodi Traditionibus fident piissima gens Hispanica, quis non videt, aereo plane fundamento suam fidem niti?

Ad

Ad haec, magno plausu in ea regione excepta est Visio quaedam, quae Eliae Prophetae de *Nubecula orta e mari* facta traditur, qua significabatur Deipara infantula, quae jam in suo ortu esset munda ab omni peccatorum sorde. Licet namque Nubecula illa esset originaliter ejusdem naturae cum mari; alterius tamen fuit qualitaris. Nam quamvis in quolibet alio homine natura humana instar maris sit in sua origine ita amaritudine peccatorum & vitiorum pondere pressa, ut sateri cogatur: *Iniquitates meae supergressae sunt caput meum*; Beata tamen Maria de hoc mari, idest natura humana, aliter fuit orta, quia in suo ortu non fuit onerata amaritudine delictorum. Legitur haec Visio in Libro de Institut. Monachor. Cap. 32. qui Joanni Hierosolymitano Patriarchae quadragesimo quarto tribuitur. Floruisse autem ille creditur iisdem temporibus, quibus Sanctus Hieronymus & Augustinus. Sed haec somnia esse, jam Eruditi omnes consentiunt; & Liber ille recentiorum Seculorum foetus est, ab aliquo Carmelita compactus, fabulisque, visionibus, ac somniis de Elia Propheta ad saturitatem repletus, quo tempore jam disputabatur de Conceptione Virginis. Quamquam negari etiam possit de ipsa Conceptione illic agi, quum tantummodo Auctor loquatur de ortu. Hisce addidere *Pauli Orosii* celebris Scriptoris Hispanici, qui Seculo V. floruit, luculentum testimonium. Is enim haec habet in Epistola ad Eustochium, sive ad Heliodorum: *Coram Deo novi, & in veritate comperi, quod nulla mulier in partu periclitatur, supra quam devote Mariae gratia imploratur, & dies Conceptionis ejus celebratur*. Sed & haec Epistola nihil aliud est, quam purum putum figmentum eorum, qui pravis artibus in suae sententiae subsidium uti non sunt veriti, Quid? Quod & Lezana & Velasquez in confirmationem puritatis originalis Deiparae adducunt *Concilium Epbesinum Tertium, & Constantinopolitanum Sextum, & Nicaenum Septimum*, ubi Maria *Immaculata* dicitur. Quo titulo etiam alii Graeci Patres Deiparam exornant. Verum nuper auctoritate Petavii vidimus, nihil haec facere ad Virginis Conceptionem. Sancti quoque *Ambrosii, Cyrilli Alexandrini*, aliorumque Patrum adulterina & conficta loca adferunt, quae commemorare nihil attinet, uti neque privatas Revelationes, quibus notum est, Ecclesiam non uti ad firmanda Dogmata, non aliunde nota, sanctissimae nostrae Religionis.

C A P U T XI.

Basileensis Concilii auctoritas perperam heic adbibita. Uti & Tridentini & Gersonii. Adulterinae Laminae Granatenses quam acriter propugnatae, & ab Apostolica Sede tandem damnatae.

ET ecce qualia vincendi aestus aut proculd, aut ab aliis procusa accepit, ut quae sententia e germanis Theologorum placitis, & quorundam Patrum locis, ac summorum Pontificum decretis, Probabilis erat, ac est, Certa etiam, & Antiquorum Traditione confirmata videatur. Dolendum sane, inclytam gentem Hispanicam, tam prudentem, tam doctam, fuisse diu, ac finire, se ludificari hisce fabulis. Dolendum, ejusmodi commenta, ex Hispaniis ad nos commigrasse nonnulorum consilio, ut post suam nostram quoque gentem, si possent, volentem nolentemque ad credendum adducerent, nullam amplius dubitationem superesse de Certitudine Scotisticae sententiae. Est mihi Liber anno 1673. Mediolani typis aereis clandestine impressus, cui titulus: *Epilogo de' fondamenti, e delle ragioni, che soda & efficacemente persuadono l'Immacolata Concezione della Vergine, e la di Lei prossima Deffinitività*. Ejus Auctor dicitur P. Andreas Mendo, Catholicorum Regum Philippi IV. & Caroli II. Concionator, qui & in Libro *Statera Opinionum*, a Romana Congregatione prohibito, hoc argumentum pertraxisse affirmatur: Ibi potissimum locum suum invenere fabellae, haftenus superiori Capitulo recensitae. Quae quum ego improbo, & quisque cordatus mecum profecto improbat, jam omnes intelligere possunt, me nihil musitare adversus doctrinam illibatae Conceptioni Virginis faventem, quae non imposturis nititur, sed rationibus ab ipsa Sancta Sede probatis; immo pro illa me dimicare. Nam si titulis confictis atque mendaciis quisquam sibiumat eandem tueri, nae ille Populum seducit, atque id unum tandem lucrari potest, ut ab ea credenda vel ipsos antea credentes imprudentia sua ac mala fide avertat. Gnaviter ergo, quantum lubet, pro Virginalis Privilegii Opinione piorum ingenia pugnent. Bonam causam protegunt, quum stant pro gloria, quanquam Opinativa, illius, cui *fecis magna qui Potens est*. At fraudibus & fabulis in causa Pietatis uti. quo.

Falsum

Falsum credatur Verum, aut Incertum jam Certum, non leve tantum crimen est, sed ingens Impietas. Et praesertim si id agatur, ut doctrina Fidei reputetur, quod tale nequaquam est: nam huc, uti infra videbimus, nonnullorum conatus collineant. Porro eadem ratione arguendus erit, quicumque traditur adulterasse loca Patrum in contrariae sententiae patrocinium, aut Revelationes confinxisse Conceptioni Immaculae adversantes. Haec omnia execrantur probi viri, Veritatis unius, non gloriae propriae amantes; & praesertim execratur Apostolica Sedes, quotidie vigil & sollicita, ne falsitati aditus sit, & perosa illos, qui secundum quod praedixerat Apostolus II. Timoth. IV. vers. 3. *sanam doctrinam non sustinent, sed ad sua desideria coarctant sibi magistros, prurientes auribus. Et a Veritate quidem auditum avertunt, ad Fabulas autem convertuntur.* Quod etiam aequo animo minime ferendum est, quidam sunt, qui existimationis propriae cauti custodes, commenta ejusmodi non jam impudenter adhibent, sed ita pro sua sententia adferunt, ut illorum nolint praestare veritatem; simul tamen ipsa congerunt, Lectorique propinant, rati non defuturam bonam gentem, quae hisce etiam imposturis ac ineptiis adhibeat fidem. Atque haec praeter alias non paucas ratio fuisse videtur, cur sacra Romana Congregatio hominum oculis ereptam voluerit Historiam controversiae de Conceptione Virginis, anno 1700. Panormi editam, hisce fabulosis aut falsis monumentis minime destitutam. Neque multa laude dignus Parthenotimus noster, qui pag. 47. *Ut autem, ait, dicamus, quod in Revelatione, aut scripta aut tradita, pia contineatur sententia, tot Doctorum consensio sat esse videtur. Consensere Patres Concilii Basiliensis, qui rem hanc jussu Eugenii IV. vocarunt ad trutinam; & hoc tulere decretum: Doctrinam de Immaculata Conceptione tanquam piam & consonam cultui Ecclesiastico, Fidei Catholicae, ac recte rationi, & sacrae Scripturae ab omnibus Catholicis approbandam fore, tenendam, & amplectendam. Et quamquam haec non habenda sit tanquam Fidei definitio, quippe Basiliense Concilium evasis in Acephalum & Schismaticum, nihilominus illorum Patrum auctoritati, quo ad punctum praesens nedum defert Natalis ab Alexandro plus ceteris, verum etiam deferunt plerique Theologorum, & Concilium Avenionense anno 1457. Consensere aliquos Episcoporum decades in Concilio Tridentino, solum quinque dissidentibus, teste Nicolao Lancisio Tom. 2. Opuscul. II. Cap. 13. qui legis acta ejusdem Concilii, quae asservantur in Castro Sancti Angeli; & ex eisdem colligitur, quod parum absuit, quin communi Patrum calculo definiretur.*

Dili-

Diligentius quaeso studeat Parthenotimus iis, quae sibi affirmanda sunt, ne fucum faciat clientibus suis. Falsum omnino est, quod is scribit, videlicet Basiliense Concilium rem hanc *jussu Eugenii IV.* vocasse ad trutinam. Quo tempore Basiliensis coetus decretum illud confecit, hoc est XV. Kal. Octobris anno 1449. ad paucos contra Eugenium Papam contumaces redactus fuerat; & non solum nullam ipsi Papae obedientiam praestabat, sed eundem exauctorare, Haereticumque declarare ausus jam fuerat. Eugenius vero tunc Generale Concilium, Basileensi irritato, Florentiae agebat. Vide Odoricum Raynaldum in Annalibus Ecclesiasticis ad annum 1439. Quare tunc revera decretum Basileensium de Conceptione emanavit, quum ii magis alieni ab Eugenio IV. erant, atque is in illos iratus. Secundo, cum veritate pugnat, *Natalem ab Alexandro illorum Parrum auctoritati, quo ad punctum praefens, detulisse plus ceteris.* Tantum abest, ut Natalis Alexander multum hac in re Basileensibus deferat, ut diserte scribat, ab iis minime definitam quaestionem, sed tantummodo *samquam Piam* ab iis pronuntiatam fuisse. Et commemoratis decretis in hanc rem Summorum Pontificum, non aliam ait esse *sacrae Facultatis Parisiensis* sententiam, quam quae Concilii Tridentini, & Romanae Ecclesiae; neque ab ea haberi uti Fidei Dogma Conceptionem Immaculatam Deiparae. Tertio, itidem contra Veritatem pugnat, *plerosque Theologorum* deferre hac in re *Concilii Basileensis auctoritati.* Nam quicumque injurii esse nolunt veris Summis Pontificibus, pro Schismatico habent Concilium Basileae temporibus iis congregatum, atque a definitionibus tunc ab eo promulgatis recedentes, conquiesscunt in Pontificiis Decretis, quibus universae Ecclesiae hac in re, etiam & Gallicae, religiose obsequuntur. Quarto, *Avenionense Concilium*, quod anno 1457. celebratum dicitur, a Labbeo viro diligentissimo, cui magna Conciliorum Collectionem acceptam referimus, frustra conquisitum fuit; ejusque mentionem tantummodo habemus in Hippolythi Maraccii Libris pro Immaculata Conceptione editis, quos proscripsit sacra Congregatio Romana. Et quamvis etiam germanus sit foetus, non pluris in causa ista faciendus est, quam ipsa Basileensis Synodus, cujus decretum Ecclesia Romana abjecit, aut correxit. Quinto, neque fidem merentur, quae Parthenotimus, testimonio tantum fretus Lancitii, refert de Tridentino Concilio, quasi *parum abfueris, quin communi Parrum calculo* sententia Scotistica *definiretur, & solum quinque dissensisse.* Certe major fides Cardinali Pallavicino, immortalis nominis Historico, debetur, qui Libro VII.

Cap. VII. Hiflor. Concil. Tridentin. tradit, nequaquam fuisse difputationem de celebri hac Quaefitione tunc dirimenda, fed tantummodo de Formula, qua e decreto de *Peccato Originali* excipienda effer Deipara, intaflis de illius Conceptione contrariis fententiis. Quum propofitum fuiffet *Pie credi, Virginem fine Peccato Originali conceptam*, ne hoc quidem tulere i *Vefcovi, e gli altri che intervenivano dell'Ordine Domenicano, ed ebbero de' fequaci*. Addit, ex ipfis tribus Legatis Pontificis, *Cardinalem de Monte* additum fuiffe fententiae Scotifticae de Conceptione; fecundum, idelt *Cardinalem Cervinum*, Thomifticae adhaefiffe: quae vero tertii fententia foret, fibi incompertum effe.

Denique Parthenotimo pag. 37. tantopere urgendum non erat, quod Gerfonius fcribit, videlicet: *Beatam Mariam non fuiffe conceptam in peccato Originali, de his veritatibus eft, quae noviter funt revelatae, vel declaratae tam per miracula, quae leguntur, quam per majorem partem Ecclefiae, quae hoc modo tenet*. Haec Gerfonius in Sermon. de Conceptione. Irascitur autem Theologus nofter Du-Pinio affirmanti, Gerfonium tantummodo cenfuiffe *Probabilem & Piam Immaculatæ Conceptionis fententiam*. Vellet, ut opinor, Theologus nofter, perfuadere clientibus fuis, a Gerfonio habitam tanquam Articulum Fidei fententiam de Immunitate originali Deiparae. Etiamfi id credidiffet Gerfonius, num, rogo, noftris temporibus idem fentire licebit contra Ecclefiae Romanae decreta, e quibus evidenter deducimus, a tam fublimi loco abefle ejufmodi fententiam? Sed neque iftud credidit Gerfonius, qui in eodem Sermone poft pauca addit: *Securius eft fic tenere, quam oppofitum, contra hoc quod voluerunt dicere aliqui, quod effer haerefis expreffa, vel peccatum mortale, contra quos Univerfitas Parifienfis determinavit*. Idem etiam in Lib. de fufcept. human. Chrifti Verit. XI. tribuit Virgini Conceptionem ab omni labe puram, additque: *Veritas haec Probabilis eft & Pia*. Idem repetit in Epiftola ad Joannem Baffandi Tom. I. pag. 451. Quid ergo in Du-Pinium hac de cauffa invehitur Siculus nofter? quum is pura puta Gerfonii verba laudarit, atque addiderit & ifta ex ejus Conclufionibus impreffis Tomi II. Part. II. pag. 187. *Ad Epifcopos non fpehat propofitionem aliquam haereticare, quae ex fe, & de jure PENITUS DUBIA EST, an ad Fidem pertineat repugnanter, neque eft scandalofa, & poceft fine periculo ejus veritas vel falfitas ignorari. Enemplum de iftis. Virgo Maria fuit concepta in peccato Originali, & de fimilibus, quae apud maximos Doctores in Theologia, non corruptos in affectu, vel intellectu, judicantur Probabiles, neque scandalizant,*
neque

neque oportet eas scire ad bene vivendum, vel credendum. Quare nullam heic in Du-Pinio *ballucitationem* invenient Lectores, sed quidem in Theologo nostro, cujus investivam & rationes contra Editorem Operum Gersonii, atque abusum Gersonianae ipsius sententiae, nihil est quod ultra expendamus.

Atque hisce aut fabulis, aut contortis in alienum sensum Veterum sententiis antea praedicarunt nonnulli, & adhuc, ut vidimus, depraedificant, sententiam praeservationis Virgineae a labe Originali de Probabili, qualem Ecclesia agnoscit, evasisse Certam. Addiderunt & nonnulla Sanctorum Patrum loca, nullo sane delectu, utpote e supposititiis scriptis petita, aut e veris pessime explicatis, scilicet Sanctorum Cypriani, Hieronymi, Ambrosii, Augustini, Bernardi &c. Exemplum unum dabo. E Libro contra quinque Haereses, quem Augustino multi tribuunt, sed recentiori, antiquissimo tamen, Scriptori tribuendum norunt Eruditi, haec verba desumunt: *Hanc, quam despicias, Manichaeae, mater mea est, sed manu fabricata est mea. Si potui inquinari (Codex Colbertinus fatigari) cum eam facerem, potui inquinari, cum ex ea nascerer. Sicut transitu meo illius non est corrupta Virginitas, sic mea ibi non est maculata majestas. Stulte, unde sordes in Virgine matre, ubi non est concubitus cum homine patre? Unde sordes in ea, quae nec concipiendo libidinem, nec pariendo est passa dolorem? &c. Sicut ille natus est Solus inter mortuos liber, sic istius, ex qua natus est, matris pudor Solus est integer.* Quid virium in oculis internos & externos hominis habeat affectuum aestus, nunquam evidentiis, quam ex hoc loco deprehendas. Pro Immaculata Virginis Conceptione adfertur, atque heic evidenter de Conceptione Christi sermo est, qui in purissimo Mariae utero conceptus, neque ab ea inquinamenti quidquam retulit, neque ei intulit. Immo contra ipsam Scoti sententiam militat heic locus, dum ratio, quare neque Maria, neque Christus sordes contraxere, quum in utero ejusdem Virginis Verbum Dei caro factum est, illa est toties a Patribus inculcata, quia *nulla libido* interfuit, & nullus cum homine patre *concubitus*, Spiritu Sancto immaculatum illum praeparante foetum: quod de Sancta Anna concipiente Mariam verificari non potest. Et quid quaeso significant verba illa: *Sicut Christus natus est SOLUS inter Mortuos liber, sic Mariae pudor SOLUS est integer?* Habes heic vim vocis *Solus*. Attamen unum superest magni momenti, quo olim nisi sunt non timentes pro Pietate mentiri, ut absolutam Piae ac Probabili sententiae Certitudinem procurarent. Anno, ut vidimus, 1594.

emergere coepit Pseudo-Dextri Chronicon. Anno insequenti 1595. effossa sunt in Hispania in Granatensi agro in Monte, quem deinde Sanctum appellarunt, Corpora, quae dicebantur esse Sanctorum Caecilii primi Granatensium Episcopi, Iscii Tarifensis, ac Thesiphontis Berienfis, discipulorum Sancti Jacobi & Martyrum. Ibi quoque *Laminae* quaedam *plumbeae* effossae, *Arabicis literis exaratae*. Interpretes conquisiti retulere, spectare *Laminas* ad tempora Apostolica, miraque *Mysteria* continere, ibique in primis legi disertam mentionem *Deiparae sine labe Conceptorae*. Fatetur Auctor Historiae Conceptionis, universam Hispaniam incredibili laetitia perfusam ex effossione tanti thesauri, & inusitata pompa tunc coeptum celebrari ejusdem Conceptionis Festum. Nimirum vix unus fuit & populo, cui persuasum tandem non fuerit, jam definitam esse controversiam de Virginis Conceptione, certamque jam stare victoriam fautoribus Scotisticae sententiae. Quoniam vero Hispali mussare ausi sunt quidam e Praedicatorum familia contra veritatem ac legitimitatem ejusmodi Laminarum, adversa factio in illos Populum concitavit, aliisque in locis tumultus ac jurgia invalere. Graviora subsequuta sunt post Annum 1614. nam eo perducta res est (quod vix postera credant secula) ut *sacra Doctoris Angelici imago, per ludibrium vili jumento superposita, per vicos, per fora, per compita, circumducta fuerit, dementi lymphatoque insequente Populo, ac per subsannationem clamitante: Sin peccado Original: sin peccado Original*. Haec Augustinus Le Blanc in Histor. Congregat. de Auxiliis, Lib. 4. cap. 27. qui & fatetur, si plusquam civilia bella, tunc eam ob causam in Hispania adversus Ordinem Praedicatorum commota, quisquam describenda sumeret, Librum non unum impleret. Atque haec ipsa jurgia & scandala, ut in posterum averterentur, suae prudentiae putavit Gregorius XV. Papa Anno 1622. Praedicatoribus ora prorsus obstruere, uti supra animadvertimus. Redeo ad *Laminas Granatenses*. Clemens autem VIII. Summus Pontifex certior de hisce factis, liberum quidem fecit Archiepiscopo Granatensi judicare de Corporibus creditis sacris, quod rationi consonum crederet secundum sacros Canones, & decreta Concilii Tridentini; at sibi & Sanctae Sedi judicium reservavit de *Laminis plumbeis*. Nihil hoc obstitit, quominus rem protegente Philippo III. Rege, Laminarum interpretatio evulgata fuerit. Praecipue vetero animos bonae & credulae gentis rapuit Concilium Apostolorum (idem puto, quod supra innui) de quo fidem faciebant *Laminae*, & in quo *Conceptio sine macula* diserte tribuebatur Virgini Deiparae. Proinde non secus ac monu-

monumenta Canonica, atque e Coelo demissa, haberi coeptae sunt apud Hispanos admirabiles istae Laminae. Et quia clam nonnulli earum fidem in dubium revocabant, *Consabvus Sanchez* palam cum aliis patrocinium illarum suscepit. O quantis erroribus ac insultibus obnoxia foret & ipsa Pietas, nisi nobis dedisset Deus Summos Pontifices & Pastores, quorum sapientia & vigilantia imposturis pravisque doctrinis quotidie occurreret! Et reapse anno 1642. Urbanus VIII. insipientem hunc aestum Hispanicae gentis diutius non ferendum ratus, Bulla promulgata in ipsas Laminas insurrexit, fidemque eis ademit, donec iudicium de illis Apostolica Sedes pronunciaffet. Adhibitis denique multis arietibus, deductae Romam fuere famosae Laminae, quae acribus ac diuturnis disputationibus aditum aperuerunt, praefraete pro eis pugnante credulitate Hispanorum; ac tandiu protracta lis est, positique tot obices, ut ulque ad Pontificatum Innocentii XI. pependit iudicium Romanae Ecclesiae. Hic ergo Pontifex, invicti animi vir, & nullius faciem respiciens, Laminas easdem tanquam adulterinas merces, & monumenta malitiose conficta, proscriptis, atque aeternum damnavit: quae sententia incredibilem universae Hispaniae moerorem attulit, quum in Laminis iis triumphum Scotisticae sententiae, & gloriam non modicam suae gentis, antea statuisset. Sed neque his deterritus Carolus II. Rex Archiepiscopum Tranensem Romam ad Pontificem misit, sententiae revisionem implorans; sed constantia ac sapientia Romana hac in re exaudiendum Regem minime censuit.

Erunt, qui haec a me commemorari arbitrabuntur, ut Scotisticae sententiae, ejusque tutoribus invidiam creem. Quibus responsum volo, toties me confessum fuisse, iterumque fateri, sententiam hanc non e Commentis haetenus recensitis, sed e Rationibus, ante eas fraudes per viros doctos excogitatis, Probabilitatem suam, quam & Romani Pontifices agnoscunt, accepisse. Haec autem in medium afferre necesse mihi fuit, quia, ut facile constabit, inde potissimum apud Hispanicam gentem, ac sensim ad Siculos, Hispanis tunc subiectos, manavit persuasio, Certam demum evasisse praerogativam Immunitatis Marianae, ac licere pro ejus tutela occurrere morti, immo & gloriam Martyrii pro ea occumbentibus esse sperandam. Et sane novimus, ineunte Seculo XVII. quo scilicet tempore animos Hispanorum pervasit credulitas, suum peculiare decus esse, suscipere patrocinium Scotisticae Opinionis; quum & Chronica Dextri, Liutprandi, Juliani, aliorumque, de quibus supra fuit sermo, ac Laminae Granatenses

tenſes hoc praecipue teſtarentur; tunc, inquam, commotione incredibili animorum non tantum gentem illam, Pietatis cultricem indefeſſam, ſimulque gloriae propriae avidiſſimam, nihil non tentafſe, ut ſibi ac aliis perſuaderet, in meridiana luce poſitam jam fuiſſe huiusmodi controverſiam; ſed etiam Catholicos Reges pia hac perſuaſione imbutos, importune apud Romanos Pontifices egſiſſe impoſterum, ut Quaefitio de Conceptione dirimeretur, & ſententiae Scotiſticae tandem decerneretur victoria. Quod quum imperrare a Prudentia Romanae Eccleſiae nequiverint, ſaltem a Paulo V. Gregorio XV. & Alexandro VII. decreta & Bullas retulere, ſilentium omnino Thomiſticae Opinioni, pacis ſervandae, & ſcandali vitandi cauſſa, praecipientes. Iis ergo temporibus, hoc eſt anno 1615. coeperunt Hiſpanicae Academiae, fortaiſſis etiam urgente Rege (nam & interdum extorta iuramenta teſtatur Caramuel Theolog. fundament. Tom. I. Fundam. V.) Vorum concipere de tuenda ſententia, ſavente Immunitati Virginis, conditione tamen adjeſta, decretiſ Sedis Apoſtolicae editis ac edendis ſeſe ſemper conformandi. Tunc etiam auditi in Hiſpania, qui dicerent, ſententiam ſuam e Probabilitatis finibus tranſiiſſe in *Certiſſudinis*, & quidem *Fidei* regnum. Tunc etiam alii ſunt auſi *Martyrii* laureolam polliceri occumbentibus pro ejuſdem ſententiae tutela. Iiſdem quoque temporibus prodiit Liber *Ferdinandi de Salazar*, qui tanta confidentia hoc argumentum pertractavit, ut contortis in ſuam ſententiam Liturgiis & Patribus Graecis ac Latinis, minus eruditae genti non ſolum propinaverit Certitudinem Conceptionis Immaculaetae, ſed etiam Virginem a *Debito Peccati Originalis* exemerit; quod facinus infra recurrit. Nemo in Hiſpania tanto torrenti adverſari audebat; ſucceſſit & Decretum Gregorii XV. ora obſtruens Thomiſticae ſententiae propugnatoribus: quare nil mirum, ſi anno 1624. Panormi quoque, & in aliis Siciliae Urbibus Catholicorum Regum cura, ejuſque Miniſtris adnitentibus, coepta ſint emitti Vota pro tutela Scotiſticae ſententiae, Vitaeque etiam impendendae pro illa. Et ut quiſque intelligat, quibus rationibus permoveretur pia gens ad ejuſmodi Votum, animum advertant ad verba, quibus eſt uſus Joannes Tellez, Dux Oſſunae, Siciliae Prorex, anno 1656. Leguntur iſta in Panormo devoto Canonici Mongitoris. Nimirum is vovet ac jurat, ſe propugnaturum Immaculatam Conceptionem Deiparae, *per eſſere queſto Miſtero fondato in più luoghi della Sagra Scrittura, ed autorizzato con la dottrina degli Apoſtoli, con l'atteſtazione di quattro Conſilj Generali, e di molti altri Provinciali: con l'autoriſà della Chieſa Uni-*

Universale, che ne celebra la Festa: con Decreti de' Sommi Pontefici, che concedono Indulgenze e Grazie speciali a quei, che celebrano e favoriscono questa sì Pia Opinione: co' testimonj de' Padri della Chiesa fin dal tempo degli Apostoli: con particolari Revelazioni, e certe et. Si revera Apostoli, & Concilia Generalia, & Patres &c. Virginem nobis exhibent Macula Originali carentem: cur dubius quisquam amplius est in amplectenda tam aperta Ecclesiae doctrina? Verum haec quidem sibi videre visi sunt quidam, in Critica arte, ac in Eruditione non satis periti, simulque immoderato affectu huic Sententiae addisti; at nondum vidit Ecclesia Romana, neutri factioni dedita, & in unam Veritatem intenta, melioribusque oculis in Veri ac Falsi, in Certi ac Incerti cognitione semper usa. Cuiam quaeso credendum?

C A P U T XII.

Communis olim Theologorum sententia contraria Scotisticae, Gabrielis Saavedrae temerariae quaedam Conclusiones.



T quid faceret aliquibus in locis Populus, Pietate ac devotione erga Deiparam, uti par est, servens, quum sibi proponi audiebat Votum dandae ipsius Vitae pro tuenda Scoti sententia, quam ab Apostolis ipsis, a tot Conciliis vel Oecumenicis, a Patribus, ab Ecclesia Universalis confirmatam audiebant? Non consuevit Populus, quae Pietatis sunt, in examen adducere, neque ad hoc aptus plerumque est, sed credit, quae sibi a doctis nuntiantur. Praeterea, quando nonnulli e Siculis Sanguinarium Votum emittere coeperunt, jam contrariae sententiae turoribus indictum fuerat silentium, & obistere nemo audebat Scotisticae patronis, sub Regio patrocinio quidquid lubebat audientibus, ac praecipue in Regno Hispaniae subiecto, & Regni moderatoribus pro ipsa sententia ad imitationem Regis puenantibus. Accessit ad ista mirabilis aliorum confidentia, qui nihil veriti sunt, firmissime asseverare, ac edicere Populis, eandem sententiam canonizatam ab Apostolica Sede jam fuisse: uti constar e Libris Francisci a Sancto Ioseph, & Aegidii a Praesentatione. Alii proximam ac imminentem definitionem a Sancta Sede pollicebantur. Videndus haec de re Joannes Antonius Velasquez, qui multos numerat *proximae defini-*

finibilitatis tutores. Eos quoque post Salazarium enumerat Parthenotimus pag. 43. Sed an sint inter eos recensendi Suarez, Valentia, & Valquez, aliorum erit perpendere. Hoc quidem dicam ego, post tot supposititia in hanc rem monumenta, quae nuper inuimus, caute procedendum in habenda fide epistolae celeberrimi Theologi Francisci Suarez, quae post ejus mortem proditiisse dicitur. Alteram quoque Joannis Caramuelis Episcopi Viglevanensis Parthenotimus ipse pag. 27. commemorat, in qua is, licet in editis scriptis alienus a Certitudine sententiae Scotisticae, dixisse fertur: *in defensionem Immaculae Conceptionis Sanguinem se libenter fusurum, & quamquam ad id sustinendum sibi deficeret Pietas, adigeret tamen naturalis amor in Matrem sui Dei*. Quae postrema verba inter se conciliare nondum potui. Illud contra certum est, si quando Ecclesia absolutum examen suscipere velit celeberrimae hujus Quaestionis, subeundum illi esse non levem laborem in discernendo, quae fuerit mens, non dicam Sanctorum Patrum, sed veterum Theologorum, quum tot tenebras in hanc rem disputatores advexerint, ut quid eligere parum periti debeant aut possint, jam nesciant. Nam unius sententiae pugiles arguunt alterius fautores, quasi textus antiquorum corruerint; ac nobis complures ex iisdem vetustis Theologis nunc exhibentur veluti contraria sibi docuisse; ac praecipue Sanctus Thomas, quem Petrus de Alva, & Joannes Ludovicus Schonleben, pro Immaculata Conceptione stetitisse enixe contendunt, quum praeteritis Seculis semper Theologi crediderint, & adhuc meliores credant, ipsum apertissime in contraria sententia fuisse. Quod etiam omnium admirationem poscit: usque ad tempora Scoti nemo negavit, quin *sententia Communis Scholarum Sanctificationem* quidem Virginis in utero admitteret, *Conceptionem* vero *sine labe* negaret. Sanctus Bonaventura, quem nemo nisi in meridie caecutiens inficias ierit, quin Immaculae Conceptionis sententiae fuerit adversatus, in 3. Dist. 3. art. 1. quaest. 2. scripsit: *Omnes fere illud tenent, quod Beata Virgo habuerit Originale*. Et infra: *Nullus invenitur dixisse de his, quos audivimus auribus nostris, Virginem Mariam a Peccato Originali fuisse immunem*. Haec Sanctus Doctor, Sancto Thomae Aquinati Synchronus. Immo & ipse Scotus circiter annum 1305. in 3. Dist. 3. *Communem* fassus est usque ad ea tempora sententiam Immunitati Marianae contrariam. Quam veritatem etiam agnovere ex antiquis Alvarus Pelagius Episcopus Silvensis, Philippus Faber, & Franciscus Pitignanus, omnes Minoritae, Baptista Mantuanus Carmelita, & ex recentioribus Franciscus Suarez,

Ga-

Gabriel Vasquez, Salmanticenses Theologi, Cordova, a Paramo, Salmeron, Palacius, & Marfilius, ut alios omittam, *Communem* appellantes Thomisticam de Conceptione Opinionem. Et nihilo minus emerfere Seculo XVII. qui ita paginas miscuerunt, ut persuadere Orbi voluerint, eosdem veteres Theologos, ipsosque Sanctos Anselmum, Bonaventuram, Thomam &c. oppositam plane docuisse sententiam. Jam vidimus, non defuisse in Hispania (melioribus certe repugnanti-
bus) qui se non adversari, sed favere Religioni temere censuerunt, quum tot Concilia, Historias, aliaque monumenta confinxere, quibus Populo persuaderetur tanquam certa eorum Opinio. Nil mirum foret, si Suaresio quoque jam vita functo supposita fuisset Epistola, ut eximium Theologum in censum suorum pugilum ii aliqua ratione pertraherent. Alia certe opinio fuit, ut Eruditi norunt, alteri ejusdem Societatis Theologo, & quidem emunctioris naris, neque minoris nominis viro, Joanni scilicet Maldonato. Mihi temperare non possum, quin aliquot ejus verba adferam, a Richardo Simone memorata Tom. I. Epist. 27. *Quisquis* (ajebat Maldonatus) *composuit Breviarium illud brevissimum Quignoni* (Cardinalis Hispani), *fecit Lectionem unam constatam ex testimoniis veterum Auctorum, ut persuaderet, omnes sensisse, Beatam Virginem fuisse conceptam sine Peccato Originali. Quod profecto fuit hominis impudentissimi, quum nemo eorum Auctorum, quos citat, ita senserit; & quod amplius est, non poterat ignorare, D. Thomam esse in contraria sententia; tamen voluit nobis persuadere, etiam illum ita sensisse: quod non est bonam causam bene agere, sed prodere.*

En quibus commoti fuerint multi ad credendam Scoti de Conceptione Opinionem, non tantummodo Probabilem & Piam, qualem nunc quisque agnoscit, aut magis Piam ac Probabilem Thomistica, quod & eximii viri credunt; sed etiam Certam, quum non deessent audaces Theologi, qui Scottisticae tribuerent Certitudinem, si Superis placet, *Physicam, Metaphysicam, & Moralem*. Quouique tamen progressa fuerit in hoc negotio nonnullorum licentia, ne dicam temeritas, satis nondum perspexere Lectores. Juvabit ergo Libellum *Andree Mendo*, Mediolani anno 1673. impressum, de quo suora mihi fuit sermo, rursus in scenam adducere. Ibi Cap. IX. pag. 66. Auctor ille, ut animos adhuc reluctantium gravissimo ariete prosternat, eorum oculos ferit Conclusionibus quibusdam a *Gabrielle Saavedra*, Ordinis Beatae Mariae de Mercede, ut is ait, editis in Libro, cui titulus *Sacra Deipara*, Disput. 17. num. 312. Iste Saavedra unus est

Tom. V.

M

e Theo-

e Theologis, quos Theologus noster Siculus pag. 44. laudat, ut plaudentes imaginario *Martyrio* occumbentium pro Immaculata Conceptione: quod Lectoribus animadvertendum est, ut discant, quam egregiis Scriptoribus Parthenotimus causam vitae nostrae commendet. Prima Saavedrae Conclusio est: *Afferimus, de potentia absoluta sacram Deiparam maculari non posse Originali Peccato*. Ita ille, cujus sententiam horreat quisquis vel rudimenta Theologiae delibavit. Si enim, ut verba sonant, de absoluta Dei potentia heic agitur, blasphemiam habes, aut certe Conclusionem temeritate scatentem; quam non miror excidisse homini illi prae devotione furenti; miror ab aliis placide exceptam, & in sinu Ecclesiae, nemine contradicente, rursus typis in Italia editam ac propagatam. Alteram Conclusionem accipe: *Immaculata sacrae Deiparae Conceptio evidenter est credibilis (tametsi remore) Fide Divina*. Cerebrum sane hominis supra modum audacis, qui adversus notissimas Summorum Pontificum Bullas novum Dogma Fidei obtrudere nobis molitur; atque uno tametsi remore sperat audaciam suam ereptum iri censurae. At pejora continet Tertia Conclusio hisce verbis expressa: *Piissima sententia ab Originali Macula Virginem purissimam praeservans, his nostris temporibus ita est vera, ut nullo modo a parte rei possit esse falsa*. Ad ista fremat oportet, quicumque Romanae Ecclesiae jura intuetur heic impudentissime conculcata. Sibi judicium de Quaestione Conceptionis Marianae Pontifices Maximi reservarunt, exploratumque est, illos judicare posse tam pro una, quam pro altera sententia, pro ut eorum sapientia, eruditio, ac unius Veritatis studium exiger. Qui vovent tutelam Scotisticae sententiae, ut vidimus, conditionem semper apponunt, seu subintelligunt, salvam nempe semper se velle auctoritatem Ecclesiae Romanae, & decreta per eam edenda. Neque disistetur Parthenotimus possibilem sententiam ejusdem Sanctae Sedis pro Thomistica Opinione. At ecce nunc Theologaltrum, qui ita *Piissimam* Scoti Opinionem esse *Veram* edicit, ut *nullo modo* possit in se ipsa *esse falsa*, libertatemque Ecclesiae in judicando de hac re impugnare. Et quid, quaeso (ut hoc ipsum inquam) est illud *his nostris temporibus ita est vera*, quasi in Ecclesia Dei aliquid nunc verum esse possit ad Fidei doctrinam pertinens, quod elapsis quoque Seculis verum non fuerit? Profecto illud Verum ac Certum de Conceptione Virginis erit aliquando nobis, quod Romanus Pontifex e Cathedra Petri credendum docebit, non quod nunc e Cathedra sua privati homines temere statuunt.

Quar-

Quarta Saavedrae Conclusio: *Probabile est, Ecclesiam jam determinasse, piam sententiam ita esse veram, ut a parte rei falsa esse non possit, idque implicite, & virtualiter falsem.* Non probabile tantum est, sed certum, Scriptorem hunc sibi atque auditoribus suis nimium illudere. Nam vel puer intelligat, Ecclesiam ab hujusmodi determinatione abstinuisse, ac voluisse abstinere, quando Romani Pontifices a Sixto IV. usque ad Alexandrum VII. non implicite, neque virtualiter, sed disertis verbis iudicium sibi reservant de Veritate utriusque sententiae, ac utramque argui falsitatis ac erroris vetant. Quinta Saavedrae Conclusio haec habet: *Dicendum igitur est, piissimam sententiam per Sedem Apostolicam posse definiri, declarari, & proponi Ecclesiae Fide Divina credendam.* Id hercle certissimum, si tamen eadem Sancta Sedes deprehendet, Scotisticam sententiam aut niti auctoritate divinae Scripturae, sive quod ibi sit expressa, sive quod ex ipsa fluat per ineluctabilem argumentationem; aut e divina Revelatione nobis in Traditione Sanctorum Patrum servata descendere. Nam ubi utrumque desit, rem indecisam, incertamque relinquet, uti relinquit tot alias Theologicas Quaestiones a Scholasticis jamdiu agitatae. Immo si Litteras sacras, aut unanimum Traditionem Patrum militare pro opposita sententia agnosceret, pro ista & non pro illa judicaret. Sexta Saavedrae Conclusio: *Afferendum omnino est, ex eo quod veritas aliqua sit Pronime definibilis ab Ecclesia, Necessario inferri, tum illam iam esse Revelatam a Deo, tum esse de Fide priori modo ex illis, quos explicuimus; idest esse objectum Fidei divinae iis, quibus sufficienter videatur Revelata a Deo, etsi nondum ut talis proposita ab Ecclesia.* Nemo sapiens non doleat, per temeraria haec somnia a vigilantibus somniata fucum fieri nimium incautae & credulae genti. Quis enim Scriptori huic revelavit, veritatem Immaculatae Conceptionis esse pronime definibilem ab Ecclesia? Jam fluxere centum & ultra anni, ex quo confidentia aliquot Hispanicorum sibi ac aliis ejusmodi definitionem pollicebatur, in Laminis nimirum Granatensibus, in Flaviis Dextris, Liutprandis, aliisque id genus monumentis spuris, aut potius in omnipotentia Regum suorum sua spe collocata. Verum sapientia Romanorum Pontificum id semper respondit, quod in Epistola Gregorii XV. anno 1622. hac de re ad Catholicum Regem scripta legimus: *Magnum sane pondus apud nos habuero preces Majestatis vestrae: saepe etiam ac saepe accurata perpendimus rem tanti momenti, desiderio ducti gratum aliquid facienti vobis ac Regnis vestris.* Tum addit: *Cum nondum aeterna Sapientia Ecclesiae suae tanti Mysterii po-*

neritalia patesceret, in Dei, Romanorumque Pontificum auctoritate debent Fideles conquiescere. Nos serius nati jam vidimus, quo abierit tantopere illa promissa a divinatoribus Hispanis proxima definitio. Et nihilominus e tam ruinoso supposito secundum illos, *Necessario* con-
 sequeretur, Scotisticam Sententiam esse jam *Revelatam a Deo*, ac posse ab ejus propugnatoribus credi illam *esse de Fide*. Quare quisnam in Saavedra, ut mitissime loquar, Prudentiam non desideret, sine qua Theologum agere res plena periculi semper fuit ac erit?

Septima illius Conclusio: *Piissima sententia probabiliter jam Ecclesiae est revelata.* Mitto incertiam hominis, qui sibi ac aliis persuadere videtur, aliquid novi ad Dogma pertinens nunc a Deo revelari. Notum est, aliam esse Theologorum, immo totius Ecclesiae Catholicae sententiam. Id tantum Ecclesia nobis credendum proponit, quod olim Deus Prophetis ac Apostolis revelavit, & ad nos usque sive per divinas Scripturas, sive per Traditionem & scripta Patrum pervenit. Quod si in neutro ex hisce Libris revelatum aliquid apparet, nequaquam Ecclesia petit a Deo, ut quae olim non revelavit, nunc revelet; sed humili tantum fronte agnoscit, Deum sibi reservasse scientiam illius Veritatis, neque illam esse e Veritatibus, quae necessarium aut utile sit Fidelibus certo tenere ac credere. Ceterum Conclusio ista in manifestam Apostolicae Sedis contumeliam vergit. Si enim *piissima sententia jam revelata est Ecclesiae*, eamque Fidelibus proponere Ecclesia negat, quamvis tot Regum & Populorum in Hispania degentium precibus fatigata: quid aliud hinc inferat Populus, nisi Romanos Pontifices aut ex incuria, aut ex Pietatis defectu, aut alio aliquo parum laudabili consilio, distulisse haecenus proponere Revelationem, quam eis notam audaces ii Theologi arbitrantur? Temere etiam hoc pronuntiari intelligas, quum nuper viderimus, Gregorium XV. disertis verbis scripsisse, *nondum aeternam Sapientiam Ecclesiae suae tanti Mysteriorum penetralia patescisse*. Et quid quaeso deinde aut rationum, aut monumentorum attulere Theologi, ut eadem penetralia relerata tandem Ecclesia agnoverit? Octava Conclusio: *Probabile est, in sensu literali Immaculatam Conceptionem contineri in sacra Scriptura.* Nona: *Non desunt in Novo Testamento testimonia, quae videntur probabiliter in sensu literali Immaculatam Conceptionem sacrae Deiparae continere.* An ita se res habeat, tum certo sciemus, quum de Quaestione hac definitivum Apostolicae Sedis judicium prodibit. Decima Saavedrae Conclusio: *Dicendum est, si pia sententia est jam Revelata, non esse improbabile asserere, quod etiam si Immaculatae Virgi-*

nis Conceptio neque sit ab Ecclesia definita, neque sufficienter Fidelibus ad credendum cum obligatione inducente assensum supernaturalem Fidei propofita, & explicata, formaliter loquendo est fidei objectum. Utique sapientes mirari non poterunt hominem adeo intrepide superaedificantem super praemissis patentissime fallis. Ecquando enim pia sententia est jam Revelata, ut Fidei objectum evalisse potuerit? Atque haec ingenia sunt, qui Certitudinem Scotisticae sententiae confirmandam ac depraedicandam sumere. Undecima: *Dicendum existimo, quod si Angelicus Doctor, fulgentissimus Sol, vivens nunc lampade phoebea cunctas illustraret Ecclesias, PROCUL DUBIO amplecteretur ultroneus sententiam piissimam.* At quis tantam huic confidentiam fecit, ut procul dubio hoc futurum affirmet? Tot millia doctorum hominum nunc vivunt, qui Thomae Aquinatis se discipulos profitentur, iique nondum Scotisticae adhaesere sententiae. Et numquid *fulgentissimus ille Sol* eclipsim patiebatur, quum oppositam sententiam tenuit & docuit? Sed haec somnia missa faciamus, ut culmen Saavedranae doctrinae attingamus: Duodecima illius Conclusio est: *Dico primo, qui Sanguinem & Vitam profunderet, ut assereret, Ecclesiam Catholicam pie & religiose servare, & celebrare Festum Conceptionis Immaculae, & nullo falso cultu illud Fidelibus celebrandum proponere; piumque esse, & Catholicum, & sacris Listeris, & Sanctorum testimoniis nullatenus dissonum; sed potius consentaneum valde & conforme, illam praedicare & defendere: vere esset Martyr.* Nemo Catholicorum non amplectatur Conclusionem istam; & ego in primis amplector. Attamen quia immixta sunt nonnulla, quae lucem poscunt, hanc ego adjiciam. Qui Sanguinem daret pro asserenda auctoritate Ecclesiae in Festis diebus indicendis, & obligatione Fidelium de iis observandis, quae sub praeecepto indicuntur, Martyr foret, quia pro Dogmate Ecclesiae tuendo mortem subiret. Verum quod est ad objectum Festorum, cum distinctione procedendum est. Festi dies, quibus aliquod Mysterium, aut factum, revelatum a Deo in Scripturis divinis, aut in Traditione Patrum, a nobis celebratur, objectum habet divina Fide credendum: exempli gratia dies Resurrectionis, Natalis, Ascensionis, Corporis Domini &c. aut dies Annunciationis, Nativitatis, Purificationis, Desponsationis &c. Beatissimae Virginis, aut dies Apostolorum, Angelorum &c. At quod est ad dies Festos Sanctorum, quos veneramur non e Revelatione Dei, sed ex Constitutione Ecclesiae, earum quidem objectum Summe Pium, ac Religiosum est, & ad disciplinam Ecclesiae pertinet, quam violare Peccatum est, non tamen ad Fidei Dogma spectat,

stat, neque divina Fide credendum est. Non enim divina Fide credere jubemur, tot Sanctos a singularium Ecclesiarum Pietate cultos, quorum festum ac Officium Ecclesia probat, singulos in coelis regnare cum Christo. Et ii concluduntur in amplissimo Regno Pietatis Opinativae: multumque falleretur, qui ex quo eorum festivitas celebratur, Fide supernaturali credendum putaret, eos in Coelum receptos, non secus ac Sancti, nobis e Sacris Litteris noti. Nunquam vero in his Festis praescribendis aut probandis Ecclesia fallitur, quia Sanctorum cultus terminatur in Deum, ac propterea quum affectus noster in Deum & tunc feratur, falsus esse non potest. Porro ad Festum Conceptionis Marianae quod attinet, jam diximus, ex eo nihil evinci posse ad dignoscendum, fuerit ne, an non, Virgo exempta ab originali peccato, quum *apud nos etiam*, uti inquit Cardinalis Bellarminus Lib. III. Cap. 16. de Cultu Sanctorum, *non sit Certum, an Beata Virgo sine peccato Originali concepta fuerit: Ecclesia enim utramque Opinionem permittit; & fundamentum hujus festi praecipuum non est Conceptio Immaculata, sed simpliciter Conceptio Matris Dei futurae: & hoc Festum etiam illi celebrant, qui putant Virginem in peccato conceptam.* Denique si licet, sub nomine hujus Festi Praeservationem Virginis celebrare ex Pietate Opinativa; licet etiam aliis Sanctificationem Virginis sub eodem nomine celebrare; neque enim hoc interdixit Bulla Alexandri VII. Illudir tamen Saavedra in Conclusionem ista Lectoribus suis, venditando, *servari ac celebrari a nobis Festum Conceptionis Immaculae*, quum e decretis Romanorum Pontificum nihil aliud celebremus nisi *Festum Conceptionis Mariae*. Quare conclusio haec circumspecte accipienda, & certe non ad omnia, quae is persuadere nobis voluit, extenditur spes & nomen *Martyrii* in tuendo Festo ejusdem Conceptionis.

Ultima Saavedrae Conclusio superest, hisce concepta verbis: *Dico Secundo: Qui mortem occumberet pro asserenda Immaculata Conceptione, sumta solum ut est VERITAS SPECULATIVA, & ut praescindit a proxi, quam prima Conclusionem explicuimus, vere esset Martyr.* Intactam liceat mihi relinquere Conclusionem istam. In eam quippe infra conferta acie invadam. Interea animadvertisse juverit, unde apud quosdam Hispanos, & apud alios Hispanis fidentes processerit Opinio, live Persuasio *Certitudinis* Scotisticae de Conceptione sententiae, quam Piam tantum ac Probabilem cum Romana Ecclesia ceteri agnoscunt, & ego in primis: Hoc est, e suppositiciis monumentis, quorum fidem diu in Hispania pervicacissime tutati sunt, qui
suae

suae factionis & patriae gloriam amor Veritatis praeferebant; e Patrum locis, quae *falsis interpretationibus*, & *alienis ab eorum mente*, uti Petavius animadvertit, in suam rem detorserunt; denique a mirabili nonnullorum confidentia, venditantium incauto Populo eam sententiam veluti doctrinam Fidei, & *proxime definibilem*, contempta interim auctoritate Ecclesiae Romanae, quae secus haftenus iudicavit, contempto quoque exemplo Academicarum, voventium quidem tutelam ejusdem sententiae, sed *secundum decreta Summorum Pontificum edita, atque edenda*: qua formula aperte significarunt debitam Fidelium promittitudinem ad deponendam ejusmodi sententiam, illiusque tutelam, si pro opposita aliquando staret Apostolicae Sedis iudicium. Quid plura? Teste ipso Parthenotimo pag. 5. Viennensis Academia coacta a Ferdinando III. Romanorum Imperatore vovere tutelam Immunitatis Marianae, vovit ac juravit, *Donec aliter a Sancta Sede Apostolica definitum fuerit*. Quamobrem nil ultra requiri puto, ut deum intelligamus, Intrinsecam, veramque *Certitudinem* in Scotistica sententia desiderari, neque *Persuasionem* istius *Certitudinis* niti bonis tabulis; ac propterea nihil a Parthenotimo haftenus adductum fuisse, quo temeritas morientium pro tuenda Immaculata Virginis Conceptione excusari queat. Quod si Parthenotimus auctoritatem heic adhibet eximii Theologi Francisci Suarez asserentis sufficientia motiva haberi ad definiendam de Fide Scotisticam sententiam: norit Lector, magnum illum quoque Virum non satis heic sibi cavisse aut ab exuberantia affectus, aut a nimia credulitate. Nam eo ipso in loco, quem Parthenotimus laudat, scribit de eadem sententia referenda in album Dogmatum: *Quia saepe in Scriptura indicata est, ut vidimus, deinde ab antiquissimis Patribus, & (ut credimus) etiam ab Apostolis* (hoc est a falsissimis Laminis Granatensibus, a Pseudo-Dextro, aliisque commentis Hispanicae eruditionis) *est tradita*. Supra etiam vidimus, Parthenotimum objecisse nobis auctoritatem Joannis de Cardenas, tribuentis Scotisticae sententiae *Certitudinem Moralem, Physicam, & Metaphysicam*. At Cardenas & ipse ex illis est, quibus fucum fecere famosae eadem Laminiae Granatenses, & tot Pseudo-Chronica in Hispaniis edita: quod evincunt illius verba. Quum enim Caramuel haec de controversia Marianae Conceptionis scripserat: *Videtur non fuisse talia a Patribus ante quingentos annos*: Cardenas respondet: *Haec periodus multa continet certo falsa. Ex Apologia enim Petri de Hoieda, & ex P. Nierembergio in Tract. de objecto Festi Conceptionis, & ex P. Granado Tract. de Conceptione, & ex multis aliis satis clare constat,*

stat,

*stat, fere ab INITIO NASCENTIS ECCLESIAE, non Controversiam, sed pacificam Assertionem in sinu veterum Patrum natam esse. Quære nunc monumenta, e quibus haurias, vel ab initio Ecclesiae Immaculatae Conceptionis sententiam pacificum cursum inter Christianos obtinuisse. NULLUM aliud occurret, nisi Granatenfes imposturae, & suppositicia Dextri, Liutprandi, aliorumque ejusdem furfuris scripta. His autem positis, ad crism tandem veniamus Voti Sanguinari, quod *magnanimum Votum* a Parthenotimo appellatur, mihi vero Votum a Ratione Absonum, Temerarium, ac Intolerandum creditur.*

C A P U T X I I I.

Votum Sanguinarium contra leges Prudentiae susceptum. Neque ei Probabilis suffragatur. Neque Pietas Opinativa, quae ipsi inest. Quid Pie aliquid credere significet.

DICO primo: Imprudenter ac temere emisti Votum de Sanguine fundendo pro tuenda Sententia, asserente sine labe originali Sanctissimam Virginem. Et qui pro tuenda Veritate hujus sententiae ultero moveretur, a Peccato immunem minime futurum. Et manifesta ratio est, quia adversus Prudentiae leges homo operatur, qui Bonum Certum, & quidem maximi pretii, quale est Vita hominis, commutare vult cum Bono Incerto, quale est Opinio Scotistica. Ex quo enim, ut vidimus, sententia haec nemini ita Certa esse potest, ut omnem formidinem Erroris ac Falli prudenter excludat, quum adhuc Incertum dubiumque sit, quale futurum de ea sit judicium Ecclesiae; quumque Parthenotimus ipse agnoscat pag. 55. posse contingere, ut desinente summo Pontifice, *deprebendatur Veritas, & haec sit in sententia Piae contraria*: Scotistica eadem sententia consequenter adhuc constricta sit oportet inter limites *Opinionum*, pro quibus tuendis eligere mortem idem Parthenotimus nefas judicavit, scribens pag. 18. *Quis unquam somnians pro incerta Opinione fas esse jugulum offerre carnifici?* Praeterea fatetur idem Siculus pag. 71. consuetudinem Academicarum, & reliquorum voventium tutelam Immaculatae Conceptionis, conditionatam semper esse, quum tacite aut expresse tutelam ejusmodi polliceantur ut

juxta

juxta Summorum Pontificum Decreta, jam edita, aut deinceps edenda. Et sane apud Mongitorem Tom. I. Cap. IX. Panormi devoti Votum Martini de Leon Archiepiscopi Panormitani Anno 1655. conceptum legitur, *salvis semper sanctae Catholicae Romanae Ecclesiae approbatione, censura, & judicio inerranti.* Ita Votum Francisci Osoni Episcopi Cephaludensis & Siciliae Proregis haec habet: *Per quanto mel permette la Santa Catholica Romana Chiesa.* Votum quoque Martini de Redin Proregis Siciliae Anno 1656. conditionem istam apponit: *Suggerendolo però tutto alla censura e determinazione della Santa Chiesa.* Votum pariter Francisci Cardinalis de Judice Proregis Siciliae Anno 1702. haec addit: *Conformando nos con las declaraciones decretos, y constituciones Apostolicas, que pudieren determinarse en este punto.* Denique Votum Canoniorum Cathedralis Panormitanae clausulam hanc praefert. *Juxta decreta summorum Pontificum jam edita, aut deinceps edenda.* Clausulae istae, quae aut adduntur, aut subintelligi debent in omnium Votis pro tutela Scotisticae Sententiae susceptis, nemo non agnoscit quid significant. Scilicet agi de tuenda sententia, quae Pie creditur Vera, sed minime Certum iis est, an re ipsa sit Vera, quum Voventium animus (uti decet ac necesse est) paratus sit ad mutandam Opinionem, quoties Sanctae Sedis judicio decerneretur, Veritatem stare in Thomistica Opinione contraria. Num Certum ac Evidens a parte rei aliquid esse potest, quod cras Romana Ecclesia Falsum deprehendere poterit? Quare quantumcunque Certa alicui videri possit Immunitas Mariana, Certitudo illa aliud esse nequit, nisi *Certitudo Subjektivae & Persuasionis*, cui ex omnium consensu potest tam Verum subesse, quam Falsum. *Persuasio* autem ista vim quidem interdum habet excusandi hominem, & Deo etiam gratum faciendi, dum pro sententia, quae non spectat ad Fidem, sed is Ignorantia aut Errore invincibili ductus, spectare ad Fidem certo sibi persuadet, mortem appetit. At in casu nostro Ignorantia aut Error Invincibilis adferri non potest, sed quidem tantummodo vincibilis, ac proinde ineptus ad excusandam temeritatem & crimen. Quum nempe nulli e doctis viris ignotum sit, Ecclesiam, cui nostram mentem in omnibus conformare debemus, quanquam sit probe conscia rationum hinc inde militantium in Quaestione de Conceptione, nullam tamen hactenus *Certitudinem* agnovisse in sententia Scotistica, immo sibi judicium de ea reservasse, ita ut temere agere, quicumque contenderet, pro hac una, & non etiam pro altera, Pontifices Maximos definitivum decretum pronuntiare posse.

Tom. V.

N

Con-

Contra: Certum ac Evidens Bonum est hominis Vita idque extremum: qua de re nemo dubitat, aut dubitare potest. Est etiam inter leges non solum Religionis Christianae, sed & Naturae, ut quisque suam Vitam conservet; ac proinde gravissimum crimen est, eam sponte perfundere sine gravi ac legitima causa. Peccatur nempe eo casu contra Caritatem, quae praecipit amorem & conservationem individui nostri; peccatur contra Justitiam, quae respicit Deum. Non enim nos Corporis ac Vitae nostrae domini sumus, sed Deus. Ut quid ergo id quod nostrum non est, sed Dei, Deo minime praecipiente, neque Ecclesia, divinae Mentis interprete, illud probante, perdere quicquam audeat arbitrio suo? Et fortassis pro Errore, hoc est pro tuenda sententia, quae ut ille sibi persuadeat continere Verum, potest tamen continere & Falsum? Neque heic ullus Probabilissimi privilegii locus, aut usus relinquitur. Nam Probabilis quidem est sententia Scotistica, eamque consequenter & licet, & laudabile est scriptis ac voce tueri. At minime Probabile est, licere mori ob tutelam ejusdem sententiae. Haec duo omnino diversa sunt, neque confundenda. Fingamus tamen, aliquam Probabilitatem Sanguinariae huic Opinioni ab extrinseca paucorum auctoritate accedere; at tunc animadvertendum, etiamsi statuamus, licere sequi in praxi Opinionem minus Probabilem in concursu Probabilioris, & tutioris (quod alii negant): ubi tamen agitur de re magni momenti, & ex qua in Religionem, aut in Rempublicam, non levia incommoda sive pericula manare queunt, uti est in Sacramentis conferendis, in medendo ex officio aegris, in judicando ex officio de Vita ac fortunis hominum, in amplectenda Religione vera, in permittenda famulis occulta compensatione: tunc ab Ecclesia jubemur sequi Opinionem tutiorem ac Probabiliozem. At quis nescit, temporalium rerum gravissimam esse hominum Vitam? Exigit ergo cura ipsius, ut in praxi tutiorem ac Probabiliozem sententiam pro conservando pretioso hoc bono praeferramus minus Probabili. Et si quis in oppositum nitatur, uti jam confixae fuere a Romanis Pontificibus Propositiones, a quibus in magni ponderis negotia Probabilissimi licentia ingerebatur, ita expectandum erit & Opinioni Sanguinariae nigrum theia ab eadem Apostolica Sede. Nam ubi moriaris causa propugnandae Scotisticae Sententiae, si forte haec Errorem complecteretur, nemo non videt, mortem tuam nihil operaturam, ut sententia illa Vera fiat, Veritatemque, qua caret, per Sanguinem tuum accipiat. Cur ergo rem adeo pretiosam projicis, ut nihil consequare? Quod si aliquando, Sancta Sede decern-

mente, deprehenderetur stare Veritas in sententia Piae opposita, (quod uti possibile Parthenotimus ipse agnoscit pag. 55.) quis imprudentiae summae ac temeritatis illos non arcefferet, qui nimium suo fidentes cerebro, atque inconsulto zelo pertracti, sententiam nolentes expectare Ecclesiae Romanae, pro Opinione, quam sibi temere Certam persuaserant, tormenta ac mortem sustinuisent? Ergo occurrendum mature improvido paucorum consilio, qui sine Dei aut Ecclesiae commendatione praefraete volunt, ut credatur Verum ac Certum, quod ipsamet Ecclesia pro Incerto adhuc tenet, & cui Falsum subesse potest; & bene collocatum suae Vitae Bonum, illudque Certissimum putant pro ejusmodi adhuc Incerta sententia.

Secundo dico: *Imprudenter ac temere concipi Votum de Mortis subeunda pro Pietate, quae inest actui Opinativo de Immaculata Virginis Conceptione; & qui hoc titulo moveretur, expertem peccati apud Deum minime futurum.* Aspectu primo vix intelligatur, cur Conclusionem istam posuerim, quum statim haec menti occurrant. Teste ipso Alexandro VII. *Pia* est sententia Scotistica; ergo *Certa* est *Pietas* huic sententiae inhaerens, & consequenter pro re *Certa* daret Vitam, qui non pro *Veritate*, sed pro *Pietate* ejusdem Mortem eligeret. At heic non levis aequivocatio latet. Necessarium autem, nedum utile est, diligentius repetere, quod supra innui, scilicet duplex genus *Pietatis* in Ecclesia dari. Primum complectitur *Pietatem Intrinsecam*, eam videlicet, quae conjuncta est cum certo Revelatis a Deo, sive universalibus, sive singularibus, nobis a divina Scriptura, aut a Traditione Patrum per Ecclesiam notificatis. Ex quo Verissima ac Certissima *intrinsece*, atque ex parte rei haec sunt, *intrinsece* sunt etiam *Pia*. Pietas enim in iis cum Veritate identificatur. Ita omnia Fidei dogmata, Sacramenta, Virtutum actus &c. *Pia*, atque ita *Pia* sunt, ut nihil Erroris aut Falsi spectata in se, & cum debitis circumstantiis, secundum testimonium Dei & Ecclesiae continere possint. Alterum genus *Pietatem Opinativam* complectitur, eam nimirum, quae in *Persuasionem* hominum consistit, eorum videlicet, qui prudenter credunt, aliquid spectare ad Dei cultum & honorem, sive ad Veritates Religionis sanctissimae, minime interveniente Revelatione divina per Ecclesiam nobis proposita, sed rationibus tantum Verisimilibus ac Probabilibus, quae sufficientes prudenti homini videantur, ut *Pia* illa res, sive sententia credatur, ac Deo grata & ab Ecclesia probata, aut saltem non improbata. Universale axioma est, colendos Sanctos, venerandas eorum Reliquias. Heic habes *Intrinsecam Pietatem*, quia dog-

ma Fidei est. At quum ad singularia venimus, quae neutiquam a Revelatione Dei pendent, succedit *Pietas Opinativa*. Plurimi re ipsa Sancti numerantur, quorum Sanctitas neque ex Sacris Litteris, neque ex Apostolica Traditione, nobis innotescit, neque dici jure potest in universali propositione revelata; sed tantummodo ad nos descendit ex antiquissimo Populi judicio, qui olim eos in Sanctorum catalogum in-
 vexit. Hos etiam venerari, hisce etiam nos commendare, ut Deum pro nobis orent, aequum & laudabile est. Idque actus *Pietatis* merito dicitur, non *Intrinsicae* quidem, quia objectum in casu isto ad Fidem non spectat, utpote nequaquam Revelatum a Deo; sed *Opinativae*, quum nobis non desint motiva, prudentem animum moventia ad existimandum, illorum animas in Coelum receptas, idoneasque ad exorandum Deum pro nobis. Idem dicas de tot Reliquiis, quas *Pie*, hoc est *Probabiliter* pertinere credimus ad hos illosve Sanctos; de tot Miraculis, aliisque innumeris in Historia Ecclesiastica narratis; denique de tot sententiis etiam contrariis, quae in Scholastica Theologia extra Dogmata Fidei quotidie agitantur. Quo plus aut minus Verisimilitudinis, sive Probabilitatis haec praefertunt, quo plus aut minus ad Evidentiam accedunt, aut inde recedunt, eo etiam major est gradus illius *Pietatis*. Ecclesia vero & huic *Opinativae Pietati* locum facit in oeconomia Religionis. Et merito quidem. Nam etsi materialis aliquis Error in Persuasionem hominum de hisce rebus aut sententiis accidere possit, dummodo eorum falsitas ignota sit, non fallitur affectus, qui in Dei cultum tendit. Taceo heic de *Pietate*, quae nititur motivis nimium levibus, aut falsis; haec enim, ut alibi dixi, non est legitima Pietas, sed Imprudentia, Superstitio, Impietas, Fanaticismus. Ut laudabilis *Opinativae Pietatis* exemplum adferam, prudenter creditur, Sancti Jacobi Apostoli Corpus Compostellana in Ecclesia honorari; Marthae, Magdalenae, & Lazari apud Provinciales; & Bartholomaei Apostoli Beneventi, aut Romae. Credere, sacra illa pignora spectare ad eosdem Sanctos, ibique eorum intercessionem apud Deum implorare, laudesque illorum celebrare, *Pietatis Opinativae* actus est. Etiam si non ea essent celeberrima ejusmodi Lipsana, quae vulgo reputantur; immo etsi ne sacra quidem illa Corpora forent: devotio tamen Populi ad Deum secura pergit, quem in illis creditis Sanctorum Reliquiis honorat, & a quo uno, uti omnium bonorum largitore, beneficia poscit & sperat, dum ad sepulchra Sanctorum orat. Nul-
 lum hinc in Ecclesiae doctrinam aut Rempublicam incommodum; immo ad alendam, aut augendam Populi devotionem conducere po-
 test.

test. Rursus in Scholis Quaestiones non paucae servant, his in unam, illis in aliam euntibus sententiam, quae tamen singulae *Pietatem Opinativam* sibi tribuere possunt. Dum istae concertationes, Opinionesque variae, prudentibus innitantur rationibus, & minime adversentur Revelatis a Deo, neque detrimento sint sanae doctrinae, atque in praxim deductae nihil officiant recto regimini Ecclesiae, aut quieti Reipublicae, sive fortunis ac Vitae hominum, disputent quantum velint docti, etiam ad raucedinem: in tuto est Ecclesia atque Respublica. Verum ac Certum assequi nequeunt? Verisimilia ac Probabilia eos sequi non dedecet, ac nemini nocet.

Ad hanc normam exige nunc sententiam speculativam de illibata Conceptione Virginis. *Pia*, est, & *Pia* ab omnibus habetur, atque habenda est, quippe Probabilibus ac prudentibus sulta rationibus; pertinere creditur ad cultum Dei, atque ad honorem Virginis. Sed *Pia* est *Pietate Opinativa*, non *Intrinsicca*, non *Objectiva*. Eam quoque in praxim deducere *Pium* est, nempe colendo Virginem uti conceptam sine macula in primo instanti, ejusque Festum ac Officium celebrando secundum istam sententiam. Nemini exploratum certe est, subsit ne Veritas huic sententiae, an non; attamen dum pendet Ecclesiae judicium, & apparentia Veritatis pro ea militat, nullum ex hujusmodi cultu ac persuasione detrimentum fuit in Ecclesiae doctrinam ac disciplinam, quum sibi Romana Ecclesia reservavit, quando opportunitas aut necessitas exegerit, discernere, sterne revera pro illa sententia Certa Veritas, an pro opposita. Et quoniam conflictus duarum Opinionum istarum tranquillitatem Reipublicae turbabat, in Hispania praesertim, sustulit prudentia Romanorum Pontificum haec scandalorum ac tumultuum semina, indicto Thomisticae sententiae fautoribus silentio, sed inlaeso jure ejusdem, si forte aliquando Veritatem in illa deprehenderet Apostolica Sedes. Neque enim & haec altera definit esse *Pia*, atque Probabilis; quod inde manifeste elucet, dum Ecclesia illius sectatores, aequae ac alterius patronos, caros habet; neque solum non averfatur, nec damnat, sed honoribus auget, non secus atque ante eis indictum silentium. Profecto in alterutra ex hisce sententiis, sive Opinionibus, Error latet; sed haecenus est materialis Error, quem depellere, nunc nequimus, & tum solum perspicere licebit, quum Ecclesia Quaestionem dirimet, aut quum misericordia Dei faciente in conspectum supremae Veritatis post mortem veniemus. Quamobrem perspicax Lector intelliget, quantum ponderis sit Parthenotimi nostri fiducia, dum pag. XIV. Praefatione scribit: *Quod*

sen-

sententia de Immaculata Virginis Conceptione jam pridem in Ecclesia nuncupata sit Pia, ipso Romano Pontifice hunc titulum approbante, spem maximam facit Propugnatoribus, fore ut ejus Veritas aliquando tandem declaretur, & palam fiat. Ita sane, ex quo Sixtus IV. vetuit, ne Scotistica sententia Haereticis aut Impietatis titulo, oneraretur, haec probante Apostolica Sede iustam possessionem Pietatis obtinere coepit. At quid inde? Nihil Parthenotinius distinguit inter Opinativam atque Intrinsecam Pietatem. Id tantum consequuta est Scoti opinio, ut negari Pia in posterum, dum pendet judicium, sine temeritate & culpa non possit. Sed Pia perrexit esse & altera Thomistarum opinio, neque ei hunc titulum sine impudentia & peccato quisquam auferre potest. Proinde utraque sententia nunc versatur inter limites Pietatis Opinativae, non vero Intrinsecae. Quod etiam ediscimus ex usitata inter Theologos dicendi formula, hoc est quum dicimus: Hoc Pie creditur. Significat ista, rem aut propositionem aliquam non spectare ad doctrinam divinae Fidei; adduci tamen nos ad credendam eam Veram tum religioso quodam affectu, tum rationibus verisimilibus ac probabilibus pro ea militantibus. Quod quum dicimus, indicamus & sentimus, rem aut propositionem illam adhuc Opinionis naturam retinere, ac tantummodo e Persuasionem atque affectu nostro efformari judicium illud, quod propterea Opinativum est, non vero e certa cognitione Veritatis inhaerentis objecto. Interroga quemvis Pie credentem aliquid, an ita credat, ut omnem Erroris formidinem excludat. Negabit procul dubio, si sapit. At hoc ipsum est affirmare, Opinionem in illo judicio involvi, quum Opinionis proprium sit involvere metum saltem levissimum alicujus Erroris. Propterea quisquis moderate, & circumspecto judicio inter Catholicos loquitur, oculoque intento Magistrum nostram confestatur Ecclesiam Romanam, sentit ac dicit, se Pie credere Immaculatam Virginis Conceptionem, hoc est se in ea sententia agnoscere Pietatem duntaxat Opinativam, non vero Pietatem Intrinsecam, omni videlicet suspitione & formidine Erroris carentem. Atque ita sane loquuntur eximii viri, atque ornamenta Romanae Ecclesiae, e quibus duos tantum laudabo. Contra Picinium Haeticum scribens Clarissimus S. R. E. Cardinalis Vincentius Gottus Ordinis Praedicatorum Tom. I. Cap. IX. §. 8. ait: Ci deride egli, perchè Piamente crediamo la Vergine preservata dal Peccato Originale. Alter S. R. E. itidem Cardinalis celeberrimus Franciscus Maria Casius Ordinis Minorum Cappucinatorum Tom. I. Serm. II. scribit: Della sola Vergine c'insegna la Fede, che su esente da ogni colpa

colpa attuale, e la Pietà ci persuade, che sia immune per singolar privilegio, ancora dall'originale: quod idem est ac dicere, nos Pio affectu & religiosa Persuasione eam credimus, idest Opinamur, ab originali labe praeservatam. Egregiis hinc viris adjungere liceat doctissimum quoque virum, & Polemicae Theologiae pugilem Clarissimum, Cajetanum Mariam Merati, Clericum Regularem, & Sacrae Congregationis Rituum Consultorem, qui in Libro de Veritat. Religion. Discurs. XVII. pag. 62. scribit: Per un speziale privilegio Piamente si crede, che anche la Madre di Dio Santissima sia stata preservata dall'universale contagio della Colpa Originale.

Licita ergo est, & laudabilis *Opinativa Pietas*, ejusque officia & exempla passim habemus in Oeconomia Christianae Religionis, cum in Scholasticis & Speculativis Theologorum quaestionibus, tum in praxi devotionis erga Sanctos, eorumque Reliquias, atque in aliis ad Historiam ritusque sacros pertinentibus. Quo majoribus Probabilitatis fundamentis nititur ista Pietas, eo laudabilior est. Eaque ratione tot Sanctos colimus Pie ac Prudenter, quos Populus sine Romana Canonizatione pro Sanctis ab antiquo habet; eorum Festum celebramus, de iis Officium recitamus, Reliquias deosculamur, Indulgentias quoque in illorum honorem summi Pontifices elargiuntur. At hujusmodi Pietas etsi rationabilis multum atque laudanda, multum tamen differt ab *Intrinfeca*. *Opinativa* quippe ex Opinione nata, certum ac minime fallax judicium procreare non potest; atque ut paucis dicam, nihil aliud est, nisi *Opinio Pietatis*; & neutiquam *Certitudo objectiva Pietatis*; non enim sita est in indubitata Cognitione Veritatis existentis in objecto, sed in *Persuasione* tantum Intellectus nostri. Contra *Pietas Intrinfeca* stabilitatem ac Certitudinem suam desumit ex objecto, quod est, quale nobis persuademus; ejusque Veritatem vere a Deo revelatam fuisse credimus, quia id nobis constat evidenter ex attestatione Ecclesiae divinitus falli nesciae. Atque ex his intelligere jam possumus, qua in aequivocatione versetur Siculus Theologus, quum scribit pag. 18. eos, qui Sanguinarium Votum emittunt pro tuenda Praeservatione Virginis, morituros non pro *Veritate*, sed pro *Pietate*, quae *Certo inest Actui Opinativo*. Non enim *Certo* atque *Intrinfecae* inest Pietas actui illi Opinativo, ex quo is fatetur; & fateri cogitur, actum ipsum *Opinativum* esse. Nimirum quando objectum tale est, ut de eo certam cognitionem habere non possumus, quae omnem depellat formidinem Erroris (uti habemus in propositionibus divina Fide creditis, quas sine metu Erroris veras credimus) in Intelle-

tellektu nostro nihil aliud est nisi *Opinio*. Et rursus quum *Pietas* fundetur super ipsam *Opinionem*, nequit haec *Intrinsece Certa* esse, neque sibi tribuere plus quam actus, cui inest, habeat in semetipso. Propterea *Pietas*, quam agnoscimus in *Opinione* Scotistica de Conceptione, *Opinativa* & ipsa duntaxat est, sive *Opinio*, non vero *Certitudo Pietatis*. Porro his positis, quicumque moretur pro *Pietate*, quae inest *Actui Opinativo de Immaculata Conceptione*, adhuc pro tuenda *Opinione* vitam suam daret. Atqui, ut ipse Parthenotimus non uno in loco agnoscit, ac potissimum pag. 15. & 18. *nefas est, Peccatum est*, pro tutela *Opinionis* mortem oppetere. Ergo tenere & contra Dei legem Votum concipitur de danda Vita pro defendenda Immunitate Mariana.

C A P U T XIV.

Alius Honor Intrinsecus, alius Opinativus. Alia Sanctitas Intrinseca, alia Opinativa. An statuendum fastigium devotionis erga Virginem in tuenda Scotistica sententia. Datur & Cultus Opinativus. Mendacii probrum ab ea Opinione eliminatum. Pia Credulitas, Pia Persuasio explicantur.

QUOD de *Pietate* diximus, idem dicendum de *Honore* Virginis, de *Sanctitate* Virginis, quibus speciosis nominibus confidit Parthenotimus, se tutaturum voventes mortem pro Scotistica sententia. Latet ibi eadem aequivocatio. Nam alius est *Honor Intrinsecus Deiparae*, eiusque *Intrinseca Sanctitas*; alius *Honor Opinativus*, atque illius *Sanctitas Opinativa*. Primus Honor, uti & *Sanctitas* Mariae, situs est in incomparabili praerogativa Maternitatis Dei, in Virginitate perpetua, in Immunitate ab omni actuali peccato, in Humilitate eximia, in Caritate, ceterisque Virtutibus, quae in eam mirabili consensu & singulari gratia Dei coaluere, ita ut in ea omnium Virtutum habeamus exemplar. Haec novimus e divinis Scripturis, & Traditione Patrum, & definitionibus Conciliorum; eaque propterea divina Fide credimus; atque ob ista supra reliquos Sanctos eminet Sancta Dei Genitrix Maria. Praeter istam vero *Sanctitatem Objectivam*, de qua dubitatio ulla Christiano homini esse nequit, & cui consequenter singularis

laris Honor ab unoquoque Fideli habetur, agnoscenda quoque est *Sanctitas Opinativa*, seu *Putativa*, quam eidem Deiparae tribuimus, sita in variis *Opinionibus*, quas pia gens habet de aliquibus privilegiis, actionibus, miraculis, ad ipsam Salvatoris nostri parentem spectantibus. Haereticus foret, qui pertinaciter Sanctitati primae se adversarium praeberet. At altera, scilicet *Opinativa*, quum Sigillo Veritatis ac Certitudinis careat, nos minime obligat ad credendum, liberumque est cuique sentire heic, quod magis consentaneum rationi censebit. Et quoniam ejusmodi Sanctitas in Opinione sita est, immo nihil aliud est, nisi Opinio Sanctitatis, propterea qui pro illa tuenda ultro se trucidandum Tyranno praeberet, imprudentiae ac temeritatis damnandus foret. Simili ratione datur *Honor putativus*, seu *Opinativus*, Virgini, aliisque Sanctis delatus, probante, aut saltem non improbante Ecclesia. Pie sibi persuadent nonnulli, se possidere *Annulum*, quo Beatam Virginem Sanctus Joseph desponsavit. Alii se habere putant *Vestes*, *Velamina*, *Capillos*, aliasque ejusdem Deiparae Reliquias. Honorem Virgini habent in honorandis hisce Reliquiis, sed Honorem ab Opinione progenitum. Huic autem Opinioni, dum falsitas aliunde non appareat, eique possessio immemorabilis patrocinetur, Ecclesia nullam infert molestiam, immo etiam favorem impertitur. Cultus enim ille & Affectus in Virginem tendit, cui revera aequum est, Christi Fideles omnes maximum habere Honorem. Proinde si quis pro *Opinativo* isto *Honore* Mariae impendere Vitam veller, contendens videlicet, ad Honorem Virginis illum *Annulum*, *Reliquias* illas spectare, pro *Opinione Honoris* Virginei moreretur: quod jam statuimus necesse esse Homini Christiano.

Atque heic erit fortasse qui petat, cur in *Pietate Opinativa*, seu *Sanctitate Putativa* Virginis, quod est ad illius Conceptionem, nonnulli veluti Palladium & culmen eximiae Devotionis erga Virginem constituent, quum tot alia Privilegia ac dona illi a Deo sine ulla dubitatione collata, & ad Intrinsecam illius Sanctitatem spectantia, habeamus, in quibus sat laudandis & honorandis nos sermo ac tempus deficiant? Nonne Maria vel sine praerogativa Conceptionis Sanctissima semper fuit, semperque erit? Et ne temere hoc sciscitari quisquam videatur, verba repetet, quae Capitulo Primo attulimus e Bulla Pii V. ubi ait: *Quasi desint praeclarissima Mariae merita, quae nec Angelica quidem lingua satis digne referri possunt; & quasi ex illo uberrimo fonte, puteoque aquarum viventium non possint saluberrimas haurire aquas, quibus Populus magna cum utilitate atque dulcedine ro-*

Tom. V.

O

fice-

ficeretur: ad dissipatas cisternas accurrunt &c. Haec Romanus Pontifex, & quidem Sanctus, & quidem doctissimus, & Deiparae devotissimus. Cur ergo, instabit aliquis, heic fastigium Pietatis erga Virginem Sanctissimam collocemus, hoc est in re Incerta ac Dubia, potius quam in tot aliis indubitatis Intrinsecae Sanctitatis Marianae argumentis, quae nobis Fides suppeditat? Quid solidae responsionis ad interrogationem istam daretur, inquirere non juvat. Repetam ego potius, quae Sanctus Bernardus habet in celebri Epistola 174. ad Canonicos Lugdunenses: *Virgo regia, inquit, falso non eget honore, veris cumulata honorum titulis, insulis dignitatum.* Ad quae imitationem & ego Lib. II. Cap. VI. de Ingeniorum Moderatione dixeram: *Ux sit post Filium suum supra ceteras creaturas laudanda Maria, non indiget ipsa dubiis laudibus, neque imprudenti sacrificio.* Ad quae verba Parthenotimus pag. 57. ita respondet: *Dei, & Virginis Filius se in eo honoratum facit, quem tu Probabiliter existimas esse inopem, ei que stipem liberaliter impertis. Est quidem persalum Probabilis illius inopia; ac certo honesta tua eleemosyna. Non inficior ergo, Beatam Virginem non indigere dubiis laudibus: Certa tamen est laus tueri, quod sine labe sit Concepta, etiamsi Certum non esset, quod fuerit ipsa Concepta sine labe.* Haec Theologi nostri mens: uti honestum est eleemosynam amore Dei conferre homini, quem Probabiliter existimas indigere, quanquam fortasse non indigeat; ita etiamsi Certum non sit, sed tantum Probabile, Virginem fuisse sine labe Conceptam, honestum tamen est, ac Certa laus eam tueri in ipsa Conceptione Immaculatam. At ipso ego: si tu plures ceruens sine dubitatione egenos, praecipuam gloriam tuae Caritatis collocares in ferenda ope non istis, sed aliis, quos non Certo, sed Probabiliter indigere putares: num Prudentia tua multum laudis referret? Num ordinem Caritatis recte festari dicereris? Quin laudabilius, Deoque gratius esset, illis potius, quam istis opitulari, nemo sapiens negabit. Ita recurrit petitio: cur tu praerogativam Conceptionis Immaculae, quae Probabilis quidem est, sed simul Dubia, ac errori obnoxia, tam vehementi studio exornare, tueri, Regibus ac Populis uti sublime pignus Pietatis erga Deiparam commendare pergis? Cur huic Persuasioni peculiaribus ubique honores procurare non desinas, ita ut tot alia Virginis merita, & praerogativae, longe maiores, ac divina Fide certissimae, tibi vilescere videantur, aut certe pari studio minime a te colantur? Num factionis tuae amor, & victoriae cupiditas, iocundo tibi hunc actum ministrat? Verum haec alii considerent. Interea animadvertamus,

mus, quae aequivocatio latet in iis Parthenotimi verbis: *Certa est laus tueri, quod sine Labe Virgo sis Concepta, etiamsi Certum non esset, quod fueris ipsa Concepta sine labe.* Per me sane liceat, Parthenotimo, & cuiusque sententiam Scotisticam propugnanti, persuadere sibi, certam ex illius tutelam laudem relaturum, dum tutela in verbis & scriptis consistat. Sub ista conditione cuiquam molestus esse nolo. Verum ubi Theologus noster Certam hanc laudem stabilire hoc in loco conetur, ut laudabile quoque vendiderit Sanguinarium Votum eidem superstructum, Caritas erga fratres reclamare me cogit, Laudem hanc sub Opinione adhuc constringi, non sub Certitudine; ipsamque Conditionatam esse, non Absolutam, quum ejus qualitas & qualitate objecti pendeat, ita ut Certa sit Laus, si Certa sit Veritas objecti; Probabilis vero duntaxat, si objecti Veritas sit tantum Probabilis. Ergo in supposito, quod Parthenotimus ipse heic amplecti non detrestat, *Certum* videlicet *non esse, quod Maria fueris concepta sine labe*, nunquam poterit esse Certa Laus, ita velle tueri Incertam hanc Dubiamque sententiam, ut pro ea Certissimum, eximiumque Vitae Bonum profunderet liceat. Quippe statuimus, nefas esse in Opinionum tutela impendere Vitam.

Eandem porro aequivocationem sub diversis nominibus refricam videas a Theologo Siculo. Dixerat Lamindus: *Non indiget Maria imprudenti sacrificio & tu contra indiges Vita tua, ut eam in Fide tuenda ac Virtutibus exercendis justius impendas.* Quid reposuerit Parthenotimus pag. 57. accipe: Inquit, *ne ipsum quidem sacrificium improprie dictum Virgini offerri. Nemo pro Virginis Cultu moriens, se Virgini litaret, sed Deo. Non Ecclesiae, pro Ecclesiae iuribus tuendis occumbens, sed Deo vitae sacrificium obtulit Thomas Cantuariensis. Etiam Religio Virtus est. Ad Religionem, aut Virtutem huic affinem (idest ad Pietatem) pertinet Virginis Cultus. Posset ergo etiam ex mente Lamindi pro exercitio Cultus Mariani vitam impendere pie Vovens.* Ex mente mea? Apage. Neque ex mente mea, neque ex eorum mente, qui haec non perfunctorie scrutentur licebit mori ob tutelam Immaculatae Conceptionis. Hic enim Cultus est *Opinativus* duntaxat, & cum Veritate minime certo conjunctus. Fortiter mortem toleravit Sanctus Thomas Cantuariensis, sed pro legibus gravissimis, quas evidenter sciebat iustas, atque ab Ecclesia certissime promulgatas, & quas sibi custodiendas ex vi sui muneris agnoscebat. Peccasset, si vili timore ductus pessumdanti Regi jura Ecclesiae concessisset. Ac proinde de eo Ecclesia canit: *Pro lege Dei sui certavit usque ad mortem.*

tem. Quidnam heic paritatis cum iis, qui Vitam offerrent caussa tuenda Immunitatis Marianae? Numquid ulla Dei, aut Ecclesiae lex adferri potest de amplectenda ac tuenda Scoti sententia? Nulla, ut omnes norunt; immo liberum semper fuit, & adhuc est Fidelibus, oppositae sententiae adhaerere. Neque Cultui Sanctitatis Marianae necessarium fuit, aut est, ei tribuere expertem omnis maculae Conceptionem; nam incomparabilis Mariae Sanctitas, ab Apostolicis temporibus semper depraedicata, nunquam indiguit Laude ista, & Cultu Opinativo, quem nunc adeo illi gratum, & supra ceteras praerogativas carum, nonnulli ex Opinione tantummodo arbitrantur. Per undecim profecto Secula, atque ultra etiam, tum Sancti Patres, tum ceteri Pietate ferventes Christi Fideles, nihil nobis concedebant in observantia ac devotione erga Deiparam; attamen nulla apud eos mentio erat Immaculae Conceptionis. Quare nulla jubente ut urgente lege Dei, & sine ulla necessitate, aut occasione vitandi peccati, ex arbitrio duntaxat illo, quod vulgo *Capriccio* dicimus, occumberent Voto Sanguinario addicti, idest pro Opinione tuenda Vitam darent: quod, millies repetam, fieri sine crimine nequit. Haec etiam Parthenotimus addit pag. 76. *In Deiparae honorem cedit ejusmodi defensio, ejusque Deiparae honor generatim a Deo revelatus.* Exploratum certe est, Honorem Virginis spectare ad leges divinitus promulgatas, atque ad doctrinam Fidei. Sed in mille ridenda, aut detestanda abripi posset Pietas, quae posito hoc principio Virginem ad arbitrium nostrum honorari posse censeret. Idcirco singulares etiam Honoris hujus rationes Ecclesiae suffragio probandae sunt: alioquin facile homines imprudentia laborent, temeritate, superstitione, impietate. Indicet mihi quaeso Theologus noster, ubinam & quando Ecclesia probavit sacrificium Vitae nostrae oblatum Deo pro Scotistica Opinione. Immo non solum nova haec honorandae Virginis ratio profusione Sanguinis & Vitae, nequaquam revelata a Deo fuit, neque continetur in generali Revelatione honoris deferendi Salvatoris nostri Matri, neque suffragio Ecclesiae comprobata est; sed Revelatio contraria nobis ante oculos stat. Revelarum quippe a Deo fuit, ejusque praeceptum nobis ab Ecclesia proponitur & commendatur: videlicet, curam habendam esse Vitae nostrae, neque licere nobis arbitrio nostro eam prodigere, & praesertim nefas esse animam ponere pro tuendis Opinionibus nostris.

Dixeram ego, si ad vitam dandam pro tutela Opinionum nostrarum, quantumcumque Piarum, siue pro *Pietate Opinativa*, satis esset *Persuasio*, innumera esse, quae Pie creduntur, & pro quibus, quaa-

quanquam Falsis nonnumquam, Vita ipsa daretur, quod cerse in Ecclesia Dei numquam tolerandum, ne idem divinis atque humanis habeatur honor, neve temere, & pro Mendacio interdum projiciatur pretiosa hominum Vita. Parthenotimi responsio est pag. 79. In primis homo, qui non moderari Ingenii tantum, sed Moderator Ingeniorum videri vult, castigatius, reverentiusque hoc loco loqui debuit, & non Mendacii nomine sugillare directam ipsam sententiam de Virginis Immunitate, etiamsi permisteremus esse meram Opinionem. Heic fidem hominum, Superumque appellare liceret. Placide tamen petam, quandonam ego Mendacii probum conjecerim in sententiam de Virginis Immunitate? Unus Parthenotimus, aut immoderato animi aestu raptus, aut ad haec pertrahenda ineptus, haec mihi patenti errore, ne dicam calumnia, assingit. Quicumque alius Latinas literas didicit, illaque verba mea legit, continuo intelligit, me non de Scotistica sententia (quam nemo nisi impudens inter Mendacia referat) illic agere, sed de aliis bene multis, quae quidem *Pia* dicuntur & creduntur, atque in regno *Pietatis Opinativae* continentur. Ex istis quis, rogo, neget, quin aliqua originem suam ab errore, falsitate, immo & ab impostura traxisse potuerint? Qui pro hisce moreretur, pro Mendacio vitam profunderet. Id autem liceret e Parthenotimi doctrina; at nunquid istud in Ecclesia Dei unquam tolerandum? Alia heic Parthenotimus addit; scribens: *Deinde qui vovet Virginis Immunitatem tueri, necesse est, ut persuadeat sibi, quod re ipsa Virgo immunis fuerit a macula. Haec persuasio, ipso non refragante Lamindo, nequit esse Mendax, ni dicere velimus, quod Pium possit esse Mendacium.* Ita ille, de sophismate in sophisma intrepido cursu delabens. Utiq; Pium non potest esse Mendacium, neque nobis Pium credere licet id, quod novimus & credimus Falsum; nam ad cultum Dei veri, ejusque servorum, spectare Mendacium, Falsitas, ac Error nequeunt. Potest tamen *Persuasio* esse *Mendax*, idest fallax, quum fieri possit, ut sit de objecto, quod nobis sine ulla culpa nostra persuadeamus esse Verum, & tamen a parte rei sit Falsum. Et sane ut *Pia* dicatur aliqua *Opinio*, sufficit *Persuasio* e rationabilibus motivis, etiam extrinsecis, nata, Verum esse ejus Opinionis objectum, praevalens motivis suadentibus falsitatem objecti ejusdem. At quod nos ita nobis persuadeamus, nunquid propterea Verum erit Certumque illud objectum? Neutiquam profecto: potest & Falsum esse. Atque heic meminisse debuit Parthenotimus rem cunctis notam, nempe *Pie credere* aliquid, hoc ipsum significare, videlicet persuadere quidem nos nobis ex verisimilibus motivis,

& re-

& religiosa affectione quadam, aliquid esse Verum, & spectare ad Religionem veram; sed simul ignorare, an illud Certum ac reapse sit Verum, quum formido Erroris ab ejusmodi Persuasionem disjuncta non sit, nec esse possit in iis, quae ad Opinionem pertinent. Multa Pie credimus de Sanctis, eorumque Miraculis, atque Reliquiis. *Persuasio* nostra *Pia* est, *Opinio* nostra *Pia* est; non enim liquet, nos credere Falsum; simulque Falsum non est (uti infra e Gersonio videbimus) nobis apparere illud objectum Probabile, quum nobis revera constet de Probabilitate, atque de apparentia Veritatis. Nihilo tamen secius in objecto potest esse Falsitas; neque enim *Pia Credulitas* sive *Persuasio* illa cadit super *Veritate* vel *Falsitate objecti*, sed super *apparentia* vel *probabilitate Veritatis*. Firmam Persuasionem Lucenses nutriunt, complurium Seculorum possessione firmatam, sibi esse veram Salvatoris e Cruce pendens Imaginem, a Nicodemo, ut ajunt, effictam. Messianensibus itidem persuasum est, apud se servari Epistolam a Sanctissima Dei Genitrice conscriptam. Florentini quoque Imaginem ejusdem Deiparae ab Angelo, ut putant, depictam praeferunt, quemadmodum & alii Imagines a Sancto Luca depictas. Haec illi Pie credunt. Dicat quaeſo Parthenotimus, num *Persuasio* ista efficere possit, ut Verum Certumque sit, quod ipsi sibi persuadent. Oppido falleretur, si id affirmaret. *Persuasio* ista nihil aliud demum est, nisi *Opinio*, quae immunis a formidine Erroris esse non potest, quod est ad Veritatem ac Certitudinem objecti; objectum quippe illud etsi Verum esse possit, potest tamen & esse Falsum. *Probabilitas* facit, ut Prudens ac *Pia* sit de objecto illo *Credulitas*; neque fallitur Persuasio Probabilitatis, dum res revera Probabilis appareat, nec appareat Falsum. At fallax est hujusmodi *Persuasio*, quoties illud, quod tantummodo Probabile ac Verisimile est, ipsa habere velit pro Vero ac Certo. Et sane minime facere ipsa potest, ut Certum Verumque sit illud objectum, ita ut pro tuenda Persuasionem seu Opinione illa fas sit jugulum offerre sponte carnifici, quum legibus Prudentiae ac Religionis patentissime adversetur, Vitam dare Certissimum ingenique Bonum pro tuenda Opinione, hoc est pro re Incerta, ne dum putas te pro Veritate occumbere, pro Falsitate ac Errore occumbas; quum in manu nostra non sit, neque in viribus Persuasionis nostrae, Veritatem ac Certitudinem conferre rebus, quae ipsa careant. Equidem novi, fieri posse, ut ex pia affectione Voluntatis, vel e Passione aliqua, uti Amoris proprii, odii adversus alios, cupiditatis gloriae &c. voluntas ita determinet Intellectum ad aliquas si-

bi ca-

bi caras Opiniones, ut formidinem Erroris ab eo eliminet. Id etiam Parthonotimus a clientibus suis exigebat, nuper scribens: *qui vovet Virgini Immunitatem, necesse est, ut Persuadeat sibi, quod re ipsa Virgo immunis fuerit a macula*, Sed commodam profecto artem is tradit excusandi & honestandi cujuscunque Erroris, Superstitionis, & Fanaticismi, si Persuasio nostra non a rationibus scientificis nata, sed a Voluntatis affectu in Intellectum ingesta, satis est, ut certissime honestum nobis ac licitum evadat, quod inhonestum atque illicitum esse possit. Inter duas dubias sententias alteri ex iis adhaerere possumus, & in praxis necessitate debemus, ne peccemus. Ignorantia quoque Invincibilis vim habet excusandae Persuasionis nostrae. At in casu nostro hanc Ignorantiam Theologo allegare opprobrium, & sub ea operari crimen foret, quum ignorare is non possit, nec debeat, adversus legem Dei ac Naturae facere, qui pro Opinione tuenda vitam suam carnifici offerret; simulque sententiam de Virginis Immunitate intra Opinionum fines adhuc contineri, quum pendente iudicio Apostolicae Sedis, Certitudo vera & objectiva tribui illi non possit. Deinde exploratum habemus, abhorre a prudentis Theologi sapientia, immo ab Ecclesiae doctrina, tantam vim statuere in Persuasione, quae improvida ac temeraria esse facile possit, & potissimum ubi agitur de re gravissima, Vita nempe nostra sponte profundenda. Namque Prudentiae Moralis leges praecipunt, ut in arduis consiliis, quale certe est Mortis ultro eligendae, solliciti caveamus, ne immoderata aliqua affectio fucum nobis faciat, & ne corrupta ab affectu Voluntas Intellectum determinet ad persuadendum sibi Verum pro Falso, aut Falsum pro Vero, aut Incertum pro Certo, aut Certum pro Incerto.

Atque ex haecenus positis habemus, aedificare adhuc in aere Siculum nostrum, quum subdit: *Rursus pie vovens cerro tenet, quod Virgini perhonorificum sit Immunitas a macula & Immunitatis tutio. Estne hoc Mendacium?* Reponendum est, nullum heic esse locum *Mendacii*, si is intelligit iudicium falsum cum intentione fallendi proximum. Itaque abjecta *Mendacii* inopportuna voce, dicendum ei erat: *Estne haec Persuasio Fallax?* Continuo quippe tunc respondebitur: si Persuasio ista respicit duntaxat *Probabilitatem* ac *Verisimilitudinem*, non fallitur, quum re ipsa Probabile sit, hunc Honorem, sive Honorificentiam minime negatam a Deo fuisse Mariae. Sin respicit *Certitudinem* hujus sententiae ac honorificentiae, Fallax est, quum nulla authentica auctoritas, aut ineluctabilis ratio certos nos adhuc fecerit,

pri-

privilegium hoc fuisse Virgini collatum. Proinde *Honorificentia* ista *Opinativa* tantum est, & sub conditione posita, adeo ut Immunitas Virgini sit honorifica, si Deus revera id fecerit: quod interim nobis innotescere, non e ratiunculis nostris, sed per vocem duntaxat infallibilis Ecclesiae poterit. Nam si oppositum voluisset Deus, idque ab Ecclesia judicante disceremus, desineret esse honorifica Virgini Scotistica Sententia, quum e Falso verus Honor progigni non possit. Tunc autem Intellectus noster sine ullo negotio rationes inveniret, quibus ostenderetur, nihil Honori Virginis detrahi per Thomisticam sententiam, quum Sanctissima Christi Mater hacce praerogativa non indigeat, ut sit honore summo digna, eamque e tot aliis titulis supra reliquos Sanctos honoratam, ac honorandam, vel ab ipso sui exordio universa fateatur Ecclesia. Quamobrem illud. *certo tenet*, quod nuper cecinit nobis Theologus Siculus, imprudens ac temerarium est, si de *Certitudine Objectiva* loquamur; prudens, si de *Probabilitate Opinionis*, ita tamen ut Persuasioni istius Honorificentiae possit quidem subesse Verum, sed negandum non sit, quin possit subesse & Falsum. Contra nos certo tenemus, quacumque ex parte versetur Votum Sanguiarium, sive homo moriatur pro *Veritate*, idest, *Persuasionem Veritatis* sententiae Scotisticae de Conceptione, sive pro *Pietate*, quae. *inest actui Opinativo* (ut Parthenotimus ait) de eadem Conceptione, sive pro *Sanctitate*, *Cultu*, aut *Honore* Deiparae, ipsum mortem subiturum duntaxat pro *Opinione*. At hoc ipsum mori pro Opinione, grave foret Imprudentiae facinus, & Peccatum, ac faciem gereret Superstitionis, ne dicam Fanaticismi, quando Parthenotimus ipse jam falsus est, nefas esse Vitam dare pro Opinione tuenda.



C A P U T X V.

Votum Sanguinarium non ferendum, quia hominum Opiniones aequat Veritatibus divina Fide credendis. Effugia Parthenotimi praecoccupata. Idem Votum in Apostolicae Sedis injuriam conceptum. Scandalo futurum hostibus Ecclesiae Catholicae. Neque ejus pondus votentibus satis perspectum. Praeterea illusorium.



TERTIO dico: *Imprudens, temerarium, ac minime ferendum esse Votum, quod Veritatibus divina Fide credendis hominum Opiniones aequat.* Indicet mihi quisquam, si potis est, quale omnium maximum honoris & amoris pignus habere, & exhibere homo Fidelis possit erga Revelata a Deo, hoc est erga Dogmata Fidei. Nullum profecto majus, quam Vitam nostram, maximum nempe ac pretiosissimum temporarium bonorum, pro eorum tutela dare; idest mori potius, quam ea abnegare. Luculentissimum heic nobis exemplum praeiuvat ipse Dei Filius; nam super alia divini sui erga nos amoris opera, quis non praedicat mortem, quam ipse pro nobis pati dignatus est? Propterea Apostolus Roman. V. vers. 8. agebat: *Commendat autem Caritatem suam Deus in nobis, quoniam quum adhuc peccatores essemus, secundum tempus Christus pro nobis mortuus est.* Non dicit, natus est, praedicavit, oravit, &c. Inquit *mortuus est.* Ultra facere non potuit amantissimus Deus. Atque hoc idem testatus est ipse inquit Joan. XV. vers. 13. *Majorem hac dilectionem nemo habet, ut animam suam ponat quis pro amicis suis.* Pariter quoque Petrus amoris sui erga divinum Magistrum ostendendi causa agebat, Joan. XIII. vers. 37. *Animam meam pro te ponam.* Et cur Martyres tanti Ecclesia facit, & reliquis Sanctis praefert? nisi quia sublime Fortitudinis & Caritatis experimentum dedere, mortem tolerando pro Christo, & pro Revelatis ab ipso. Plus homo praestare non potest, quam renuntiando Vitae suae, ut acquirat, quod sperat, sed non videt, ut assequatur, quod credit, sed non apparet, uti Apostolus ait, Roman. VIII. & Haeb. XI. Quum ergo Voto Sanguinario addicti Vitam se daturos voveant pro tuenda sententia sua, quae tamen ex omnium, immo & ipsorum confessione ad divinam Fidem non pertinet, nec Fidei Dogma ap-

Tom. V.

P

pellari

pellari sine crimine potest: consequenter *Veritatibus Fidei* humanam *Opinionem* arbitrio suo parem faciunt. Atqui hoc facinus intolerandum est, nempe temeritatis ac superbiae, quod a peccato excusare non possis; tum quod Ecclesia a tot Seculis neminem novit, aut toleravit, qui simili de causa Sanguinem suum fuderit, aut fundi licite posse censuerit; tum etiam quod Fidei Dogmata tuentes certi sumus, nos pro Veritate, sive pro certe Revelatis a Deo occumbere; occumbentes vero pro Opinionibus fieri posse, ut pro Errore ac Falsitate animam ponant. Neque censuram hanc, quam Lamindus antea indicarat, a clientibus suis Parthenotimus in posterum depellet, quando Veritatis vis hanc ab eo confessionem expressit pag. 59. ubi ait: *Certe facinus est Opiniones aequare Veritatibus Fidei*. Quum ergo ipse pag. 19. agnoverit, Scotisticam de Conceptione sententiam *nondum esse de Fide*, & pag. 21. *non oriri ex Dei Revelatione, quae sit ab Ecclesia Fidelibus proposita*; neque ausus usquam fuerit illam referre inter Fidei Dogmata: petendum nunc est ab eo, cur *facinus* intolerandum clientibus suis suadere dicendus non sit, quando eos ad tolerandam mortem hortatur pro tuenda sententia, quae nihil aliud est nisi *Opinio*? Nonne hoc est modo omnium efficacissimo prodere, apud te pari in aestimatione esse Veritates a Deo certissime revelatas, ac Opiniones hominum profecto non certas? Vide Castrensis, & Vasquii doctrinam, quam attuli supra.

Quid respondeat Parthenotimus pag. 59. accipe: *At vovens, non pro Opinione, sed pro Deiparae cultu moretur. Affirmare autem, quod mori ob exercitium Virtutum aequetur Morti pro Fide confitenda, nullum est facinus, nec res moderationis indigna*. Hoc idem ante proposuerat pag. 19. scribens: *Non Martyr esset pie vovens, quia assentitur Immaculae Beatae Virginis Conceptioni, nec pro ejus directa Certitudine, quae nondum est de Fide* (& adhuc in opinione consistit) *mortem oppeteret, sed pro defensione Sanctitatis Marianae, quae Virtutem Religionis sapit*. Et haec illa Veritas, pro qua moretur. Addit infra: *Virtutis opus est, Virginem ut a labe immunem venerari. Virtutis opus est, vovere actum Virtutis, & Votum servare*. Piget me toties cogi eandem recoquere crambem, hoc est eandem dissipare aequivocationem, sub diversis nominibus a Parthenotimo propositam. Sed minus perit, ut a fallacia tam periculosa doctrinae sibi caveant, est succurrendum. Primo Lectores animadvertant, ac fortiter teneant velim, fateri rursus Theologum nostrum, temeritatis & peccati expertem non futurum, qui pro *Opinione* mori eligeret. Quare is probe
sen-

sentiens, sententiam Scotisticam post plura Secula nondum e finibus *Opinionum* migrasse in sacrarium Fidei aut Scientiae, ad aliam anchoram confugit. Nempe excogitavit, Voto Sanguinario sese obligantes debere protestari, se morituros non pro sententiae istius Veritate, quae adhuc latet in tenebris Opinionis, sed pro *Deiparae cultu, Sanctitate, honore: quod opus Virtutis est, & exercitium Virtutis, & Virtutem Religionis* sive *Pietatis sapit*. Speciosum sane effugium, ac pulchra primo aspectu doctrina, qua irretiri possint rudes, ut in mortem ruant *alacriter* pro tuenda Immunitate Mariae. Verum ubi in viscera doctrinae hujusmodi penetremus, nihil nisi inane ac temerarium occurret. Secundo intelligimus, consequi ex ista doctrina, nullam dari *Opinionem*, dummodo *Pia* sit, pro qua tuenda non liceat secundum Parthenotimi placita mortem oppetere: quod tamen facere inter detestabilia *facinora* nuper ab ipso Theologo vidimus recensitum. Quilibet enim semper illius orationem repetet: *Non morior pro Opinione, sed pro cultu & honore hujus Sancti: pro Pietate, quae inest alicui Opinatio; & ut faciam opus Virtutis, opus Religionis, atque Pietatis*. Hoc unum, etiamsi ultra non procedamus, sufficit, ut sentiantur absurdum, ac imprudentia Parthenotimaniae doctrinae. Nullum enim amplius discrimen erit inter Dogmata Fidei certissima, & fallaces hominum Opiniones, quando aequae pro utrisque Vitam dare *Virtutis opus est, Religionis, atque Pietatis*. Deinde nulla vel levis *Opinio* erit, pro qua, dum *Pia* videatur, honestum non sit ac laudabile Sanguinem profundere; immo & pro delirio Pietatis idem praestare, commendatione non cariturum censebitur, modo sibi homo *persuadeat* (quod Parthenotimus supra docuit faciendum) se tueri certam sententiam. Miseram, exclamare cogor, Ecclesiae ac Reipublicae conditionem, si tam periculosa ac improvida doctrinae locus unquam relinqueretur! Sed intimum ejusdem doctrinae vitium, non semel detectum, repetamus. *Veritas* illa una est, quae rerum & actionum pretium intrinsicum constituit; idque potissimum in Religionis ac Pietatis oeconomia animadvertendum. Si *Certa* est *Veritas* in aliqua propositione, aut opere, spectante ad cultum Dei, & Sanctorum, *Certum* quoque est praedicatum *Pietatis*, quod illi tribuitur; & tunc *Virtutis Certae*, sive *Religionis, aut Pietatis Certae opus* illud dicendum est. Sin autem *Veritas Certa* objecti lateat, & de ea tantummodo *Probabilitas* habeatur, sive *apparentia Veritatis*: tunc *Probabile* duntaxat est praedicatum *Pietatis*; & opus illud dicendum est *opus Virtutis, seu Religionis, ac Pietatis Probabilis*, non vero *Certae*; ne-

que enim ex arbitrio nostro Intellectus potest aut debet objecto conferre, quod ab eo abest, aut plus ei tribuere, quam in eo sit. Dupliciter ergo habere possumus motiva credendi, aliquid spectare ad cultum Numinis, ejulve servorum, aut agendi aliquid, quod Deo gratum nobis videatur. Si *Probabilia* tantum sunt motiva, *Probabile* etiam est, sed non *Certum*, spectare propositionem aut actionem illam ad cultum Dei. Si *Certa* (ut in Dogmatis divina Fide credendis) tunc *Certum* quoque est, nos credere *Verum* & non *Falsum*; nos agere opus Virtutis Certae, sive Religionis atque Pietatis, de quo nil dubitationis reliquum sit. Ita possumus habere sufficientia motiva ad suspicandum aliquid de proximo nostro; & quantum est ad suspicandum, tunc non fallimur. Falleremur quidem, & judicium nostrum temerarium foret, si quae sunt motiva Probabilia atque apta ad fundandam justam Suspicionem (haec autem idem ferme est atque Opinio) nos adhiberemus ad credendum *Certum* id, quod tantummodo Probabile est. Quum ergo a Scotistica de Conceptione sententia, pendente iudicio Ecclesiae, non possit excludi formido Erroris, necesse propterea est, ut sit adhuc *Opinio*, non *Certa Veritate* nixa, sed *Probabilitate* tantum, ac *apparentia Veritatis*. Rursus necesse est, ut *Probabilis* ac *Opinativus* tantummodo sit, & non *Certus*, *Cultus* & *Honor Deiparae*, a Veritate sententiae ipsius pendens; neque enim certi nos sumus, quin Deus aliter fecerit, ac nos arbitremur, Scoti sententiam sequendo; & quin aliquando sentiendum sit cum Thomistis, si Ecclesia pro illis judicaret. Hoc posito, tueatur Fidelis quilibet quantum vult verbis & rationibus Piam hanc Opinionem. Recte agit, uti recte agitur in tot aliis Opinionibus, sive Probabilibus sententiis, quas in Schola Theologi tuentur. At quando pro hac Opinione propugnanda Theologus noster vult etiam Vitam impendere: non opus Pium facit, sed Peccatum; non actum Virtutis exercet, sed Temeritatis. Nam quod est tantum Probabile, atque is scire debet ac potest, non esse immune a formidine & periculo Erroris, ipse ignorantia vincibili, aut intoleranda pervicacia *Certum* vult esse. Deinde pro Opinione Virtutis, Pietatis, Cultus, Honoris, aut Sanctitatis Marianae occumbere vult; quum tamen ipsemet agnoverit, *nefas esse pro Opinione Mori*. Tertio fatetur ille, detestabile *Facinus esse Opiniones aequae Veritatibus Fidei*: atque ipse ignorare non potest; nec debet, quantum interfit inter Honorem Opinativum Virginis, manantem e Scotistica de Conceptione sententia, atque Honorem Certissimum Virgini debitum e Maternitate Dei, Virginitate perpetua,

tua, aliisque praerogativis divina Fide de ipsa credendis: & nihilominus pro Honore illo Opinativo mori non secus paratus est, ac sit pro Honore Certissimo secundum Dogmata Fidei Deiparae debito. Nonne ergo damnandum se praebet Theologus noster ea de causa, quod Opinionem aequet Veritatibus Fidei, atque (ut alibi ostendimus) Certissimum Vitae Bonum pro incerto commutari licite possit nos doceat?

Quarto dico: *Imprudens, temerarium, atque intolerandum esse Verum, quod in injuriam cedit Apostolicae Sedis: immo & universae Ecclesiae.* Justis rationibus mota Romana Ecclesia, & Concilii Tridentini Patres, inter duas de Conceptione Virginis oppositas sententias, sive Opiniones, judicium suum adhuc continuere; ita vero unam commendarunt, eique faverunt Romani Pontifices, ut alterius tamen jura non laeserint. Hoc etiam variis Decretis edixerunt, ab universa Catholicorum Republica praestandum. Quid autem aliud est Parthenotimi, illorumque, qui incaute Parthenotimo fidem habent, consilium, nisi persuadere velle Christiano Orbi, jam sententiam suam in Dogma Catholicae Fidei evasisse, quando pro illa Vitam suam vovet, non secus atque pro doctrina Fidei agendum Christus praescripsit? Quid nisi jura Ecclesiae usurpare, temereque edicere velle, repugnante nihilominus Ecclesia, non amplius dubitandum esse de Veritate ejusmodi sententiae, quam tamen Summi Pontifices, toties in illam intenti, dubiam haecenus incertamque reliquere, solidique rationibus ducti decernendam minime censuerunt? Certe nemo non agnoscat in hisce tanti momenti conatibus temeritatem atque superbiam; & in contumeliam Sanctae Sedis recidere ista privatorum hominum consilia. Nam posteaquam viderunt hujus sententiae patroni, & Principes, & Academias a se commotas frustra egisse apud prudentiam & constantiam Apostolicae Sedis, ut inter Fidei articulos referretur Opinio de Immaculata Conceptione: aliam ipsi iniere viam, quam nimium credulis persuaderetur, jam tandem ita exploratam stabilemque esse ejusmodi sententiam, vel sine Romanae Ecclesiae sententia, ut eam Sanguine tueri non tantum liceat, sed & Martyrii genus Deo gratissimum futurum sit. Arbitrati quoque sunt, se hac ratione prorsus depressuros apud vulgus Opinionem adversariorum, quam tamen uti Erroris ac Impietatis expertem haecenus agnovit, atque agnoscendam decrevit Apostolica Sedes. Quaeso interim, si aliquando Romana Ecclesia Fidei Dogmatis adjungeret Scotisticam sententiam, quid ultra, quid majus faciendum Parthenotimo restaret ad testandum, se divi-

divina Fide credere sententiam eandem, postquam praeoccupato iudicio Ecclesiae Sanguinem pro ipsa tuenda nunc vover? Atque haecenus profecto universa Catholicorum Respublica sensit, quantum Cathedrala Petri zelo & cura honoris Deiparae ferveat, & simul quantum Doctrina & Prudentia excellat. Sed ecce homines, qui se plus scire ac sapere, quam Romana Ecclesia opinantur; quique uberiori zelo se incendi, quam Successores Petri & Concilia ipsa, huius Opinionis probe conscia, persuadere se posse Populo arbitrantur. Haec quis ferat? Hercle si in vivis ageret Clarevallenſis Abbas Sanctus Bernardus, tonaret isto novitio facinore percussus. Norunt Eruditi, quantopere is indignatus fuerit adversus Lugdunensium Canoniorum novitatem, qui Anno 1140. Festum Conceptionis Mariae primi in Gallia instituerunt, Inconsulta Apostolica Sede. *Nam si sic videbatur (ait Epistola CLXXIV.) consulenda erat prius Apostolicae Sedis auctoritas, & non ita praecipitanter atque inconsulte paucorum sequenda simplicitas imperitorum.* Quid ergo nunc diceret Sanctus Abbas, audiens eo usque processisse nonnullorum licentiam, ut Romana Ecclesia minime consulta, immo noscentes ipsam in huiusmodi controversia non ita inclinare in unam sententiam, quin possit aliquando iudicare pro opposita; praeterea fatentes, nullam ferme esse Academiam, quae hac in re non sequatur Romanae Ecclesiae prudentem circumspectionem, dum tutelam quidem voverent Scotisticae sententiae, sed *iuxta Summorum Pontificum Decreta jam edita, aut deinceps edenda:* isti, inquam, nihilo secius uti rem Certam, atque omni dubitatione carentem, eandem Scoti sententiam venditent; & quod pejus est, de Vita hominum decernant in ejus tutelam impendenda, dicentes: *Persuadete vobis, quod re ipsa Virgo immunis fuerit a macula*, ac deinde intrepidi pro ista persuasione morti occurrite, & nos *Martyrum* coronam vobis pollicemur in coelis? De vitis hominum prodigendis nunc agitur, re utique pretii ingentis, & de honore *Martyrii* conferendo sectatoribus huius inconsulti consilii, ac proinde de Sanctis antiquitati universae ignotis in Coelum inferendis. Si pro Thomistica Opinione post paucos dies Romana iudicaret Ecclesia (quod ne Parthenotimus quidem negat, quin contingere possit) nihil deperiret conscientiae, aut estimationi hominum, qui haecenus voce & calamo Scotisticam tutati sunt Opinionem, quum tandiu se illam, uti opposita Probabiliorem, se tutari profiteantur, quandiu quaestionem dirimat Romanus Pontifex, idque faciunt probante ipsa Apostolica Sede. At nequaquam denegemus insimulare temeritatis, qui eidem Scoti sententiae adhaerentes,

tes, sua tantum Prudentia innixi, ac pertinaci superbia usurpantes jura Ecclesiae, Certum sibi finxere, quod Sancta Sedes Incertum adhuc habet, Vitamque suo arbitrio non amplius recipiendam profudere pro Errore. Neque eorum Imprudentiam excusaret Ignorantia invincibilis, quando facile possent ac deberent scire, haecenus Ecclesiam abstulisse a credenda hujusmodi Certitudine, ita ut plus ipsi sapere voluerint, quam oporteret sapere.

Quinto dico: *Imprudens, semerarium, ac damnandum esse Vorum, quod Doctrinam ac Prudentiam Catholicæ Ecclesiæ irridendam hostibus nostris præbere possit.* Fingamus nobis Tyrannum, dementiae ac impietatis facibus succensum, qui tormenta ac mortem minetur assertoribus Immaculatae Conceptionis, multosque e Voventibus ea de causa in tormenta & mortem rapiat: quodnam quaeso foret iudicium Heterodoxorum de Ecclesia Catholica, si diram hanc ipsa toleraret carnificinam? Praestare ego non possum, quia inter Fanaticos recenserent hoc hominum genus, qui nulla commoti Evidentia rei, nulla infallibili Auctoritate fulti, suaeque tantum privata Persuasione abrepti, jugulum ultro carnifici traderent. Et quidni miserabile istud macellum intuentes, aut audientes, cum Lucretio ingeminent

Tantum Relligio potuit suadere malorum?

Ad haec dignitati ac prudentiae Apostolicae Sedis, atque Ecclesiae Catholicae acerrime in posterum insultarent, quando, connivente saltem ipsa, apud nos inspicerent, eadem firmitate credi, eadem constantia propugnari, tam quod Certo Revelatum a Deo credimus, quam quod Incertum adhuc est, an fuerit Revelatum; tam quae Ecclesia infallibilis credenda nobis absque Erroris metu proponit, quam quae adhuc formidinem Erroris includunt, immo uti dubia atque Incerta ab Ecclesia ipsa proponuntur. Adderent, ruere jam apud nos principia solidissima, quibus haecenus contra illos fuimus usi: hoc est Auctoritatem Ecclesiae eam demum esse, quae certos nos facit de Veritate credendorum, sive de Revelatione divina. Si enim satis est *Persuasio*, quam quisque privatus habere potest, & Parthenotimus sufficientem deprædicat, ut Certum aliquid sit nobis in rebus a Revelatione Dei pendentibus, atque ut legitime ac honeste Sanguis pro Sententia Scottistica fundatur: ipsi etiam Sæclarii *Persuasionem* ista tutos in sua doctrina credere se deinceps poterunt, ac nobis irridebunt tanta de necessitate Auctoritatis Ecclesiae adversus eosdem proferentibus. Tum pergerent insultare nobis, & contendere, negari amplius non posse (quod haecenus quisque Catholicus, atque ipse Parthenotimus negavit)

quia

quin ad *Fidem divinam* spectet sententia Scotistica, quando vidente ac tacente Ecclesia, pro ea non secus ac pro Dogmatis Fidei Sanguis effunditur. Quod si Parthenotimus quisquam reponeret, non fundi Sanguinem pro *Veritate* istius sententiae, quae nondum Certa de Fide est, sed quidem pro *Pietate, quae Certo inest Actui Opinativo de Immaculata Conceptione, sive pro Cultu, pro Honore, pro Sanctitate Virginis*: acrius illi instarent, petentes, sitne de Fide Certitudo istius Pietatis, Cultus, Honoris &c. an non. Affirmante Parthenotimo, pertinere haec ad Fidem, ergo, inquit, Catholicis omnibus toleranda mors erit pro Immunitatis Marianae sententia: quod tamen nemo nisi desipiens e Catholicis dixit, aut dicere potest. Addent, monstrum plane esse, Certum appellari *Cultum & Honorem Virginis* in Scotistica sententia, quando *Veritatem* ipsius sententiae adhuc fatemur Probabilem quidem, sed minime Certam, ita ut formidinem Erroris nequam excludat, quum Certitudo Cultus, Honoris, Pietatis, Sanctitatis fluere tantummodo possit e Certitudine Veritatis, quae eidem sententiae insit. Finge nunc, Parthenotimum fateri, non spectare ad Fidei Dogmata Pietatem istam, Cultum &c. Urgebunt vehementius imprudentiam, temeritatem, Fanaticismum morientium pro sententia, quae nihil aliud demum sit nisi *Opinio*; & a qua cerebellum nostrum jure excludere nequit metum Erroris, quando Parthenotimus ipse negare non potuit, quin judicante Ecclesia Veritas deprehendi possit aliquando in *sententia Piae opposita*. Reponente autem Parthenotimo, dari aliam Certitudinem, quae ut is ait pag. 24. non a *Revelatione Dei* clare sibi nota, sed ex *consensu Theologorum, Academicorum, ex universalibus Patrum locutionibus* oriatur, Parthenotimum nullo negotio obruent, contendendo, non sufficere haec ad invehendam Certitudinem, pro qua Certum Vitae bonum commutare liceat, quum sigillo Veritatis, quod Ecclesia una apponere potest, careat ejusmodi Certitudo; immo quum Ecclesia, quaestionis probe conscia, ut Incertam illius Veritatem hucusque agnoverit. Adjicient, falso venditari *consensum hunc Theologorum, & Academicorum*; nam Theologi & Academiae *Piam* quidem, hoc est *Probabilem*, agnoscunt sententiam Scotisticam, nequaquam vero *Certam*; immo illam ita tuentur, ut paratos se fateantur ad concedendum in oppositam, si quando Sedes Petri Veritatem in Thomistica potius, quam in Scotistica sententia detegeret. Insuper falso jactari ejusmodi *consensum* contenderent, prolati veterum Theologorum placitis, apud quos per tot Saecula *Communis* fuit Thomistica sententia. Denique objicerent nobis non pau-

pau-

paucos, ut Parthenotimus dicitur, sed plerisque ex antiquis Patribus, qui *unum Jesum Christum* a culpa primi parentis immunem fuisse concordi voce tradiderunt; unus quippe sine Concupiscentia, & non virili e semine, sed opere Spiritus Sancti, procreatus in utero Virginis fuit. Haec, ut puto, adversus nos Heterodoxi aliquando jaculari possent, nisi mature obviam iretur perverfis consecrariis, quae e pervicaci tutela Voti Sanguinarij effluere possent. Utrum mihi, an Parthenotimo, haec Veritas & Ratio militent, Ecclesiae, aut, saltem Prudentiorum judicium decernet.

Sexto dico: *Imprudenter ac temere Vorum Sanguinarij concipi, quum grave illius pondus minime a voventibus satis perpendatur.* Peto enim ego, num qui sese novitio hoc Voto obstringunt, serio prius animadverterint, quid polliceantur, quidve sperent. Non enim agitur de istu tantum securis, celerique morte; sed etiam de tormentis quibuslibet perferendis, qualia fortissimi Athletae nominis Christiani olim sustinere. Profecto non consuevere Tyranni sibi contradicentium Vitas istu uno amputare. Immo exquisitis tormentorum generibus student, ut in suam sententiam reluctantes trahant, antequam in illorum caput postremo supplicio animadvertant. Horremus nos, quanquam a barbaris iis spectaculis remotissimi, lanienam Martyrum legentes, & nunquam lassas in iis excrucian- & dilaniandis satellitum manus. Et haec tamen e tutissimo loco mente duntaxat metimur. Aut ergo Votum tolerandae mortis tam facile zelatores nostri concipiunt, quia ignorant, quam duro, tremendoque discrimini sese offerant; aut si omnia probe tenent, ideo tam placido, serenoque vultu vovent, quia sibi pollicentur, nunquam promissi implendi occasionem esse adfuturam, dum inter Catholicos pacatissime vivunt, & Barbarorum persecutio hanc ob rem nunquam pertimescenda videtur: quod sane Thraconum potius piorum est, quam fortium Christianae Religionis pugilum. Ut ut tamen sit, si serio agunt, rursus peto ego, qua spe agantur, tormenta acerbissima devorandi, & mortem denique fortissime tolerandi? Ad ineundum Martyrium pro Catholica Fide, nemo neget, Sancto Augustino variis in locis id tradente, quin speciali Gratia & auxilio Dei sit opus. Et istud sane divinus Magister spondit cuicunque, non temere ad testandam Veritatem coelestis suae doctrinae pergenti. At quibus, quaeso, tabulis Parthenotimus singulare istud auxilium clientibus suis spondeat? Nimirum absque ullo divinarum Litterarum aut Ecclesiae suffragio, immo saltem tacite contradicente Ecclesia, Sanguinarij Votum pro

Conceptione Virginis procusum fuit; illudque suo tantum fidentes ingenio nonnulli efformant, aut deprædicant, & quidem pro Opinione tuenda, quæ dubitationem omnem Erroris minime excludit. Atqui non ab hominum ingenio ac arbitrio, sed a promissionibus Christi, sperandum expectandumque est peculiare divinæ gratiæ auxilium; neque Temeritas absit ab exponente sese immanibus tormentis, nisi eum Ecclesia certum faciat, illius lateri adfuturum, qui in veris Martyribus certare ac vincere consuevit & potest. Quare ad *Tentationem Dei* referri potest hujusmodi audax consilium, quum nulla necessitas nobis adsit, a lege Dei aut Ecclesiæ imposita, fundendi Sanguinis pro tuenda Scotistica sententia, neque utilitas in Ecclesiam manare possit e Sanguine pro illa fuso; non enim propterea evalura Vera ac Certae eadem Sententia. Quod si *Martyrio sese offerre temere, & absque iusta causa*, vel quum agitur de Veritatibus Fidei propugnandis, *Tentatio Dei* est, uti Th. Sanchez ostendit in Decalog. Lib. 2. Cap. 34. quanto minus mortem eligere licebit pro sententia seu Opinione duntaxat Piâ, quæ certe exclusæ est e catalogo Veritatum Fidei? Origenis verba audiamus Tom. 31. in Joannem: *Honestum quidem est, ait, si incideris certamen pro confitendo Jesum, confessionem non differre, neque tardare mortem pro Veritate oppetere. At non minus quam hoc honestum est, talis tantæque tentationis Occasionem non dare, sed omnimodo vitare eam: non solum quia tantæ rei exitus incertus sit nobis, verum etiam ne nos occasio simus, ut magis Peccatores, magisque Impii evadant illi, qui nondum Sanguinem nostrum re ipsa effundisse rei sunt facti: si quæ in nobis sunt facientes, declinaverimus eos, qui insidias nobis vel ad mortem usque moliantur; sed puniendi alioquin majori graviorique poena nostri causa, si nostri amantes, rebus illorum posthabitis, exposuerimus nos ipsos interficiendos, nulla nos necessitate urgente. Paria habet Clemens Alexandrinus, Gregorius Nyssenus, Petrus Alexandrinus, Gregorius Nazianzenus, ac alii Patres. Si illi improbat, qui nulla necessitate urgente ad tormenta & mortem currebant pro Fide, Deum quippe quodammodo tentabant, causamque præbebant impiis, ut peccata peccatis adderent: num probandi, qui mortis subeundæ necessitatem, quam nemini Ecclesia imponit pro tuenda Scotistica sententia, ipsi arbitrio suo sibi faciunt ac imponunt? Neque *Cultrum ac Honorem Deiparæ* obtendere juvabit. Non nostrum est, sed Ecclesiæ, præscribere rationem veram colendæ ac honorandæ Virginis. Laudat Ecclesia tuentes voce & scriptis Immaculatam Conceptionem; at nunquam laudavit aut probavit, San-*

gui-

guinem etiam dare pro illius sententiae tutela, quia nunquam probavit mortem oppetere pro Opinionibus, licet Piis, qualis adhuc est in Ecclesia Dei Scotistica sententia.

Septimo dico: *Minime ferendum Votum Sanguinarium, quia Votum tantummodo officiosum est, ac potius irrisorium.* Tormentorum ac necis crudelissimae terrores nuper ego ingerebam paucis Siculis, Vitam suam sacrantibus tutelae Immunitatis Marianae. Verum ex altera parte insurgit Parthenotimus, animosque addit clientibus suis, ut Votum intrepide concipiant, ac nullo eculeorum & patibulorum metu se concuti patiantur. Scribit enim pag. 100. *Theologos ut vitae prodigos moderari prius cogiset Lamindus, quam moderetur, tamquam vitae projectionem, Pium Votum, ac Juramentum. Quippe plures in carcere, quem Jurans repetere debet, sunt enecti; nec Unus Conceptionis defensor Vitam amisit; imo nec periculum subiit illam amittendi.* Haec rogo perpendant, & mihi explicant sapientes. Ad me quod attinet, hic eorum sensus mihi videtur. Bono animo estote, Siculi mei, qui me Magistro utimini; atque hilares vovete Votum cruentum de tuenda Scotistica sententia: nil funesti inde vobis continget. Pacificos dies usque ad senectam ducetis; neque vel unus capillus ob Votum istud e capite vestro peribit. Aliorum exemplum respicite, qui par Votum antea concepere: nec unus Vitam amisit, immo ne periculum quidem subiit illam amittendi. Si haec non immerito tribuenda sunt Theologo nostro, jam habet Lector, quid demum sentiendum sit de Voto Sanguinario. Nimirum illud esse Votum irrisorium; ac suaderi hominibus, ut ipsum emittant, sed simul adjecta, ut ita dicam, cautione, ne guttam quidem sanguinis unquam ipsos ea de causa esse profusuros. Ubinam ergo Votum illud *magnanimum*, quod Parthenotimus tantopere in Praefatione extollebat, quando insinuat, nullum, ne leve quidem, periculum subesse incommodi, nedum mortis, illud voventibus? Atque ecce, quo desinat mori pro *Pietate, pro Cultu, pro Honore Virginis.* Immo, tacite ait Parthenotimus, nullus vestrum morietur, semperque aberit Vitae discrimen ab hujusmodi Voto, quod non concipitur in eum finem, ut Sanguis reapse sit fundendus, sed ut sensim Populo persuadeatur, sententiam, quam nos depraedicamus, evasisse tam Certam, uti sunt Articuli Fidei; atque ut volentem, nolentemque Ecclesiam cogamus ad hanc Opinionem Articulum Fidei decernendam. Quod si Tyrannus (nondum natus, & nunquam fortasse nasciturus) aliquando mortem, horrendamve membrorum lacerationem minaretur, tunc Vitae nostrae

consulemus aut commutatione Voti, aut alia quapiam commoda ratione, quae non deerit. An Parthenotimi mentem assequutus ego heic fuerim, prudentum erit judicare. Ubi vero ita se res habeat, nemo neget, quin conspectum etiam ex hac facie Votum Sanguinarium, minime ferendum appareat, quum ludibrium sit Pietatis, & sub speciosa magnanimitatis larva alio collineet.

C A P U T XVI.

Martyrii Spes Voti Sanguinarii amatoribus perperam facta. Sancti Thomae, & Cardinalis Capisucci in banc rem doctrina. Pro Veritatis sententiae Scotisticae revera Voventes se Visam daturos pollicentur. An Theophili Raynaudi sententia de Vita danda pro eadem sententia improbata Romae fuerit.



CTAVO denique loco dicendum est: *Intolerandum esse Votum Sanguinarium, quod suis patronis nomen Martyris, & coronam Martyrii pollicetur.* Longe antequam Alexander VII. postremam Bullam de Controversia Conceptionis promulgaret, hoc est ineunte jam Seculo XVII. audiri coepta est in Hispania Opinio nonnullorum, affirmantium, tolerare mortem ad testificandam gratiam originalem Virginis, fore *verum Martyrium*. Scilicet Anno 1615. quum confectae Laminae Granatenses, Pseudo-Dextri Chronicon, aliaque piorum Impostorum monumenta, veluti ancilia e Coelo dimissa, omnem dubitationem de Veritate Immaculatae Conceptionis e piissimae gentis Hispanicae cordibus amovisset, religioso aestu excitati nonnulli, fractis fraenis quibusque, nihil non sunt ausi. Atque illi quidem imperterriti animo depraedicare coeperunt veluti Dogma Fidei sententiam Scotisticam: quo posito consequens erat, gloriosum *Martyris* nomen iis esse deferendum, qui pro ipsa tuenda in certamine animam suam exponerent. Tunc ergo Thesis erupit, *Martyrii* laudem pollicita morientibus pro ejusmodi caussa; atque haec illaesa dicitur evasisse e supremi Tribunalis Inquisitionis Hispanicae examine. Eam proinde, stantibus tam propitiis ventis, tutati sunt *Alvarus de Palacios* in Disc. pro Immac. Concept. *Aegidius de Praesentatione* in Lib. de Praeservat. Virginis, *Jacobus Granado* in Lib. de Conceptione, & *Christophorus de Vega* in

in Theolog. Mariana: *Saavedram* quoque supra vidimus pro eadem Martyrii sponse pugnante. Immo idem Granado refert (credat qui velit) in eam opinionem inclinasse eximium Theologum *Franciscum Suarez*, cujus Epistolam laudat. Hisce Parthenotimus addit *Ludovicum Turrianum*, *Thomam Frances de Urrogoiti*, & *Franciscum Castillo Velasco*; addendus & ipse tandem aciei tantorum comilitonum. Quamvis enim Theologus noster, incertus quem eventum habitura sit pugna, praefacte non deferat nomen & aureolam Martyrii pro causa ista occumbentibus: satis tamen significat, sibi eandem opinionem probari, immo & ipsam clientibus suis artificiose insinuat. Hac praecipue de causa *Lamindus Sanguinario Voto* obstandum credidit, quod audisset hominem Populo suadentem mori, si occasio ferret, pro tuenda Virginis Conceptione sine macula; gloriosam enim hanc mortem subsequeretur praemium ac nomen illustre *Martyris*. Quid porro Siculus Theologus in hanc rem habeat iterum audi: *Virtutis opus est*, ait pag. 19. *Virginem ut a labe Immune venerari, quia Pium est, ipso fatente Pritanio. Virtutis opus est, votum alicuius Virtutis, & Votum servare: Vovete & Reddite. Quid ergo impedimento esse potest, ut pro his Virtutis actibus mortem quis subeat, & Martyr nuncupetur?* Pag. 59. addit: *Vovens non pro Opinione* (scilicet Scotistica de Conceptione Virginis) *sed pro Deiparae Cultu moreretur. Affirmare autem quod Mori ob exercitium Virtutum aequetur morti pro Fide consistenda, nullum est facinus, nec res est moderationis indiga.* Tum pag. 74. ostendere conatur, non esse hoc Martyrii novum genus, quo nomine *Lamindus* illud confixerat; nam Sancto Thoma docente, *Omnium Virtutum opera, secundum quod referuntur in Deum, sunt quaedam protestationes Fidei*. Parthenotimus autem in ea sententia est, mortem oppetere pro Immunitate Virginis esse *Opus Virtutis*. Quamobrem animadvertat Lector, non solum contendere a Theologo Siculo, *Honestum esse ac laudabile pro Scotistica sententia mori*, sed etiam *veri Martyrii gloriam deberi morientibus*. Quae opinio quum gravissima res certe sit, omnium prudentum Catholicorum examen exigit.

Ad me quod attinet infimum omnium, censeo, nunquam in Ecclesia Dei tolerandam ejusmodi sententiam, eamque sollicitè eradicandam, ne sub Martyrii spe incauti Fideles, ubi neque opus est, neque licet, in mortem ruant. Et profecto si quae haecenus disserui, solido fundamento nituntur, jam supervacaneum sit alia ad hanc molem deijciendam referre. Si enim honestum minime est, immo Pec-

catum

catum est, pro tuendis Opinionibus Vitae jaſturam pati; & ſententia Scotifica inter Opiniones haſtenus numeranda venit: reliquum eſt, eo minus *Martyrii* palmam ac nomen tribuendum certantibus uſque ad mortem pro eadem Sententia. Vera autem narrat Parthenotimus poſt alios Theologos, quum ait, pro cauſſa etiam *Virtutis* poſſe verum conſummarī Martyrium, quia & *Virtutum opera ſunt quaedam proteſtationes Fidei*, quae in iis peragendis elucet. Sed ejusmodi doctrinam is nunquam aptet morienti pro Immunitate Beatiffimae Virginis. Nam ut idem Angelicus Doctōr tradit 2. 2. Quaeſt. 124. Artic. V. *Omnium Virtutum opera, ſecundum quod referuntur ad Deum, ſunt quaedam proteſtationes Fidei, per quam nobis innotescit, quod Deus hujusmodi opera a nobis requirit, & nos pro eis remunerat. Eo ſecundum hoc poſſunt eſſe Martyrii cauſſa: unde & Beati Joannis Baptiſtae Martyrium in Eccleſia celebratur, qui non pro neganda Fide, ſed pro reprehenſione adulterii mortem ſuſtinuit.* Integra Aquinatis ſententia proferenda Parthenotimo erat, & tunc perſpexiſſet, quam male regula ab eo adhibita a caſu noſtro aberret. Inquit Sanctus Doctōr, e Fidei doctrina debere prius innotescere morituro pro opere Virtutis, *Deum hujusmodi opera a nobis requirere, & velle pro eis nos remunerari.* At quandonam doctrina Fidei fuit, exigere Deum, aut Eccleſiam, ut pro tutela Scotificae ſententiae mortem ſubeamus? It quacnam haſtenus auctoritas infallibilis certos nos fecit, Deum remuneraturum eſſe morientes pro hujusmodi cauſſa? Immo exigit Deus & Eccleſia, ne temere ac imprudenter prodigamus Vitam noſtram, & ne pro tuendis Opinionibus, quantumlibet Piis, eam impendamus, quales adhuc eſſe ſententias Scotificam & Thomificam de Conceptione Mariae quilibet ſapientum judicat & docet. Neque ſufficit *Perſuaſio* noſtra, quae in rebus Evidentia carentibus fallax ex natura ſua eſt, & niſi ab infallibili auctoritate Certitudinem Veritatis in iis, quae a Revelatione pendent, aſſequatur, tam pro Vero, quam pro Falſo, determinare ſe poteſt. Utramque iſtam rationem ſcite expreſſit Raymundus Capifuccus Ord. Praedic. Sacri Palatii Magiſter, poſtea S. R. E. Cardinalis, Controverſ. XXVII. de Martyrio §. 16. *Cuiuscumque, ait, Virtutis opus, prout reſertur in Deum, eſſe poteſt materia Martyrii. Cum autem dicimus, prout reſertur in Deum, hoc ita intelligendum eſt, ut opus Virtutis referendum ſit in Deum, & ex intentione ipſius Martyris patientis, & ratione ipſius operis, quod ex ſe ipſo Deum reſpiciat. Ita ut ad Martyrii rationem inducendam non ſufficiat, quod aliquis mortem patiat̃ur pro Virtutis opere,*

pere.

pere, quod solum ex intentione patientis referatur in Deum; sed necesse est, quod opus illud etiam ex propria ratione Deum respiciat, ut finem supernaturalem, & ad Deum ex propria ratione relationem habeat; ita ut passio re ipsa, & ex propria ratione, quia est passio pro VIRTUTE PER FIDEM COGNITA tendat etiam ex se ipsa in Christum, & in Dei gloriam cedat &c. Nec Martyr esset, qui occideretur PRO DEFENSIONE OPINIONIS, quam falso credit esse de Fide; nam revera Divinae Fidei testis non esset, quia re ipsa quod ipse credit, ad Fidem non pertineret, nec ejus passio in Fidei manifestationem cederet. Non dissimilia tradit Lessius Lib. III. Capit. I. Dubit. 3. Quare videas, necessarium esse ad Martyrium, ut opus, pro quo danda est Vita, sit opus Virtutis, cujus veritas ac pretium per Fidem sit nobis certa. Neque sufficit generalis Virtutis illius cognitio per Fidem, sed oportet, ut opus illud singulare ex propria ratione spectet ad Fidem, ac referatur ad Deum. Neque sufficit Intentio, Persuasio, & Affectio nostra, quum nihil horum efficere possit, ut opus illud pertineat ad Fidem, Certumque sit, quando illud Incertum sit ex propria ratione. At nemo nescit, exclusam adhuc esse & doctrina Fidei sententiam Scotisticam, eamque inter Opiniones haereticas esse numerandam; ac proinde intelligit, perperam Martyrii spem praeberi occumbentibus pro illius tutela. Incertum quippe adhuc est, an Deus Immunitatem illam Virgini tribuerit, atque an Deo placere possit, sitque Virtutis opus ad Fidem spectantis, discrimen Vitae incurrere pro ejus tutela.

Fortasse reponet heic Parthenotimus, esse Virtutis opus ad Fidem pertinens, atque commendatum a Deo, *Cultum ac Honorem Deiparae*, illiusque tutelam. Sed toties dixi, semperque nobis repetendum est, Fidei quidem Dogma esse *Cultum ac Honorem Virginis*; sed minime ad Fidem spectare cunctos illius colendae ac honorandae modos: nam & ex his ipsis occurrere possunt, qui Errorum, Superstitionem, & Haeresim sapiant, uti de Collyridianis factum jam legimus. Si Probabile tantum est, Virginem expertem fuisse originalis contagii, necessario Probabile etiam duntaxat sit, non vero Certum Fide divina, Virginem ita esse colendam: temere vero ac imprudenter ab illo agi, qui assumens veluti Certum hoc Incertum, pro ipso Vitam profundat, maximum videlicet, Certissimumque Bonum. Addit tamen Siculus Scriptor, fatente etiam Lamindo, calamo & rationibus Immaculatam Deiparae Conceptionem tueri, procul dubio cum vera Pietate consonare. Ita sane est, quia, docente nos in primis Ecclesia Romana,

na, scimus, Probabiles adesse rationes, propter quas sententia haec non videtur hactenus adversari Dogmatis Fidei, immo videtur consonare cum ipsis, ita ut jure *Pia* appellanda sit. Verum hoc non eximit sententiam hanc e numero *Opinionum*, immo ipsam inter Opiniones enumerandam evincit. Quum enim dicimus, *Pie credo aliquid*, nihil aliud significamus, nisi nos nequaquam e clara & evidenti cognitione Veritatis existentis in sententia proposita, sed ex apparentia Veritatis, quam nobis rationes Probabiles insinuant, & religioso quodam affectu, assensum praebere illi sententiae. Quare ipsum appellare *Piam* aliquam sententiam, excludit Certitudinem illius in communi Theologorum sermone. Aliter loquimur, quum Certitudinem aut Fidei, aut Evidentiae Moralis, Physicae, aut Metaphysicae tenemus. Non enim dicimus *Pie credo*: mortuorum in postremo iudicio Resurrectionem; sed *divina Fide credo*: quum Certitudinem rei ex auctoritate Dei revelantis habeamus. Non dicimus *Pie credo*, Sanctum Augustinum Hipponensem Episcopum vixisse ineunte Seculo V. multosque Libros scripsisse; sed *Scio, Certumve id habeo* ex evidentia morali. Contra, ubi deest Certitudo, ac Opinioni tantummodo locus est, quum de rebus agitur, sive sententiis, quae spectare ad Dei Cultum, atque ad Honorem Servorum Dei possunt, tunc dicimus: *Pie credo*, exempli gratia, Scientiam mediam, Miraculum aliquod Sancti Augustini, aut Sancti Antonii Patavini, & Caput aut Reliquias Sancti Joannis Baptistae adservari in illa Civitate ac Templo. Quare, ut pro modulo meo loquar, si affectu seposito Parthenotimus intime suam sententiam scrutabitur, facile inveniet, totam Martyrii sui telam in una Phantasia sua, imagines Pietatis intra se agitante, aut si mavis dicere, in uno Intellectu, contextam. Est quidem Veritas cognita per Fidem Honor & Cultus genericus Deiparae, & Virtus itidem ad Fidem spectans, eam colere ac honorare; at descendendo ad particularia, minime per Fidem novimus, in Honorem Virginis Sententiam Scoticam cedere; neque doctrina Fidei nos docet, Cultum legitimum, Deoque ac Virgini gratum, esse Vitae nostrae sacrificium pro hujus sententiae tutela. Quippe Ecclesia *Piam* quidem, hoc est *Probabilem*, non vero *Certam* habet ejusmodi sententiam: neque improbat, minusque caros habet, qui oppositae adhaerent. Ergo credere Veram ac Certam Scoti sententiam, atque existimare bene collocatum in illa tuenda ingens Vitae nostrae bonum, unice consistit in *Persuassione, Affectione, & Intentione* volentis pro Opinioni illius patrocinio mori, non autem in re, seu opere, quod

Cet-

Certo, & *ex propria ratione* spectet ad Cultum & Honorem Virginis: quum constare aliquando possit, judicante Ecclesia, praefarendam esse Thomisticam sententiam, ac propterea non esse colendam hac specie Cultus atque Honoris Sanctissimam Christi parentem. Fallaci autem, ut toties dixi, principio nititur, qui regendum se tradit uni suae Persuasioni, Affectionique, licet Piae ac bonae; idque praecipue accidere in voventibus suam Vitam pro defensione Scotisticae sententiae. Neque enim in casu isto excusare nos potest, aut juvare Ignorantia, sive Error Invincibilis, postquam nemo e doctis ignorare potest aut debet, pendere judicium Ecclesiae, atque istud inclinare posse in contrariam sententiam; & nosse potest ac debet, dari Opiniones speculative probabiles, immo probabilissimas, quae tamen in praxi sint improbabilis: quod potissimum observandum est in rebus magni momenti, & praecipue ubi agitur de Vita hominum proicienda. Nam ut ut ratio speculativa gravis occurrat, posse Deo placere Opinionem nostram de Virgine sine labe concepta, & prudenter propterea nos voce & calamo posse ipsam tueri: si tamen Opinionem istam ita exaggerare, & ex ejus suppositione ita nobis imperare volumus, ut pro ipsa tuenda tanquam certissima mortem eligamus: tunc alia ratio longe gravior, immo certa, ac talis nobis occurrit, ut primam prorsus prosternat, videlicet, Malum esse Vitam ponere pro Opinione, ac vetari nos a Deo mortem oppetere pro sententia, cui hactenus nulla infallibilis auctoritas certitudinem contulit.

Restat ergo, ut qui pro ejusmodi causa occumbat, non sit *Martyr Fidei*, sed *Martyr Opinionis*; & quidem ab Ecclesia damnandus, quippe qui peccat, dum pertinaciter contra mentem Ecclesiae contendit, aliquid sine dubitatione spectare ad Dei cultum & Virginis Honorem, quod is negare non potest, quin adhuc Certitudine apud Ecclesiam careat; suoque judicio imprudenter fidens, pro non certo Honore Deiparae Certissimum, magnique momenti pignus, neque suum, sed Dei, Vitam scilicet, commutare statuit, Eoque facilius imaginarii hujus Martirii ruinosam fundamenta deprehendes, ubi intelligas, Votum voventium tutelam Scotisticae sententiae Sanguine suo, resolvi revera in tutelam *Veritatis Certae*, quae ineffe eidem sententiae creditur. Nam quicumque vovent, se tutaturos aut scriptis tantum ac voce, aut etiam Sanguine Immunitatem Virginis, ii non *Pietatem* sententiae, sed *Veritatem* hujus Immunitatis, sive Certam illam credant, sive Probabiliorem opposita sententia, sibi ante oculos statuunt defendendam. Nullus est mihi a paucis Auctoribus, qui in *Martyrium*

album inferre sunt aucti morientes pro Opinione Scotistica, neque utla mihi cupido legendi intemperantium ejusmodi Auctorum scripta. Attamen quid in hanc rem habeat *Gabriel Saavedra*, supra vidimus. Quid etiam docuerit *Christophorus de Vega* in Theolog. Mariana Palstra 3. Certam. 19. nobis edisseret Auctor Histor. Controverf. de Concept. Nimirum Vega verum Martyrem habet, qui se morti offerat propugnandae causa propositionis hujus speculativae: *Verum est, & Certum, Virginem prorsus fuisse immunem ab Originali Peccato. Nam, ut is ait, tueri Veritatem Certam ac Infallibilem ex iis, quae in honorem & obsequium Dei cedunt, est Actus Religionis. Eiusdem generis est gratia originalis Deiparae. Hanc vero Certam atque Infalibilem esse, argumenta producta evincunt. Ergo quicumque persuasum hoc habens, testis hujus Veritatis occumberet, Martyrii palmam consequeretur. Neque juvat dicere, hanc esse Opinionem, & consequenter ejus tutelam non esse Actum Virtutis, neque protestationem Fidei, atque adeo neque Martyrium testari eam Sanguine suo. Non enim dici potest Opinio, de qua efformetur incertum iudicium, sed sententia, quae visa infallibilibus argumentis omnem a mente formidinem excludit, immo & omnem imprudentiam in credendo Virginem peccati Originalis experientem. Quicumque ergo eam ut talem veneratur, ut par est, atque pro ea mortem oppetit, certe Martyr est. Qui vero illam immerito adhuc Opinionem censet, & per consequens certum de ea iudicium non efformat, hic sine dubio non foret Martyr, sed imprudens ac temerarius, si ut eam tueatur des Vitam. An confidentia in iis, qui talia venditant, desideretur, quisquis sapit, continuo intelliget. Succedat & *Granado*, Martyrii ejusdem sponsor, qui cautius animadvertens, dissimulari nullo negotio posse iactatam a nonnullis intemperantibus ingeniis Certitudinem Veritatis in eadem sententia, suppeditavit novis hisce Martyribus effugium, quod Parthenotimus arripuit, & ego haecenus oppugnavi, scilicet debere morientes profiteri se mori pro eo, quod in Veritate speculativa Immaculae Conceptionis est Certum, hoc est pro defendendo Cultu & Festo Immaculae Conceptionis, praescripto ab Ecclesia, sententiam Immaculae Conceptionis esse veram & Piam. En quibus Magistris profecerit Parthenotimus nolter, qui tamen uti ingeniosior, utramque miscuit sententiam, scilicet debere Voto Sanguinario addictos profiteri, se Vitam daturus, non pro Veritate speculativa sententiae Scotisticae, sed pro Cultu & Honore Virginis, qui certo ad Virtutem Religionis spectat, & est quaedam protestatio Fidei; sed simul debere ipsos perluadere sibi, *Certissimam esse Veritatem* ejus-*

eiusdem sententiae. Verum percontari juvat ab ingeniosis hisce viris, an credant, Cultum & Honorem hunc descendere e sententia tribuente Virgini praerogativam istam. Fatebuntur, ut arbitror; deinde, an credant, Certum Honorem obvenire alicui posse e non Certa praerogativa. Negent hoc oportet; nam implicat contradictionem, credere, Honorem minime dubium heic tribui Deiparae, simulque credere dubiam, sive nondum Certam praerogativam Immunitatis, ex qua manare debet hic Honor. Atqui, ut haftenus ostendimus, sententia Scotistica de Conceptione Virginis nondum e finibus *Opinionum* exiliit; & Lectori amplius non est opus, ut repetam *Persuasionem* privatorum hominum carere virtute efficiendi Certum, & credendi reipsa Revelatum a Deo, quod Ecclesia in suis decretis uti dubium, atque an a Deo revelatum fuerit, Incertum adhuc agnoscit. Ergo ubinam Certus ille Virginis Honor, pro quo certum Vitae suae bonum impendere vult Sanguinarij Voti patronus? Ubi *protestatio Fidei*, quum de Opinione agatur, super quam fundatur Honor iste tantopere depraedicator? Alibi vidimus, quid sit *Pietas Opinativa*, *Cultus Opinativus*, *Honor Opinativus*, Pius sane ac laudabilis, quod nulli praecepto Dei adverfetur, quod nullum reipublicae detrimentum adferat, immo quod sufficienti ratione confert, per quam consonare merito dicatur cum recta Ecclesiae doctrina. At velle in mortem incurrere pro Cultu isto ac Honore Opinativo, in reipublicae damnum cedit, cujus membra sunt quilibet cives; & divino ac naturali Praecepto opponitur de non temere projicienda Vita nostra; demum peccat in Ecclesiae doctrinam, quae Opinionibus quidem Piiis iustissime favet, sed simul praecipit, ne quis pro ulla Opinione quantumlibet Pia ultro necandum se praebeat. Et quum in ipsius Ecclesiae successione per tot Secula nullum similis inconsultae Pietatis exemplum occurrat: quid aliud superest, nisi ut Sanguinario Voto addictis spem eripiamus non solum Martyrii, sed operis liciti atque laudabilis.

Neque aliam fuisse haftenus mentem Romanae Ecclesiae in quaestione ista scripsit Lamindus Pritanius, cujus sunt haec verba: *Non unus autem ego in hoc Voto profundendae Vitae pro Immaculata Conceptione Virginis Superstitionem timeo. Timuis & times Apostolica Sedes, quae quamvis eandem Opinionem maxime Verisimilem, & Piam dicat; nihilominus Votum in Theophilo Raynaudo olim non probavit, ipsumque affirmantem, pro ea causa pium esse mori, silere iussit.* Mirum est, quantopere Parthenotium nostrum concusserit mentio haec

Apollonicae Sedis, non probantis cruentum paucorum Votum, ac Theophili Raynaudi, expungere iussi sponsonem faciam morientibus pro Scotistica sententia. Aestuat ille hac de causa, & non uno in loco proelium redintegrat, ut hujusmodi telum nimis sibi molestum a se avertat. Pag. 68. petit, unde haec Lamindus acceperit, & *quibus tabulis, quibus monumentis, quo Auctore narrationem suam comprobet.* Causam exponit, cur ipsius Raynaudi Liber de *Martyrio per Pestem* confixus fuerit Anno 1646. a sacra Congregatione Indicis; atque inde infert, *dubiae fidei esse praeceptum illud silentii Theophilo datum ab Apostolica Sede, & ab uno memoratum Lamindo.* Addit, silere minime iussos novem alios Scriptores, qui eandem *Martyrii* fiduciam ingesserant mortem subeuntibus pro Immunitate Mariana; ac propterea verisimile non esse, quod de Raynaudo Lamindus venditat. Subdit praeterea: *Neque Apostolica Sedes silere iussit omnes Academias, quae voverent, votoque sacramentum adiciunt, se tuituras Beatæ Virginis Immunitatem ab omni macula:* quod nemo non videt, quantum a controversia nostra sit alienum, quum nimium differant, Opinionem tueri voce & calamo (quod & Lamindus laudavit) atque pro ea Opinione tormentis & securi sese offerre. Tum pag. 96. conqueritur, *quod Lamindus non egerit cum Raynaudo benignius, qui profecto majorem sibi ab eo gratiam polliceri vir apprime Catholicus poterat.* Sed non multis heic opus est. Possidet Parthenotimus eandem, qua ego utor, editionem Operum Theophili Raynaudi. Facile potuisset intelligere, Lamindum non sine bonis tabulis Raynaudi mentionem praesenti quaestioni immiscuisse, si pari diligentia rem sibi ingratam quaesivisset, qua gratae quaeri consueverunt. Tomum ergo Vigesium ejus Operum adeat, sibi que pagina 156. occurret *Correctio facta a Congregatione Indicis Libri inscripti de Martyrio per Pestem.* Ibi ista leguntur: *Expungatur id, quod Auctor scribit: Eum faturum MARTYREM, cui mors intentaretur, si Piam sententiam de Conceptione Beatæ Mariæ Virginis Immaculata non improbare, isque mallet mortem prius acceptare eam ob causam, & re ipsa eam acciperet.* En quo Auctore Lamindus Raynaudum silere iussum tradidit. Atquo is revera edito rursus eo Opere, opinionem quidem aliorum, Martyrium morientibus pro ea causa promittentium, retulit; sed suum ipse iudicium continuit. Heic autem antequam progrediar, animadvertat Lector, quam immerito expostulet Theologus Siculus, quasi Raynaudo parum aequum & amicum se Lamindus prodiderit. Apud me profecto est maximo in pretio omnigena eruditio Raynaudi; atque arbi-

tror,

trior, ingentem ejus Operum molem reipublicae Literatorum admirationi non minus, quam ufui esse posse; neque eximii viri meritis quidquam detrahit, quod ex ejus Libris opinionem illam eradendam Roma jusserit. An vero illum ego acerbe fuerim infectatus judicent recti rerum aestimatores. Dixi, Apostolicam Sedem non probasse depraedicatum ab eo *Martyrium*. Mitius loqui non potui, ipsumque meum argumentum exigebat, ut quid ei hac de causa accidisset, non dissimularem. Quamobrem inanes Parthenorimi querelae abeant. Quod si is pag. 95. vulnus istud refricans dolet, quod Lamindus non distinguens dixerit, a sacra Congregatione Indicis impositum Raynaudo silentium, atque non casu, Sedis Apostolicae vocabulo fuerit usus, is pro suo ingenio querelas multiplicat: quippe ad auctoritatem Apostolicae Sedis refertur quidquid in variis Congregationibus Romanae Curiae agunt Eminentissimi Cardinales. Disertis verbis haec scripsit Sixtus V. in fundatione ejusdem Congregationis Indicis, ut habetur in ejus Constitut. LXXIV. *Libros, qui post Indicem Tridentini Concilii jussu editum prodierunt, Catholicae doctrinae, Christianorumque morum disciplinae repugnantes, expendant, & recognoscant: at ubi Nobis resulerint, Nostra Auctoritate rejiciant.* Licuit sane Raynaudo postea appellare ad Summum Pontificem, eique exponere, confixam injuste spem *Martyrii* a se factam morientibus pro Scotistica sententia; sed meliora edoctus, abstinuisse credendus est.

Utrum vero in sua sententia persisterit vir ille doctissimus, an ab ea recesserit, nihil attinet inquirere. Satis nobis in praesentia est, Sacrae Congregationi minime probatam fuisse *Martyrii* fiduciam ingestam a Raynaudo, & nunc etiam a Parthenorimo, homini pro sententia Scotistica mortem toleranti. Quod autem animadvertendum heic est, vetuit sacra Congregatio, ne Raynaudus *Martyrium verum ac proprium* tribueret piis viris vita excedentibus, dum amore Dei infectis *Peste* intervniunt, aliave Caritatis ac Virtutis certae opera faciunt; simulque licere voluit, hosce appellare *Martyres improprie ac late* sumpto eodem vocabulo. At ubi de morte subeunda pro *Immaculata Conceptione* agitur, *Martyrii* nomen quodcunque expungendum praecepit. Ad haec perpendas velim, inter Votum Sanguinarium, & Raynaudi propositionem intercedere magni momenti discrimen. Aliud enim est, *asserere velle Certam*, & ad Cultum Dei ac Virginis sine dubitatione spectantem, sententiam Scotisticam; aliud *nolle eam improbare ac damnare*. Illud positivum, hoc negativum. In postremo casu, ut infra dicam, honestum fuerit mortem potius tolerare, quam
notam

notam Impietatis aut Falsitatis impingere eidem sententiae. Et nihilominus *Martyrii* tam proprii quam improprii nomen pro hac causa occumbentibus negavit sacra Congregatio. Neque immerito. Nam ii *veri Martyres*, qui Sanguine suo obignant aliquam Veritatem divina Fide credendam: ii *Martyres* etiam, sed metaphorice ac *improprie*, qui in exercitio Caritatis aut Patientiae e Vita excedunt; eorum quippe opus non Persuasionem tantum propria, sed re ipsa Deo gratum est, atque ad Fidei doctrinam spectat. At qui, ne damnet sententiam Scotisticam, morti occurrit, opus facit, quod iuste quidem opinemur placere Deo, sed nondum per Fidem novimus, an placeat Deo; quum liceat etiam contrariae adhaerere sententiae, cui qui adhaeret, ex natura rei etiam damnat ac improbat Scoti Opinionem. Deficiente igitur Certitudine objecti in moriente, ne damnet sententiam Scotisticam, non poterit is *Martyrii*, neque *proprie*, neque *improprie sumpti*, laudem ac nomen consequi. Quod si ita sensit sacra Congregatio de secundo casu, quanto magis eadem improbarit Voto Sanguinario devotos, idest mortem tolerantes, ut *Veram ac Certam* asserant sententiam Scotisticam, sive hanc Veritatem & Certitudinem statuas in propositione atque Opinione ipsa, sive in Pietate, quae inest alicui Opinativo de Immunitate Mariana? Immo non ipsa tantum Congregatio profusionem Vitae in casu isto improbasse videtur, sed & ipse Theophilus Raynaudus jam damnassee dicendus est. Ejus verba de Martyr. per Pestem Part. II. Cap. III. num. 18. repetam, ubi illum duplicem casum distinguens ait: *In posteriore dubio statendum est: Vitam Temere, nec absque SCELERE, atque adeo sine Martyrii fructibus abjiciendam pro Assertionem alicujus Propositionis, cujus VERITAS non sit in Ecclesia PRORSUS rata, ita ut non sit exploratum, quod ejus assensus a FIDE exigatur.* Nisi Parthenotimus, aut quisquam alius evincat, Scotisticae Sententiae Veritatem esse in Ecclesia Dei adeo ratam & exploratam, ut ejus assensus a Fide exigatur: habet ille tandem tum a Sacra Congregatione, tum a Raynaudo ipso non solum *Martyrii* spem Sanguinario Voto ereptam, sed etiam ipsius Sanguinarii Voti damnationem.

C A P U T X V I I.

An dare Vitam liceat, ne sententiam de Immunitate Mariana damnumus. Quid in casu isto agendum. Accuratus tamen negotium istud perpendendum.

HISCE autem positis, consequens profecto est, tolerandum minime fore *Votum*, in quo voventes contra Ecclesiae Romanae mentem *Martyrii* coronam sibi pollicentur; & quod gravius est, opus sibi statuunt praeceptis Dei & Ecclesiae contrarium: quum ne ipse quidem Parthenotimus neget, quin sit nefas Vitam impendere pro *Opinione* tuenda; isque negare nequeat, quin sententia Scotistica de Conceptione adhuc inter *Opiniones* sit computanda. Peccatum quoque est, velle pertinaciter Fidei Veritates aequare hominum Opinionibus. Peccatum, vel le pervicaciter, ipsiusque Vitae sacrificio, Populo persuadere tanquam Certum illud, quod Ecclesia pro Incerto adhuc habet. Peccatum contra Justitiam, quum homo ex arbitrio suo, & Deo atque Ecclesia non solum non praecipiente, sed etiam improbante, profundere vult pro Opinionibus Vitam, cujus potestatem sibi reservavit omnium Creator. Peccatum contra Charitatem, quam quisque debet sibi; & Proximo etiam debet, quamvis Tyranno ac impio, cui ministranda sine necessitate aut utilitate Ecclesiae non est materies & occasio nova saeviendi atque peccandi: Peccatum denique contra Prudentiam, quum Bonum Certum ac ingentis pretii, voventes commutare temere velint pro Incerto. Et quoniam, uti Cardinalis Cajetanus scripsit loco supra commemorato, & Tamburinus confirmavit Lib. III. de Just. Tract. III. part. 3. Cap. 1. ipsa Opera positiva Virtutis, quorum bonitas & doctrina Fidei constet, uti *Evangelium praedicare apud Infideles: Sacrum celebrare: a Carnibus abstinere* &c. ut bona, honesta, & laudabilia sint in praxi, necesse est, ut debitae circumstantiae concurrant: alioqui non Virtutis sed Temeritatis opera evadunt: quanto magis temerarium erit velle pretiosum Vitae Bonum profundere pro Opere positivo Virtutis Opinativae, & minime per Fidem Certae, qualis est assertio Scotisticae sententiae? Vide & Lessium Lib. II. Cap. XL. Dubit. VII. num. 42. Reliquum proinde est, ut Sanguinariu *Votum* irri-

irritum ac nullum sit, quum non sit de meliori bono, immo sit de Opere involvente peccatum; & qui monitus pervicaciter illud conciperet, aut ei post monita constans adhaerere vellet, a crimine excusandus neutiquam foret.

Supra vero innuimus, duplicem distinguendum esse casum, in quo certamen oboriri posset de sententia Scotistica cum discrimine Vitae. Primus, *eligere velle interitum, ut asseras Veram ac Certam eandem sententiam*. Alter, *Vitae suae iacturam pati potius quam damnare eandem uti Falsam ac Impiam*. Non est cum priore confundendus posterior casus. Diversa enim omnino sunt, Opinionem de Immaculata Virginis Conceptione Veram ac Certam inter gladios asserere velle, atque eam asserere nolle Falsam aut Impiam. Qui renuit Falsitatis aut Impietatis Opinionem arguere, non eam propterea Veram esse contendit; sed tantummodo iudicium suum continet, & nihil de Veritate aut Falsitate illius decernit. Quid ergo Catholico homini agendum, si ante Tyrannum sistatur, aut a privato quopiam furente urgeatur, interrogatus, an credat, sitne absque originali Labe Virgo concepta; eique, si credat, inevitabilis mortis minae intendantur? Quotiescunque respondeat, se firmissime in hac esse sententia, tormentaque & mortem potius eligat, quam recedere ab ejusmodi Opinione: uti hactenus vidimus, temere ac imprudenter ager; reusque sceleris gravissimi erit, utpote qui nimium suo iudicio credit, illud praeferens iudicio Ecclesiae, & praeferente Certitudinem Opinioni tribuere volens, qua tamen, pendente Ecclesiae iudicio, caret eadem opinio. Is ergo in isto amphractu intrepide respondere potest: *Hoc ignoro: id tantum Deus novit*. Immo ita respondeat, oportet, ut salvam faciat Vitam suam, rem nimirum enixe sibi a Deo commendatam. Et praecipue quod ita respondendo Verum dicet, nihilque aliud profitebitur, quam quod Ecclesia hactenus sensit, dum ita unam ex Opinionibus de Conceptione Virginis probat, ut alteram oppositam non improbet. Hoc pacto Tyranni furorem exarmabit, suumque caput prudenter discrimini eripiet, neque temere Vitam pro Opinione tuenda impendet. Atque hic est reipsa casus Voti Sanguinarii, cujus intoleranda confectaria hactenus persequuti fuimus. Voto enim isto toti antiquitati incognito id praesertim voventes contendunt, se ad profundendam Vitam esse paratos, ut Certam asserant Immunitatem Virginis. Et quanquam Parthenotimus nobis edixerit, voventes mortem subituros non pro *Veritate* ac *Certitudine* ejusdem *Opinionis*, sed pro *Veritate* ac *Certitudine* *Honoris & Cultus* Mariae, qui ex ea Opinione

nione defluit, & pro Veritate Pietatis, quae inest Actui Opinativo de Immaculata Conceptione; attamen vidimus, Cultum hunc, Honorem; & Pietatem, Certa nunquam esse posse, nisi Certa sit Sententia, super qua innituntur; & consequenter eo recidere semper consilium Voti Sanguinarii, ut voventes repugnante Ecclesia ostendant ac suadeant Populo, Certam esse, ac parem Veritatibus Fidei, Sanguine nostro propugnandis, Opinionem Scotisticam de Virginis Conceptione. Scribit autem Parthenotimus pag. 101. *Theologorum mentem, qui Votum usque ad Sanguinem tuentur, eam esse numquam posse, quod semper, & in omni eventu pie Vovens mortem subire debeat; sed ubi solum Deiparae periclitetur Honor. Sive, uti infra repetit, ut mortem toleret, cum (quod prudentis arbitrio metiendum est) Virginis Immaculatae deprehenderis Honorem periclitari.* Ita sub hujusmodi verborum ambage is consilia sui Voti occultat, liberumque clientibus suis campum relinquit profundendae Vitae pro tutela Scotisticae sententiae. Rectius ipse munere suo functus fuisset, si terminos huic arbitrio, atque prudentiae privatorum hominum statuisset, ne dum prudenter tueri ii se putant sententiam Veram ac Certam, ac Honorem, Cultumque Verum & Certum Virginis, ejusque Sanctitatem; imprudenter, ac vincibili Errore indirecte se occidant, ultro ac sine necessitate carnifici jugulum tradentes. Attamen ex hac ipsius confessione jam intelligant Voto Sanguinario addicti, sibi non esse mortem eligendam, quoties agitur de prodendo, an Credant Veram ac Certam Scoti Sententiam, Verumque ac Certum Honorem Mariae in ejus sententiae tutela collocatum; sed tunc sibi respondendum: *Opinor quidem ita esse, at id Certum mihi non est. Deus novit; noscam & ego, si aliquando quaestionem dirimet Ecclesia.* Neutiquam enim periclitatur Honor Virginis, dum protestamur, nos ignorare, an reipsa Beatissimae Christi Matri collata fuerit Immunitas ab originali macula, & nos nequaquam credere Certam Scoti Sententiam. Postquam Ecclesia a tot Seculis, & quidem disertis verbis, liberum cuicumque facit adhaerere oppositae sententiae, evidens est, non periclitari Honorem Deiparae, etiam credendo illam Immunitatis Scotisticae expertem. Si periclitaretur, non id fineret Ecclesia, supra quemcunque privatum Theologum sollicita de Honore Mariae. Quanto ergo minus periclitabitur Honor iste, protestando duntaxat, nos nequaquam Certo credere Scotisticam Immunitatem, atque ignorare, quid Deus revera in Conceptione Virginis fuerit operatus?

Atque ista haftenus dicenda habui, ut ostenderem, quam incongrua, minimeque ferenda sit Voto Sanguinario praestita a Parthenotimo tutela, cujus objectum est tutela Certae Veritatis, quae tamen Certitudo, ubicumque eam statuas, abest a Scoti sententia. Petat nunc aliquis, quid agendum sit, si quando Tyrannus, aut quispiam improbus alius, mortem minatus, adigere nos velit ad appellandam *Impiam* ac *Falsam* sententiam eandem. Heic certe urget praeceptum Vitae custodiendae, neque prodigendae, sed simul imminet timor Falsum appellandi, quod Verum ac Certum esse, judicante Ecclesia, deprehendi aliquando possit. Quod plus est, praeceptum viget ac urget Summorum Pontificum, vetantium, ne quisquam Falsitatis aut Impietatis notam inurat Opinioni patrocinantium Immaculae Conceptioni. Itaque dico primo, si quisquam oblati mihi atrocibus tormentis ac morte, compelleret me ad configendam Erroris ac Impietatis nota Scotificam Sententiam, continuo reponerem: *Id nescio: Novit Deus*: qua responsione nihil Veritati, neque praecepto Ecclesiae derogarem, fierique posset, ut furori tyrannico facerem satis. Verum ubi is acrius adhuc instaret, atque a me expereretur, ut diserte damnares ejusmodi sententiam: cernens ego, rem mihi esse cum violento simul & furioso, seu mente capto, ac memor, *respondendum esse Stulto juxta Stultitiam suam, Proverb. XXVI. vers. 5. & Sapientem Eccles. VII. vers. 18.* edicere: *Noli esse Stultus, ne moriaris in tempore non tuo*: quantum possem, ingenio curarem, ut importunam interrogationem eluderem, & sine aperta damnatione sententiae discrimen Vitae evaderem. Verum ubi in irritum cederet omnis conatus, putarem praestare mori quam piam fugillare sententiam: idque ne peccarem contra praeceptum Ecclesiae, quae sub anathematis poena ab infimulanda Impietatis ac Haeresis Scotistica sententia Catholicos omnes coercuit. Quod quum ajo, tria heic animadvertenda. Primum, non in quaestione ista sitam esse controversiam, quae Parthenotimi calamum in me fuscitavit. Neque enim e persuasione mea, uti neque e morte mea, quidquam certitudinis accederet Opinioni de Virgine sine labe concepta: quem tamen in finem collineat intentio voventium ad Parthenotimi normam. Secundum, non Parthenotimum tantummodo ceterosque ad singularitatem gloriae aspirantes devoto erga Virginem animo, sed quemlibet Catholicorum mortem prius optere debere, quam censoriam notam inferre praeclaudatae sententiae, quum ad Catholicos cunctos praeceptum illud extendatur, & obligetur quisque ad parendum Ecclesiae mandatis. Tertium, nil majoris prae-

praestantiae five praerogativae effluere hinc posse in sententiam faventem Immunitati Marianae. Nimirum quoties inster idem Tyrannus, ac necem tibi indicat, nisi *Haereticam* aut *Impiam* affirmes contrariam alteram sententiam, negantem Virgini Immunitatem originalem: ne id facias, Vita potius in hoc etiam casu est offerenda licetori. Et quid? *Simuli anathematis poenae* Sixtus IV. Concilium Tridentinum, alique Romani Pontifices subjecere eos, qui Haeresis aut Impietatis arguerent *Opinionem contrariam, videlicet gloriosam Virginem Mariam cum originali peccato fuisse conceptam*. Ad praeceptum quod attinet, nihil discriminis inter utriusque sententiae patronos ac censores Ecclesia statuit. Si ergo damnare non licet Thomisticam Opinionem, tibi, ne illam damnes, mors potius est eligenda. Quamobrem tunc non pro Veritate, five Certitudine alterutrius Opinionis sanguis effunderetur, sed ut mandatis Ecclesiae non adverstando, evitaretur Peccatum.

Meam in hanc rem, qualiscumque sit, opinionem dedi. Nunc addo, ipsam nihilominus accuratiori examine indigere: quod me doctiores, quam lubebit, inire poterunt. Inquirendum namque videtur, an meas Ecclesiae, interdicens censuram utriusque Opinionis eo usque feratur, ut in conspectu eculeorum & carnificis mors potius subeunda sit, ne alterutra improbetur. Nimirum, ut superius innui, occurrunt nobis praecepta Ecclesiae, immo & Dei, quae nos minime obligant, quum mortis periculum instat: tunc enim cessat voluntas Dei, aut Ecclesiae ad nos obligandum. Immo interdum non solum cessat obligatio illius praecepti, sed etiam viget obligatio conservandae Vitae (secluso semper gravi scandalo, & contemtu Ecclesiae, five Religionis) ita ut peccati expers non foret, qui pervicaciter tunc occumbere vellet, ne praeceptum transgrederetur. Neque heic de re Intrinsece mala sermo est, a qua perpetuo & ubique abstinendum est. Quum enim Ecclesia liberum cuicumque relinquat, quam Veritati propiorem putet ex duabus istis Opinionibus amplecti, liberum ex vi contrariorum sit etiam necesse est, ut qui unam amplectitur, ac Veram credit, alteram tacite saltem improbet, & falsam credat. Neque praedicatum *Pietatis* ita conjunctum est cum hisce Opinionibus, ut nullo unquam tempore disjungi possit. Vocabulum enim *Piae*, quod Sententiae, five Opinioni cuiuspiam tribuitur, Probabilitatem non Certitudinem indicat. Et quandoquidem Ecclesia quaestionis hujus definitionem nondum suscepit, ac nos dedecet ita iudicium illius velle arctare, ut unam tantum ex istis Opinionibus eligere possit tanquam doctrin-

doctrinam Fidei divinae, quum aequae possit & alteram: consequenter neutra Opinio dici potest ex parte rei ita *Pia*, sive *Probabiliter spectans ad Cultum Dei & Virginis*, ut aliter esse aliquando non possit. Proinde quum ideo tantum damnare hanc vel illam e propositis duabus Opinionibus malum sit, quia ab Ecclesia prohibitum; & sint aliqua Ecclesiae mandata, quae minime nos obligant, quoties incurritur periculum mortis: prudentiores judicabunt, rectene, an secus procedat nuper a me proposita Conclusio. In hisce tamen casibus, hoc est in re tanti momenti, si commodum ac tempus non deesset, consultius foret, mentem Sanctissimae Romanae Ecclesiae ab ipsa petere, cujus ductu atque judicio omnia nostra consilia & acta regentes, non ego, non alius quisquam errabit. Eoque magis percutari juvabit Ecclesiae Magistrae nostrae mentem, quum ipsa in eum tantummodo finem interdixerit ambarum Opinionum censuram, ut finem faceret jurgiis publicis & scandalis, inter disputantes Theologos jamdiu vigentibus, non vero ut immunem intrinsece a censura praestaret alterutram ex illis sententiis. Ad haec finge tibi, duos ejusmodi Opinionum patronos, alterum Scotisticae, alterum Thomisticae, sisti ante Tyrannum, atque ambos Persuasionem ductos, sententiam suam cum sacris Litteris, ac Traditione Patrum, certius consentire, ac propterea sinere, se potius Vita spoliari, quam ejusmodi Persuasionem deponere (Cur enim uni non liceat, quod alteri?) ita ut ambo mortem oppetant, sed pro oppositis sententiis tuendis. Rursus tantummodo finge, utrumque pugilem sub securi cadere, ne Haereticam aut Impiam appellent contrariae factionis sententiam uti Ecclesia mandavit: quid consequatur, facile sentis. Consequetur nempe spectaculum inusitatum, quod non sine aliquo horrore audiamus, videlicet pro contrariis de una, eademque re sententiis homines ejusdem Religionis aevo nostro mortem subire: cujus rei exemplum frustra in universa Ecclesiae Historia perquiras. Restat ergo, ut cautius in hisce etiam casibus, extra controversiam, quae mihi cum Parthenotimo est, propositis procedamus, ne aut imprudenter Vita projiciatur, aut dignitati Ecclesiae ac Religionis officiendo, hostibus nostris ridendi aut declamandi contra nos occasionem praebeamus.

C A P U T XVIII.

Falsa crimina Lamindo Prisanio imposita a Parthenotimo. Qui Visitationarium se prodit. Revelatio tributa Dominico a Jesu Maria Carmelitae expenditur.

HISCE expeditis leviora supersunt expendenda mihi in Parthenotimi Libello. Et quidem missa lubenter facio, quae in contemptum mei non uno in loco Siculus Scriptor intermiscet. An Justo titulo is adversus me egerit, aliorum judicium esto. Hoc tantum novi, ut ut ille magnus sit vir, & in sublimi Theologiae throno sedeat, ego vero exiguus sim, nulloque nomine cum eo comparandus; ejus tamen dignitas non faciet, ut illi in praesenti quaestione victoria adjudicetur; neque tenuitas mea, ut mihi eripiat. Rationibus certavit ille: rationibus certavi & ego. In his unis collocanda est victoriae spes. Uter melioribus armis fuerit usus, docti viri aliquando judicabunt, ac tempus sensim aperiet. Unum tamen, quod me intime ferit, dissimulandum heic minime censeo. Videlicet aegre ferre Theologum nostrum pag. 90. quod *Lamindus in Italia, quae Deiparae cultu ceteras regiones superat, scripserit opus in Gallia imprimendum*. Duas praeterea Theses Theologus idem commemorat B. Virgini injurias, & in Gallia enatas, quae ab Alexandro VIII. confixas ait. In mentem quoque Lectorum revocat *Monita Salutaria Beatae Virginis ad cultores suos indiscretos in Galliis vulgata, & a Clemente X. Anno 1676. proscripta*. Tum in haec verba erumpit: *Cur ergo Lamindus doctrinam, quae licet ipsi appareat vera, ceteris est falsa, nefas non putat proferre, ac inculcare: doctrinam, inquam, unde qua Italiae, qua Galliae oriri queant scandala? Italiae quidem, ubi vivendi Virgineae Immunitatis defensionem verus consuetudo est. Galliae etiam oriri queunt scandala, ubi Non Pauci Deiparae Cultum, ejusque Sanctitatem impetentes, in ea stabilirentur opinione, & certe hominis Itali opera, quod inspersa superstitionibus sit gentis Italiae in Deiparam observantia. Declarationi huic tandem finem imponit lenibus hisce verbis: Absit, ut in mentem meam cadat suspicio (vide hominis candorem, non immerito Candidi nomen praeferentis, ejusque delicatam Caritatem post*

post nuper institutam accusationem) quod rem paucioribus in Gallia gratam facturus haec scripseris Lamindus. Haec Parthenotimo displicent; at mihi aequius displicet, ipsum distingere heic meris somniis ineruditam gentem, atque indigno artificio, quod in omnium oculis incurrit, studuisse, ut invidiam Lamindo atque odium falsis hisce querelis crearet. Somnium quippe est, enatas in Gallia duas illas Thefes. Somnium, prodiisse e Gallia *Monita salutaria*, quum Germano Colonienſi tribuantur. Somnium fortassis etiam est, *Monita* illa a Clemente X. Anno 1676. explosa fuisse; nam serius, si bene memini, id contigit: quod in praesentia exquirere nec vacat, nec interest. At somnium certe contumeliosum Galliae genti nemo non sentiat in Parthenotimi oratione scribentis: *non paucos Gallorum Deiparae cultum, ejusque Sanctitatem impetere*. Quis haec ferat de Catholica ac pia gente Gallica proferri, quando ne ipsi quidem Janſenistae, quos observari ante oculos Parthenotimi hoc in loco par est credere, Deiparae cultum, ejusque Sanctitatem improbare deprehenduntur? quod si is eodem obelo configit & illos, qui intemperantiam nonnullorum in cultu ac laude Virginis non ferunt, noverit Siculus Scriptor, se incaute maledicere Theophilo Raynaudo, sibi tam caro, & quibusvis Theologis Catholicis, etiam Italis, qui legitimum Mariae Cultum docent ac suadent; spurium ac superstitiosum arguunt, & arguendum esse fatentur. Praeterea somnium perquam ridiculum est, sibi in Lamindo fingere *doctrinam, unde qua Italiae, qua Galliae oriri queant scandala*. Tot anni jam effluxere, ex quo Lamindi Liber prodiit, neque ullum in Gallia, Germania, ac Italia, quibus in locis idem impressus fuit, auditum est murmur, nullaue scandali vel levis umbra apparuit. At inquit Siculus: *In Italia vovendi Virgineae Immunitatis defensionem vetus consuetudo est*. Lamindus vero hanc impugnare non veretur; & *doctrinam, quae licet ipsi appareat Vera, Ceteris est Falsa, nefas non putat proferre ac inculcare, quod inſperſa superstitionibus sit gentis Italiae in Deiparam observantia*. Haecenus putaveram ego, rem mihi esse cum *sacrae Theologiae Professore* gravissimo, ut Libelli ab ipso editi praefertur titulus. Sed nunc iustae defensionis necessitas dicere & expostulare me cogit, pugnam mihi esse cum Theologo Visionario, ne duriori etiam nomine utar. Nemo enim, nisi qui somnia somniat, & Visiones videt, deprehendere uspiam poterit, quae Lamindo Parthenotimus heic affingit. Quisquis haecenus Lamindi Librum legit, aut ipsius Parthenotimi Opusculum, ubi integra Lamindi censura exhibetur, a vestigio haec verba obvia habet:

Satis

Satis quibusdam non fuit calamo & rationibus Immaculatam Deiparae Conceptionem tueri: quod procul dubio cum vera Pietate consonat. Si Parthenotimo animus est significare, Scotisticam de Conceptione sententiam a Lamindo improbari, habet unde pudeat talia scripsisse. Si de voto tuendi calamo ac rationibus eandem sententiam, rursus ei os obstruunt verba Lamindi, laudantis, sive intercedat, sive non intercedat Votum, propugnatores sententiae ipsius. Una inter Lamindum & Parthenotimum haecenus controversia fuit de Voto Sanguinario: hoc unum Lamindus censura sua impetiit. In hoc unum quoque collineant, quae hucusque ego congeffi; nempe: *Minime licere Sanguinem & Vitam profunderere pro tuenda Scotistica Sententia*. Si vero Parthenotimus contendit, doctrinam hanc, quae Lamindo apparet Vera, Ceteris esse Falsam: Ceteros ego spero iudicaturos, nonnisi in phantasia supra modum fervente id genus judicia atque assertiones posse nasci: quando omnibus notum est, non paucos adhuc esse, qui vel ipsi Scotisticae sententiae adhaerent: ceteros autem spero ego adversaturos Voto tuendae ipsius profusione Vitae.

Ne quis tamen injurium me putet Parthenotimo, dum illi somnia ac Visiones tribuo, ipsum fatentem exhibere juvat, se ejusmodi somniis atque Visionibus obnoxium. Oculis converte ad illius Praefationem, qua integerrimae Virgini, sanctissimae Dei parenti, omnis prorsus maculae experti, se, suamque Dissertationem inscribit Auctor. Ibi vir pius, & gratis coelestibus refertus, haec ad Virginem, quam alloquitur: *Literariam in arenam jam jam publice descensurus, non semel, ut scis, Te verbis illis interpellavi, quibus Barac Deboram: Si venis mecum, vadam: si nolueris venire mecum, non pergam. Judic. 4. 8.* Neque haec perfunctoria dicta; nam subdit: *Et audire mihi VISUS SUM. Ibo quidem tecum. Atque nescio, quid solaminis animo meo ingessere, quae subdere VIDEBARIS: Sed hac vice victoria non reputabitur tibi.* Addit infra: *Verum ut cum spe victoriae, quae Tibi tandem cederet, Scholastico in pulvere militarem, cognovi, Te consulendam esse; & semel atque iterum, ac saepius consultus. Exploratus mihi eras meus Apostolorum, qui arduis Fidei in rebus non aliud, quam tuum interrogare consueverunt oraculum.* Pulsandam igitur erat, inquit Rupertus Abbas, te alloquens, ac pristina Ecclesiae tempora memorans, „ad Ostium Veritatis, & consulendum Oraculum Spiritus Sancti, scilicet sacrarium pectoris tui, ut Viva Voca omnem necessario tenendam demonstrares regulam Filii, cum testimonio Scripturarum, quas memoria retinebas. La V. Cant. Haec Parthenotimus. Non consulaverit, puto,

puto, occasione ista Theologus noster Libros aliquos a Deipara conscriptos, quos ad manus haberet. Ergo duntaxat eam interrogavit & confuluerit necesse est in Visione aliqua, hoc est in familiari colloquio cum ipsa Virgine Sanctissima habito. Neque ipse diffitetur scribens: *ET AUDIRE MIHI VISUS SUM*. Habemus ergo (idque dolens repeto, sed me argumenti gravitas repetere cogit) non Theologum gravem, sed Visionarium, seque talem suo ore fatentem, qui Voti Sanguinari patrociniū suscepit. Quid recti, quid solidi consequenter ab eo expectandum sit, agnoscant ac discant tandem prudentes rerum aestimatores. Agitur heic de Vita hominum, idest de maximo Reipublicae negotio: ferrine potest, ut homini ita composito decernenda causa tanti momenti relinquatur? Fuit, semperque erit mos, immo debitum Theologorum, qui sui muneris probe sint conscii, in quaestionibus ad Religionem spectantibus consulere divinas Scripturas, Sacra Concilia, Sanctos Patres; simulque oratione pulsare Deum, ut ad Veritatem assequendam, Erroremque fugiendum, infirmis ingeniis nostris opem conferat. Ut hoc ipsum a Deo nobis impetret, exorare quoque Virginem beatissimam licebit atque juvabit. Sed potissimum, *ne pateat aditus Errori, recolendum est, quod ut privatis mentibus a Deo existimeretur infusa lux, cohaereat necesse est cum Regula, quam vocant Fidei vivam, seu Romano Pontifice ex Cathedra docente*. Haec sunt Parthenotimi verba pag. 36. quae & mea facio; atque utinam is nunquam fuisset oblitus, quando obtrudere coepit clientibus suis tanquam Certam, & ab omni formidine Erroris immunem Scotisticam de Conceptione sententiam, quam tamen Romani Pontifices ex Cathedra sat aperte docuerunt, esse interea Incertam, & posse aliquando Veritatem deprehendi in opposita sententia. Habemus ergo fontes non fallaces Veritatum ad Theologiam spectantium. Appellet nunc Parthenotimus, quantum lubet, Virginem sanctissimam *ostium Veritatis, & oraculum Spiritus Sancti*: non obstabo, neque innuam, quanta circumfusione Mystica haec, seu Metaphorica vocabula in Theologia severiori sint adhibenda. At Consulere Virginem, atque ab ea Expectare, *ut Viva Voce omnem necessario tenendam demonstraret regulam Fidei*; immo respondentem illam *Audire Sibi Videri*: id genus Revelatio bene ferventis Phantasiae opificium profecto fuerit, quod a solidae Theologiae legibus ac usu quantum abhorreat, atque Errori non uni ostium aperire quotidie possit, nihil est, quod ego ostendam. Dolebat nuper Siculus Theologus, opera Lamindi hominis Itali Gallos in ea opinione stabiliri, quod *inversa superstitionibus sit*

gentis

gentis Italae in Deiparam observantia. Immo nunquam fuit Gallis tam sinistra de gente Itala opinio; eoque minus in eam descendunt, ex quo Italicum Scriptorem animadverterunt, libero calamo, neque contradicente Ecclesia insectantem, non *gentis Italae*, sed *paucorum Sicularum* naevos in observantia erga Deiparam. Neque enim in ulla gente naevi unquam defuere, nullo tamen universitatis dedecore, quum paucorum ii sint, & ipsis hisce paucis censura aliorum non parcat. Videat potius Parthenotimus, quam feliciter ipse pugnet pro gloria Italiae, quum non tantum se patronum palam praestet *Voti Sanguinarii*, quod Superstitionem olere videtur, illudque omnibus animosa contentione suadeat; sed etiam rem antea ignotam prodit, scilicet inter nos non deesse Theologos Visionarios, qui de tam grandis momenti rebus & quaestionibus Deiparam consulunt, ejusque *Vitam Vocem* audiunt, & victoriae spem certam ab ipsa reportant. Ast nihil edocere Gallos, ceterosque Populos oportet, universam Italiam tantum abesse a probando pseudo-magnanimo illo *Voto*, quantum ab auscultandis ejusmodi Theologis. Et quid dico Theologis? Unus fuit, unus, ut spero, erit ex Italis, qui haec audeat, & scribat. Quod si mihi serio in re tanta agenti ludere placeret, denique adderem, fieri posse, ut Prophetas potius laudem Parthenotimus referat, sed alio, quam ipse speret, eventu, ex hujusmodi certamine, quando ipsemet tradit, sibi hoc responsi datum fuisse: *Sed hac vice victoria non reputabitur tibi*; sive ut Sanctes Pagninus interpretatur: *Verum non eris gloria tua in via, per quam ambulas*; sive ut Vatablus reddit: *Hoc non eris tibi honori*. Tempus aperiet, penes utrum e nobis statuta sit victoria.

Interea perpendendum relinquam Lectoribus, non crasso sub aere natis, an artificium aliquod subdubitare liceat in Parthenotimo, commemorante, *Theses & Monita salutaria*, a Sancta Sede proscripta: post quae ille subdit: *Absit, ut in mentem meam cadat suspicio, quod rem paucioribus ex Gallia gratam facturus, haec scripseris Lamindus*. Scilicet ille quidem a se ita amolitur suspicionem de arcano aliquo foedere cum Jansenistis, ut eodem tempore ipsam clientulis suis suspicionem ingerere videatur; nam qui non pauci in Gallia *Deiparae cultum*, ejusque *Sanctitatem* impetunt, & pauciores postea (nempe comparati cum reliquis Gallis) appellantur, non alii sunt, quam Jansenii sectatores famosi. Miratus hercle fuisset, si Parthenotimo excidisset hoc telum; nam & in ipsa splendidissima Sicularum Metropoli Panormo, ubi is degit, parum absuit, quin ante annos duos obor-

ta Grammaticali controversia, publicis etiam lucubrationibus agitata, Janfenismi notam effugerit, qui cum altero Parthenotimo manus conferere est ausus. Sed quisquis fuerit heic Theologo nostro animus, placido illi ore reponam, me nihil indigere ejus monitis, ut discam, qui cultus Beatissimae Salvatoris nostri Parenti debeatur; neque enim in ea colenda cuiquam concedo. Monendum vero ipsum, ne in excessus rapi se sinat, a quibus cuicumque Catholico, nedum Theologo homini, cavendum est. Una mihi cum illo controversia est, tolerandum ne sit, an non, Votum Sanguinarium. Pro me stare confido, non dicam universam Italiam ceterasque Christiani nominis Provincias, sed & ipsos religiosissimos, doctissimosque Parthenotimi sodales, qui quum observantia & amore erga Deiparam cum omnibus, nedum cum Siculis, certent, ab ejusmodi tamen Voto abstinere, amplexuri jamdiu, ut conjicio, non impigre, si cum recta Pietate conciliari illud posse animadvertissent. Quare perpendat Parthenotimus, quos contemnat, quos feriat ipse, dum in Lamindum (quem alioquin omnes norunt Janfenii errores perosum) Janfenismi suspicionem sub specie nolentis commoveret, eaque tantum de causa, quod Votum, nemini ferme, si paucos Siculos excipias, probatum, rejiciat. Porro antequam Capitulo huic finem faciam, monendus est Lector, Parthenotimum non suas duntaxat Visiones in aciem eduxisse, sed & alienas. Nam pag. 27. Revelationem adfert, factam *Venerabili Dominico a Jesu Maria, Generali Ordinis Fratrum Carmelitarum Exaltatorum a Divo Thoma Aquinate*. Revelatum, inquam eidem fuit, *quod futurum esset Concilium, quo Immaculata Deiparae Conceptio definiretur*. Libenter heic peterem a Parthenotimo, utrum is fidem adhibeat ejusmodi Visionibus, an non. Si non adhibet, cur bonae genti eas propinat, quasi & mercibus istis futura sit virtus ad confirmandos clientes suos in Persuasione Certitudinis sententiae suae? Sin adhibet, dicat quales, an sit prudentis Theologi, ac bene conscii, quae sint vires piarum Phantasiarum, hujusmodi Revelationibus fidere in Disputationibus de doctrina Fidei? Eoque minus fidendum erat Venerabili viro illi, cujus virtutes ac merita ut ut egregia fuerint (intacta quippe illa dimitto) Visiones tamen characterem tantummodo praefereunt Phantasiae sine somno somniantis. Ejus Vitam ad manus non habeo; haec tamen ibi narrata olim intellexi. Saepe videlicet is traditur in extasim raptus. *Quadam vero die in Coelum sublarus vidit aeternum Patrem, qui & Dominico gratias egit, quod negotia Dei in terris promoveret. Vidit & Deiparam in throno confidentem,*
coepit-

coepitque contendere cum Sancto Bernardo, uter ex iis praeferret devotione erga Mariam. Noluit Virgo quaestionem dirimere, sed amborum ora praemii loco lacte suo conspersit. Tunc iussus Dominicus Missam celebrare in Coelo, Diaconum sibi habuit Sanctum Joseph, Subdiaconum Sanctum Franciscum Assisinatem. Sed oborta lite, quatenam Missa eligenda foret, Sanctus Franciscus Missam de sacris Stigmatibus, Joseph Missam de Incarnatione, Dominicus Missam de Beata Maria praeferebant. Ex decreto aeterni Patris lis Dominico adjudicata est. Tunc Angelorum chori complures coeperunt Musicis modi cantare *Salve sancta Parens &c.* Ante Communionem scrupulus Dominicum invasit; nondum enim media non advenerat, ipse vero non erat jejunus. De hoc monitus Pater aeternus dispensationem elargitus est. Demum peracto sacro idem aeternus Pater Dominicum sedere iussit in throno, cunctisque Angelis praecepit, ut ad illius manus deosculandas accederent. Si vera sunt haec, ut olim me legere memini, nihil ultra exposcas, ut manu tangas, quodnam sit precium quarundam Revelationum. Et optandum quidem foret, ut in Phantasias Pietate aestuantes sapientum Hispanorum diligentia severius introspiceret, quando apud eos postremis hisce temporibus & foecundius pullularunt, & felicius excoepae sunt, cum virorum, tum mulierum multiplices Revelationes, a quibus amplectendis, aut probandis longe absunt ceterae Catholicorum Provinciae & Ecclesiae; immo constat, Romanae Congregationis decreto percussas fuisse Visiones & Revalationes *Hippolite a Jesu*, & *Mariae de Agreda*; uti & Academiam Parisiensem postremae Libris nigrum theta inscripsisse.



C A P U T XIX.

Sanguinarium Votum Romae, & alibi, insuetum, quia improbatum. Parthenotimus Consuetudinis clypeo illud frustra suser. Senecae auctoritate abutitur. Suarii Doctrina de Votis ad Visae discrimen sese extendentibus explicata. Cardinalis de Lugo inuisus in controversiam nostram pertractus.

SUMMO PERE Ecclesiae Romanae cordi est, fovere Pietatem erga Deiparam: quo in studio non dicam tantum Italiam, sed omnes Catholicas regiones concordēs ac aemulatricēs habet. Attamen neque Romae, neque innumeris aliis in locis, Votum unquam Sanguinarium in usu fuit. Cur quaeſo? Quum tribuere id nemo poſſit, niſi imprudenter, Pietatis defectui: iuſtae conjecturae locus reſtat, ab eo reliquos Catholicos, qui Immaculatae Conceptionis ſententiae favent, hac ipſa de cauſa abſtinere, quod ipſum ſentiant pugnare cum vera Pietate. Reponit Siculus pag. 72. *Non inde opus eſt inferre, quod inhoneſtum ſit, quidquid nondum Romana Eccleſia in conſuetudinem induxit in ipſa Urbe; praefertim ſi Romana ipſa Eccleſia alibi inter Catholicos vigere conſuetudinem illam probe ſciat, nulloque vel leviffimo indicio reprobet. Divum Gregorium Magnum conſuluerat Auguſtinus Anglorum Epico- pus, quamnam conſuetudinem inferre oporteret in Angliam, recens in Eccleſiae Romanae ſinum redeuntem. Conſultus Romanus Pontifeſ in ita reſponderet: Novit fraternitas tua Romanae Eccleſiae conſuetudinem, in qua ſe meminiſ enurriſam. Sed mihi placet, ut ſive in Romana, ſive in Gallicorum, ſive in qualibet Eccleſia aliquid inveniriſi, quod plus omnipotenti Deo poſſit placere, ſollicite eligas. C. Novit Diſt. 12. Haec Parthenotimus, qui & ſubdit; Eſto, necdum inductus Romae ſis mos Vovendi, Jurandique Virgineam Immunitatem: ſi apud Hiſpanos & Siculos, ac Hiſpaniarum & Siciliae Eccleſias vigeat, & Deo placere probatum ſit: quid eris obſtaculo, quominus prudenter eligatur? In Hiſpaniarum Eccleſiis vigere Votum Sanguinolentum, nondum bonis tabulis quiſquam oſtendit. Apud Siculos quidem, ſed perpaucos, illud concipi teſtem habemus Parthenotimum ipſum. At Romanam Eccleſiam probe noſſe Conſuetudinem Voti huius, alibi inter Catholicos*
vigen-

vigentem, affirmat quidem secundum sua desideria Parthenotimus, sed sapientes meliori titulo negabunt. Innumerae sunt Opiniones, ac ritus, in Libris, atque in variis Orbis Catholici locis occurrentes, quae ubi serium revocarentur in examen, aut falsae, aut supersticiosae, aut in praxi perniciosae, aut scandalosae reputarentur; nulla vero ex iis legitime dicitur Apostolicae Sedi nota. Tum solum ejusmodi merces noscit, & perspectas habet Romana Ecclesia, quum ad illius tribunal perpendendae deducuntur. Porro ad Votum Sanguinarium quod attinet, tantum abest, ut ipsum *probe sciat Ecclesia Romana*, nulloque *vel levissimo indicio reprober*, ut contrarium potius elucere possit, quandoquidem uti vidimus, Sacra Congregatio in Libro Theophili Raynaudi, magnificam spem factam pro Immaculata Conceptione morientibus nequaquam probavit. Sed quod vehementius miretur Theologorum Respublica, illud est, quod Parthenotimus e Gregorii Magni Epistola in patrocinium sui Voti corrasit, nihil animadvertens, quid inter Dogma & Disciplinam intersit. Agebat Sanctus Pontifex *de Ritibus Missae*, de quibus agebat *Angliae* Apostolus Augustinus: *Altera Consuetudo Missarum est in Romana Ecclesia, atque altera in Galliarum Ecclesiis*. Hosce Ritus, aliosque ejusmodi ad Disciplinam spectantes, quamvis varios pro varietate locorum, laudabiles nihilominus esse posse nemo inter Eruditos ignorat. Verum in casu nostro de Dogmate Morali agitur, & magni quidem momenti: videlicet: *Num liceat mortem subire pro tuenda sententia, quae ad Fidem divi- nam minime spectet, Et num liceat animo tam firmo adhaerere Opinioni de Revelatione alicujus rei, ut non secus ac pro certo Revelatis a Deo animam ponere liceat*. Ad haec frustra *Consuetudinis* nomen heic Parthenotimus usurpat, quum ejus Votis originem Novitas ipsa arguere possit, videlicet ab Anno duntaxat 1624. deducta. Accedit, quod semper inquirendum restat, an rite institui a paucis potuerit Votum de re tam gravi, qualis est hominum Vita, quum reliqua Catholicorum gens pro honore Virginis ferventissima nihil tale audeat. *Ex singulis Ecclesiis, quae pia, quae religiosa, quae recta sunt, elige*; subdebat in eodem loco insignis Pontifex Gregorius Magnus; & Augustino docente, Epistola ad Januarium, in Discipline ritibus illud tantummodo, *quod neque contra Fidem, neque contra bonos mores injungitur, indifferenter est habendum*: quod & alia a Gratiano collecta in Distinctione supra laudata confirmant. An vero *pium, religiosum, rectum*, & *secundum Fidem* dici possit, praefraße velle *Certum*, quod Ecclesiae Romanae in pervulgatis Decretis *Incertum* adhuc est;

est; & nolle in Dei, Romanorumque Pontificum auctoritate conquiescere (quod Gregorius XV. ut supra vidimus, de Controversia ista scribens, a quocumque Fidei exigebat;) Pias denique Opiniones aequare velle Dogmatis Fidei: nullo negotio docti ac prudentes iudicabunt.

In Praefationis pagina 16. Theologus noster pro se exerit auctoritatem Senecae, scribentis in Epistol. 33. *Ego utar via veteri. Sed si propiorem, planioremque invenero, hanc muniam. Qui ante nos ista moverunt, non domini nostri, sed duces sunt.* Tum addit: *Majores quidem nostri, ut aiebat Seneca, non domini nostri, sed duces sunt. Duces, ait, non hostes. Eorum igitur ductum nec sequi pudeat, nec pigeat deferere. Sequi non pudeat, ubi eos Veritatis semitam dereliquisse minime appareat. Deferere non pigeat, ubi eos a Veritatis tramite aberrasse liquido constabit.* Verum parcat Theologus noster, si dixero, hoc unum satis esse posse, ut ejus ductum quisque saltem suspectum habeat, atque ab ejus Theologia & Libello sibi meuiat. Etepm quandonam Senecae Ethnico Philosopho, & de Philosophicis duntaxat loquenti, tantum auctoritatis accessit, ut Theologorum Christiani nominis norma, & in Theologicis praeceptor noster evaserit? Ad haec nil gratius contingere nostrorum temporum Haereticis possit, quam accipere a viro, eoque Catholico, quae nunc Siculis observanda proponuntur. Nimirum & ipsi reponunt, ut sese auctoritati Traditionis & Sanctorum Patrum subducant, Patres ipsos in numero ducum habendos, quos *sequi non pudeat, nec pigeat deferere; & viam veterem eligendam; sed si propior ac planior inveniatur, hanc munientdam.* Atqui vera Theologia nos docet, Sanctos Patres ita esse duces nostros in explicandis divinis Scripturis, & tradenda doctrina Fidei, ut ab eorum unanimi consensu discedere crimen sit, quum legitimi ii sint Traditionis custodes. Celeberrima est in hanc rem sanctio Tridentini Concilii, Sessione IV. quam supra attuli. Idem quoque tradiderat Trullanum Concilium Can. XIX. Paria itidem Martinus Papa I. in Lateranensi Concilio scribens: *Nil permittere dici noviter a quopiam, quod Sanctorum Patrum traditio minime definivit.* Teme re ergo faciat, qui se non Patrum sectatorem, sed Iudicem constituat; eos sequi paratus, si sibi videantur Veritatis semitam non dereliquisse; deferere, ubi a Veritatis tramite aberrasse illos sibi constet. Quorum vero Theologus noster periculosis hisce documentis Praefationem suam insperferit, pondum liquido sum assequutus. Num ut fidem Patribus adimat, si quando plurimi ex iis Scotisticae sententiae obsta-

obstare reperirentur: quod tamen ipse Parthenotimus pag. 51. negat? At hoc verum-ne sit, an falsum, judicabit aliquando Cathedra Petri. Nunquid ut antiquos Theologos dejiciat, apud quos *Communis* fuit Thomistica de Conceptione sententia? Sed pariter judicabit Apostolica Sedes, an in doctrina Catholicae Religionis praeferendi sint *non Sancti Sanctis, & moderni antiquis Doctoribus*, uti aiebat Cardinalis Cajetanus in 3. S. Thomae, quæst. 27. art. 2. & præcipue si concordet cum præcipuis Ecclesiae Doctoribus Theologi veteres deprehendantur. Num denique ut Voto Sanguinario patrocinium paret, si forte contra ipsum proferatur Antiquorum auctoritas? At nullum novi ejusmodi quaestionis documentum apud veteres; neque enim eis unquam in mentem venit, excogitare homines tam sui ac Prudentiae oblitos, ut pro Opinionibus tuendis vellent animam suam pervicacissime ponere, atque ad id sese Voto obstringere. Primus mihi notus, qui casum hunc ipsum de tutela Immunitatis Marianae praesensit, ut supra vidimus, Alphonsus de Castro (quem postea sequuti sunt Gabriel Vasquez & Theophilus Raynaudus) *Haeresis* damnavit, qui tam firmiter Opinionem Scotisticam tenebat ac doceret, ac si esset *Articulus Fidei, & ita pro illius Opinionis defensione esset mori paratus, sicut faceret pro illis, quæ ad Fidem pertinere noscuntur.*

Quærit Parthenotimus pag. 12. an particula *usque ad Sanguinem* subintelligatur in omnium Votis de tuenda Deiparae Immunitate. Indicat Sanctum Antoninum, Cardinalem de Turrecremata, Gesonium, ac alios, scribentes, in Vitae discrimine eximi voventes a servanda re promissa. Tum Suarii doctrinam producit, docentis, id verum esse, *ubi alia aliunde non colligatur esse mens & voluntas voventis. Et hæc, ut Suarius subdit, etiamsi se extendat ad Vitæ discrimen, rationabilis esse potest & prudens, nedom ubi materia Voti sit opus præceptum, verum etiam ubi sit opus consilii.* Addit Parthenotimus: *Nec mihi dubitandum est, quin plerumque Vitæ discrimen non excludant pia voventes.* Contra mihi nulla dubitatio est, quin qui vovent voce tantum & scriptis tueri Scotisticam sententiam, alieni omnino sint a voluntate obsequandi Sanguine suo Opinionem istam, simulque perdendae Prudentiae, immo & Animæ suæ, pro tutela rei, quam Certam, pendente judicio Ecclesiae, sentiunt se præstare non posse. Eoque magis ab imprudenti hujusmodi sacrificio abhorrebunt; nam ut animadverti supra, licet quidem & laudabile est, Vitæ discrimen subire pro actibus Pietatis, aut alterius Virtutis ad Deum tendentis, sed ea conditione, ut actus illi sint *Virtutis Intrinsecæ,*

secae, non *Opinativae*, Neque sufficit, ut actus ipse referri possit ad Virtutem etiam Intrinsicam. Necesse est etiam, ut pretio suo superet pretium Vitae nostrae. Si secus sit, insipienter, & non sine peccato, Vita profundetur. Ecclesia praecipiens certis diebus Jejunium, aut Abstinentiam a carne, aut interesse incruento Sacrificio, nos certe non obligat ad rem praestandam cum periculo vitae. Immo desiperet, & peccaret, qui praefracte mortem eligeret in necessitate cibi, oblata sibi ad comedendum carne, aut imminente sibi certo interitu, si ad audiendum Sacrum proficisci vellet. Et quis, rogo, e Theologis nisi delirans, auctor homini esset, ut potius exiguum pecuniae sibi reliquae conferat in eleemosynam Sacerdoti celebraturo sacrum, quod vovit; aut in candelis emendis impendat, quas vovit, ante facram quamquam Imaginem accendendis, quam extremo Vitae periculo ob defectum cibi empto pane succurrat? Et ratio est, quia a Dei & Naturae legibus sub gravi praecepto obligamur ad servandum pretiosum Vitae Bonum, nisi forte agatur de illa impendenda pro Bono praestantiori, aut Malum instet majus, quam mors corporis nostri. Igitur interdum modici sunt pretii, quae vovemus, quia neque in multam utilitatem nostram, neque in magnum Dei honorem cedere possunt; & tunc in arbitrio nostro minime positum est ita earum rerum pretium augere, ut Vita prudenter pro iis detur, & dispensatos nos jure putemus ab obligatione tuendae Vitae. Deus tantum & Ecclesia indicare certo nobis possunt, quando laudabile sit mortem sponte eligere; ac proinde non careat Peccato, qui pro levibus rebus, neque a Deo, neque ab Ecclesia imperatis, occumbere velit. Ideo consequens est, doctrinam Suarii intra honestos limites esse coercendam; hoc est, tunc revera cum Prudentia & Pietate consentire etiam Vitae discrimen, quum agitur de Bono Certo ac praestantiori; non autem quum de levibus praecepti aut consilii operibus, secluso semper Scandalo & contemtu Ecclesiae. Utrum vero Scotisticae sententiae tutela sit res tanti momenti, quae in summam gloriam Dei, & Virginis, aut utilitatem nostram cedat, facile patebit, si confideremus, nondum pertinere sententiam ipsam ad Fidei doctrinam; atque ab Ecclesia liberum fieri cuicumque etiam contrariae adherere sententiae; & fieri insuper aliquando posse, ut in ipsa opposita sententia Veritas deprehendatur. Quis ergo, nisi temere ac imprudenter trucidandum se finat, pro asserenda ejusmodi adhuc incerta sententia? Et nimium quidem differt Votum propugnandae verbis tantum & calamo saepe laudatae Immunitatis a Voto etiam tolerandae mortis pro eju-

eiusdem tutela. Distinguebat Sanctus Augustinus Theologicas Opiniones a Dogmatis Fidei Libr. de Peccat. Original. Contr. Pelag. Cap. XXIII. scribens: *Longe aliter se habent Quaestiones istae, quas esse praeter Fidem arbitrat, quam sunt illae, in quibus salva Fide, qua Christiani sumus, aut ignoratur quid Verum sit, & sententia definitiva suspenditur; aut aliter quam est, humana & infirma suspitione conicitur &c. Quis enim non sentiat, in his atque huiusmodi variis & innumerabilibus Quaestionibus, sive ad obscurissima opera Dei, sive ad Scripturarum abditissimas tenebras pertinentibus, quas certo aliquo genere completti ac definire difficile est, & multa ignorari, salva Christiana Fide, & alicubi errari sine aliquo Haeretici Dogmatis crimine? Paria habet Ephraem Antiochenus apud Photium Cod. 228. Necesse profecto est, ut alterutra de duabus sententiis de Conceptione Virginis falsa sit: attamen quia neutra ad Christianam Fidem spectat, nobis licet eam amplecti, quae probabilior videatur; & quamvis fortasse in illa eligenda ac propugnanda erremus, nullum doctrinae Catholicae detrimentum infertur. Verum ubi Vitam quoque nostram, insigne scilicet Bonum, cuius usum nobis divina liberalitas concessit, erogare velimus pro tutela alterutrius ex hisce sententiis; jam certo contra Christianae Fidei doctrinam erramus, quando mori eligimus pro sententia, cui certi non sumus an subsit Error. Christianum vero Dogma instat, non esse prodigendam Vitam pro sententiis, quas Ecclesia probe illarum conscia, nondum ab Erroris immunes pronuntiavit, inmo aliquando etiam improbare possit.*

Ut ostendat Theologus noster, posse aliquid credi a Deo Revelatum in Scripturis, etiamsi nondum publice cunctis proposita fuerit Revelatio, Cardinalem de Lugo laudat pag. 23. in haec verba scribentem Disput. 20. de Fide num. 59. *Potest contingere, quod aliquibus sit de Fide aliquod in Scriptura contentum, quibus manifestum est, id in Scriptura contineri, quod tamen omnibus non sit de Fide; quia non ita clare Scriptura loquitur, ut id possit ab omnibus animadverti. Vera est sententia Cardinalis, in eo tamen casu, quo Ecclesia nondum agnoverit, an eadem Revelatio subsistat, nihilque de ea protulerit. Disputatur autem a tot Seculis, Revelatum-ne a Deo fuerit Mystrium Conceptionis Marianae. Ecclesia non semel interposito iudicio suo nos docuit, nondum constare, num Revelatum fuerit ejusmodi privilegium, an potius oppositum. In tali rerum statu audacia in illo non desideretur, qui auditoribus suis venditet, Fide divina posse credi Immunitatem Mariae, idque tam Certo, ut prudenter pretio-*

Tom. V.

V

sum

sum Vitae depositum pro hac Persuasionem tuenda discrimini oblatum credatur, non secus atque fiat pro certissime Revelatis a Deo. Dum *Probabilem* & *Piam* sententiam tuam putes, annuo & consentio, quia ex Ecclesiae decretis id merito deducis; quanquam & contrarium sentientes ex iis ipsis deducant *Probabilem* quoque ac *Piam* non definire esse Opinione suam. Ubi vero Certitudinem Fidei divinae adstruere vis Scotisticae sententiae, repetit Lamindus: *Cuinam certum id videtur? Creaturae fallacissimae*: additque; immo & in casu nostro semere iudicansi, quum suum iudicio Ecclesiae anteponat, Parthenotimus autem reponenti: *Nec Theologorum placita sola admiratione expoluntur*, respondet, tum maxime fallax esse privati hominis iudicium, quum se putat plus scire quam Ecclesia; & quod Incertum huic est, tanta is pervicacia vult Certum, ut Sanguinem pro ejusmodi Persuasionis tutela dare non dubitet. Et profecto, consideratis Ecclesiae decretis, nemo non agnoscat, fundamento nullo niti, quae Parthenotimus addit pag. 28. scribens: *Non est igitur adeo clarum, ut sibiimet Pritanus blanditur, quod pia Sententia sit Opinio, & mera Opinio, cui subesse possit falsum*. Ex quo oppositam amplecti Thomistarum sententiam Fidelibus Ecclesia liberum facit, ac pro ejus Veritate definitivum decretum pronuntiare aliquando possit (quod ne noster quidem Theologus negare est ausus): leges omnes Logicae Scotisticam inter Opiniones aduc enumerandam decernunt. Frustra quoque is pag. 33. contendit dari Certitudinem, quae a Divina Fide non oriatur, & Bagotium laudat, qui in *Apologetico Fidei per plures disputationes contra Academicos aliam firmat a Certitudine Fidei Certitudinem*. Nihil opus erat Bagotii auctoritate ad confirmandam rem meridiano Sole clariorem, & quam universa Philosophorum ac Theologorum schola, immo & vulgus novit, nempe innumera fuisse, ac esse in rerum natura sine divinae Revelationis praesidio, nobis notissima, Certissima, Evidentia. Non vagetur quaesio Theologus noster: consistat in quaestione nostra. Disputatur heic, an Certus quispiam esse possit, Revelatam fuisse a Deo Immunitatem Virginis (hoc autem ex iis est, quae nisi ipse Deus revelarit, rescire nobis non licet) non solum ulla voce Ecclesiae agnoscentis hanc Revelationem, sed etiam cum dispersa voce Ecclesiae nos docentis, adhuc abditum esse in thesauris Dei hujusmodi mysterium. Quid ultra quaerimus? Ecclesia ita nos erudiente, nonnisi Prudentiae monita pessumdet, qui ita pertinaciter Scotisticam sententiam sibi Certam persuadere velit, ut quae de articulo Fidei ageretur, tormenta ac mortem pro ea asserenda ac tuenda eligere statuat.

C A P U T XX.

Thomistica de Conceptione Sententia ne ipsa quidem Certa. Potest & ipsa esse honorifica Virgini. Gersonii locus a Parthenotismo adductus, contra ipsum militans. An erret iudicium putantis, licere mortem oppetere pro tutela Sacrosanctae Sententiae. An ab Haeresi excusari possit, negans Christum Filium naturalem Dei. An ante Ecclesiae definitionem credere quaedam liceat spectare ad Fidem Divinam.

PARTHENOTIMI verba sunt pag. 40. *Sis ergo utraque Sententia (quod mordicus nego) eodem modo Probabilis; at Immunis sententia Virgini perhonorifica, ac proinde Deo grata, & ejus defensio Deo Potest promitti: secus autem sententia maculae, ejusque propugnatio.* Pro more quorundam, Amorem sui tantummodo consulentium, sua duntaxat respicit, sua laudat Theologus Siculus. At adversariorum quoque mens & rationes aequo animo sunt perpendendae, ac sincere ferendum de iis iudicium. Contendunt Thomistae, e Scripturae locis nonnullis, iisque non mysticis, sed literalibus, deduci, Virgini minime collatam fuisse Praeservationis Originalis praerogativam. Addunt, plerosque Sanctos Patres, non secus atque ipsi sentiunt, interpretatos fuisse illa sacrarum Literarum loca. Denique sententiam suam *Communem* fuisse usque ad initium Seculi XIV. scilicet usque ad tempora Joannis Duns cognomento Scoti. An ii pro Veritate militent, ego homuncio ignoro; atque ajo, pendente iudicio Ecclesiae, *Probabilem* esse utramque de Conceptione sententiam, neutram vero *Certam* posse merito appellari. At fingamus tantisper, solidissimis fundamentis niti Thomisticam Sententiam. In hac suppositione tria necessario consequuntur, scilicet Thomistarum sententiam non solum gratam, sed unice esse posse gratam Deo Veritatis parenti. Secundo, eam tantum, non vero Scotisticam, posse placere Virgini, cui nunquam placuit, nunquam placeat, nisi Veritas; & quae falsas laudes averfatur, idque duntaxat cupit de se affirmari, quod cum Voluntate Dei consonum fuit, est, & erit. Tertio, Ecclesiam, custodem divinitus constitutam Veritatis,

posse ac debere, in hoc supposito, uni adhaerere Thomisticae Sententiae, & hanc unam gratam habere. Quare in ista suppositione evanescere statim vides metum, ne honorificentia Virginis minuatur aut laedatur, quum honorificum Deiparae illud tantummodo sit, quod Deus voluit illi elargiri (& quidem innumera eidem dona certissima est elargitus) non quod nostra Devotio importune, & praeter, aut contra mentem Ecclesiae & Dei tribuendum illi censet. Honor profecto Virginis cordi erat tot Sanctis Viris, plisque Theologis, & adhuc cordi est iis, qui aliam a Scotistica tenere, tenentve Sententiam. Et quamquam zelus eorum laudetur ac Pietas, qui Mariam sine labe conceptam tuentur, eorum quoque zelus & Pietas commendanda est, qui vigilant, ne Error ac Falsitas in doctrinam Ecclesiae irrepant. Quod si accidere posset (nunquam autem accidet) rueret Ecclesia tota; quum nemo ignoret, & Ecclesia in uno errare deprehenderetur, frustra postea privilegium Infallibilitatis de ea posse depraedicari. Itaque sophismate laborat memorata nuper Parthenotimi argumentatio. Nam ex quo nos aliquid excogitamus uti honorificum Virgini, non continuo sequitur, illud quoque esse Verum, & certissime gratum Deo, gratamque esse Virgini sine ulla dubitatione ejusdem praerogativae tutelam. Gratum quippe illud unum Deo est, quod ipse voluit, non quod nos cupimus ipsum voluisse. Fallaci, inquam, argumentatione dicimus: Istud in honorem Virginis cedit: ergo illud voluit ac fecit Deus: ac proinde hoc affirmare ac tueri, gratum quoque Deo est. Contraria nimirum ratione argumentatio efformanda est. Deo & Virgini & Ecclesiae certo placere tantummodo potest, quod verum est, & Deus in sacris Literis, aut in Traditione Patrum revelavit a se factum, non quod devotio nostra excogitat & exoptat. Donec vero ab Ecclesia decernatur, quid re ipsa de hoc Mysterio Deus revelarit, utraque sententia inter Opinionis fines contineatur necesse est; neque ea Certitudine suam Deo gratam arbitrari quisquam potest, ut certo affirmare fas ei sit, alteram esse ipsi Deo ingratam. Proinde id unum superest, laudabile quidem esse tueri voce & calamo Scotisticam Sententiam. Laudabile quoque opinari, gratam Deo esse illius tutelam voce & calamo: Verisimile quippe & Probabile, quando Certam Veritatem divinarum humanarumque rerum assequi non possumus, tenere ac propugnare decet. Porro Vitae prodigus foret, atque peccaret, qui pro ejusdem sententiae tutela Sanguinem funderet, quum nefas sit, ipse Parthenotimo, ceterisque Theologis latentibus, pro Opinionis alicujus, quantumvis Piissimae, tutela impende-

pendere Vitam, de cuius Certissimo pretio, ejusque custodiendae praecepto, nemini dubitatio occurrere potest. Vetuit etiam Apostolica Sedes, ne duarum *De gratia Dei & Libero Arbitrio*, sententiarum patroni, alter alterius Opinionem Haereticis, impietatis, aut Erroris insimularet. Itidem vetuit Anno 1667. ne disputantes *de vi Attritionis ex metu Gebennae* in Sacramento Poenitentiae, alter alterius sententiam aliqua Theologica censura percelleret. Temere sane ac imprudenter ageret, qui pro defendenda alterutra ex hisce sententiis mortem eligeret, ea persuasione seductus, suam esse Certam, atque a Deo Revelatam in sacris Literis, aut in Traditione Patrum. Ex quo ad Ecclesiae Tribunal utraque sententia delata est, decretumque fuit, abstinendum interim esse ab alterutrius censura, laudabiliter quidem suam quisque tueatur oratione & scriptis, uti Probabilem, aut Probabiliorem altera; at non sine gravi crimine pro ea, videlicet pro Opinione, securibus collum praebeat. Quod si scandalis & jurgis, ob ejusmodi controversias oborientibus, praecidendum cursum Prudentia Ecclesiae censeret, indistincto alteri ex iis silentio, sed simul sibi reservato judicio de Veritate aut Falsitate ejusmodi sententiarum, nemo nisi somnians contenderet, ereptam uni Probabilitatem, additam vero alteri Certitudinem; diserta enim Ecclesiae protestatio Persuasioni huic, immo praesumptioni, obsisteret.

Dixerat Lamindus: *At enim subijcitur, quamquam subesse error huic Opinioni, & falli intellectus possit; nunquam tamen heic errare Affectus dicitur &c.* Tum ostendit, hunc ipsum Affectum errare posse, neque expectandum esse praemium ac laudem e zelo sine scientia. Ad ista Parthenotimus pag. 53. respondet: *Nedum pie vorventes, sed Theologos Voti pietatem non improbant, Lamindus carpit, aequè nobis aperiens verae Theologiae, ac verae Pietatis dogmata.* Ita auditoribus suis per Ironiam aut illudit, aut imponit, qui se sacrae Theologiae Professore inscribit. Evidens est, Lamindum pugnare heic, & in reliquis suis de controversia ista verbis & argumentis non contra omnes Voventes tutelam Scotisticae sententiae (*calamo enim & rationibus id praestare, laudem ab ipso meruit*) sed unice contra paucos Voti Sanguinarij patronos. Si apertis oculis aliam Lamindo mentem Siculus Professor tribuit, videat ipse, quo nomine sit dignus; si caligantibus, ineptum ad haec dijudicanda incaute se prodat. Subdit ille: *Fallitur Lamindus, si credit, quod unus erret Affectus; nam neque errat Judicium, quo Pium esse asseritur, Immaculatam Virginem colere, & ob Immaculatae Virginis cultum mortem oppetere.* Ut hoc ipsum

ipsum evincat, en quo argumento utatur. *Omissio hic*, ait, *enamine*, utrum reapse falsitati obnoxium sit iudicium, quo Immaculata assertitur Conceptio: disputat Gerson, quatenus Veritates credendae sint de necessitate salutis, & inter alia haec habet: „Sicut dicit Aristoteles, nihil refert, Falsa Probabiliora esse quibusdam Veris: ita nihil refert, quaedam Falsa Pie credi. Non quod ea ratione, qua Falsa sunt, vel si sciuntur esse Falsa, credi possunt (procul hoc a Piestate Fidelium) sed cadit existimatio, seu Pia Credulitas non super Veritate vel Falsitate; sed tantummodo super Apparentia, vel Probabilitate. Ex hoc non est periculosum vel Falsum, quia constat de Apparentia vel Probabilitate; dum Falsitas, vel Veritas ignota est. „Lectorem rogo, ut non incuriose perpendat, an Parthenotimus ea reapse proferat, quibus aperte juguletur causa, quam protegit. Ut ostendat, non errare iudicium, quo Pium esse assertitur, Immaculatam Virginem colere, & ob Immaculae Virginis Cultum mortem appetere, ita argumentatur: Nihil refert, Falsa Probabiliora esse quibusdam Veris. Nihil refert, quaedam Falsa Pie credi, & reliqua e Gersonio. Egregia, inquam, tela conquisivit Siculus Professor, sed quae in unum ipsum recidunt, neque ego aptiora instruere potuissim. Haec enim validissima quidem sunt ad ostendendum, laudabili studio posse nos tueri voce, calamo, & Festo, immaculatam Virginis Conceptionem; at simul evincunt, nisi temere Vitam impendi posse pro eadem tuenda. Primum legitime prudenterque praestamus; quia etsi Error huic Opinioni subesse possit, dum tamen Apparentiam Veritatis, vel Probabilitatem in ea deprehendimus; & nobis ignotum est (neque innotescere potest, pendente iudicio Ecclesiae) an Falsum in ea lateat: Prudenti homini hoc satis est, ut eidem sententiae adhaereat, & secundum illam cultum suum erga Virginem regat. Verum quippe est, non Falsum, constare nobis de ista Probabilitate, seu Apparentia Veritatis; neque id periculosum est, quia per hoc non creduntur Certo Vera, quae Incerta adhuc sunt, & Falsitatis metum non excludunt. Deinde ista Credulitas Probabilis prudenter fundata est; eamque habere ac tueri voce & scriptis, nihil incommodi aut periculi adfert doctrinae, aut disciplinae Ecclesiae, uti neque Reipublicae regimini & quieti: quandoquidem pia ista credulitas non cadit super Veritate vel Falsitate obiecti: ipsaque Falsa pie credere, nullum piaculum est, dum Probabilia sint, & apparentiam praeferant Veritatis, & dum nulla sufficiens ratio occurrat, cur Falsa nobis credenda sint. Quum ergo in sententiam Scotisticam confluant motiva robusta,

Proba-

Probabilitatis, & Veritatis apparentia in ipsa minime desideretur: propterea centies & ego, laudavi uti Pium & Prudens, amplecti, & voce scriptivse tueri Immaculatam Conceptionem. Neque ullus sapiens vitio nobis vertit, quod Intellectus noster in obscuris adhaereat Probabilitati & Verisimilitudini, quotiescumque Certitudo Veri aciem mentis nostrae fugit. Itaque concordēs in hoc pergitur Theologus Siculus & ego. Quum vero is addit: *Neque errat Judicium, quo Pium asseritur ob Immaculae Virginis cultum mortem oppetere*, hoc utique praeter mentem Gersonii adtexit, & contra rectae Rationis leges omnino pugnat. Namque id unum Gersonius scite statuit, licere nobis Pia Credulitate ferri in assensum Opinionis, quae Probabilitatem & Apparentiam Veritatis secum adducat: nunquam vero somniavit, licere etiam pro ejusdem Opinionis tutela jugulum carnicifci offerre. Nemo enim e Theologis, Parthenotimo ipso satente, unquam docuit, fas esse pro Opinionibus tuendis vitae discrimen incurrere.

Certe sunt ipsius Siculi verba pag. 15. *Theologi numquam dixerunt, licitum esse mori pro Opinione*, etiam si Pia. Idem repetit infra: *Nullus Theologorum est, quod ego sciam, qui asserat, posse quemquam honeste mori ob causam Immaculae Conceptionis, si haec tantum sit Opinio, & pro mera ista Opinione Sanguinem profunderē velit*. Ex his agnoscimus enormem Parthenotimi nostri contradictionem. Uno in loco agnoscit & ipse, nefas esse pro Opinione mori. Tum in altero contendit, Gersonii auctoritate abutens, fas esse pro Immaculata Conceptione, quamvis eam duntaxat Opinionem Piam respiciamus, Sanguine nostro pugnare. Et ne quis dubitet, hanc ejus mentem esse, pag. 55. docet, etiam si Sanguinario Voto sese adstringentes Opinarentur, *Virginem ab Originali labe fuisse praeservatam*, attamen dum *Falsitas hujus Opinionis ignota est, & Apparentia pro Veritate stat, iidem putarent licitum & honestum illam defendere Sanguine suo*. Atqui Gersonius tantummodo tradit, prudenter assensum praebere Opinionibus, Probabilitatem & Apparentiam Veritatis praefereantibus, & nihil referre, si quaedam Falsa Pie credantur Vera. Quis vero nisi imprudens, seu potius Fanaticus, dicat: *Nihil refert mori pro Veritate aut pro Falsitate*: Ad primum sufficit Probabilitas & apparentia Veritatis. Ad alterum necessaria est Certitudo Veritatis, non minor atque est Certitudo Vitae nostrae, & Certitudo praecepti divini & naturalis de illa servanda. In illo non errat judicium, quia Verum est, & non Falsum, Opinionem illam esse Probabilem & Piam, hoc est haberi in ea *appareantiam Veritatis*, ita ut non immerito Opine-

pinemur, spectare ipsam ad cultum Dei, sive ad Honorem Virginis, aut Sanctorum. At in isto fallibile est iudicium, quia non amplius uti *Probabilis*, sed uti *Certa* sumeretur sententia illa, & supponeretur ut Certum atque indubitatum, spectare ad Cultum & Honorem Dei & Virginis, quod tamen Probabiliter tantum spectat, & metum involvit, ne Falsum aliquando deprehendatur. Proinde sapientibus considerandum relinquam, an in Ecclesia Dei toleranda diutius sit doctrina, & quidem a Theologo disseminata, quae nullam distinctionem statuit inter *Pie Opinari* de aliqua re & *Mori* pro tutela istius Opinionis; & quae non solum laudem, sed & *Martyrii* gloriam pollicetur in mortem ruentibus, dum tueantur aliquid, quod *Pie* idest *Probabiliter*, & *secundum apparentiam Veritatis* credant. Si ita sentire, ac docere fas esset, heu quot miseris aut stultis via sterneretur, ut imprudenter ac temere Vitam darent pro Falsis rebus atque sententiis, quas Probabiles reputant! Immo docerentur Fideles pro duabus etiam oppositis sententiis Sanguinem fundere: quod patens absurdum est. Exempli enim gratia quum Thomistae *Pie* credant, sententiam suam de Conceptione Virginis inniti sacris Litteris, ac Traditione Patrum, sibi que persuadeant, *apparentiam Veritatis*, sive *Probabilitatem* in ea minime desiderari; quotiescunque locus foret Parthenotimanae doctrinae, non erraret illorum Iudicium, asserendo Pium esse pro illa Opinatione occumbere. Verum quis hoc ferat? Non minus Thomistae quam Scotistae, temere animam suam darent, quia tam illi quam isti pro re Incerta Sanguinem suum commutarent, atque alterutra certe pars pro Errore & Falsitate postremo fato succumberet. Quod si Parthenotimus pag. 60. intolerandum idem Dogma repetit scribens: *Etiamsi Certa non esset* (quod idem est ac dicere, etsi mera *Opinio* foret) *Deiparae Immunitas ab omni labe, nihilominus Immunitatis iuris, usque ad Virginis laudem conducent, spectat ad Prudentiam*: Uti que (respondebit mecum quicumque sapit) ad Prudentiam spectat, eam calamo ac voce tueri, uti *Probabilem*, quia sufficientia motiva *Probabilitatis* pro ea militant, ut prudenter opinemur, non vero ut Certo credamus, eam sententiam ad laudem Virginis conducere; quando certi non sumus, an Deus ita voluerit, & sitne tribuenda an neganda ejusmodi laus Virgini Sanctissimae. At Sanguine & Vita velle tueri eandem tantummodo Probabilem sententiam, ad Imprudentiam & transgressionem divinae Legis spectat. Ubi *Certa* non sit Scoti sententia (uti nunc supponit Parthenotimus) *Opinio* dicatur oportet, simulque *Opinativus* sit *Cultus*, *Honor*, *Laus*, *Pietas*, & si qua sunt alia

alia praedicata eidem Opinioni inhaerentia, aut inde manantia, quemadmodum & in ceteris Opinionibus Piis accidit, quae in cultum & honorem Deiparae & Sanctorum collineant, neque propterea desinunt esse Opinioniones. Repetat nunc Lector confessionem Parthenotimi ipsius agnolcentis, *nefas esse pro Opinionibus tuendis mori*, & quid ex jam dictis consequatur, demum intelligat.

Dixerat Lamindus: *At mihi certissima est hujusmodi opinio, aliquis dicet. Cui? Homini, nempe Creaturae fallacissimae. Num rogo, certum est aliquid, quia id tibi Certum videtur?* Atque huc faciunt Apostoli verba Roman. III. vers. 4. *Est autem Deus Verax, omnis autem Homo Mendax.* Respondet Parthenotimus pag. 20. *Creatura; quae est per Theologos fallacissima, per eosdem Certitudinem assequi potest. Haec est eorum assertio, nec sola Lamindi interrogatione labefactatur. Homo suadet sibi, Certam esse Immaculatae Virginis Assertionem, quia id insinuant Patres, docent Theologi, feri communis sensus &c.* Nihil est, quod ego ultra laborem in ostendendo, quantum a Veritate absit, quod heic summa confidentia Sículus Theologus clientibus suis edisserit. Jam supra evicimus. Scotisticam Sententiam Piam ac Probabilem ab omnibus iuste haberi; Certam vero esse falso dici, si de Certitudine Objectiva, & a parte rei agatur. Fateri quippe cogimur, ex quo a sententia ista non abest *Erroris formido*, ipsam intra Opinionis septa contineri. Hanc formidinem, pendente iudicio Ecclesiae, tolli non posse, fateatur quisque necesse est; neque negavit Parthenotimus ipse, scribens pag. 35. *definiente controversiam hanc Apostolica Sede deprehendi posse Veritatem in sententia Piae contraria.* Ergo falsum heic nobis obtruditur; & quanquam Certitudinem sibi Sículus in hac sententia fingere possit, semper fallibile dicendum erit illius Iudicium, sive Persuasio, quia infallibilis Cathedra Petri potest, non in ista, sed in opposita sententia deprehendere Veritatem. Ergo stabilis est Lamindi interrogatio atque responsio; & donec erumpat Ecclesiae definitivum decretum, nullus Theologorum, heic a fallacia immunem se praestare potest. Falsum denique est, nos *Certitudinem* hanc assequi posse per Theologos. Nam ut omittam, quod Theophilus Raynaudus, carum Parthenotimo caput, & a me quoque maximi factum, tradit Partit. I. Erotem. XIX. de malis ac bonis Libris, num. 471. nempe *communem Doctorum Scholasticorum sententiam non continere irrefragabile argumentum; quia Certitudo infallibilis, qualis ad statuendum pro potestate de re Fidei enigiur, nisi debeat promissione aliqua divina, quam pro Doctoribus universis nusquam*

reperimus. Ut etiam omittam, Theologos veteres fere omnes fuisse; & non paucos etiam e recentibus esse in contraria sententia: illae ipsae Academiae, & ceteri, qui Scotisticam tuentur, atque hujusmodi argumentum rite ac sincere versantur, si interrogentur, quae sit eorum mens (exceptis tantum illis, quibus factionis suae amor nimius, aut sine justo criterio efformatum judicium tenebras offundit) continuo respondebunt, se *Piam* quidem & *Probabilem*, & si mavis *Probabilissimam*, existimare Scoti sententiam; non vero *Certam*, *Certitudine* saltem *Objectiva*, quae formidine quacumque Erroris careat. Quid Academiae voveant, jam vidimus supra Cap. 19. Quapropter Certitudinem hanc potest quidem Parthenotimus iactare in coetu suorum clientum, edicendo, eam *insinuari a Patribus, doceri a Theologis, ferri a communi sensu*: at nos qua facilitate id ab eo affirmatur, eadem negabimus. Judicium firmum tunc tantum habituri erimus, quum Romanus Pontifex reservatam sibi sententiam pronuntiabit. Interea pro *Certam esse Immaculatae Conceptionis Assertionem* Parthenotimus rogandus est ut scribat *Probabilem*: & neminem a se dissentientem habebit.

Magnopere tamen vereor, ut id impetremus ab homine, qui post susceptum Sanguinarii Voti patrocinium non sentire nequit, corruere ejusmodi Voti fundamenta, si pro sententia *duntaxat Probabili* concipiatur. Immo ipsum videas pag. 22. caute insinuare discipulis suis, posse secundum quosdam Theologos Certum esse homini, aliquid spectare ad Fidei dogmata, quanquam Revelationem hanc Ecclesia non proposuerit, quoties nempe *ille homo sibi persuadet, id facile a Deo Revelatum*. Sed millies repetendum est, *Persuasionem* hominis ferri posse tam in Verum quam in Falsum; & ubi *Persuasioni* tantum ponderis tribueremus, Haereticis *Persuasionem* abundantibus, sed *Veritate* destitutis, grande patrocinium a nobis praeberetur. Interdum quidem proderit Persuasio ista, dum videlicet conjuncta sit cum *Ignorantia Invincibili* ad excusandum, immo & laudandum hominem mori volentem pro tuendo, quod ipse invincibiliter sibi persuadet revelatum fuisse a Deo. Ubi vero cum *Persuasionem* jungatur *Ignorantia* duntaxat *Vincibilis*, desipiat miser ille, & peccet, dum temerario & imprudenti affectu ruit in mortem. Jam diximus, *Ignorantiam Invincibilem* admitti non posse in viris doctis, si forte sibi persuadeant, Certo revelatam fuisse a Deo Praeservationem Virginis, quum neminem e doctis latere possit, quid hac de re sentiat Ecclesia Romana, omnium Magistra. Ei profecto non ignota quaestio est: attamen ipsa

rem

rem uti Incertam adhuc respicit, quum alterutri ex oppositis sententiis adhaerere liberum nobis reliquerit. Ceterum dissimulanda non sunt, quae Parthenotimus hanc in rem pag. 23. adjicit, inquit: *Adducis Granadus illius exemplum, qui censeret, posse divina Fide credi, quod Christus sit Filius Naturalis Dei; nec inde inferre licet, quod sit Haereticus, qui illud negaret.* Sed animadvertant Siculi, quo eos ducat eruditio Theologica Magistri sui. Sub finem Seculi a Christo nato Octavi in Hispania Felix Orgellitanus Episcopus, & Elipandus Archiepiscopus Toletanus tradidere, Christum non *Naturalem*, sed *Adoptivum Dei Filium* esse. Doctrinam hanc Haereticam pronuntiarunt in Foro-Julienſi Concilio Anno 791. complures Episcopi; tum in Francofordienſi plenario Concilio Anno 794. Episcopi Italiae, Germaniae, & Galliae, assistantibus Pontificis Legatis; eamque praeterea damnavit Hadrianus tunc Romanus Pontifex in Epistola ad Hispanos. Alcuinus etiam Lib. I. adversus Elipandum testatur, perverſum idem Dogma confixum fuisse in Concilio Ratisponenſi Anno 792. eundemque Hadrianum anathemata in ipsum protulisse. Ad haec Anno 799. Leo III. Papa in Synodo Romana hanc Haeresim proſcripſit. Eodemque Anno idem Felix Orgellitanus publicam edidit Confessionem Fidei, in qua agnovit, *Dominum nostrum Jesum Christum in utraque Natura, Deitatis videlicet & Humanitatis, Proprium ac Verum Dei Filium esse.* Vide Labbeum & Aguirrium in Collect. Concil. & Alcuini Opera. Denique Patrum plerique oppositam docuere sententiam, quibus liceat mihi adjungere Marium Victorium Rhetorem Urbis Romae Anno Christi 362. in Epistola ad Candidum Arrianum, edita a Mabillonio inter Analeſta. *Deus, inquit, caritate praedestinavit nos in Adoptionem per Christum. Numquid & Christum per Adoptionem Filium Deus habes? NULLUS AUSUS EST DICERE; fortasse nec tu.* En quam mature Felicis Orgellitani doctrina improbata fuerit in Ecclesia Dei. Quod ineunte Seculo XIV. Scotus, Durandus, & Bassolis eandem Opinionem renovarint, excusandi sunt. Non enim eis perspecta erant Acta Conciliorum illorum, neque Epistola Hadriani, quorum editionem Surio debemus; neque alia Eruditionis Ecclesiasticae monumenta, quae nunc abundant. At postquam postremis hisce temporibus tanta lux facta est Quaestioni huic, laboraret necesse est non levi ignorantia Theologiae Dogmaticae, qui placido calamo haec in medium proferret, & praesertim nulla facta distinctione duarum in Christo Naturarum. Aut si haec minime ignorat, videat ille, an culpam depellere a se possit, quod paucos Theologos

Scholasticos recentiores, pro suae gentis honore omnem lapidem moventes, tanti aestimet, ut eorum auctoritate fretus arbitretur, non amplius temerariam atque Haereticam propositionem, quam Summi Pontifices, & plenarium Occidentalis Ecclesiae Concilium ab ipso Papa probatum damnavit. Hisce interea utitur Parthenotimus noster Auctoribus, qui neglecta aut contempta Sanctorum Patrum doctrina, in cerebro suo quaerunt, atque invenisse se putant, quid Fidelibus credendum sit, aut non credendum. Religiosior certe ac prudentior his Carolus, jure cognomento Magnus, qui concors cum eodem Hadriano I. & Patribus Concilii Francofordienfis, de hac ipsa re scribebat ad Hispanos. *Me Apostolicae Sedi, ajebat ille, & Antiquis ab initio Ecclesiae, & Catholicis Traditionibus tota mentis intentione, tota cordis alacritate conjungo. Quidquid in illorum legitur Libris, qui divino Spiritu afflati, toti Orbi a Deo Christo dati sunt Doctores, indubitanter teneo: hoc ad salutem animae meae sufficere credens, quod sacratissima Evangelicae veritatis pandit Historia; quod Apostolica in suis Epistolis confirmat Auctoritas; quod eximii sacrae Scripturae Tractatores, & praecipui Christianae Fidei Doctores, ad perpetuam posteris reliquerunt memoriam.*

Parthenotimus noster interea perpendat, an forte ex iis sit, qui Patrum auctoritati praeferre non dubitant recentiorum Theologorum meditata. Verum ille his dimissis, contendere pergit, posse divina Fide, additum haecenus credi Conceptionis Virgineae Mysterium. Et sane haec scripserat Pritanius: *Quamquam summe Pia sis Persuasio illa, qua Beatissimam Christi parentem sine Labe Conceptam putas, nihil aliud tamen est, quam Opinio humana Errori obnoxia, dum Romana Sedes ejusmodi Sententiam antiqua Traditione, sive Revelatione divina sufficienter nisi statuat. Insurgit heic Theologus Panormitanus, & pag. 32. Minus recta, ait, minus digna Theologo ejusmodi argumentatio. Fac, te vinisse, antequam Ecclesiastici Liber declararetur ab Ecclesia Canonicus. Fac, te per id tempus hoc judicium concepisse: Ecclesiastici Liber Canonicus est. Num ideo id judicium erat re ipsa Errori obnoxium? Absit. Verum erat; Certum re ipsa erat, & divinae Revelationi re ipsa conforme. Vides nunc, arbiutor, quam utilis Theologia Scholastica sit, ne in hujusmodi propositiones impingas, quales Lamindus heic profert. Utilis procul dubio Theologia Scholastica est, immo necessaria Ecclesiae; atque auctor & ego sum omnibus, ut ei dent operam; sed nequaquam Logicae, qua Parthenotimus utitur; haec enim facile in paralogsismos addiscentem conjiciet. Primo,*

exem-

exemplum *Ecclesiastici* si recte metiare, deprehendes, Traditionem explicitam praecessisse, antequam Ecclesia Librum inter Canonicos retulerit: quod nondum Immunitatis Marianaë patroni ostenderunt suae adesse sententiae, persuadentibus immo sibi contrariae patronis, Sanctos Patres, & Theologos antiquos pro sua explicite stare. Secundo, si dubitatum fuisset ante iudicium Ecclesiae de divina origine Ecclesiastici, ne tunc quidem *Objectiva Certitudine* Certum fuisset privati hominis iudicium de illius authenticitate, sed quidem *Certitudine Subiectiva*, & *Persuasionis*, quae formidinem Erroris excludere non potuisset, donec dubitationem & formidinem suo infallibili iudicio sustulisset Ecclesia. Plurima nunc incerta sunt, & disputantur in Scholis. Si unam ex hisce Quaestionibus Ecclesia post centum annos dirimeret, ac statueret, spectare ad Fidem, puta, *Scientiam Mediam*, aut necessitatem alicujus actus *Dilectionis Dei in Administratione Sacramentali*: peto ego a Parthenotimo; an Certum Certitudine Intrinseca, Formali, & Objectiva nunc esset illorum sententia, quae post centum annos relata in censum Dogmatum ab Ecclesia contrariae praeferretur? Si negat, habet ille, unde sibi respondeat. Sin affirmat: nolo ego tempus ultra terere in ejus dictis refutandis. Tertio, quam incongruum sit exemplum hoc loco productum, disparitas inter nostram atque illam rem evincit. Nunquam Ecclesia media stetit inter disputantes de authenticitate Libri *Ecclesiastici*, neque agnovit, Eas esse utriusque oppositae sententiae rationes, ut neutram damnari interdixit. At in casu nostro Apostolica Sedes, conscia a tot Seculis disputationum de Immaculata Conceptione, rationumque hinc inde productarum, nihil aliud haecenus decrevit, quod est ad Veritatem sententiarum, nisi ut nemini liceat hanc aut illam censura configere. Itaque perspiciat Lector, quam utilis sit *Theologia Scholastica* Parthenotimo nostro ad solvendos inextricabiles nodos, quibus Votum suum Sanguinarium constringitur. Alio tamen exemplo is pugnam renovat, iniquens pag. 33. dari posse, ac dari *Judicium moraliter Certum, nulloque prudenti formidini obnoxium de credibilitate Fidei Christianae* in Ethnico ad Religionem Christianam sese convertente. Hoc autem iudicium non a Revelatione divina trahit originem, actumque Fidei praecedit, & Certum nihilominus est. Ergo, is infert, iudicium de Veritate Sententiae Scotisticae Certum esse potest, etsi nondum ad Fidem Divinam spectet. At hoc sane minime dignum Theologo iudicium, ut mitissime loquar, quando is cum Veritate, seu Credibilitate Christianae Religionis componit Veritatem seu Credibilitatem

Im-

Immaculatae Conceptionis. Omnium Theologorum concors sententia est, sanctissimam Religionem nostram adeo evidenter esse Credibilem, ac tot in eam confluere motiva gravissima Credibilitatis, ut inexcusabilis sit quicumque Infidelis, qui rite sibi annuntiatam non amplectatur. At quisnam audeat asserere, Evidentiam Credibilitatis in sententia de Conceptione Scotistica deprehendi? Eset hoc conicere dedecus caecitatis, aut extenuatae nimium Pietatis in Ecclesiam, quae tamdiu rogata, nondum tamen Opinionem illam dignam censuit, quae inter Dogmata Fidei referretur; immo in contraria Opinione pondus Credibilitatis se agnoscere satis testatur. Porro nunquam disputavit Lamindus, an aliquid homini Certum esse possit, etiam si nondum sibi sit propositum credendum Fide divina, aut ante actum Fidei divinae. Vagatur Parthenotimus. Quaestio nostra est, an Scoti Sententia, de qua quid haecenus judicavit Ecclesia, ignorare non potest, Certa adeo esse homini prudenti possit, ut legitime ac prudenter pro ejus tutela mortem eligat. Hoc nondum Theologus noster ostendit; & me contrarium ostendisse, jam Lector, ut spero, animadverterit.

C A P U T X X I.

Cavillatoris nova Præsentia perperam a Parthenotimo iniusta. Inquisitioni Hispanicæ an iuste tributa ab ipso quædam Insalubilitatis species. Aliæ Parthenotimi cavillationes.



LIAM nunc scenam aperit ingeniosus Parthenotimus, per quam clientes suos confidit magis atque magis in sua sententia confirmandos. Didicit ille, spem victoriæ in concertationibus augeri, ubi non rationes tantum adversariorum oppugnantur, sed & in ipsos adversarios odium & contemptus conflatur. Supra vidimus, artificiose injectas ab eo *Jansenismi* suspiciones in Lamindum; nunc ipsum uti *Cavillatorem* traducere conatur, quaerens præcipue pag. 82. *Cur Lamindus in cavillationem se proripiat.* Cedo Cavillationes istas. Ea palmaris, & quæ non uno in loco recurrit: videlicet Lamindum *omisisse distinctionem Votorum*, hoc est, non explicuisse, an utrumque Votum improbet, quorum unum pollicetur patrocinium Immunitatis Marianæ

voce

voce duntaxat & calamo; alterum paria pollicetur, addito etiam *Sanguine & Vita*. Hanc eandem cantilenam Parthenotimus exorditur pag. 13. tum ipsam in aliis locis ingeminat. Quod pejus est, sibi interdum fingit, Lamindi mentem revera fuisse damnandi etiam Votum Academiarum, sine ulla *Sanguinis* mentione conceptum. Necessesse profecto est, ut pugnandi ardor criterii usum prorsus eriperit Siculo Professori, quando in ipso suo Libello haec Lamindi verba differtissima refert, neque eorum sensum & vim intelligit. *Satis*, inquit Lamindus, *quibusdam non fuit calamo & rationibus Immaculatam Dei-parae Conceptionem tueri, quod procul dubio cum vera Pictate consonat*. Qui haec dicit, cubitalibus literis significat, se summopere probare quocumque *suenes calamo & rationibus* eandem sententiam, Cuncta vero ejusdem spicula eos duntaxat petunt, qui *Vitam* pro tuenda ipsa sententia vorent, seque *Martyres* futuros pro hujusmodi causa morientes confidunt. Et nihilominus identidem Siculo censor Lectoribus suis persuadere non veretur, impugnari a Lamindo. alterum quoque Votum, hoc est Academiarum, nimium ab isto diversum. Uter nostrum in *Cavillationes se proripiat*, resti Judices decernere jam incipiunt. Dixerat Lamindus: *Quomodo te Numini placisurum putas, illiusque Martyrem te futurum speras, si rite certus non es, te pro Veritate mortem oppetere? idque tanta contentione fuisse vis, quod aliter Deus voluisse potest, incertumque adhuc est, an aliter esse volueris? Cave, ne amorem, & reverentiam Virgini debitam eo usque amplifices, ut Superstitionem efficias*. Non unus autem ego in hoc Voto profundendae *Visae* pro Immaculata Conceptione Virginis Superstitionem timeo. *Timuis, & times Apostolica Sedes &c.* Plura haec retuli, & quorum intelligit Lector, ubi acceperit, quid ad ista adnotarit. Paternitanus Theologus pag. 65. Principio, inquit, videat Lamindus, quo ipsum abripias ille suus, quem vocat Superstitionis timorem, sed nontacito diceret audaciam: dum Superstitionis notam Catholicorum sententiae inuris. Quid haec sibi velit Parthenotimus; quum ait Catholicorum sententiam, non satis assequor. Si forte Scotificam de Conceptione sententiam Superstitionis nota a me inspersam vult, ad quemcunque Lectorem tam foede ac immerito a Cavillatore laesus appello, a quo etiam indigne habitus sum superius, perinde quasi Mendacii nomine denigrari eandem Scoti Sententiam. Sin *Votum* tantummodo profundendae *Visae*, quod unum reapse Lamindus minime tolerandum contendit: brevi indicabo, quam iustus mihi sit timor Superstitionis in illo. Atqui subdit Parthenotimus: *Si Superstitionis, seu*

Cul-

*Cultus falsi censura notatur Votum, quod Virginis Immunitatem, & huius defensionem respiciat, eadem efficiendum esset nova celeberrimum Conceptionis Deiparae Festum, quod ex nuper dictis Praeservationem ab originali macula respicit. De Festo Conceptionis supra egi. Repeto nunc; ne umbram quidem Superstitionis occurrere in tuenda voce & calamo Scotistica sententia, uti neque in celebrando secundum eandem sententiam Festo Conceptionis: quod liberum Alexander VII. cuiusque fecit. Sufficit enim Pietas Opinativa, Probabilibus ac Verisimilibus motivis innixa, ut Opinioni alicui adhaereamus, eamque propugnemus, atque ut Festum etiam celebretur. Celebrantur per totum Catholicum Orbem tot Festa pro Sanctis ab Apostolica Sede minime canonizatis, pro tot Reliquiis, & Corporibus Sanctorum, eorumque Miraculis. Probabilitas ista legitimum prudenti suppeditat argumentum ita agendi: At ubi agatur de Vita danda pro Probabili tantum sententia, hoc est pro Opinione tuenda, atque Martyrum praemio inde sperando, Imprudentiam & Crimen heic deprehendimus, & Superstitionis justus metus occurrit. Addit Parthenotimus pag. 67. *Supremum Inquisitionis Hispanae Tribunal permisisse Thefin de Martyrio morientis pro Immaculata Conceptione: quo scilicet tempore Laminæ Granatenfes, Dextri Chronicon, & reliquæ piorum hominum imposturae persuaserant religiosissimæ Hispanicæ genti, in Concilio ipso Apostolorum cognitam fuisse veritatem Immunitatis Marianæ. Subdit Siculus, damnatam quidem fuisse a suprema Lusitaniæ Inquisitione Thefin Auctoris statuentis, quod inconsulto Summo Pontifice, poterat Festum Conceptionis celebrari. Hic idem Auctor Virginis Conceptionem inter Veritates ad Fidem pertinentes collocavit. Hic inferebat: quare verum subiret Martyrium. At Siculus Theologus subdit, totam istam, integramque sententiam a Lusitanis fuisse vetitam. Theologi vero, qui Martyrium esse defendunt Mortem pro Marianæ Conceptionis defensione, nunquam somniarunt defendere Martyrium esse, quia inconsulto Summo Pontifice, possit Festum celebrari: quodque eodem inconsulto, Fidei Veritatibus sit annumeranda Deiparae illibata Conceptio. Fallitur ergo, si quis unquam credat, inter se Fidei Quæsitores diffidere. Nullus est mihi Liber, quo possim intime perscrutari, quæ heic ab unius Parthenotimi eruditione didici. Quare tantum respondeo, nihil mea referre (ac puto idem dicturos ceteros Italos, Germanos & Gallos) quid agat, aut non agat, probet aut improbet Inquisitio Hispanica & Lusitanica: neque enim ab illorum iudiciis quidquam pendet reliquus Catholicus Orbis. Immo serium ridebit quisquis Tribuna-**

bunalibus iis quamdam Infallibilitatis speciem tribui a Parthenotimo audit. Satis sit mihi dicere, ab Hispanica Inquisitione proscriptum fuisse temporibus nostris eximium Opus, & celebre Eruditionis Ecclesiasticae promptuarium, scilicet *Acta Sanctorum* a Bollando: aliisque Clarissimis Patribus Societatis Jesu Antuerpiensibus collecta & illustrata, quae tamen eodem tempore illaesa evasere e Romano examine. Immo ea ipsa in Hispania sub novo Rege Catholico Philippo V. libertati pristinae reddita sunt, pauculis verbis expungi aut mutari iussis, ut aliqua praecedenti Censurae excusatio fuisse videretur. Ceterum non satis mihi persuasit Parthenotimus, non idem fuisse damnatum a Lusitanis, quod ipse clientibus suis in Oputculo suo, felicisque alibi, insinuandum curat. Nempe scribit heic, *Theologos nunquam somniasse defendere, quod Summo Pontifici inconsulto, Fidei Veritatibus sit annumeranda Deiparae illibata Conceptio.* Atque is nihilo secius pag. 22. *Theologos, memorat sentientes, quod Fide divina posset credi, sine labe Virginem fuisse conceptam; cum sibi homo persuadeat, id fuisse a Deo revelatum.* Et pag. 29. addit. *Neque quia Ecclesia, fidissima Dogmatum testis, adhuc ut Fidei articulum Sententiam Piam non proposuerit credendam, inferre licet, quod ea non fuerit Revelata.* Et pag. 47. *Ut autem dicamus, quod in Revelatione aut scripta aut tradita, pia contineatur sententia, tot Doctorum sententia sat esse videtur.* Haec ille scribens nonne nobis insinuat, posse nos inconsulto Romano Pontifice divina Fide credere veram Scotisticam sententiam? Certe constat, Romanam Ecclesiam, omnium Ecclesiarum Magistram, una cum Tridentino Concilio, in albo Opinionum reliquisse Scoti sententiam, sibi que de illa reservasse iudicium, quod nunc sibi Parthenotimus usurpat.

Petit Parthenotimus pag. 80. *cur in scrupulos se proripiat Lamindus?* Scrupulum autem Lamindi arbitratur, *simulasse Superstitionem in Voto Sanguinario.* Tum percontatur: *Unde tanta lux uni se pandit Lamindo, quae ceteris fuerit occlusa? Num ex Bibliis, & sacra Traditione, quae Dumtaxat ipse praecipit consulenda?* Contra ego perlibenter ab eodem Parthenotimo sciscitarer, quandoquidem is glorioso Theologi nomine insignitum se ait, an licere putet imponere proximo suo sententias periculosas, aut erroneas, ab ejus mente prorsus alienas? Lamindus Pritanius Lib. I. Cap. XI. de Ingenior. Moderat. dixerat: *Praeter divinas Scripturas, & Traditiones, Concilia sacra, & praesertim Oecumenica, Romanorum Pontificum Epistolae & Decreta, Sanctorum Patrum Libri, probatae Veterum Historiae, Theologorum, aliorum*

que Ortbodonorum scripta, sunt ii fontes & loca, unde Ecclesiae Catholicae doctrina est haurienda. In eo ipso Libro, adversus quem arma Parthenotimus arripuit, haec leguntur; & nihilominus Parthenotimus idem palam scripsit, *Lamindum praecepisse, consulenda dumtaxat Biblia & Sacram Traditionem*. An Theologum deceat ars ista pugnandi, quum vacabit, ille nobis prodet. Addit deinde: *Bibliorum & sacrae Traditionis plerique Theologorum gnari, illis potius consonum, uspoae Pium, vutiri sunt Votum*. Votum quidem tuendi Voce & Calamo Illibatam Virginis Conceptionem, a plerisque Theologorum probatur; probatur & a me illorum discipulo. At quandonam Plerique Theologorum Votum Sanguinarium, de quo uno loquitur Lamindus, *sacris Litteris ac Traditioni Patrum consonum, uspoae Pium*, scribere? Immo tacite hoc ipsum, si paucos infimi subfellii excipias, ii damnarunt, quando sensere, *nefas esse pro Opinionibus tuendis Animam nostram ponere*. Non confundat quaeso diversa haec Theologus noster, & veritatem pressius sequatur, suisque auditoribus tradat. Denique is ait pag. 81. *Quodnam Ecclesiae Dogmatibus detrimentum accedet ex eo quod hic vel ille pro hoc aut illa Virtutis Actu mori, aut non mori, licite queat?* Serio-ne loquitur heic Theologus noster? Serio, nemo neget. Itaque secundum illum inter veros ac proprios Martyres, & Martyres improprie appellatos, nullum erit discrimen: quod tamen Theologi graviores negant. Immo, si Theologum hunc audimus, nihil Ecclesiae Dogmatibus officit, quod *hic vel ille pro hoc aut illo Virtutis Actu mori, aut non mori, licite queat*. Ubi Parthenotimus hisce verbis tradat, *Virtutis Actum esse pro tuenda Illibata Conceptione Mori*: jam quisque videt, frustra ab ipso assumi tanquam Certum & probatum, quod adhuc inter nos disputatur, scilicet: *An liceat, & Virtutis actus sit pro ejusmodi causa occumbere*. Haecenus ostendi, id abhorre a recta Pietate, atque inter Peccata referendum fore. Et profecto si temere ac imprudenter Vita propter hoc prodigatur, nemo non intelligit, quantum inde dedecoris in doctrinam Ecclesiae, quantum detrimenti in Rempublicam effluere possit. Foecundus deinde in interrogando Siculus Scriptor & Cenfor haec habet pag. 82. *Petitue etiam a Lamindo, cur in solum Votum de tuenda Virginis Immunitate usque ad Sanguinis profusionem tela vibret; & cetera praeterit intacta, ut Votum servienti infirmis etiam cum Vitae discrimine, & quidem magis aperto, Votum carnibus non vescendi roto Vitae tempore, aliaque id genus*. Nihil esset, cur ego responsum facerem importunitis hisce interrogationibus, quando superius fatis respondi. Breviter ta-

men

men dicam, nullam fuisse causam adducendi in examen praeter Sanguinarium reliqua Fidelium Vota; neque enim de istis instituendis sibi erat Tractatus. Nunc autem a Parthenotimo coactus repeto, Votum intersuendi aegris, aut peste infectis, ut salvam faciant animam suam, aut sanitatem corporis recipiant, etsi inde Vitae discrimen per accidens incurratur, esse de Certo & eximio Virtutis, hoc est Caritatis Actu, quem Evangelium ipsum probat, atque commendat. Ubinam vero Christus Dominus, aut Ecclesia commendaret veluti sacrificium Deo carum, Vitam nostram impendere causa propugnandae Opinionis de Immunitate Mariana: post decem annos nobis Parthenotimus ostendit; tantum enim illi temporis ad quaerendum ac docendum concedo. Ad Votum vero non velle carnis toto vitae tempore quod attinet, jam dixi Cap. III. illud minime ferendum, nisi excludat periculum mortis ob alimoniae defectum. Praeterea petit Siculus Professor pag. 83. cur Laminus Sanguinario Voto *nec ullum, quem rectum habere potest, det sensum*. Quamnam quaeso? Nimirum illius patronos non mori pro eo, quod esset tantum Probabile in Virginis Conceptione (hoc est pro Veritate sententiae: cogitur quippe & ipse fateri, Probabilem quidem, non vero Certam illam esse) sed pro eo, quod est ibi Certum, hoc est pro defendendo Cultu & Festo Immaculatae Conceptionis praescripto ab Ecclesia: quod in Veritate Speculativa est Certum, ut ait Jacobus Granado, cui Minorita Velasco consensit. Sed centies dixi, Cultum hunc Opinativum esse, quod est ad statuendam Immunitatem Virginis; atque e Festo Conceptionis, reluctante Romana Ecclesia, deduci, a Summis Pontificibus pro Scotistica sententia contra oppositam fuisse quidquam definitum, quum diserte ii contrarium protestentur. Et Cultus & Festum laudanda sunt. Mors vero, quae subiretur a Sanguinari Voti patronis, quippe tolerata pro Opinione, imprudens facinus & scelus dicenda est. Porro inania sunt effugia quae haec & alibi quaerit Theologus noster. Ipsi enim revera Votum est, non pro tuendo Cultu & Festo Conceptionis, sed pro tuenda Immaculata Deiparae Conceptione, ut ipsius Opusculum in titulo & fronte potentissime profutur.

C A P U T XXII.

Confusio a Parthenotimo somniata in Lamindi censura. Nullum Heterodoxis ex ea censura ministrari posse scandalum, sed quidem e Voto Sanguinario. Neque Lamindus Doctores Catholicos, Theologosve Scholasticos traducit.

PERGIT deinde is dicere pag. 84. In plerisque formularum, quibus Deo promittitur initio Conceptionis sine labe, maxime quibus Academiae utuntur, nulla fit Mortis mentio, nec exprimitur Usque ad Sanguinem. Neque in Neapolitana reperitur. Denique subdit: Quod si quā ulla est alia Vovendi ac Jurandi formula, qua Usque ad Sanguinem additur; cur bujus tantum formulae, & non aliarum, recordatur Lamindus? Mirentur heic iterum Parthenotimi ingenium Lectores. Non uno is in loco Lamindum exhibuit (per summam tamen injuriam) non Voti tantum Sanguinarii censores, sed & ceterorum pro tuenda Scotistica sententia sine Sanguine conceptorum. Heic autem dolet, quod idem Lamindus Voti duntaxat Cruenti, & non aliorum fuerit recordatus. Insuper Lectorem opportune monendum ille censet, a plerisque formulis Votorum abesse Sanguinis & Mortis mentionem; neque prospicit, hoc ipsum jaculum in suum caput recidere, quando ut alibi animadverti, tot Academiae, Ecclesiae, & Theologi, saltem non minus quam Siculi, judicio, doctrina, & zelo honoris Deiparae ornati, Votorum quidem suscipiunt tuendae Scotisticae sententiae (quod laudabile est, praecipue dissensionis componendae causa, quemadmodum in Hispaniis fit, uti ipse Parthenotimus falsus est pag. 77.) sed a Voto Sanguinario abstinere, & ut puto, abhorrent. Addit Siculus Censor pag. 85. Cur tam confuse & generatim conqueritur Lamindus: Quod nostris quoque temporibus sum in privatis colloquiis, sum in publicis concionibus Idem Votum repetitur? Nollet, uti hactenus vidimus, Theologus noster, Lamindum adeo in scrupulos pronum, ut imprudentiam, immo & Superstitionem timeat in Sanguinario Voto. Ego contra Parthenotimum ipsum scrupulosiorem vellem, ex quo Confusionem, & Generalitatem sine ulla causa tribuit Lamindo, quasi is Vota omnia pro tutela Conceptionis Virgineae sugillavit. Prostat Lamindi Liber,

Liber, prostat & ipfius Parthenotimi Libellus, in quo ejufmodi Lamindi verba leguntur. *Idem Vorum* meridiano Sole clarius non alios respicit, quam affirmantes: *Pro cauffa Immaculae Conceptionis pium effe mori*, ut ibi diferte atque unice fcribit Lamindus. Quod ubi ita effe Lector deprehenderit, poterit ne non agnoscere, unum Parthenotimum occurrere nobis, qui in *Cavillationes* fe proripiat, qui *Confufionem* prae aestu difputationis in Lamindi fcripta intrudit, ut incautis Lectoribus alio refpicientibus, ipfe interim pudorem Voti Sanguinarii imprudenter concepti, atque infelicius propugnati, a fe & a clientibus fuis aliqua ratione amoliat? Eodem pede currit fubfequens Siculi Profefloris querela pag. 85. *Catholicae gentis fama*, ait, num digna non eft, quae unius privati viri famae non fit praeferenda? Cur ergo publicae cauffae non profpexit Lamindus, qui tantam in privata expoftulat cautionem? Inanes naeniae, expoftulationes joculars, dicere liceat. Ubinam quaeſo Lamindus univerſae Catholicorum gentis famam arrodit, poſtquam ipſe aperta profeſſione teſtatus eſt: *Calamo & rationibus Immaculatam Deiparae Conceptionem ſueri, procul dubio cum vera Pietate conſonare?* Siculos quoddam tantum, aut ſi qui ſunt alibi, certe paucos, Lamindus non virulenta, ſed amica oratione aggreſſus eſt, ut eos ab imprudenti ac periculoſo Voto Sanguinario averteret, quod ipſi duntaxat concipiunt, & legitimum reputant, non vero univerſa Catholicorum gens, aliena nimium ab huiusmodi improvida novitate. Sed qui praecoꝑatus ferventi affectu in litteraria paleſtra dimicat, difficile vitia ſuae ſententiae ſenſit, facile in adverſarii conſingit.

Declamatorio deinde ſtylo eadem pag. 85. Parthenotimus ſubdit: *Quo jure, Cavillationis viſio, quod Lamindus ipſe in alienis ſcriptis curat amoliri, tuebitur ſua non eſſe inſperſa?* Magnum aliquod portendit haec emphafiſ. Intentis auribus audiamus. *Quid ſuſpicabitur de Catholicorum more Heterodoxus, qui haec a Catholico ſcripta offenderit?* Tum multis e pixide Candidati Rhetorici figuris depromtis, tandem ait diſturos Heterodoxos: *Dubia-ne ergo prudenter nobis eris Romanorum Superſtitio?* Narrat Priſtanius, quod Romanus pro re incerta mortem oppetere licitum, immo bonellum putat. Ita igitur res erit. Ergo in plerisque Catholicorum mos Divos venerandi certo pravus inolevit. Haec Heterodoxus inferre ex Lamindi Lectione facile poteſt: maxime ſi ex Janſeniſtis fuerit &c. Ego vero, ſepoſitis parumper Heterodoxis, referam potius, quid haec legentes Catholici diſturi erunt. Neceſſe ſane eſt; Parthenotimum vel vigilantem ſomniare, quando talia ſcripſiſſe illum videmus. Primo *Cavillationem* in Lamindo non niſi

nisi somnians appeller id, quod minime Lamindus dixit, sed unus Parthenotimus in felici sua Phantasia fabricavit. Nam etiam si id supponeremus, non *Cavillatio* Lamindi id foret appellandum, sed *Confoctarium* tantummodo censurae ab illo efformatae. Secundo, somnium merum est, posse Heterodoxos e Voto Sanguinario elicere, inolevisse in *Plerisque Catholicorum pravam morem venerandi Sanctos*; prorsus enim falsum est, *Plerosque* e nostris imprudenti Voto illi sese obstringere. Pauci tantum Siculi, fortasse pauci & alibi, illud amplectuntur. Tertio, inane somnium est, Sectariis ansam praeberi deprehendendi Superstitionem in Romana Ecclesia. Immo ne deprehendant, neque nobis objicere illam quisquam possit, Catholicus Scriptor Voto paucorum Sanguinario sese opposuit. Alienae vero communionis homines intelligere hinc etiam possunt, non dissimulari apud nos, immo opugnari libere, quaecunque errorem aut abusum in Pietatis negotio praeferre videntur. Atque eo longius aberunt a tribuenda Catholicis Superstitionis nota in Quaestione de Immunitate Mariana, quum animadverterint, Lamindi Librum a tot annis editum, atque insensum Superstitioni, aut Superstitionis umbrae in hac eadem causa, pacifice versari, neque sine plausu (si dicere licet) inter Catholicos; ejusque censuram de Voto Sanguinario a sapientioribus probatam, uno Parthenotimo excepto, qui pro honore proprio sollicitus aliter sensit. Quod plus est, ostendit in eodem Libro Lamindus, ne probari quidem ab Ecclesia Romana ejusmodi Votum: quod unum sufficit, ut nulla Heterodoxis reliqua sit causa culpandae hanc ob causam Catholicae Ecclesiae. Ceterum nisi hospes esset in Polemica Theologia Parthenotimus noster, nullo negotio resciret, objici nobis ab Heterodoxis alios ritus, alios mores, ac opiniones, quae a nonnullis interdum sine consensu Ecclesiae usurpantur, aut litteris etiam traduntur, & Superstitionem olere videntur. Quid vero Catholici Sapientes respondent? Non omnia illi, quae quilibet Catholicus facit aut sentit, recte facta, aut excogitata contendunt. Sed Heterodoxos appellant ad Ecclesiarum nostrarum, Romanae in primis, Catechismos, ad Romanorum Pontificum Decreta, ad Concilia nostra, atque ad sanioris Theologiae Doctores, in quibus vera Catholicorum Doctrina quaerenda est, non in vulgi insipientia, aut in privatorum placitis, nonnunquam falsis, erroneis, scandalosis, temerariis, ridendis. Tunc in tuto est dignitas & puritas Ecclesiae Catholicae. Quanto autem magis huic cautum est in Lamindi Libro, postquam Votum ipsum Sanguinarium ibi exhibetur, ab ipsa Apostolica Sede jamdiu sufficienter improbatum.

atque

atque explosum? Haec, ut spero, Catholici de Parthenotimi commentis, quae is Heterodoxis somniat, dicturi erunt. Immo & ab ipsis Heterodoxis commendanda venit Catholicorum cura, quod lollium, in agro Ecclesiae nullo non Seculo germinans, & germinaturum usque ad finem Seculi, non negligant, & primi ipsi vitandum aliis ostendant. Quid vero iidem Haeretici dicturi contra forent, si aliquando Votum Sanguinarium quisquam sua morte compleret, & ferale spectaculum gentis pro eo trucidatae in eorum oculos incurreret, jam indicavi superius. Interea probrum sibi ducit, ac propterea negat Parthenotimus, ut nuper vidimus, *quod Romanus* (idest pauci Siculi) *pro re Incerta mortem oppetere, licitum immo honestum putat.* Contendit etiam, *Catholicis* (hoc est paucis Siculis) *haec scita, quae non docuerunt, & vix somniaverunt, a Lamindo appingi.* Sed illi gratiae habendae, quod haec scribens, rationem germanam ac breviorē ipse tandem omnibus patefecerit dijudicandi, tolerandum ne sit, an non, Votum Sanguinarium. Vicit ille, si verum est, voventes pro tuenda Scotistica sententia Vitam, morituros esse *pro Sententia Certa, omnem Erroris formidinem excludente.* Vicit contra Lamindus, ubi verum sit, mortem electuros *pro sententia adhuc Incerta, & nondum e finibus humanarum Opinionum, quamvis Piarum, egressa.* Hoc se haecenus evicisse Lamindus sibi persuadet. Judicabunt sapientes, qui interim animadverterint, quae confectaria emanant e doctrina nuper a Parthenotimo tradita. Neque cavendum esse in posterum Catholicis viris, ne erroris, superstitionis, aut haereseos doctrinam cujusquam Catholici unquam infumulent; secus enim faciendo, Heterodoxis ansa praebebitur arguendae Catholicae Ecclesiae. Ejusmodi terculamenta excogitat ars Declamatoria, sed ridet meliorum sapientia.

Petit praeterea Panormitanus Professor pag. 87. *Cur Lamindus Votum saltem ex parte non excusavit. Si displicebat ipsi, quod Voventes Virgineae Immunitatis defensionem, Sanguinem velint profundere: cur ejusmodi Voto hanc non curavit moderationem adhibere, ut interim intacta esset tuenda Immunitatis promissio, & amoveretur Sanguinis profusio?* Ita utramque paginam Theologus tantopere a Cavillationibus averfus, hujusmodi accusatione onerat, ut si quo possit modo eorum saltem odium, qui Lamindi Librum nequaquam legerunt, in Lamindum conjiciant. Repetere tamen cogor, quod toties dixi: ex eodem videlicet fonte effluere hallucinationes Parthenotimi non dignoscantis, quibus vitiis suum Votum laboret, & rursus videre se putantis in Lamindi Libro, quae nemo alius videre haecenus potuit.

Quod

Quod enim est ad reliqua Academiarum Vota, dixit jam Lamindus; ac centies repetet, ea sibi innoxia, immo commendanda procul dubio videri. Porro pag. 92. iterum displicet Parthenotimo, *quod Lamindus eodem Opusculo* (ita nempe Librum appellat, qui paginas octingentas septuaginta duas spissi characteris in quarto implet in prima Parisiensi Editione) *de Ingenior. Moderation. quo cum hoste alienae Religionis, & Batavae gentis, in litteraria acie congredditur, hostes sibi aut facit, aut fingit Catholicos, ac proinde ejusdem Religionis viros, Hercle vereor ego, ut Lamindus, aut quisquam alius, quum Libros de Religione conscripturus est, Magistrum sibi adhibere velit Siculum Theologum, cui certe tantum auctoritatis non conciliavit soliditas Libelli, haecenus a me ad stateram appensi. Immo heic potissimum hospitem in Eruditione Ecclesiastica ille se prodit; paucos quippe reperias, qui dimicantes cum Haereticis honesta etiam libertate non arguant, si quos e Catholicis in defectus aut excessus sententiarum declinantes animadvertunt. Vide Alphonsum de Castro, Melchiorem Canum, Bellarminum, & Gottum S. R. E. Cardinales, Petavium, Theophilum Raynaudum, Beccanum &c. Subdit Siculus: Si animus Lamindo est, cum Catholicis congreddi, congreddiatur, ut lubet. Me plane felicem, cui tanta indulget liberalis hic Censor. Pergit ille: Sed ut mos congreddendi Catholicis est, Opusculo mutetur siculum. Lamindo consilium fuit tractandi de negotio Religionis, in quo Haeretici passim, sed aliquando Catholici delinquere solent. Ergo cum de illis, tum de istis, argumentum poscebat, ut ageretur; ac proinde videant severi Judices, quo plausu excipiendus sit Parthenotimus exigens a Lamindo, ut titulum Libri sui mutet. At ille addit: Non enim Religionem spectant Catholicam, quae de Immaculata Virginis Conceptione inter Catholicos disceptantur. Dicat quaelo egregius iste Theologus, ad quamnam Religionem spectent, si minime ad Catholicam? Si vera is hoc in loco tradit: qui pro Scotistica sententia occumbat, Vitam minime dabit pro re pertinente Ad Catholicam Religionem. Atque ita is ore suo Votum suum cruentum damnavit. Utcumque tamen Parthenotimi mens heic fuerit, illud constat, Lamindum confessum fuisse antea summe Piam sententiam Immunitatis Marianae, ejusque tutelam voce & calamo cum vera Pietate consonare. Verum quod nonnulli abutentes Pontificiis decretis, immo contra eorumdem mentem, depraedicare audeant tam Certam sententiam, ut non solum liceat, sed laudabile sit, & Martyrii gloriam referat, pro illa occumbere: contra periculosum hoc Dogma & ritum*

ritum exercere vocem & juvat, & opus est, ne sub Pietatis specie Superstitio in Populum Fidelem, atque in Religionem Catholicam irrepatur: a quo morbo Apostolica praelertim Sedes cavendum jubet.

Praeterea Parthenotimo pag. 93. *displicet, quod Lamindus falso Doctores Catholicos traducat, quasi vero docuerint posse quemquam mortem subire ob purae Opinionis causam: cum aperte ab eis oppositum sit defensum.* Sed quis Proteum hunc teneat, atque ab eo certam de Voti Sanguinariii mente confessionem exprimat? Si ei objicimus, Scottificam de Conceptione sententiam, pendente judicio Ecclesiae, nihil aliud esse, nisi *Opinionem, Piam* quidem & *Probabilem*, sed minime *Certam*; ac proinde pro illa tuenda non sine crimine Vitam offerri, quum satente ipso Parthenotimo nefas sit ob Opinionis tutelam velle Vita spoliari: is e manibus nostris elabitur per rimam, quam Granaud excogitavit, scilicet, non pro Veritate ejusdem sententiae (quam & ipse sentit praestari non posse Certam) voventes fore morituros, sed *pro Pietate, quae inest Actui Opinativo de Conceptione Virginis, aut pro Cultu & Honore ejusdem Deiparae, aut pro Festo* ab Ecclesia praefcripto. Si rursus instamus, agi heic de *Pietate Opinativa, de Cultu Opinativo &c.* quae justum quidem titulum nobis suppeditant Opinandi, Virginem sine labe fuisse conceptam, atque ipsam colendi atque honorandi secundum istam Opinionem sive sententiam; verum non sufficere haec, ut legitime Vita impendatur, quum Pietas ista & Cultus, & Festum innitantur sententia nondum praetergressa fines Opinionum, is ad priora redit, atque contendit, sententiam eandem *Certam* esse; suosque discipulos docet, opus esse, ut sibi persuadeant, eam *Certam* esse, alioquin imprudenter occumberent. Hoc ipso in loco ita ille scribit: *Afferat Lamindus, puram esse Opinionem, quod Deipara omnis maculae fuerit experta, cum a Theologis, ut visum est, isthuc defendatur Saltem tamquam quid moraliter Certum. Quod tamen pura sit Opinio, sumi non debet ut quid certum, ut quid exploratum, & maxime ubi de negotio Religionis agatur.* Immo quia & de negotio Religionis agitur, & de Vita hominum projicienda, non debet Parthenotimus adeo Certam & exploratam sumere sententiam Scottificam, ut pro illa tuenda Fideles nimium credulos impellat ad subeunda tormenta, mortemque temporalium malorum terribilissimum. Ad Religionem quod attinet, falli non possumus, pro *Opinione* duntaxat accipientes *Piam* Scoti sententiam; neque enim Ecclesia aliter hactenus sensit, & docuit, dum suum locum oppositae sententiae reliquit. Contra falli possunt, & falluntur, qui illam nunc *Saltem tam-*

quam *Moraliter Certam* depraedicant, si hoc nomine intelligunt *Cervitudinem Erroris* metu liberam. Ex certo praeterea falluntur, neque temeritatis culpa absolvi possunt docentes, illam posse nunc etiam credi, tanquam *Fidei* doctrinam: quod insinuari videas a Parthenotimo ipso scribente *Saltem*. Quicumque enim tenet sententiam aliquam, ignarus quale iudicium prolatura de ea aliquando sit Ecclesia falli nescia, necesse est, ut ei adhaereat cum formidine saltem aliqua Erroris; & consequenter illam tamdiu agnoscat uti meram Opinionem, quamdiu pendet iudicium Ecclesiae, quum proprius sit Opinionis character involvere formidinem Erroris. Quomodo ergo nos conscii, quid adhuc Apostolica Sedes, ac Tridentinum Concilium, de duabus oppositis sententiis ad Conceptionem Virginis spectantibus senserit, *Scotisticam Moraliter Certam* appellare audeamus; immo tam *Certam*, ut *divina Fide* credi possit inconcussa? Repugnat aliquid esse hodie *Moraliter Certum*, immo *Fidei* divinae objectum, quod cras possit ab Ecclesia iudicante *Falsum* deprehendi. Hoc autem contingere posse de Scotistica Sententia, ne ipse quidem Parthenotimus negare est ausus pag. 55. Quod si nihil aliud hastenus quam *Opinio* est huiusmodi sententia, & quamvis apud multos non sit *Opinio actualiter formidans*, attamen non desinit esse *Opinio radicaliter Saltem formidans*; namque uti talem viri docti agnoscere coguntur, quippe qui ignorare hac in re non possunt Decreta Ecclesiae: habemus jam tandem a Parthenotimo ipso pronuntiatam damnationis sententiam in Votum Sanguinarium, quandoquidem ex ipsius quoque confessione nefas est mortem subire tuendae causae Opinionis. Religionis Catholicae dignitati & securitati consultum vidimus, minime credendo *Certam* Scoti sententiam, immo hanc ipsam iudicii suspensionem Religio exigit, dum pendet iudicium Ecclesiae; neque aliter Academiae faciunt, quae tutelam Immunitatis Marianae vovent *iuxta Summorum Pontificum decreta jam edita, aut deinceps edenda*; sive donec aliter a sancta Apostolica Sede definitum fuerit. Consulat ergo Parthenotimus, & si quis alius cum eo sentit, pretiosae hominum Vitae, neque amplius contra Catholicae Religionis praecepta auctor sit Fideli Populo, ut *Votum* concipiat *pro tuenda Immaculata Conceptione usque ad Sanguinem*: quod unum Lamiudus minime ferendum ostendit.

Theologo nostro itidem pag. 94. displicet, quod de Theologis Scholasticis Lamiudus solum tacite obloquitur. Quare? Horum, ait, ut vidimus, flocci pendit Opiniones ac sententias, dum contrarias credis, venditatque, omni formidine amota, ut veras, Ergo sciendum, ut Partheno-

thenotimus, omni formidine amota, de Vita hominum decernat, suisque clientibus, immo universae Catholicae Reipublicae persuadeat, Vitam cum laude dari, ac Martyrii coronam esse sperandam, si pro Scoti sententia, hoc est pro Opinione, in Mortem incurrat. Fin-
gat ille sibi tantisper, temere concipi ejusmodi Votum (quod hactenus ego factum contendo) ac tunc dicat, honestum-ne sit exigere, ut omnes sileant, ut nemo periculosae Opinioni occurrat, ne molestia sibi, & *Scholasticis Theologis* creetur, quo nomine semetipsum duntaxat, & paucos suos allēctas designat? Ecclesiae causam, reipublicae tutelam, praefarendam heic esse, unusquisque intelligit. Audiamus tamen Parthenotimum alias nentem querelas: *Debuerat* (inquit pag. 100.) *quae causa Lamindi prudentia est, saltem animis pendere, utrum pro Immunitatis Virgineae tuitione, honestum sit mori, honestum sit hujusmodi tuitionem, utpote Piam, Deo Virginis Filio promittere. Non debuerat Theologos, qui a Voto steterunt, ut temere in mortem ruentes, fugillare.* Sed est cur Eruditi mirentur Parthenotimum novas leges invehentem in Rempublicam Literariam. Quisquis vel de limine salutavit officinas Theologorum tam Moralium, quam Scholasticorum, novit, quemque intrepida libertate suas proponere sententias, atque alienas impugnare, prout Verum a se stare, Falsum ab illis putat; & quot pugnae sint inter eos omnibus patet. Quis, rogo, alterum nimiae licentiae, aut inurbanitatis, aut iniquitatis merito arceffat, quod contrariam foveat sententiam, sibi quē Theologali quamvis laurea illustri adversetur? Libertatem hanc nemini Ecclesia negat, dum a doctrina Fidei laedenda, atque ab aliis excessibus abste-
neatur. An peculiare aliquod privilegium ostentare Parthenotimus possit, ipse aliquando aperiet. Interea alteram ille excitat querelam, scribeas: *Non verbis, iisque Legum instar, paucis; sed rationibus improbanda sunt Theologorum responsa. Lamindus ergo non Legislatorum, sed Disceptantium more cum Theologis congregiatur* &c. Ita inanibus hīce cantilenis Lectorem suum detinet Parthenotimus, neque respicit, Lamindum obiter camerinam istam movisse; neque enim suscepit istud ex professo pertractare argumentum, in alia pro suo instituto intentus. Attamen in paucis iis verbis Lector easdem rationes conclusas deprehendet, quas heic fufius expressas accepit. Et quidnam quaeso hactenus Theologus Siculus Opusculo suo praestitit, nisi eandem Lamindi rationes, quocunque modo potuit, refellere atque infirmare? Igitur mera haec verba sunt lyrae, non justae querelae.

CAPUT XXIII.

Theologorum auctoritas commendata. Sed non omnes certi ad Veritatem duces. Quid Amor Factionis, quid Amor Novitatis audere soleat. Excedi etiam posse in ensollendis Deiparae praerogativis. Immo ea etiam via in Errorem ac Haeresim Pietas intemperans & pervercam prolabi potest.



ALTUM interea Theologo nostro manet imo in pectore vulnus, quod Theologis Voti Sanguinarij patronis Lamindus contradicere est ausus. Ii sunt Theologi: grande eorum nomen; insignis auctoritas. Lamindus vero privatus homo; recens homo, qui vero sub nomine apparere veritus est; uti Parthenotimus ait pag. 103. Larvatus homo, & via notus de nomine, uti idem repetit pag. 75. Ea de causa irascitur, & pag. 100. his verbis occurrit hominibus non satis aestimantibus eximios hosce Viros: Scio, quod parum ponderis habeas penes aliquos Theologorum auctoritas. Verum is decipitur, qui credat, Theologorum coetus apum esse examina, quae pulveris exigui jactu compressa quiescunt. Pag. vero 46. praemiserat & ista: At Suarez (reponet quidam Lamindi nomine, Lamindi causam agens) quid aliud quam Scholasticus, & ex pusillis ingeniis? Quid aliud, quam Scholastici, Suarezii affectae? Non est ergo magni faciendum horum omnium iudicium, ubi agitur de re Fidei a Romano Pontifice decidenda. Tum in laudes Theologiae Scholasticae excurrit eruditus Theologus, & Sixti V. Constitutionem, in qua eadem commendatur, objicit Criticis eidem Theologiae oblatrantibus. Quem, vel quos prae oculis habeat haec scribens, & non uno in loco inculcans Parthenotimus, divinare nescio. Si forte Lamindum: inique sane, postquam is, atque in controversia praesenti, sua laude non fraudarit Theologos calamo & rationibus Immaculatam Deiparae Conceptionem suentes. Deinde quot, rogo, sunt Theologi isti, quos Parthenotimus nova lege, nova ratione argumentandi, a Lamindo contemptos dicitur, ea tantum de causa, quod eorum Votum Sanguinarium non probet? Illos brevi in digitis suis Siculus Professor recensabit. Atqui Lamindus innumeros alios, & longe graviores, habere se putat, non aliter, quam ipse, sentientes, Scotticam

ficam sententiam consistere adhuc intra Piarum Opinionum fines, ac propterea a Voto illo imprudenti alienos. Quoi ergo Theologorum contentum huc Parthenotimus noster trahit, quum Lamindus communem Theologorum sententiam, immo Romanae Ecclesiae iudicium, in huiusmodi Quaestione sequatur? Quoi ridenda plane exaggeratione sibi fingit, *Suarez*, insignem adeo Theologum, a quopiam *inter pusilla ingenia* conjectum? Digna sane non est tam gravis quaestio, quae hisce commentis, confictisque querelis pertractetur.

Attamen quando auctoritate Theologorum (paucorum certe) tueri se pergit Parthenotimus, atque inde nobis terrorem incutendum, odiumve creandum sperat, monet me Locus, ut corollarium praesenti controversiae adjungam. Et primo una cum aliis Catholicis dignitatem Theologiae Scholasticae agnosco, utilitatem depraedico, necessitatem sentio. Neque quod in ea excolenda occurrant aliqui interdum Novatores, atque in Prudentiam, aut in ipsam meliorem doctrinam peccantes, quidquam nobilitas & pretium eximiae hujus Scientiae decrevit. Fortunatae nimium forent Artes ac Literae, si a perfectis tantummodo tractarentur ingeniis. Secundo gloriosum Theologi nomen nimis urgendum non est ad conciliandum tantum auctoritatis Opinioni alicui, hoc est sententiae extra Fidei pomperia sitae, ut contra sentire aliis non liceat, atque audaciae insimulandus veniat, qui adversus Opinionem illam in arenam descendat. Innumera sunt, quorum veritas in abditissimis tenebris, immo & insuperandis, jacet. Praeterea inter ipsos, qui Theologica laurea ornati incedunt, non desunt imbecillia, ac male educata ingenia. Et ex ipsis Theologis, in quos profusior Naturae liberalitas fuit, & quibus majores vires addit contentio studii atque meditationis, quemnam ostendas, tam firmis passibus in investiganda Veritate procedentem, ut ceteris ingeniis facultas erepta sit meliora sentiendi? Hercle videas Suario ipsi, quamquam singularis ingenii & doctrinae viro, alios, atque ex ipso suo doctissimo instituto, contradicentes. Idem & aliis contingit, & quotidie contingit. Neque mirum, quum vel ab ipso Angelico Doctore, cui in Ecclesia Dei supra Theologos reliquos veneratio major deferatur, & quem pleraeque Scholae sequuntur, alii in tot quaestionibus dissentiant, ac dissentire temerarium nemini videatur. Immo integras Scholas inter se in tot controversiis discordes sub oculis habemus. Quare quisque intelligat, quo plausu sit excipiendus, qui paucos Theologos sibi concordēs commemorans, & speciosum hoc *Theologi* nomen exerens, putat, id ponderis accedere posse Opinioni alicui suae,

aut

aut alienae, ut adversus ipsam insurgere piaculum sit & crimen. Nul-
lus profecto Theologicis studiis operam navans est, qui jure non u-
surpet, quae olim Sanctus Augustinus ad Sanctum Hieronymum scri-
bebat: *Ego, ajebat, facor Caritati tuae, solis iis Scripturae Libris,*
qui jam Canonici appellantur, didici hunc errorem, honoremque defer-
re, ut nullum eorum Auctorem scribendo aliquid errasse firmissime cre-
dam. Nobis post tot Secula viventibus addendum est, honorem quo-
que deferendum Decretis Romanorum Pontificum, & Conciliorum ge-
neralium, & concordibus Sanctorum Patrum Sententiis. Ceterum sub-
dit Augustinus, & nos cum illo: *Alios autem ita lego, ut quantali-*
bet sanctitate, doctrinaque polleant, non ideo Verum pusem, quia ipsi
ita sentiunt, sed quia mihi vel per illos Auctores Canonicos vel pro-
babili ratione, quod a Vero non abhorreant, persuadere potuerunt.

Porro neque gloriosa *Theologi* appellatio a quoquam excludit
imbecillitatem ingenii, turbidosque affectus, quibus obnoxia passim est
hominum, licet doctorum, natura; & quibus furtim impellentibus,
dum Veritatem Theologus assequutum se ceaset, raptum se in Erro-
rem neutiquam animadvertit. Vidimus tot Propositiones ab Alexan-
dro VII. Innocentio XI. & Alexandro VIII. proscriptas. Earum pro-
culdubio Auctores Theologico nomine gloriabantur. Sunt & alia com-
plura ejusmodi, aut inepte, aut temere excogitata, & nondum a San-
cta Sede confixa; a quibus tamen, quanquam per Theologos propo-
sitis, meliorum sapientia abhorret. Vide Theophilum Raynaudum in
Heteroclitis, & in *Dipsychis Marianis*. Nimirum aut *Amor Factionis*,
aut *Amor Novitatis* in praeceptis agunt nonnullorum ingenia, ut alios
affectus omittam, & gravi ad Veritatem detegendam sive secernen-
dam impedimento sunt. Intuere, quos aut leges Instituti a se susce-
pti, aut mos Scholae, sive Magistri imperium, quasdam sententias
sequi jubent, aut cogunt: e vestigio quidquid ibi discunt, illud uti
Verum, aut saltem uti Probabilius, quam aliarum Scholarum placi-
ta, amplectuntur. Quae ibi rationes & argumenta resonant, ea dun-
taxat invincibilia videntur. Propterea, quantifcumque possint viribus
obstant aliarum Scholarum pugiles, fortiora etiam proferant, nu-
squm tamen Verum, aut Veritatis umbram conspiciunt, nisi in Scho-
lae documentis, ad quam illos electio, casusve perduxit, & cui affe-
ctus omnes & obsequium primo devovere. Ita spiritus *Factionis* pro
suis Opinionibus tanquam pro aris & focis pugnat; immo, si huma-
nae etiam artes ac vires suppetunt, nihil omittit, quo adversarios,
eorumque Cathedras dejiciat, suisque sententiis imperii praerogativam
ubi-

ubique procuret. Atque utinam nulla unquam hujus impotentiae exempla Hispanica Regna dedissent. Et Veritatem quidem se in hisce foederibus confectari quisque arbitratur, quum tamen pro gloria ac tutela propriae *Factionis*, potius quam pro certitudine Veritatis a se stantis, tot excitet motus. Interim longe graviora incommoda progignit alter Amor, nempe *Novitatis*. Hinc Haereses, hinc tot aut temerariae, aut erroneae, aut periculosae, aut ineptae sententiae, quibus nunquam caruit, nunquam carebit ipsa Christianorum Respublica. Mitto nunc fortia Ingenia, quae plus libidini suae mentis, quam Pietati studentia, enormia procudunt placita, unde Pietas ipsa, atque Orthodoxae Religionis doctrina laeditur. Heic ante oculos mihi tantummodo versantur Ingenia in Pietatem prona: nam & ex ipsis sunt, quae *Novatorum* nomen non refugiant, immo illud ambitiose conquirunt; gloriosum quippe hunc titulum censent, dummodo pro Pietate novum aliquid proferant; atque ejusmodi inventis tam caeca interdum firmitate adhaerent, ut qui secus cogitet aut sentiat, saltem eorum judicio languentem in se Pietatem innutrire videatur. At non minus primi, quam secundi errare possunt, quanquam ea invaluerit consuetudo, ut primos horrore quodam excipiamus atque insectemur; alteros vero pacifice toleremus, quasi non & isti excessus in detrimentum atque opprobrium Ecclesiae, ac verae Doctrinae, vergere possint. Ad utrumque Theologorum genus aptari quodammodo potest, quod Cardinalis Cajetanus habet in Summa, Verbo *Opinio*, ubi haec inter alia animadvertit: *Errant Sectarum aemulatores, Opinioniones suae Sectae sequentes, non ut rationi magis consentaneas; sed quia nati sunt, aut nutriti in Secta illius doctrinae. Secundo, ex non relatione ad suam regulam; omnis enim Opinio examinanda est ad suam regulam. Et quia in his, quae sunt Fidei & Morum, regula est Sacra Scriptura exposita ab Ecclesia Catholica, non excusatur aliquis a quantumcumque rationabili Opinio in hujusmodi, si suspecta est communi Ecclesiae, seu Apostolicae Sedi. Et hinc damnantur credentes Haereticorum, & antiquorum, & novorum, adhaerentes doctrinis reprobatis, aut suspectis, saltem apud Apostolicam Sedem. Tercio ex modo, dum nimis firmiter inhaeretur Opinioni, & ASSERITUR UT CERTUM atque INDUBITATUM, quod tamen est intra latitudinem OPINABILIIUM. Et hinc saepe erratur ex nimio affectu ad nostra; & minore, quam opus fuerit, examine, resolutione, ac judicio, dum Probabilia accipiuntur, ut Demonstrata. Id genus Theologos agnovit etiam & exploit Thyrsus Gonzalez Praepositus Generalis Societatis Jesu in Fundam. Theolog. Moral.*

Moral. Dissert. I. num. 33. ubi scribit: *En dictis inferes, non facere Opinionem Probabilem Auctores illos, qui vel ex desiderio placendi hominibus, vel ex pravo affectu faciendi sibi nomen, & inveniendi Sectatores; vel sine sufficienti Studio, nimis propere ferunt iudicium, docentes esse licitam actionem, quam illicitam esse docuissent, si ex SIN-CERO DESIDERIO INVENIENDI VERITATEM diligenter incubuissent illius controversiae studio, & non ducerentur ALIQUO IN-ORDINATO AFFECTU.*

Neque heic ii mihi culpantur, immo laudantur, qui nova quidem Pietatis inventa, sive ritus, sive sententias invehunt, sed quae legitima sunt consuetudines veteris, semperque stabilis Catholicae doctrinae, & recte consonant cum probatissima Ecclesiae disciplina. Cavendum tantummodo ab iis, qui indomito ingenio, aut exuberanti affectu rapti, nova fabricant, gloriolam inde tacita cupiditate aucupantes, aut praestantioris Ingenii, aut ferventioris Pietatis. Etenim non raro accidit, ut ex eorum conatibus nihil aliud emergat, nisi aut insulae, aut temerariae Opiniones sive sententiae. Insulsum est, quidquid nullo sacrarum Literarum, aut sacrae Traditionis documento innititur, sed ex argutiolis duntaxat Intellectus nostri depromitur, praeeunte nullo, aut aliquo sed non satis firmo principio, quod veluti solidissima basis sententiis iis subternatur. Parum, exempli causa, visum est nonnullis tradere, *dona ac privilegia Sanctis a Deo concessa, Beatissimae quoque Virgini fuisse collata*: quae sententia caute etiam, neque sine exceptionibus suis est adhibenda. Majora insuper excogitarunt, contententes, nihil ferme laudis esse, quod Deiparae tribui merito non possit. Basilii Seleucienfis verba huc traxere scribentis Homil. in *Sanctam Deiparam*, apud Combefisium in Auctar. Bibliothec. Patrum. *O Virgo Sanctissima, ut ut quis honesta quaeque ac gloriosa de se loquatur, baud quidem ille aberrabit a Veritate, immo nec pro merito feceris satis.* Habemus heic Hyperbolem tolerandam atque laudandam in Oratione Panegyrica, quum & nos non incongrue dicamus, Deiparam supra omnem laudem nostram esse; & similia de inelytis Principibus, nedum de Sanctis, usurpentur. Verum nemo sanioris criterii locum hunc excipit veluti sententiam Theologico rigore conceptam. Alioquin deliria non pauca, etiam divinitati injuriosa, patrocinium sub ejus umbra polliceri sibi jam possent. Attamen non defuere Theologi, qui arrepto axiomate isto, super illud mira multa in Deiparae laudem aedificaverunt, non contraria sane Scripturis divinis, neque Traditioni, verum universae antiquitati ignota; eaque

eaque uti praeclara Virginis encomia, atque ornamenta in Scholas, in Libros, in Suggesta adduxere: Mirum, quot Conclusiones, quot Opiniones in hanc rem pii Viri Hispani in primis, subtilitatibus passi, & in inventis foecundi produxerint. *Mariae Corpus*, si eos auscultamus, e *Materia Adami innocentis efformatum fuit. Maria concepta sine conjugali commercio, sine parentum concupiscentia. Maria in primo instanti, quo caepit esse, Visione Beatifica a Deo donata est, qualem in divino Redemtore nostro Patres ac Theologi agnoscunt. Usu rationis praedita in ipso primo instanti, e vestigio erupit in altissimum actum Fidei & Amoris Dei, propter quem Gratiam sibi infusam a Deo meruit de Congruo, & ex opere operantis. Tunc etiam Votum Virginitatis emisit. Conceptio Virginis in gratia praeordinata a Deo fuit ante praescientiam peccati, ita ut ipsa Mater Domini, futura fuisset, etiamsi Adam non peccasset. Et mirum profecto, quei sibi tantum tribuat humana infirmitas (rectius dicam, temeritas) ut sine ulla Scripturarum luce, confidentissime concipiat ac dirigat in mente Dei consilia & decreta ab aeterno condita, quasi ea oculis cerneret, manu tangeret. Addunt, Conceptionem Virginis majorem ei attulisse Gratiam, quam Gratia omnium Beatorum collectivae sumptorum. Nolo ultra progredi, atque hujusmodi fursive chartam onerare. Uno verbo dicam, haec atque alia id genus a severioribus Theologis nihil aliud reputari, quam Somnia vigilantium piorum, inter quae & Visiones piarum mulierum, quam parum aut nihil intersit, nullo negotio agnoscas. Pete, an ejusmodi ornamentis Deipara delectetur, quibus nullum solidum Veritatis fundamentum divina Scriptura aut Traditio sufficit: nemo cordatus credat. Apud homines leves corde Adulatio quidem gratiam invenire potest, non vero in Beatorum animis, qui proinde effugere atque odisse credendi sunt, quidquid non prudens, humilis ac bene fundata Pietas, sed intemperantium Ingeniorum ambitio aut simplicitas excogitavit, quae e Novitate sententiarum sibi gloriam nominis, potius quam Virgini honorem videntur conquirere. Eam ob causam Sanctus Anselmus in Libro de Excell. Virgin. indecens esse reputabat, de Beata Marre Dei quid dubitabile in laudem ejus recitari, quum ea, quae incunctanter de illa vera existunt, tanta laudis materia sint referta, ut quicumque in laudando eam morari desiderat, necesse sit, ut facultas ejus magnitudini rei & veritati succumbat. Proinde ab his melior Theologia, & sobria Pietas abstinent atque abhorrent, quando, unum constans Nego imaginarias omnes has moles dissolvere ac deicere potest. Quod tamen dolendum, ita hujusmodi*

piis doctorum virorum imaginationibus, uti ex mulierum Revelationibus nonnulli oblectantur eisque assuescunt, ut eas pari ardore & credulitate excipiant, aut in Libros inferant, atque Evangelicas Veritates: quod & nuper factum vidimus in Vita Beatissimae Virginis edita, quae ad satietatem, ne dicam ad nauseam, aerea haec scita cum certis commiscet. Consultat prudens Lector, quae Gersonius in Epistola ad Joannem Bassandi edita Tom. I. pag. 450. scribit, eos potissimum redarguens, qui ita argumentantur: *Christus potuit, & potest multa facere, & hoc decet eum: ergo fecit aut faciet. Consequentia haec, subdit Gersonius, quae fit a multis, saepe fallit per fallaciam peritiosis principii &c.* Tum aut haereticis aut temeritatis damnat asserentes, *Christum communicasse Matri suae, statim dum Concepta aut Nata fuit, gloriosam & consummatam felicitatem, usumque perfectae rationis aut cognitionem lucidissimam totius decursus vitae suae & Filii &c.* Reliqua praetereo.

Neque tamen heic stetit in nonnullis novandi ardor. Non solum quae Veteres ignorarunt, suo ingenio adinvenisse sibi sunt visi, sed etiam abjectis majorum sententiis, novas procuderunt, quas quia pia genti gratiores censuerunt, ideo animosius evulgare non sunt veriti. Neque inanis fuit spes, ruente multorum Pietate in amplexum cujuscumque narrationis aut opinionis, dum ad augendam Deiparae, Sanctorum & Populi sui gloriam pertinere videatur. Sed ubinam sunt, bone Deus, principia verae Theologiae? Dicam non peregrina, non ignota, sed quae vel tirones in vestibulo tam sublimis Scientiae nosse possunt, aut debent, & certe non ignorat Parthenotimus ipse. Quidquid a Revelatione Dei pendet, haurire nos tantummodo possumus aut e divinis Scripturis, secundum interpretationem Ecclesiae Catholicae expositis, aut e Traditione Apostolica, per Decreta Romanorum Pontificum, per Concilia, per Sanctos Patres ad nos transmissa. Theologi, qui post Annum a Christo Nato Milleimum illustrare hanc omnium nobilissimam Scientiam coeperunt, etsi multis destituti subsidiis, quibus aetas nostra abundat, ad hos tamen fontes intenti semper fuere, inde Revelationem aut explicitam, aut implicitam educturi. Exploratum quippe iis erat, posse quidem humanam Rationem ex indubitatis ac evidentibus principiis alias eruere Veritates; sed ubi de iis agitur, quae Deus facere, & non facere potuit, tunc nisi is revelaverit, quid revera fecerit, succumbere prorsus sentimus ipsius Rationis vires, & ineptas tantum aut temerarias sententias per ipsam procudi. Audi Sanctum Thomam in 3. Quest. I. Art.

Art. III. *Ea, quae ex sola Dei voluntate proveniunt supra omne debitum creaturae, nobis innotescere non possunt, nisi quatenus in Sacra Scriptura (addo aut in Traditionis sacrae monumentis) traduntur, per quae divina voluntas nobis innotescat.* Et quid si interpretationi divinarum Litterarum, aut Traditionum Patrum palam, sive clanculum, novae istae sententiae adversentur? Nonne error, & ubi pertinacia adjungatur, Haeresis inde proficiscitur? Exemplum temeritatis hujus huc advocare juvat, argumento, quod prae manibus habemus, perquam affine, ex quo dignoscat Lector, quid possint Ingenia sine freno speculationibus innutrita; & quid prurigo & amor *Novitatis*, quidve intemperans *Pietatis* sive *Devotionis* aestus gignere inter homines possit. Denique Parthenotimus ipse hinc intelligere poterit, quae ratio habenda sit Theologorum, ubi pauci in sententiis dissentiant a communi Sanctorum Patrum, ipsorumque praestantiorum Theologorum doctrina.

C A P U T XXIV.

DEBITUM Peccati Originalis Veteres omnes in Virgine agnovere. Quando caepta est tribui eidem ab ipso Immunitas. Patrum & Theologorum chorus concors adversans hujusmodi sententiae.

USQUE ad Annum Christi 1613. omnes fere, qui a macula *Peccati Originalis exemptam* credidere Sanctissimam Christi Matrem, agnoscebant tamen, ac fatebantur, illam nequaquam fuisse immunem a *DEBITO* ipsius Peccati, a quo Peccato incurrendo postea singulari divinae bonitatis privilegio praeservatam contendebant. An quisquam ante annum illum Opinionem diversam tradiderit, ignoro. Illud certum, si quis talia proferre est ausus, ab insignium Theologorum choro concordia auctoritatem & vocem ei ademptam fuisse. At postquam commentitii veterum Libri de Conceptione Immaculata tractantes, ac praesertim *Laminae Granatenses*, eandem sententiam ipsis Apostolis notam atque probatam mentientes, in Hispania prodire; eaque figmenta veluti testes e coelo demissi, tanta, ut vulgo credebatur, cum gloria Hispanicae gentis excepta fuere: tunc effraenata ingenia nihil non permixtum sibi censuerunt. Tunc ergo nonnulli ex Hispanis Theo-

logis venditare coeperunt, Scotisticam de Conceptione sententiam *Ceram* evalisse; ac posse *divina Fide* credi cum Veritate conjunctam; & proinde *Martyrii* nomen & praemium iis minime negandum, qui pro ejusdem propugnatione tormentis & securibus suum corpus offerrent. Aliquas quoque partis roboris, idest audaciae, sententias exco-
gitarunt, ac palam defendendas susceperunt, quas praecedenti Capite innui. Quod potissimum nunc animadvertendum, eodem Anno 1615. in Thesibus publicis audiri primum coepta est ea propositio: *Deiparam minime contraxisse Debitum peccati Originalis*. Ad Toletanae Inquisitionis examen pertracta haec Opinio, tum ad Matritensis Inquisitionis supremum Tribunal, accedentibus etiam, ut ajunt, plurium Academicarum votis, evalisse traditur illaesa. Certatim deinde convolarunt alii ad eam amplectendam atque tuendam, turgidusque fluvius adeo sensim crevit, ut quamquam meliorum sententia & vox obfisteret, obices omnes, repagula cuncta contemserit atque confregerit. Quid Plura? Si fides Auctori, qui Historiam edidit Controversiae de Conceptione Virginis Libri IX. Cap. XIV. Opinio haec *Hodie communior est in Scholis*. Equidem hoc ab illo, uti & alia multa, perperam scriptum opinor, quum gravissimi in Hispania quoque Theologi adversus ejusmodi sententiam pugnarint, pluresque Scholae Italicae, Gallicae, Germanicae, ac Belgicae eandem averfentur. Attamen quaecumque sit Theologorum recentium copia, obstare heic minime poterit, quominus novitia haec Opinio gravi censurae eripiat, ubi *sam* deprehendamus concordiam *Sanctorum Patrum Traditioni*, & doctrinae *Communi* Theologorum usque ad Annum 1615. adversantem, ac praeterea a melioribus subinde etiam improbatam. Quis enim ferat in Theologiam & doctrinam Ecclesiae invehi inconstantiam illam, quam in Legum Civilium Scientiam irrepsisse intuemur, dum pro varietate temporum, Legislatorum, ac Interpretum, quae Communes olim sententiae fuere, in desuetudinem abeunt, succedentibus novis, in imo contrariis? Non solum ergo operae pretium fore, sed plurimi interesse Catholicae Ecclesiae, unusquisque judicabit, diligentius introspecti in Opinionem illorum, qui a *Deipara Debitum Peccati Originalis* excludunt. Nam si revera haec vitio Novitatis illius laborat, quae Traditioni Veterum opponitur: ipsam continuo explodendam esse constabit. Et jamdiu quidem rem ita se habere ostenderunt inter ipsos Hispanos Theologi Salmanticenses Ordinis Carmelitarum Excalceatorum, quorum Opera Theologica, multis constantia Tomis, ac multa laude digna, in Italia quoque, hoc est Venetiis, Anno 1677. publicis ty-

pis tradita fuere, quanquam & ipsi pro Immunitate Mariae a Peccato, acerrime pugnent. Sed quoniam hosce Libros, immo & Patrum loca ab ipsis commemorata, nonnulli aut minime legunt, aut lesta contemnunt, juvat nunc eadem methodo uti, qua usi sunt iidem Salmanticenses ad confutandam hujusmodi Opinionem: hoc est ante omnium oculos sistere easdem Patrum sententias, tum ab ipsis Salmanticensibus Tom. IV. Curs. Theolog. collectas, tum celeberrimo viro Dionysio Petavio Soc. Jesu productas Tom. VI. Theologiae Dogmaticae. Neque enim unquam legi Bandellum, Turrecrematam, Spinam, Launojum, aliosque id genus Scriptores, praeter Cardinalem Cajetanum. Quod ubi praestitero, luculentius perspiciet Lector, quantum influxus habeat exemplum istud ad prodendum, inutili conatu proferri quorundam Theologorum auctoritatem, ut Voto Sanguinario patrociniū comparetur. Quod si ex hisce Sententiis nonnullae videbuntur ipsam infirmare, aut dejicere Scotisticam Sententiam de Conceptione Virginis, rationem indicabo, per quam illius patroni loca ista minime dissimulantes, ab eisdem sese, suamque sententiam expedire se posse sibi persuadent.

Clemens Alexandrinus Anno Christi 198.

Paedagog. Lib. III. Cap. XII. „ Solum Verbum est, in quod Peccatum non cadit: est enim peccare natura omnibus innatum & commune „

Tertullianus Anno Christi 208.

Libro de anima Cap. 41. „ Solus Deus sine Peccato, & Solus homo sine Peccato Christus, quia & Christus Deus „

Origenes Anno 240.

Homilia XII. in Leviticum ex versione Ruffini haec habet. „ Scriptura dicit: Nemo mundus a forde; nec si unius diei fuerit vita ejus. Hoc ipso ergo omnis, qui ingreditur mundum, quod in vulva matris est positus, & quod materiam corporis ab origine, paterni sanguinis sumit, in patre & in matre contaminatus dici potest. Solus vero meus Jesus Mundum ingressus, in matre non pollutus „ Cetera vide, uti & *Homiliam VI. super Numeros.*

Dionysius Alexandrinus Anno 260.

In Epistola Synodica ad Paulum Samosatenum, si tamen illius est, certe antiquissima „ Nullus Peccati est expers, nisi Solus Christus, scilicet & Pater Christi, & Spiritus Sanctus „ Ita & alii Ecclesiae Graecae Patres, nempe Gregorius Nyssenus, cujus verba adfert Sanctus Thomas in Caten. Luc. 2. & Sanctus Ephrem Syrus in Sermone de Passio-

Passione, & Chrysostomus Homilia VI. de Penitent. „ Christum Solum sine Peccato *depraedicarunt* „.

Sanctus Hilarius Anno 360.

Ejus verba adfert Sanctus Augustinus Lib. I. Cap. III. contra Julianum Pelagianum, *quae ejusmodi sunt, ubi de Christi Carne agit.*
 „ Ergo cum missus est in similitudinem Carnis Peccati, non sicut
 „ carnem habuit, ita habuit & Peccatum. Sed quia ex Peccato omnis
 „ nris Caro est, a Peccato Adam parente deducta, in similitudine
 „ Peccati carnis est missus, existente in eo non Peccato, sed Peccati
 „ carnis similitudine „. *Idem Tract. in Psalm. 118. de Christo ait.*
 „ Ipse utique perfectus, & sine Peccato Solus, & unus, in cujus ore
 „ dolus non fuit „. *Idem Tract. in Psalm. 138. in fine.* Ecce venit
 „ princeps hujus mundi, & non invenit in me quidquam. Solus enim
 „ extra Peccatum est Dominus noster Jesus Christus.

Sanctus Ambrosius Anno 385.

„ Dicit Beatus Ambrosius (*teste Augustino Lib. 2. Cap. 9. contra Julianum*) unum Solum hominem Mediatorem Dei & hominum, eo
 „ quod sit natus ex Virgine, nec senserit nascendo Peccatum, generationis
 „ obnoxiae vinculis non teneri. Omnes autem homines sub
 „ Peccato nasci, quorum ipse ortus in vitio est: quia Concupiscentiae
 „ voluptate concreti, prius subirent contagia delictorum, quam
 „ vitalem de hoc aere spiritum ducerent. *Olim vero Obnoxii appellabantur*
 „ *Servi. Verba item Ambrosii e Libro de Arca Noe Augustinus adferebat*
 „ *Cap. II. ejusdem Lib. 2. contra Julianum:* „ Per unum
 „ Dominum Jesum salus ventura nationibus declaratur, qui solus potuit
 „ (*Floriacensis Codice praeunte Monachi Benedictini scribunt Non*
 „ *Potuit*) justus esse, cum generatio omnis erraret, nisi (*fortassis*
 „ *addendum quia*) ex Virgine generationis Obnoxiae privilegio minime
 „ teneretur. Ecce (*inquit idem Ambrosius*) in iniquitatibus conceptus sum,
 „ & in delictis peperit me mater mea: dicit is, qui justus prae ceteris
 „ putabatur. Quem igitur jam justum dixerim, nisi horum liberum vinculo-
 „ rum, quem naturae communis vincula non teneant? Omnes sub Peccato: ab Adam in omnes regnabat
 „ mors. Veniat Solus Justus in conspectu Dei, de quo jam non exceptione
 „ dicatur: Non peccavit in labiis suis; sed peccatum non fecit „. *Tum pergit dicere Sanctus Augustinus:* „ Huic dic, si
 „ audes, quod Diabolus fecerit hominum conditorem, qui utriusque
 „ sexus commixtione nascuntur; quandoquidem Solum Christum, quia
 „ sit natus ex Virgine, a vinculis Obnoxiae generationis excepti, omni-

„ mni-

„mnibus ceteris ex Adam sub peccati obligatione nascentibus, quod
 „utique Peccatum Diabolus seminavit „ . *Idem Sanctus Augustinus*
Lib. 1. Oper. Imperfecti. contra Julianum ait : „ En adest ille Ambro-
 „sius : de hoc in quod inveheris, quid dicat, vide. Quomodo So-
 „hus, inquit in Libro de Arca, potuit justus esse Christus, cum ge-
 „neratio omnis erraret, nisi natus ex Virgine generationis Obnoxiae
 „privilegio minime teneretur „ ? Tum subdit *Augustinus :* „ Audi ad-
 „huc, audi, & proterviam linguam frontis elisione compesce „ . *Ar-*
que heic sequentia refert Ambrosii verba expressa e Lib. 11. in Cap.
11. 19. Lucae : „ Non enim virilis coitus vulvae virginalis secreta re-
 „seravit, sed immaculatum semen inviolabili utero Spiritus Sanctus
 „infudit. Solus enim per omnia ex natis de femina sanctus Domi-
 „nus Jesus, qui terrenae contagia corruptelae, immaculati partus no-
 „vitate non senserit, & coelesti majestate depulerit „ . *Haec ipsa Am-*
brosii verba nobis in Horis Canonicis ad Festum Circumcisionis Domini
Ecclesia praescribit recitanda. Addit heic Augustinus ad Julianum con-
versus : „ Cernis nempe, quod dico, quis dixerit ? Cernis, quidquid con-
 „tra me dicis, contra quem dicas ? Si enim ego hinc sum Discipulus
 „Manichaei, hoc est & ille. Non est autem hoc ille, qui haec an-
 „te nos dixit : Non est hoc igitur, quisquis haec dicit ; sed Haere-
 „ticus manifestus est, quisquis huic antiquo Catholico Dogmati con-
 „tradicit „ . *Sanctus Augustinus isidem in Libro contra duas Episto-*
las Pelagian. Lib. IV. Cap. XI. haec Ambrosii verba in Isaiam com-
memorat : „ Idcirco Christus Immaculatus, quia nec ipsa nascendi so-
 „lita condicione maculatus est „ . *Addit haec alia de Domino :* „ Di-
 „gnum etenim fuit, ut qui non erat habiturus corporeae Peccatum
 „prolapsionis, nullum sentiret generationis naturale contagium. Me-
 „rito ergo David flebiliter in se deploravit ipsa inquinamenta natu-
 „rae, & quod prius inciperet in homine macula, quam Vita „ .
Idem Sanctus Augustinus Lib. 11. Cap. 3. contra Julianum haec verba
e Tractatu Sancti Ambrosii contra Novatianos, sive de poenitentia Lib.
I. Cap. 111. describit : „ Apostolus de Christo Non in similitudinem
 „carnis ait, quia Christus veritatem suscepit carnis humanae, non
 „similitudinem. Neque in similitudinem Peccati ait, quia Peccatum
 „non fecit, sed Peccatum pro nobis factus est. Sed venit in Simili-
 „tudinem Carnis Peccati, hoc est suscepit, similitudinem carnis pec-
 „catricis. Non enim sicut Omnis homo ex virili & feminea permi-
 „xtione generatus, sed natus de Spiritu Sancto, & de Virgine, Im-
 „maculatum corpus susceperat, quod non solum nulla vitia macula-

„ ve-

„ verant, sed nec generationis, aut conceptionis concretio injuriosa
 „ fuscaverat. Nam Omnes Homines sub Peccato Nascimur, quorum
 „ ipse ortus in vitio est, sicut habes lectum, dicente Domino: Ecce
 „ enim in iniquitatibus conceptus sum, & in delictis peperit me ma-
 „ ter mea. Christi autem caro damnavit peccatum, quod nascendo
 „ non sensit, quod moriendo crucifixit „. *Denique idem Sanctus Au-*
gustinus Libr. I. Cap. 34. de Nuptiis & Concupiscenti. haec Ambrosii
verba in illius expositione in Isaiam profert: „ Ideo & quasi homo
 „ per universa tentatus est, & in similitudinem hominum cuncta su-
 „ stinuit, sed quasi de Spiritu natus, abstinuit a peccato. Omnis e-
 „ nim homo mendax, & nemo sine peccato, nisi Solus Deus. Ser-
 „ vatum est igitur, ut ex viro & muliere, idest per illam corporum
 „ commixtionem Nemo videatur expers esse delicti. Qui autem ex-
 „ pers est Delicti, expers est etiam hujusmodi conceptionis „.

Sanctus Joannes Chrysostomus Anno 404.

In Psalmi LVIII. vers. 5. verba: Neque iniquitas mea, neque &c.
ait: „ Solus Christus haec dicere potuit, qui Peccatum non habuit,
 „ & idcirco eursus salutis nostrae direxit „. *Vide Catenam Graecor.*
Patrum a Corderio editam. Tom. II. pag. 155.

Zosimus Papa Anno 417.

In Epistola, cujus Fragmentum adfert Sanctus Augustinus in Epistola
190. olim 157. haec scribebat: „ Nullus enim, nisi qui Peccati ser-
 „ vus est, liber efficitur, nec Redemptus dici potest, nisi qui vere
 „ per Peccatum fuerit ante captivus, sicut scriptum est: Si vos Fi-
 „ lius liberaverit, vere liberi eritis „.

Sanctus Augustinus Anno 425.

Libr. I. Cap. XII. de Nuptiis & Concupiscenti. loquens de Conceptione
Christi haec habet: „ Solus ibi nuptialis concubitus non fuit, quia in
 „ Carne Peccati fieri non poterat sine illa carnis pudenda Concupi-
 „ scentia, quae accidit ex peccato: sine qua concipi voluit, qui fu-
 „ turus erat sine Peccato, non in Carne peccati, sed in similitudi-
 „ nem Carnis peccati; ut hinc etiam doceret, omnem, quae de con-
 „ cubitu nascitur, Carnem esse Peccati: quandoquidem sola, quae non
 „ inde nata est, non fuit Caro peccati „. *Epistola olim 57. nunc*
187. „ Hos ergo excepto lapide angulari (idest Christo) non vi-
 „ deo, quomodo aedificentur homines ad habendum in se inhabitan-
 „ tem Deum, nisi cum fuerint renati, quod non possunt esse, ante-
 „ quam nati „. *Lib. IV. Cap. 4. contra duas Epistolas Pelagian.* „ Si
 „ enim propterea morimur, quia ille (Adam) mortuus est: ille au-

„ tem

tem mortuus est, quia peccavit, poenam dicunt (*Pelagiani*) transire sine culpa, & innocentes parvulos injusto supplicio puniri, trahendo mortem sine meritis mortis. Quod de uno Solo Mediatore Dei & Hominum Christo Jesu Catholica Fides, jubet “. *Libro X, de Genesi ad litteram, Cap. 18:* ” Et quid incoinquinatius illo utero Virginis? cujus Caro etsi de propagatione venit, non tamen de Peccati propagine concepit. *Addis:* Proinde Corpus Christi, quamvis ex carne seminae assumptum est, quae de illa Carnis peccati propagine concepta fuerat: tamen quia non sic in ea conceptum est, quomodo fuerat illa concepta, nec ipsa erat Caro peccati, sed similitudo Carnis peccati “. *Eodem Libro X. de Genesi ad litteram.* ” Secundum rationem quippe illam seminalem ibi (*idest in lumbis Abrahae*) fuit Levi, qua ratione per concubitum venturus erat in Matrem, secundum quam rationem non ibi erat Christi Caro, quamvis secundum ipsam ibi fuerit Mariae Caro. Quapropter nec Levi, nec Christus in lumbis Abrahae secundum animam; secundum Carnem vero & Levi & Christus; sed Levi secundum concupiscentiam carnalem, Christus autem secundum solam substantiam corporalem. Cum enim sit in semine & visibilis corpulentia, & invisibilis ratio, utrumque cucurrit ex Abraham, vel etiam ex ipso Adam usque ad Corpus Mariae; quia & ipsum eo modo conceptura & exortum est. Christus autem visibilem carnis substantiam de carne Virginis sumpsit: ratio vero conceptionis ejus non a semine virili, sed longe aliter, ac desuper venit “. *Libro VI. contra Julianum Cap. 4.* ” Tu dicis etiam pro peccatoribus mortuum esse Christum: ego dico nonnisi pro peccatoribus mortuum, ita ut respondere cogaris: si nullo peccato parvuli obstricti sunt, non esse pro parvulis mortuum. Dicit enim ad Corinthios: Quoniam unus pro omnibus mortuus est; ergo omnes mortui sunt, & pro omnibus mortuus est &c. Quos igitur hoc loco intelligis mortuos? Numquid eos, qui de corpore exierunt? Quis ita desipiat, ut hoc sapiat? Eo modo itaque intelligimus mortuos, pro quibus omnibus mortuus est Christus, quomodo alibi dicit (*Col. 2. 13.*) *Et vos, cum essetis mortui in delictis, & praepreio carnis vestrae, vivificavit cum illo.* Ac per hoc Unus, inquit, pro omnibus mortuus est: ergo omnes mortui sunt &c. Quia ergo non in corpore, restat ut in peccato esse mortuos omnes, pro quibus Christus mortuus est, nemo neget, nemo dubitet, nisi qui se non negat, aut dubitat esse Christianum. *Lib. II. Cap. XX. de Peccat. merit.* In hoc autem loco

Tom. V.

B b

” utrum

utrum esset in filiis hominum, vel esse potuisset, aut posset, qui non ex peccato ad justitiam perfectissimam perveniret, sed nullo unquam peccato esset obstrictus, hoc quaeritur. Ideo si illa vera sunt, quae tam multa de parvulis diximus, nec est in filiis hominum quisquam, nec fuit, nec erit, excepto Uno Mediatore, in quo nobis propitiatio, & justificatio posita est. *Supra quoque dixerat.* Hunc prorsus nisi Unum Mediatorem Dei & hominum hominem Christum Jesum, nullum vel esse, vel fuisse, vel futurum esse, Certissimum est. *Libro eodem Cap. XXIV.* Solus ergo ille etiam homo factus manens Deus, peccatum nullum habuit unquam; nec sumit Carnem peccati, quamvis de materna Carne peccati. Quod enim carnis inde suscepit, id profecto aut suscipiendum mundavit, aut suscipiendo mundavit. *Libro eodem Cap. XXIX.* Nullos existit homo, de quo in hac vita constituto veraciter dici possit, quod nullum habeat omnino peccatum, excepto uno Mediatore, qui nos Creatori nostro per remissionem reconciliat peccatorum.

Idem Sanctus Augustinus Libro de Profect. Justitiae Cap. XXI. Quisquis ergo fuisse, vel esse in hac vita aliquem hominem, vel aliquos homines putat, excepto Uno Mediatore Dei & hominum, quibus necessaria non fuerit remissio peccatorum, contrarius est divinae Scripturae, ubi Apostolus ait (*Rom. V. 12.*) *Per unum hominem peccatum intravit in Mundum, & per peccatum mors; & ita in omnes homines pertransiit, in quo omnes peccaverunt.* Et necesse est ut impia contentione asserat, esse posse homines, qui sine Mediatore Christo liberante atque salvante sint liberi salvique a peccato, quum ille dixerit (*Matth. IX. 12.*) *Non est opus sanis Medicus, sed male habentibus. Non veni curare justos, sed peccatores.* *Libro V. Cap. XIV. contra Julianum.* Quod si dementis est dicere, & sine dubio Caro Christi non est Caro peccati, sed similis Carni peccati: quid restat ut intelligamus, nisi ea excepta, omnem reliquam humanam Carnem esse peccati? Et hinc apparet, illam Concupiscentiam, per quam Christus concipi noluit, fecisse in genere humano propaginem mali: quia Mariae corpus quamvis inde venerit, tamen eam non trajecit in corpus, quod inde non concepit. Ceterum Corpus Christi inde dictum esse in similitudine Carnis peccati, quia omnis alia hominum Caro peccati est. Quisquis negat, & carnem Christi ita carni comparat nascentium hominum caeterorum, ut asserat, utramque esse puritatis aequalis, de-

„detestandus Haereticus invenitur „ Sunt & alia supilia loca Lib.
 I. Cap. XXVIII. & XXIX. de Peccator. meritis. & remissi. Et Libro
 XX. Cap. VI. de Civit. Dei, & Lib. II. Cap. LXXX. & CCXVIII.
 & CCXXV. Oper. Imperfect. Et Lib. IV. Cap. LXXIX. & LXXX-
 VIII. & sequ. Et Lib. VI. Cap. XXXIV. Tum Lib. VI. Cap. XXXV.
 ejusdem Oper. Imperf. haec habet : „ Nunc autem Christus missus est
 „ in similitudine Carnis peccati, quia Solus veram carnem sic ha-
 „ buit, ut non esset Caro peccati, sed ejus similitudo, Ac per hoc
 „ necesse est, ut fateamur, Carnem ceterorum hominum esse pecca-
 „ ti, cui similis facta est vera caro Christi, sed non caro peccati „
 Lib. IV. Cap. IV. contra duas Epistol. Pelagian. „ Nemo mundus a
 „ sorde nec infans, cujus est diei unius vita super septem. Sinite mi-
 „ serum remissionem accipere peccatorum per eum; qui Solus nec
 „ parvus, nec magnus potuit habere Peccatum „, Enarrat in Psalm.
 „ L. Cap. X. Definita est sententia. In Adam, inquit Apostolus Rom.
 „ V. omnes peccaverunt. Solus esse Innocens Infans potuit, qui de
 „ opere Adam non natus est „, Item eodem Libro VI. Cap. CCXVIII.
 Operis Imperfect. haec habet : „ Si autem quaeritur, quomodo Chri-
 „ stus non fuerit decimatus, cum etiam ipse, quod manifestum est,
 „ secundum originem carnis fuerit in lumbis Abrahae, quando a
 „ Melchisedech pater ille decimatus est : nihil occurrit, nisi quod
 „ Maria quidem mater ejus, de qua carnem sumpsit, de carnali
 „ Concupiscentia parentum nata est; non autem Christum sic ipsa
 „ concepit, quoniam non de virili semine, sed de Spiritu Sancto pro-
 „ creavit. Non ergo pertinuit ad rationem virilis seminis, per quam
 „ fuerunt in lumbis Abrahae, quos in illo decimatos esse sacra Scri-
 „ ptura testatur. Ita Augustinus in postremo suorum Librorum haec et
 „ nim scribentem mors intercepit „ : Item Lib. II. Cap. XXXV. de
 Peccator. Meritis. „ Teneamus indeclinabilem Fidei confessionem. Solus
 „ unus est, qui sine Peccato natus est in similitudine carnis peccati „.
 In Lovaniensi quoque editione Operum Sancti Augustini Sermo XLII.
 de Tempore dubitabatur, num Augustinianus foret. Ei revera tri-
 buendum non esse moment Benedictini Monachi Congregat. S. Mauri
 in nupera Editione. Attamen quum vetustum sit, & confarcinatum
 noverimus e variis Augustini locis, immo hunc ipsum nobis quotan-
 nis legendum Ecclesia Romana exhibeat in Horis Canonicis Vigiliae
 Epiphaniae, non incongruum erit, pauca haec inde referre dicta de
 Christo. „ Solus enim sine peccato est natus, quem sine virili com-
 „ plexu non concupiscentia carnis, sed Obedientia genuit mentis „.

Et quidem Augustinus Lib. II. Cap. XXXV. & ipse dixerat: „Solutus unus est, qui sine peccato natus est in similitudinem carnis peccati &c. Per quae ne putet quisquam indicari, Virginem caruisse sanctificatione ante nativitatem, animadvertendum est, Conceptionem quoque appellari *Nativitatem in sacris Literis. Noli timere accipere Mariam conjugem tuam: quod enim in ea Natum est, de Spiritu Sancto est.* Ita Angelus de Joseph Matt. I. 20. Conceptionem Christi significans. Id quod Augustinus ipse agnovit, scribens Enarrat. in Psalm. LVII. numer. V. „Non enim ex visceribus tantum homo nascitur, sed & in visceribus. Prius nascitur in visceribus, ut possit nasci ex visceribus. Propterea dictum est Mariae: *Quod enim Natum est in te, de Spiritu Sancto est.* Nondum de illa natum erat, sed jam in illa natum erat „.

Sanctus Leo Magnus Papa Anno 445.

Sermone I. de Nativitate. Domini nostri Jesu Christi: „Dominus noster peccati mortisque destructor sicut Nullum a reatu liberum reperit, ita liberandis Omnibus venit „. *Es infra.* Alienum quippe ab hac nativitate est, quod de omnibus legitur (*Job. XIV. 4.*) „Nemo mundus a sorde, nec infans, cujus est unius diei vita super terram. Nihil ergo in istam singularem Nativitatem de carnis concupiscentia transivit, nihil de peccati lege manavit „. Hunc etiam Sermonem in Horis Canonicis quotannis nobis recitandum Ecclesia praescribit Natali die Salvatoris nostri. *Sermone II. de Nativitate Domini:* „Nova nativitate genitus est, conceptus a Virgine, natus ex Virgine sine paternae carnis concupiscentia, sine maternae integritatis injuria: quia futurum hominum Salvatorem talis ortus decebat, qui & in se habere humanae substantiae naturam, & humanae carnis inquinamenta nesciret „. *Es infra:* „Venit enim Dominus noster contagia nostra auferre, non perpeti; nec succumbere vitiis, sed mederi „. *Es infra.* „Nam superbia hostis antiqui non immerito sibi in omnes homines jus tyrannicum vindicabat, nec in debito dominatu premebat, quos a mandato Dei spontaneos in obsequium suae voluntatis illexerat. Non itaque juste amitteret originalem humani generis servitutem, nisi de eo, quod subegerat, vinceretur. Quod ut fieret, sine virili semine editus est Christus ex Virgine, quam non humanus coitus, sed Spiritus Sanctus fecundavit. Et cum in Omnibus Matribus non fiat sine peccati sordis conceptio, haec inde purgationem traxit, unde concepit. Quod enim paterni seminis transfusio non pervenit, peccati se illic origo

„ non

„ non miscuit. Inviolata virginitas concupiscentiam nescivit, subitan-
 „ tiam ministravit. Assumpta est de Matre Domini natura, non cul-
 „ pa. Creata est forma servi sine conditione servili: quia novus ho-
 „ mo sic temperatus est veteri, ut & veritatem susceperet gene-
 „ ris, & vitium excluderet vetustatis. „ *Sermone IV. de Nativit. Do-*
 „ *mini:* „ Terra enim carnis humanae, quae in primo fuerat praevari-
 „ catore maledicta, in hoc Solo Beatae Virginis partu germen edi-
 „ dit benedictum, & a vitio suae stirpis alienum. Cujus spiritalem
 „ originem in regeneratione quisque consequitur, & omni homini re-
 „ nascenti aqua Baptismatis instar est uteri virginalis, eodem Spiritu
 „ Sancto replente fontem, qui replevit & Virginem; ut peccatum,
 „ quod ibi vacuavit sacra conceptio, heic mystica tollat ablutio. *Ser-*
 „ *mone VIII. de Nativit. Domini.* „ In totius igitur humani generis
 „ strage communi, unum solum fuit remedium sub divinae rationis
 „ occulto, quod posset subvenire prostratis, si aliquis filiorum Adam
 „ originalis praevaricationis alienus, atque innocens nasceretur, qui
 „ ceteris exemplo prodesset & merito. Sed quia hoc naturalis gene-
 „ ratio non sinebat, nec poterat vitiatæ radici sine semine propago
 „ esse, de quo Scriptura dicit (*Job. XIV. 4.*) *Quis potest facere*
 „ *mundum de immundo conceptum semine?* Nonne Tu, qui solus es?
 „ Dominus David factus est Filius David, & de promissi germinis
 „ fructu proles est orta sine vitio, gemina conveniente natura. „ *E-*
 „ *pistola XXV. ad Julianum Episcopum Coensem.* „ Nativitas Domini
 „ secundum carnem, quamvis habeat quaedam propria, quibus hu-
 „ manae conditionis initia transcendant, sive quod Solus ab inviolata
 „ Virgine sine Concupiscentia est conceptus, & natus, sive quod ita
 „ visceribus matris est editus, ut & foecunditas pareret, & virginitas
 „ permaneret: non alterius tamen naturae erat ejus caro, quam no-
 „ stra. „ Quid significet *Solus*, qua voce tot usi sunt in hocce argu-
 „ mento, nos docet Ecclesia, quum in Hymno Virginum de Deipa-
 „ ra ait: *Quae Sola Virgo parit.* Adhuc tamen Sanctum Leonem
 „ audiamus in *Epistola CXVII. ad Monachos Palaestinos:* „ Ut per
 „ unum, ait, hominem fieret renovatio vetustatis; & mortis vincu-
 „ lum unius praevaricatione contractum, unius morte, qui Solus mor-
 „ ti nihil debuit, solveretur. „ *Infra.* „ Nam quia captivitatis no-
 „ strae resolvi originalia vincula non poterant, nisi existeret homo
 „ nostri generis, nostraeque naturae, quem veteris debiti praejudicia
 „ non tenerent &c. *Sunt & alia loca, quae quia similia, praesermir-*
 „ *to.* Vide supra Cap. IX. unum ex eis ab Ecclesia nobis proposi-
 „ tum in ipsa Octava Conceptionis Deiparae.

Joannes Cassianus Anno 446.

Collat. XXII. Cap. XI. „ Hoc de illo, qui Solus est absque peccato, tanquam Singulare memoratur: *Misit Deus Filium suum in similitudinem carnis peccati*: quia veram atque integram suscipiens substantiam carnis humanae, non ipsum Peccatum in ea, sed similitudinem Peccati suscepisse credendus est. „ *Ibidem Cap. XII.* In hoc ergo ille homo, qui natus ex Virgine est, magna a Cunctis, qui ex utriusque sexus commixtione producimur, distantia segregatur: quod cum Omnes non similitudinem, sed veritatem Peccati in carne gestemus, ille non veritatem, sed similitudinem Peccati, & verae carnis assumptionem suscepit.

Sanctus Maximus Episcopus Taurinensis Anno 450.

In Sermone VII. de Paschate inter Anecdota Muratorii Tom. IV. „ Solus Dei Filius peccatores liberat, quia solus liber est a peccato.

Sanctus Fulgentius Anno 525.

Libro de incarnat. & Gratia Cap. VI. „ Haec est gratia, qua factum est, ut Deus, qui venit peccata tollere, quia peccatum in eo non est, homo conciperetur, atque nasceretur in similitudine carnis peccati, de carne peccati, Caro quippe Mariae, quae in iniquitatibus fuerat humana solemnitate concepta, Caro fuit utique Peccati, quae Filium Dei genuit in similitudinem carnis peccati „ . Quae heic Sanctus Fulgentius dicit, ut Salmanticenses Theologi animadvertunt, quatuordecim Episcoporum Africanae Ecclesiae auctoritate confirmatur, hoc est Daciani, Fortunati &c. qui omnes eidem Operi, ad Episcopos Orientales directo, subscribunt, uti colligitur e Cap. I. Libri Primi. *Ibidem Cap. VI.* Si enim „ Caro peccati non mendaciter dicitur, habet in se Caro ipsa peccatum; si vero peccatum non habet, falsum portat carnis peccati vocabulum. Sed eam, de qua loquimur, carnem peccati, verax discipulus veritatis Paulus appellat. „ Restat igitur, ut sicut vere caro, cum caro dicitur; ita vere in se peccatum habet cum caro peccati ore Apostolico nuncupatur. „ *Libro I. de Veris. praedestinat. interpretans locum Apostoli Roman. V. Per Unum hominem &c. haec habet*: „ Peccans igitur homo totam in se peccato subdit progeniem, quando delinquendo veram perdit libertatem; a quo enim quis devictus est, & servus addictus est, & omnis qui facit peccatum, servus est peccati. Ab hac servitute, qua nascens parvulus tenetur obstrictus, Solus Mediator Dei & hominum homo Christus Jesus liber est genitus: qui licet verus homo natus fuerit, non tamen interveniente Cuncupiscentia carnis,

„ nec ex concubitu maris & feminae, sed de Spiritu Sancto natus,
 „ ita veram Carnem de carne Matris accepit, ut Dominus verus
 „ non culpam humanaesumeret originis sed naturam. „

Homiliae editae sub nomine Episcopi Gallicani.

Habentur in Bibliotheca Patrum Tomo VI. Homiliae complures, pars
 quarum Eusebio cuidam Gallicano Episcopo, pars Eucherio Lugdu-
 nensi, aut Caesario Arelatenfis, aut Fausto Regiensi, aut antiquissi-
 mis Monachis Lirinenfibus, pars denique Brunoni Signiensi Episcopo,
 tribuuntur. Quicumque sit earum Auctor, certe perverustus est. Ea
 illius verba in *Homil. Dominicae V.* „ Accedere ad mortuum, hoc
 „ est accedere ad peccatum, &c. Omnium commune est Originale
 „ peccatum: omnes igitur ad illud accedere non dubium est &c. Nunc
 „ autem de Summo Sacerdote videamus, per quem Dominum & Sal-
 „ vatorem intelligimus. Ipse enim ad nullum mortuum accessit, quia
 „ neque Originale peccatum a parentibus traxit; neque a se pecca-
 „ tum aliquod commisit. Ipse est enim de quo scriptum est: *Qui*
 „ *peccatum non fecit, nec inventus est dolus in ore ejus.* Ipse igitur
 „ Solus est, qui ad patris & matris mortem & peccatum non acces-
 „ sit. „ *Homilia II. de Nativitate Domini, cujus initium Bene Nolitis,*
haec habet alloquendo Deiparam: „ Initiator omnium rerum abs te
 „ initiatur; & profundendum pro Mundi vita sanguinem de corpore
 „ tuo accepit; ac de te sumpsit, quod etiam pro te solvat. A pec-
 „ cati enim veteris nexu per se non est immunis nec ipsa Genitrix
 „ Redemptoris. Solus ille, licet ex debito renascatur, lege tamen ve-
 „ teris debiti non tenetur „. Vide Salmanticensis, qui per additum
 illud *per se* nihil enervari ostendunt vim istius sententiae,

Caesiodorus Anno 550.

In *Libro de Anima Cap. VII.* haec de Christo Domino habet: „ Ait
 „ Angelus: Spiritus Sanctus superveniet in te &c. Quis, rogo, in hac
 „ majestate nascendi aut Originalis Peccati credat esse culpam, aut
 „ profanam aliquam carnis suspicetur offensam? Absque peccato sine
 „ dubio venit, qui erat omnium peccata soluturus, conceptus mysti-
 „ co inspiramine, natus ex Virgine &c.

Sanctus Gregorius Magnus Papa Anno 598.

Lib. XI. Cap. ultim. in fine explicans verba Job. Quis potest facere
mundum de immundo conceptum femine? Nonne tu, qui solus es? haec
 habet: „ Potest vero hoc in loco intelligi, quia Beatus Job incarna-
 „ tionem Redemptoris intuitus, Solum vidit in Mundo hominem de
 „ immundo semine non esse conceptum, qui sic in Mundum venit
 ex

ex Virgine, ut nihil haberet de immunda conceptione. Neque enim ex viro & femina, sed ex Spiritu Sancto, & Maria Virgine processit. Solus ergo in carne sua vere mundus exstitit, qui delectatione carnis tangi non potuit: quia nec per carnalem huc delectationem venit. *Lib. I. Homil. VIII. in Ezechiel. num. 21.* In Solo sibi Unigenito Domino nostro Jesu Christo complacuit, quia hunc inter homines hominem creasse non poenituit, in quo peccatum nullum omnimodo invenit, sicut de illo per Psalmistam dicitur: *Juravit Dominus, & non poenitebit eum: tu es Sacerdos in aeternum secundum ordinem Melchisedech.* In solo ergo Redemptore nostro sibi complacuit Pater, quia in eo solo non invenit culpam, in qua se reprehendat quasi per poenitentiam.

Ferrandus, qui & Fulgentius, Diaconus Carthaginensis circ.

Annum Christi 630.

Epistola ad Anatolium Diaconum Urbis Romae in Bibliothec. Patrum Tom. IX. pag. 303. In carne Christi natura est nostrae carnis, sed non reperitur culpa naturae. Sic caro Christi carni Mariae & similis est, & dissimilis. Similis, quia inde traxit originem; dissimilis, quia non inde contraxit vitatae originis contagionem. Similis, quoniam licet voluntarias, tamen veras sentit infirmitates; dissimilis, quoniam nullas penitus neque per voluntatem, neque per ignorantiam commisit iniquitates. *Infra.* Caro Christi non erat in iniquitatibus concepta: propter quid ergo conditionem mortis videtur experta? Manifeste scimus, non necessitate, sed voluntate pro nobis mortuum fuisse Filium Dei, &c.

Clerus Romanus Sede vacante Anno Christi 639. vel 640.

In Epistola ad Episcopos Scotiae, Lib. II. Histor. Ecclesiastic. Bedae Cap. XIX. *Et primum quidem blasphemia & stultiloquium est dicere, esse hominem sine Peccato; quod omnino non potest, nisi UNUS mediator Dei & hominum homo Christus Jesus, qui sine Peccato est conceptus & parvus. Nam CETERI HOMINES cum Peccato Originali nascentes, testimonium praevaricationis Adae (etiam sine Peccato Actuali existentes) portare noscuntur, secundum Prophetam dicentem: Ecce enim in iniquitatibus conceptus sum, & in peccatis concepit me mater mea. Scripta fuit Epistola haec ab Hilario Archiepiscopo; tunc servante locum Sanctae Sedis Apostolicae, atque a Joanne Diacono, & in Dei nomine Electo, hoc est a Joanne IV. Papa tunc duntaxat Electo, & nondum consecrato, atque ab aliis Ecclesiae Romanae Primoribus. Quae foret Traditio Sedis Apostolicae, hinc etiam certissime colligas.*

Joan-

Joannes IV. Papa Anno 641.

Florebat Summus hic Pontifex circiter Annum 641. atque Apologiam scripsit pro Honorio Papa ad Constantinum Imperatorem filium Heraclii, quam primus e tenebris eripuit V. Cl. Jacobus Sirmondus Societatis Jesu. Haec ibi: „Natus est ergo secundus Adam, nullum „habens nascendo, vel cum hominibus conversando, peccatum. Etenim Verbum caro factum *in similitudine carnis peccati*, omnia nostra suscepit, nullum reatus vitium ferens ex traduce praevaricatoris exortum. Similitudinem ergo intelligimus, non carnis ejus, sed peccati „. *Et infra* „. Hoc omne humanum patitur genus sub peccato constitutum; quoniam nemo mundus est ab hoc peccato praevaricationis, *nec infans*, sicut scriptum est (*Jub. XI. 16.*) *cujus est unius diei vita super terram*. Et quemadmodum Spiritus Sanctus per David ait: *Ecce enim in iniquitatibus conceptus sum, & in delictis peperit me mater mea: Sicut enim in Adam omnes peccaverunt*, secundum Apostolum, *ita in Christo omnes justificabuntur. Et sicut per unum hominem peccatores constituti sunt multi, ita per unum hominem iusti constituentur multi*. Ergo Unus & Solus est sine Peccato Mediator Dei & Hominum homo Christus Jesus, qui in mortuis liber conceptus & natus est. „

Sanctus Hildephonus Archiepiscopus Toletanus Anno 660.

Libro de Virginitate Beatae Mariae Tom. XII. pag. 366. Bibliorb. Patr.: „At vero Beata Maria, licet ipsa de Carne peccati sit nata & procreata, ipsaque quamvis Caro peccati fuerit, non tunc jam praeveniente Spiritus Sancti gratia ab Angelo prae omnibus mulieribus benedicta vocatur? *Spiritus Sanctus superveniet in te, & Virtus Altissimi obumbrabit tibi*. Alioqui si non eodem Spiritu sanctificata est & Emundata: quomodo ejus caro non Caro peccati fuit? Et si caro ejus de massa primae praevaricationis venit: quomodo Christus Verbum caro sine peccato fuit, qui de carne peccati carnem assumpsit; nisi quia Verbum, quod caro factum est, eam primum obumbravit, in quam Spiritus Sanctus supervenit, & virtus Altissimi totam eam possedit? Propterea vere caro ejus non jam caro peccati fuit, in qua Deus totam infundit, & Verbum, quod caro factum est, sine peccato ad nos venit. „ Agnoscit nempe Sanctus Hildephonus Virginem procreatam *de carne peccati*; at quia *Sanctificata & emundata* in utero illius caro fuit, propterea *jam non caro peccati fuit*, quum Verbum Dei in illam descendit, humanam carnem sumpturus. Vide Petavium, qui hunc locum refert, & ita expli-

Tom. V.

C c

pli-

plicat, atque addit, legi ejusdem Hildephonfi Sermone XI. de Assumptione B. Virginis haec verba (quae tamen inter ejus opera edita in Bibliotheca Patrum non invenio, sed quidem inter Sermones S. Petri Damiani:) *Caro Virginis ex Adam assumpta, maculas Adae non assumpsit.* Tum dicere pergit Petavius: *Sed de Originali, ut opinor, macula non loquitur; verum de vitiis, quae Adami posteris insciunt.* Haec autem minime praetereundum est, Opusculum nuper memoratum de *Virginitate Sanctae Mariae*, a Petavio, aliisque tribus S. Hildephonso: Verum Dacherius & Mabillonius contendunt, illud *Paschasio Rasberto* esse tribuendum, qui Anno 840. floruit; ac propterea sub ejus nomine ab ipso Dacherio editum fuit in Spicilegio. Neque dissimulabo, illic legi haec etiam verba de festo die *Nativitatis* Deiparae: *Quia tam solemniter colitur, constat ex auctoritate Ecclesiae, quod nullis, quando nata est, subjacuit delictis, neque contraxit in utero sanctificata Originale Peccatum:* Et infra: *Nunc autem quia ex auctoritate totius Ecclesiae veneratur, constat eam ab omni Originali peccato immunem fuisse.* Atque haec minime Petavius & Salmanticenses ignorarunt; sed & ipsi tacite agnovere, importare tantummodo, Mariam in utero sanctificatam fuisse, quum haec alia verba praecedant: *Sic & B. Virgo Maria, nisi in utero matris sanctificata esset, minime Nativitas ejus colenda esset.* Tum vero diserte & ipse fatetur, Christum unum ab ea lege immunem fuisse, inquiens: *Plurimum desipiunt, qui dicunt eum communi lege naturae esse natum, qui non ea lege constat esse conceptus; quoniam haec lex nascendi, quae nunc lex naturae vocatur, ex vitio primae damnationis est. Et ideo ait Apostolus: Fuimus nos omnes aliquando filii irae, sicut & ceteri. Sed absit a Fidelium cordibus, ut ita Christus natus credatur filius irae, sicut Ceteri nascuntur in vitio corruptionis.*

Beda Venerabilis circ. Annum Christi 730.

In Expositione. Epistolae ad Roman. Cap. VIII. „ Ecce unde nemo „ sine peccato nascitur. Ecce propter quod Dominus non sic concipi „ voluit, quem Virgo concepit „ *Cap. V.* „ Genuit peccatores morti obnoxios primus peccator, primus praevaricator: venit ad salvandos de Virgine Salvator, qui ad te, non qua venisti, venit. „ Non enim ille de Concupiscentia maris & feminae, nec de illo vinculo concupiscentiae. *Sanctus*, inquit, *Spiritus superveniet in te.* „ Dictum est hoc Virgini in fide ferventi, non Concupiscentia carnis aestuanti „. *Commentar. in Psalm. IV.* „ Christus nullo modo cecidit, quia neque actualiter neque Originaliter. Quod actualiter

„ NON

„ non ceciderit, patet. Patet quoque, quod non Originaliter. Soli
 „ enim illi casum originalis Peccati patiuntur, qui per poenam ipsius
 „ originalis Peccati, idest per Concupiscentiam, generantur. Christus
 „ vero per Concupiscentiam generatus non est, quia sine carnali de-
 „ lectione de Spiritu Sancto conceptus est „. *In Libros Boethii de*
 „ *Trinitate:* „ Item pertinet ad nostrae Fidei fundamentum Verbi
 „ incarnatio, ut scilicet credamus Dei Filium assumpsisse carnem ex
 „ Virgine, & in Virgine: quam carnem & creando assumpsit, & as-
 „ sumendo creavit, non de nihilo carnem sibi in utero Virginis
 „ creando vel formando, sicut quidam Haeretici senserunt; sed po-
 „ tius de substantia Virginis carnem assumpsit, quam assumendo crea-
 „ vit, idest purificavit, non conceptus libidinosa lege concipiendi, &
 „ ideo immunis ab omni peccato, non tamen a poena peccati „.
Homilia in Feriam Quatuor Temporum, seu in Cap. Lucae 1. „ Mis-
 „ sus est Angelus &c. Ad distinctionem nostrae sanctitatis Jesus sin-
 „ gulariter Sanctus nasciturus asseritur. Nos quippe etsi Sancti effici-
 „ mur, non tamen nascimur: quia ipsa naturae corruptibilis condi-
 „ tione constringimur, ut merito cum Propheta gementes singuli di-
 „ camus: *Ecce enim in iniquitatibus conceptus sum, & in delictis pe-*
 „ *peris me mater mea.* Ille autem Solus veraciter Sanctus est, qui
 „ ut ipsam conditionem naturae corruptibilis vinceret, ex commixtio-
 „ ne carnalis copulae conceptus non est „.

Etherius Uxamensis Episcopus, & Beatus Abbas, Anno 790.

Libro 1. adversus Elipandum, apud Canisum Part. 1. Tom. II. Le-
ction. Antiquar. pag. 340. Edition. Basnag. „ Non potest Dei Filius
 „ tibi esse similis, quia & ipsa Conceptione humana multum dissimi-
 „ lis tibi est. Ille conceptus de Spiritu Sancto, non de virili semi-
 „ ne, SOLUS SINE PECCATO; Tu vero de virili semine, de
 „ massa perditionis, & concupiscentia utrorumque parentum. Et na-
 „ tus de muliere in peccatis conceptus, & in peccatis natus. Ille
 „ enim inter homines SOLUS natus de Virgine, & Solus Sine Pec-
 „ cato conceptus, & Solus Sine Peccato natus „.

Concilium Foro-Julienſe Anno 791.

In Symbolo Fidei ibi dicitur: „ Non putativus Dei Filius, sed ve-
 „ rus: non Adoptivus, sed proprius, quia numquam fuit propter ho-
 „ minem, quem assumpsit, a Patre alienus. Solus enim Sine Pecca-
 „ to natus est Homo, quoniam Solus & incarnatus de Spiritu San-
 „ cto, & immaculata Virgine novus Homo „.

Haymo Episcopus Halberstadiensis Anno 845.

Commentar. in Cap. V. Epistol. ad Romanos, qui ab aliis Remigio Antissiodorensi, de quo infra, tribuitur: „Adam exemplar est futuris
„posteris suis in peccato; quia sicut ille peccator, & mortalis exi-
„tit, ita Omnes posteri ejus peccatores & mortales nati sunt, & na-
„scuntur quotidie, transducto originali Peccato in posteros, ut Bea-
„tus Augustinus dicit, per Concupiscentiam coitus; sed per gratiam
„&c. Sicut enim nullus homo extra Adam, idest extra progeniem
„illius, ita nullus extra peccatum illius praeter Christum „.

Rabanus Maurus Archiepiscopus Moguntinus Anno 850.

*In Tractat. adversus Judaeos edito a Chiffletio, & a Martene & Du-
rand. Tom. V. Thesaur. Novi Anecdotor. quem Librum alii tribunt
Amuloni Archiepiscopo Lugdunensi iisdem temporibus florenti, Cap.
LII. haec ait:* „In illa generatione, quae secundum Adam est, Nul-
„lus absque Peccato nasci potest: in ista, quae per Christum de Ba-
„ptismo exordium sumit, omnes, qui regenerantur, absque omni de-
„licto tam Originali, quam Actuali renascuntur. Ad exemplum vi-
„delicet Redemptoris nostri, qui Solus inter homines verus homo
„sine Peccato conceptus est, & absque ullo delicto de Virgine est
„editus, ut quod primus Adam per inobedientiam contraxerat, iste
„secundus Adam per obedientiam non delinquendo, retraheret „.

Remigius Antissiodorensis Monachus Anno 890.

Enarratione in Psal. L. Tom. XVI. Biblioth. Patrum: „Et vincas,
„scilicet omnes judicatos: omnes enim iuste judicari possunt, quam-
„quam multi iusti, multum proventi: tu solus iniuste, quia Solus
„a Peccato Immunis. Cum judicaris, o Pater in Filio. Verbum in
„assumpta humanitate hoc futurum praevidit, ut Filius Dei veniret
„judicandus. *Ecce enim in iniquitatibus conceptus sum.* Quasi dicat:
„Et non solum judicatus vincis omnes judicatos in tali scelere,
„quale meum est, in hoc quod illi iuste, tu iniuste: sed etiam om-
„nes homines, quia omnes sunt peccatores, tu autem Solus sine
„peccato. Et transfert in se omne humanum genus. *Ecce enim in
„iniquitatibus conceptus sum.* In quibus, subjungit, *Et in peccatis
„concepit me mater mea,* idest in Concupiscentia carnali concepit.
„Quae carnalis delectatio ex peccato primi parentis in carne nostra
„viget &c. Non enim maritus, quia maritus est, mortalis est; erat
„enim & Dominus mortalis, sed non de peccato suscepit poenam
„nostram, sed non culpam nostram.

Sanctus Petrus Damiani Anno 1050.

In Opusculo, sive Libro, qui appellatur Gratissimus de Simoniacis Cap. XIX. „ Et quid alios memorem? Quandoquidem & ipse Dei Mediator & hominum de peccatoribus originem duxit & de fermentata „ massa, sinceritatis azymam absque ulla vetustatis infectione suscepit. Immo, ut expressius dicam, ex ipsa carne Virginis quae de „ Peccato Concepta Est, caro sine Peccato prodiit, quae ultro etiam „ carnis peccata delevit „. Heic ait Petavius: *Manifeste Petrus hoc loco Beatam Virginem Originali affectam Visio facitur, quod & ab eo significari necesse est, ut argumentationi vis & ratio constet.* Adducuntur autem ex ejusdem Sancti Viri Sermone XL. in Assumptione Beatae Mariae haec verba: „ Caro enim Virginis ex Adam assumpta, „ maculas Adae non admisit, sed singularis continentiae puritas in „ candorem lucis aeternae conversa est. „ Haec ipsa verba S. Hildephonso tributa nuper Petavius commemoravit, inquit, de *actualibus Peccatis esse intelligenda.* Idem S. Petrus in *Sermone XXIII. in Natio. Sancti Joan. Baptistae.* „ Secundus honor est Sanctificatio in „ ventre matris. Quicumque de massa praevaricatrice Mundum ingredimur, longam restem Originalis Peccati trahimus nobiscum. Solus „ Ille, qui Peccatum non fecit, exsepitur, quem Virginalis thalamus, „ ignorante viro, terris effundit. Longe quippe aliter, & dissimili „ modo conceptus est, Spiritu Sancto tota maiestate Virginem inundante atque mundante, superans usum carnis, naturae ordinem, viri „ commixtionem. Sic quippe decebat, ut Peccatum nesciret, qui „ peccata tollebat, ut similitudinem carnis peccati suscipere, non autem „ carnem peccati. Cum igitur omnes in iniquitatibus concepti „ sint, neminem umquam mortalium intra matris viscera Sanctificatum legimus praeter Hieremiam, & Joannem Baptistam. Quam „ quam & de singulari Virgine nulla sit ambiguitas, quin ipsa maternis circumscripta visceribus, sublimiore Sanctificationis genere Mundata sit „.

Sanctus Anselmus Archiepiscopus Cantuariensis Anno 1100.

Libro II. Operis, cui titulus, Cur Deus homo, Cap. XVI. ubi Bosonem collocutorem suum quaerentem sic facit: „ Qualiter de massa peccatrice, & humano genere, quod totum infectum erat peccato, „ quasi azymum de fermentato, Deus assumpsit. Nam licet ipsa hominis ejusdem conceptio sit munda, & absque carnalis delectationis peccato, Virgo tamen ipsa, unde assumptus est, est in iniquitatibus Concepta; & in peccatis concepit eam mater ejus; & cum „ Ori-

„ ginali Peccato. Nata est; quia & ipsa in Adam peccavit, in quo
 „ Omnes Peccaverunt „ Subdit Petavius: *Cui respondens Anselmus,*
pro confesso ponit, hominem illum absque Peccato esse, de massa pec-
carice licet assumptum; & quomodo id factum sit, deinceps explicat.
 Ita quoque Salmanticenses, qui & aliis Sancti Anselmi verbis istud
 confirmant. Idem Anselmus in *Libro de Excellentia B. Virginis Ma-*
rine Cap. 3. ubi de Angelica Salutatione Virgini facta ait „: Cum
 „ igitur in his, quae tantopere Deo placent, Sancta Virgo Maria
 „ tam excellenter illi placuit, ut nequaquam crederet quis, illam a-
 „ liqua ratione excellentius placere potuisse; nimirum tenemus fide,
 „ ab omni, si quid adhuc in illam Originalis, sive actualis peccati
 „ supererat, ita mundatum cor illius, ut & super eam Spiritus Do-
 „ mini, scilicet super humilem, & quietam, & trementem verba
 „ sua, totus requiesceret „.

Gilbertus Crispinus Abbas Westmonasteriensis Anno 1106.
 In Bibliotheca Patrum Tom. XX. pag. 1884. legitur Dialogus inter
 Christianum & Judaeum, tributus Guilielmo de Campellis Episcopo
 Catalaunensi (sive de Chalons) qui Anno 1113. floruit. At hunc
 Librum Caveus, Du-Pin, & alii tribuendum censent Gilberto Ab-
 bati Westmonasteriensis, qui Anno 1106. Monasterio illi praefectus
 fuit. Ejus haec sunt verba: „ Cum Christum Originali Peccato ob-
 „ noxium esse dicis, omnino mentiris; nam de immaculata Virgine
 „ conceptus & natus, sine virili semine genitus est, ac proinde Ori-
 „ ginalis Culpae particeps non est &c. Quapropter Omnis homo car-
 „ nali delectamento genitus, cum Originali peccato nascitur, qui per
 „ luxuriam vitiatam naturam a primo patre trahens, & de corru-
 „ ptione carnis natus, illa placida natura carer, in qua primum pri-
 „ mus homo factus est, Denique dum in conceptu Christi omnis lu-
 „ xuria defuit, nullam de carne peccati maculam traxit; immo coo-
 „ perante Spiritu Sancto placidum & mundum conceptum habuit,
 „ quia omni delectamento luxuriae caruit; & quia in terris patrem
 „ non habuit, de corruptione carnis natus non fuit „.

Rupertus Abbas Tuitiensis, Anno 1120.

Libro I. Commentar. in Cantica ad Virginem haec dicit: „ Et tu qui-
 „ dem veraciter dicere potueras: Ecce enim in iniquitatibus conce-
 „ pra sum, & in peccatis concepit me mater mea. Cum enim esses
 „ de massa, quae in Adam corrupta est, haereditaria peccati origi-
 „ nalis labe non carebas; sed ante faciem hujus amoris nec illud,
 „ nec aliud stare potuit. Ante faciem hujus ignis stipula omnis inte-
 „ „ rit,

„riit, ut totum sanctum fieret habitaculum, in quò Deus totis novem mensibus habitaret „.

Hugo de Sancto Victore Anno 1125.

In Summ. Sent. Tract. I. Cap. XVI. de Carne Christi, antequam conciperetur, haec habet: „ Sane dici potest, & credi oportet, juxta Sanctorum attestationis convenientiam, ipsam prius peccato fuisse obnoxiam, sicut reliqua Virginis caro: sed Spiritus Sancti operatione ita mundatam, ut ab omni contagione immunis uniretur Verbo. Mariam quoque totam Spiritus Sanctus in eam praeveniens a Peccato prorsus purgavit, & a fomite peccati etiam liberavit „.

Sanctus Bernardus Abbas Claraevallensis Anno 1140.

In celebri Epistola CLXXIV. ad Canonicos Lugdunenses ait: „ Si igitur ante Conceptum sui sanctificari (Maria) minime potuit, quoniam non erat; sed nec in ipso quidem Conceptu, propter Peccatum quod inerat; restat, ut post Conceptum in utero jam existens, Sanctificationem accepisse credatur, quae excluso Peccato sanctam fecerit Nativitatem, non tamen & Conceptionem „. Haec aperta Sancti Bernardi mens, qui inter Beatam Virginem & Sanctum Joannem Baptistam, & Hieremiam, nullum agnovit discrimen; uti nec agnovit distinctionem inter Conceptum seminalem & animale, quam neoterici excogitarunt, veteres ignorarunt. Vide Petavium, & Salmanticenses, & Mabillonium in Notis ad eam Epistolam, qui etiam locum adferunt & *Sermone II. ejusdem Bernardi in Assumptionem Virginis*, ubi ait: „ Absit enim, ut proprii quidquam inquinamenti domus haec aliquando habuisse videatur, ut in ea proinde scopula Lazari quaereretur. Quod si Originalem a parentibus Maculam traxit; sed minus a Hieremia sanctificatam in utero, aut non magis a Joanne Spiritu Sancto repletam credere, prohibet pietas Christiana „. Ita in *Sermone LXXVIII. in Cantica Bernardus* concors cum antiquis Patribus ait: „ Sine generalis velamine confusionis (id est originali macula uti Petavius docet) nemo filiorum hominum intravit initians vitam, Uno sane excepto, qui ingreditur sine Macula. Emmanuel is est &c. De cetero unus omnibus per omnia introitus est, electis dico, & reprobis. Non enim est distinctio. Omnes peccaverunt, & omnes caputium suae verecundiae portant „. Nicetas Choniates *Lib. I. Cap. 74. Thesauri*, veterum opiniones refert de infusione Animae in Corpus inquires: *Nullum commune dogma super Quaestione ista vel ab Apostolis, vel ab ullis aliis Sanctis Patribus accepimus*. Addit, nonnullos Patrum sensisse, semen animari,

CUM

cum primum vulvae injectum est, ita ut partium neutra compositionem aut praecedat aut subsequatur. Philosophos vero serius Animam infundi scripserunt. Sanctus autem Augustinus, aliique non pauci Occidentalis Ecclesiae Patres, ac Theologi, usque ad tempora Magistri Sententiarum, hoc est post Sanctum Bernardum, ancipites in ejusmodi quaestione fuere, uti pluribus ostendit Clariss. S. R. E. Cardinalis Henricus Norisius in Vindiciis Augustinianis Cap. IV. §. III. Vide & Cassiodorum Lib. de Anima Cap. VII. Nunc certissima inter Theologos sententia est, Animas non ex traduce venire, novasque a Deo creatas in foetum efformatum infundi. Verum quae Antiquorum fuerit mens, ab ipsis antiquis petendum est, non vero a recentioribus. Ceterum etsi olim obscura, incertaque videretur origo Animae, & quomodo Peccatum primi hominis transfunderetur in posteros, nihilo secius Sanctus Augustinus cum Ecclesia Catholica uti stabile dogma Fidei agnovit semper & depraedicavit transfusionem Peccati Originalis in omnes homines: quod & nos tanquam Fidei Dogma amplectimur.

Richardus de Sancto Victore Anno 1150.

Libro I. de Emmanuele Cap. XII. De Christo Domino ait: „Macu-
lam peccati de materna carne non contraxit, sed delevit“. *Aper-
te*, ajunt Salmanticenses, *supponens adfuisse ibi, si non in se ipsa, in
suo tamen Debitor, praedictam Maculam.* Idem infra addit de Christi
carne & de carne Virginis „Notandum in matre & prole: quia in
„Matre caro mundata; in Prole non mundata, sed munda: in illa
„purgata, in ista pura“. Sunt & infra alia ejusdem Richardi ver-
ba idem significantia.

Anonymus, qui floruit Anno 1160.

Editus in Thesauro Novo Anecdotor. a Clariss. PP. Martene & Du-
rand. Tom. V. In Tractat. adversus Judaeum pag. 1565. „Si Vir-
go concepit non de creatura, sed de Creatore concipiat. Et cum
„omnis conceptus ex carnis voluptate perveniat, attestante Prophe-
ta, qui ait: *In peccatis concepit me mater mea*: nemo concipitur
„sine Peccato. Sed ipse Dominus hoc signum daturus est, quod
„Virgo concipiat. Ergo conceptus iste sine Peccato erit. Conspicies
„itaque cum integritate Virginitas, non de carne, sed de Spiritu“.

Innocentius III. Papa circiter Annum 1198.

In Sermone de Purificatione Virginis: *Statim autem Spiritus Sanctus
supervenit in eam. Prius quidem in eam venerat, cum in utero matris
animam ejus ab Originali Peccato mundavit: sed & nunc supervenit in
eam,*

cano, ut carum ejus a fomise Peccati mundalet, quatenus esset sine
vaga prorsus & macula.

Idem in Sermone de Sancto Joanne Baptista: *Joannes fuit con-
ceptus in culpa. SOLUS autem Christus fuit sine culpa conceptus; uter-
que vero natus in gratia.*

Idem in Sermone de Assumptione Virginis: *Illa (scilicet Eva)
fuit sine culpa producta; sed produxit in culpa. Haec autem (videli-
cet Maria) fuit in culpa producta, sed sine culpa produxit. Quid ver-
ba ista significant, a tanto Pontifice sive Doctore prolata, nemo non
intelligit. Infra idem agit de fomise Peccati, & stimulo carnis prorsus
in Virgine extincto, postquam in ea plenitudo Divinitatis corpora-
liter habitavit.*

Richardus de S. Laurentio Poenitentiarius Romanus Anno 1240.
In Tractatu de Laudib. Virginis Lib. VII. Cap. Item quod Luna &c.
§. divisa tenebris, ubi accommodans, ajunt Salmanticenses, Beatae
Virgini illa verba: *In principio creavit Deus coelum & terram*, inquit:
„ Idest Animam & Corpus Mariae. Sed haec terra erat inanis &
„ vacua ante Gratiā sanctificationis, & erant tenebrae super faciem
„ abyssi, quia concepta est in Originali „. Idem repetit aliis in locis.

Guillelmus Durandus Mimatenfis Episcopus, cognomento

Speculator, Anno 1286.

*In Rationali divinar. Officior. Lib. VII. Quidam etiam faciunt quin-
sum Festum, scilicet de Conceptione Beatae Mariae, dicentes, quod si-
cut celebratur de morte Sanctorum, non propter mortem, sed quia tunc
recepti sunt nuptiis aeternis; similiter potest celebrari Festum de Con-
ceptione, non quia sit concepta, quia in Peccato est concepta, sed quia
Mater Domini est concepta; asserentes hoc fuisse revelatum cuidam Ab-
bati in naufragio constituto: quod tamen non est authenticum. Unde
non est approbandum, cum concepta fuerit in PECCATO, scilicet per
concubitus maris & foeminae, de Consecrat. Distinct. 4. firmissime.
Verumtamen licet fuerit concepta in Peccato, dimissum est ei illud Ori-
ginale Peccatum, cum sanctificata fuerit in utero, sicut & Hieremias,
& Sanctus Joannes Baptista.*

Tandem ne nimius sim, in hac eadem sententia fuere, uti Sal-
manticenses Theologi animadverterunt, Petrus Lombardus Magister
Sententiarum, Hugo de Sancto Claro, Albertus Magnus, Sancti Docto-
res Seraphicus, & Angelicus (neque enim haecenus Petrus de Alva,
aut alii persuadere Eruditis, Sanctum Doctorem a se discordem fuisse)
& Sanctus Bernardinus Senensis & Sanctus Antoninus. Alios omitto,

Tom. V.

D d

quos

quos longo catalogo iidem Salmanticensēs enumerant; nam qui hætenus commemorati sunt, satis superque ad intelligendum nos perducat, per tria & decem Secula a Christo nato viguisse, & *Communem* fuisse in Ecclesia sententiam non eximentem a Peccato Adami nisi *Unum Christum Dominum*. Surrexit postea Joannes Duns Scotus, Ordinis Minorum, qui circiter Annum 1307. Sententiam de Immunitate Virginis, ante duo Secula levibus principiis natam, adhuc tamen elumbem, & a præcipuis Theologis improbatam, propugnavit; sui que instituti posteris, immo & aliis non paucis, gratissimam sensim effecit. Is tamen non eo strepitu publicæ disputationis, non ea felicitate successus, qualem subsequuta Secula, una cum aliis de eodem Scoto fabulis, commenta sunt, sententiæ hujus propugnator fuit: immo summa modestia usus Distinct. III. in Lib. III. Sentent. Quæst. I. tria proponit, uti animadvertit Natalis Alexander: Nempe primo, Deum potuisse facere, ut *Virgo nunquam fuisset in Peccato Originali*. Secundo, Potuisse facere, ut illa esset in Peccato Originali tantum *in una instanti*. Tertio, Potuisse facere, ut illa in eodem Originali esset *per aliquod tempus*, ac ultimo instanti hujus temporis purgata & sanctificata fuerit. Tum addit: *Quid autem horum trium, quæ ostensa sunt esse possibilis, factum sit, Deus novit. Si auctoritati Ecclesiæ, vel auctoritati Scripturæ non repugnat, videtur probabile quod excellentius est attribuere Mariæ: quam postremam sententiam in posterioribus scriptis roboravit. Dixi, non eo mirabili successu, quem apud Wadingum legimus, processisse tunc Scoti opinionem; nam & qui eodem tempore in Anglia floruit Joannes Baconus, Carmeliticæ Scholæ princeps, & Doctor Resolutus deinde nuncupatus, circiter Annum 1330. Libro II. Distinct. XXX. Quæstion. I. Petrum quidem Aureolum sibi opponit, dicentem, quod *Beata Virgo Originalem culpam non traxit de facto, tamen habuit necessitatem contrahendi*: nihil vero de Joanne Duns Scoto habet. Tum ipse Opinionem hanc appellat *Hæresim adulatoriam, & nimis devotam*; simulque contendit, Peccatum Originale in omnes pertransiisse, excepto Christo: quod multis confirmare nititur. Accedat & Alvarus Pelagius Ordin. Minor. & Scoti ipsius discipulus, vir sane per ea tempora ob eruditionem suam admirandus, qui circiter Annum 1330. Episcopus Silvensis in Lusitania est renuntiatus. Hic autem Lib. II. Cap. LI. de *Placitu Ecclesiæ*, Magistri sui opinione contemta, scribit: *De Matre Christi beatissima tenens Sancti, maxime Augustinus, quod non peccavit etiam venialiter in hac vita, tamen in Originali Peccato Concepta fuit, sicut**

& ceteri homines; quia ab illa sententia patris sui David: Ecce in iniquitatibus conceptus sum, Psalm. L. Nullus excipitur, nisi Christus, qui non de semine humano, sed de Spiritu Sancto conceptus fuit. Tum infra subdit: Et hanc sententiam tenent Omnes Antiqui Theologi, Alexander, Thomas in suo Quarto & Secundo, Bonaventura, Richardus, licet quidam novi Theologi a sensu Ecclesiae recedentes Communi, tenere contra (indevoli revera Dominæ, ei tamen devoti cupientes apparere) nitantur: quorum Nova Opinio; & phantastica, sit a Fidelibus cancellata. Tum Sanctificationem Virginis ab Ecclesia doceri ait: & ita dicit Oratio, quæ dicitur in hoc Festo Romæ in Sancta Maria Majori: Deus, qui Sanctificationem Virginis &c. sicut vidi & audivi, quum ibi de ista Sanctificatione prædicarem in isto Festo Sanctificationis, quod fit in Decembri ante Festum Natalis per XV. dies. Dubitat autem Theophilus Raynaudus, in Tractat. de Piet. Lugdun. pag. 305. an hæc scripserit Pelagius, quum duo ejusdem MStæ hæc minime exhibeant. At hæc ejus stylum sapiunt, & illa alii Codices præferunt. Neque mirum, si quis contrariæ sententiæ postea deditus, in ejus Libro describendo hæc pauca sibi ingrata expunxerit.

C A P U T XXV.

Sententia excludentium Debitum a Virgine concordi Traditione Patrum eversa. A præstantioribus Theologis improbata. Nihilominus Censurina Civitas adducta ad Votum de tuenda Sanguine suo eadem Debiti exclusionem. En hoc temerario Voto, quæ consecraria fluant.

EX his autem Romanorum Pontificum, Doctorum Ecclesiae, Sanctorum Patrum, veterumque Theologorum dictis inferebant olim Thomisticae sententiæ patroni, Deiparam ipsam minime exclusam fuisse e Decreto Apostoli scribentis: Omnes in Adam peccasse. At quum non immerito responderetur, non ita rigide accipiendas semper esse universales quasdam Sacrae Scripturae propositiones, ut eximere ab eis quaedam particularia non liceat, si id suadeant rationes ex ipsa Scriptura legitime deductæ: instabant ii; interpretationem divinarum Literarum petendam esse concordii sensu Sanctorum Patrum. Esse vero apud illos Catholicum Dogma: Unum Jesum Christum inter homines expertem fuisse Peccati Originem.

ginalis. Praeterea illos diserte scribere, ideo Christum Dominum à Peccati Originalis lege exemptum fuisse, neque primi hominis maculas contraxisse, quia non ex commixtione sexuum, non e semine virili, sed de Spiritu Sancto conceptus fuit. Quamobrem quum Maria non eo modo supranaturali, sed communi concepta fuerit: eosque Petavius insignis vir, de Dogmatica Theologia optime meritis, redarguat, qui nimio ardore tuendae Immunitatis Marianae, Conceptionem ejus effinxere *sine Concupiscentia* peractam, atque adeo a communi Naturae humanae lege ac usu alienam: secundum illos Theologos consequebatur, Mariae tribuendam nequaquam fore praerogativam, per quam Solus divinus ejus Filius a ceteris Hominibus distinctus fuit. Illa nimirum concepta *e carne Peccati*, & non sine Concupiscentia; Christus vero absque ullo Concupiscentiae afflatu, & duntaxat *in similitudinem carnis Peccati*. Haec illi. Proinde vim rationationis hujus sentientes, tum antiqui, tum recentiores Theologi, quibus reverentia erat erga Sanctos Patres, eodemque tempore pius ardor propugnandae Immaculae Conceptionis, non aliam adinvenerunt viam conciliandi tolerabili aliqua ratione loca Scripturarum, Patrum, ac veterum Theologorum cum sententia sua, nisi statuendo in Virgine *Debitum* Peccati Originalis, atque ab ea excludendo *Peccatum* ipsum ex singulari beneficentia Dei: sub qua consideratione adhuc ipsa Virgo distingueretur a Christo, quem liberum non solum a *Peccato*, sed etiam a *Debito* Ecclesia universa fatetur. Rationem hanc exponendi, quod est ad praesentem quaestionem, divinas Literas & Patres, Scotus ipse in 3. Distinct. 3. Quaest. prim. indicavit, uti etiam animadvertit Hugo Cabellus Scoti interpres; ac propterea Theologi reliqui, removens a Deipara *Originale Peccatum*, concordii studio usque ad Annum 1615. necessarium duxere, *Debitum* hoc idem sanctissimae Virgini tribuere: quorum satis longum catalogum contextum invenias apud supra laudatos Theologos Salmanticenses. An autem sit haec revera mens Literarum sacrarum, & an sufficiat interpretatio ista, ad rite explicanda tot loca Patrum, ac veterum Theologorum, erit Apostolicae Sedis non infallibili judicio edocere, si quando controversiam a tot Seculis inter Scotistas & Thomistas ferventem, ad accuratum examen deducere, & quid firmissime de ea credendum sit, edicere voluerit. Duo interim explorata habemus: alterum, usque ad tempora Scoti *Communem* Theologorum sententiam fuisse, negantium Deiparae Immunitatem a Macula Originali. Id libere fatentes habemus insignes ac sinceritate praestantes Theologos, quos

quos supra innui. Alterum, usque ad Annum 1615. *Communem* itidem fuisse Theologorum sententiam, excludi non posse a Deipara *Debitum* Culpa Originalis, atque ita sensisse omnes ferme, qui pro ejusdem Immunitate a *Peccato* in aciem ante Annum illum venerunt.

His positis, judicium prudentiorum esto, quid sentiendum sit de Theologis iis, qui post illum Annum 1615. novam invexere Opinionem de Virgine ab ipso Peccati *Debito* eximenda. Non utique ferenda hujusmodi Sententia, si chorum Sanctorum Patrum, si nubem veterum Theologorum, adversantem habet. Ac propterea Cardinalis Cajetanus, quasi praescius, aliquando emerfuros, qui eam propugnare ausuri essent, in Comment. ad Part. 1. 2. Sancti Thomae Quaest. 81. Art. 3. *Haereticam* eandem appellavit, cujus judicium Catharinus deinde, & Corduba confirmarunt. Eam praeterea *parum tutam* in Fide Cardinalis Bellarminus denunciavit; & *proximam errori*, aut parum probabilem censuerunt Medina, Suarez, Vasquez, Valentia, Faber, Canisius, Beccanus, Castropalaus, Theophylus Raynaudus, Salmanticenses Theologi, & Cardinalis Gottus, ut alios omittam. Quid plura? Auctor est Hurtadus, teste eodem Theophylo Raynaudo in *Theolog. antiqua de vera Martyrii notione*, numer. 72. ne Romae quidem toleratam fuisse ejusmodi Opinionem. Quippe *Inquisitio Romana* asserionem illam de Immunitate Beatae Virginis a *Debito* Peccati Originalis damnavit ut *Erroneam*. Ex Libro P. Fr. Joannis Mariae Zamori, cui titulus de eminentissima Deiparae perfectione, eo quod assereret eam carentiam *Debiti* Peccatum originale contrahendi, voluit esse *vetitae lectionis*. Nihilo tamen secius, ut vidimus, indomita ingenia, five Novitatis nimium amica, five in Pietatis rebus audacter intemperantia, fractis quibusque repagulis, & Patrum ac veterum omnium Theologorum contempta auctoritate, pergunt hanc ipsam Opinionem in Scholis ac Libris fovere atque disseminare, quum tamen ipsam injuriosam Christo fateri cogamur, *Quem Solum Sine Peccato fuisse*; univ[er]sa antiquitas agnovit. Propterea heic obtestor, ego sapientes quovis, ut seposito omni partium Studio, adhibitaeque diligenti consideratione, jam tandem perspiciant, an non piorum hujusmodi Novatorum licentia, atque inconsultus zelus in dedecus, & in perniciem conspiraret matri nostrae Ecclesiae. Praecepit sacra Synodus Tridentina Sess. IV. ut nemo suae prudentiae innixus, in rebus Fidei & Morum, ad aedificationem doctrinae Catholicae pertinentium, contra Unanimum Consensum Patrum, ipsam Sacram Scripturam interpretari audeat. Consonant in eandem sententiam Patrum dicta, sed potissimum, quae

quae Vincentius Lirinensis in aureo suo Commonitorio scripsit, monens, in Ecclesia Dei non Nova, sed Novae, duntaxat Dogmata tradi posse. Novae enim omnes sententiae de rebus a Revelatione Dei pendebantibus, aut ineptae, aut temerariae sunt, aut denique Haereticum virus continere facile possunt. Quare is addit Cap. IX. *Adnuntiare ergo aliquid Christianis Catholicis, praeter id quod acceperunt, nunquam licuit, nunquam licet, nunquam licebit.* Et sane qui sibi facultatem arrogant proponendi & praedicandi novam doctrinam, quae nullo sacrarum Literarum, aut antiquae Traditionis fundamento nitatur, ii sibi licere putant, quod ne ipsa quidem Apostolica Sedes & Concilia Oecumenica licere sibi putant. Praeterea idem Lirinensis referens literas Stephani I. Papae inquit: *Denique in Epistola, quae tunc ad Africam missa est, his verbis sanxis: NIHIL NOVANDUM ESSE: NISI QUOD TRADITUM EST.* Intelligebat enim vir sanctus & prudens, nihil aliud rationem Pietatis admittere, nisi ut omnia qua fide a Patribus suscepta forent, eadem fide filiis consignarentur; nosque Religionem non qua vellemus ducere, sed potius qua illa duceret, sequi oportere: idque esse proprium Christianae modestiae & gravitatis, non sua posteris tradere, sed a maioribus accepta servare. Proinde hic mos perpetuus Ecclesiae fuit, estque Theologorum omnium, qui recta sapiunt, in sententiis ad Theologiam pertinentibus super omnia inquirere, quid habeant divinae Scripturae, & quae sit de illarum sententiis mens Sanctorum Patrum, & quid ferat Traditio, ex iisdem Patribus haurienda. Haec sunt arma Ecclesiae: hisce illa utitur adversus Haereticos, ut de eorum male sana doctrina triumphet. Si fieri posset (id autem nunquam futurum Christus pollicitus est) ut a nobis contemneretur Traditio Patrum, dilaberemur & nos in terribilissimum Chaos Haereticorum; pugnaque perennis inter nos & illos foret, nunquam vero spes iusta victoriae. Nam ubi eo reducta res foret; ut nos, aequae ac illi, ex ingenio nostro statueremus Dogmata, contra, aut secus quam habet Traditio Sanctorum Patrum (quod faciunt Sestarii) & ad unam Scripturam atque intelligentiam nostram, explosa eorundem Patrum interpretatione, alter alterum provocaret: utrique suam mordicus praeferrent sententiam; neque alia superesset ratio evincendi, quatenam ex iis esset vera ac potior appellanda. Nos ideo invicti adversus Haereticorum conatus, quod eis tum Scripturae loca, tum concordem eorum interpretationem, Traditionis ope in Ecclesia Dei servatam, objicere possumus: quam Traditionem consulendam, vel ipse Sanctus Irenaeus proximis Apostolicis temporibus iussit.

fit. Neque enim ad nos pertinet, neque licet, innovare aliquid in doctrina Fidei; neque Revelatio nova nobis expectanda; sed illud tantummodo retinendum, & sancte colligendum atque custodiendum, quod olim Deus revelavit, & ad nos per Literas sacras, per Concilia, & Patres, testes integerrimos Revelationis non scriptae, transmissum est. Neque Pietatis augendae obtentu fas est contra mentem Sanctorum nova dogmata procudere: quis enim nisi superbus & audax plus scire ac sapere se putet, quam Sancti Ecclesiae Doctores, ac propiores fonti Revelationis divinae? Propterea illos etiam Vincentius Lirinensis arguebat, qui tum pios prae reliquis se putant, quum Novas gravis momenti Opiniones invehunt, quibus Sanctorum Patrum documenta obstitunt. *Mirari satis nequeo* (ita ille Cap. XXI.) *tantam quorundam hominum vesaniam, tantam eucaecatae mentis impietatem, tantam postremo errandi libidinem, ut consensu non sint, tradita semel & accepta antiquis credendi regula. Sed NOVA ac NOVA in diem quaerant, semperque gestiant ALIQUID RELIGIONI ADDERE, MUTARE, DETRAHERE: quasi non coeleste Dogma, quod semel revelatum est, sufficiat &c.*

Quo igitur nomine digni sint, qui Anno 1615. tradere coeperunt novitiam hanc doctrinam, scilicet, ne *Debitum* quidem *Peccati Originalis*tribuendum esse Mariae, Sapientes tandem judicabunt, quum, uti perspeximus, per antecedentia sexdecim Secula aliter Sancti Patres, & Theologorum Scholae senserint: atque ipsi illi, quibus Immunitatis Marianae tutela plus cordi fuisse noscitur, agnoverint necessariam hujus saltem *Debiri* confessionem, ut Redemptionis necessitatem in Virgine tueamur, & ut Apostoli auctoritas, & Patrum interpretatio, aliqua ratione subsistant. Neque enim locus heic reliquus est speciosae illi doctrinae, perfectiorem modum Redemptionis esse, Virginem a *contrahendo Debito* praeleservatam, quam a *Debito liberatam* fuisse. Nam, uti supra nos docuit Romanus Pontifex Zosimus, Nullus, nisi qui *Peccati servus est*, *Liber efficitur, nec Redemptus dici potest, nisi qui vere per Peccatum fuerit ante captivus*. Et Sanctus Leo Magnus Papa Sermon. I. de Nativitate Domini: *Sicut Nullum a reatu liberum reperit, ita pro liberandis omnibus venit*. Itaque nullus dubito, quin quicunque animo ac ingenio ab affectibus praevis, atque ab anticipatis judiciis expurgato, Opinionem hactenus commemoratam perpenderit, plane intolerandam in Ecclesia Dei appellet. Attamen aliquid etiam gravius hac ipsa de causa exerendum est, quod me impulit ad corollarium hoc postremum adjiendum, hoc est ad colligen-

ligenda tot Patrum ac Theologorum veterum vota; & quod prudentibus stuporem fortassis & horrorem incutiat, nobisque luculentius aperiat, quid audere possit inconsultus novandi ardor, & improvida Pietatis amplificandae cupiditas. Non solum placuit ac placet nonnullis periculosa huic Opinioni adhaerere, eamque in Scholas imperterritè invehere; inventi sunt etiam, qui pro ejus tutela Vitam se duros voverunt. Testem habeo Auctorem Historiae Conceptionis Virginiae, qui Libro IX. Cap. XVI. tradit, Cusentinam Civitatem in Calabria primariam Anno 1656. Votum emisisse de propugnanda Immunitate Virginis non solum a *Peccato Originali* sed etiam ab illius *Debito*: & quidem *Sanguine* etiam & *Vita*. Voti quoque formulam refert, a Syndico Urbis illius concepti, nomine Reipublicae, *omniumque Civium tam praesentium, quam futurorum*. Egregium sane Votum, quo Populus indoctus, & impotens ad discernenda momenta ejusmodi quæstionum, ad mortem subeundam obligatur, posterosque ipsos rei incios tam ferali obligatione constrictos decernit. En formulæ Cusentinae verba: *Promissimus & juramus, sacris sanctis Evangeliiis, nos docturos, professuros, ac propugnatueros, Mariam semper Virginem, Dei matrem, & Dominam nostram, in Conceptione sua non solum non contraxisse Peccatum Originale, sed ne ipsius quidem Debitum, quum transfundi nequeat infelix haereditas Adami in illam, quae ut Mater futura Verbi aeterni praevisa fuit in signo antecedenti Adamum. Et Votum juramento confirmamus testificandi HANC VERITATE SANGUINE & VITA, & curandi, ut idem a reliquis fiat. Ita ille Auctor, qui insuetum hoc Votum veluti rarissimae Pietatis prodigium suspiciens, addit: *Nel che Cosenza si vantiaggia ad ogni altra Città del Mondo; mentre un simil voto di niun'altra si legge*. Neque legeretur, subdo ego, dum Christi Fideles accuratius in rem ipsam introspiciant, & sapere pergant.*

Equidem infimus in domo Dei sum; attamen quando omnium est Fidelium, Ecclesiam Dei matrem nostram, ejusque doctrinam germanam tueri, libera heic voce ajo, fraeno tandem opus esse ad compescenda Ingenia sub Pietatis specie extra orbitas verae Pietatis decurrentia. Addo, manifeste imprudens, nullum, ac irritum esse hujusmodi Votum, neque sine scelere Vitam profundi posse pro tuenda Opinione, quae nequaquam Probabilis, immo Falsa ex dictis censenda est. Evidens quippe esse sincerus quisque rerum aestimator deprehender, veteres Patres, (inter quos duo eximii tum doctrina tum sanctitate Pontifices Maximi. Leo I. & Gregorius Magnus praeterea

Leo

Leonem IV. & Ambrosius, & Augustinus, & Anselmus, & Thomas, & Bonaventura, Ecclesiae Doctores) non solum ignorasse praerogativam hanc a Novatoribus piis Deiparae attributam, sed ita loquutos fuisse, ut aperte destruant saltem sententiam auferentium a Beata Virgine *Debitum Peccati Originalis*. Quonam ergo abibit veneratio semper habita in Ecclesia Dei, semperque habenda unanimi Sanctorum Patrum Traditioni? Et quanam Prudentia fuerit pro tam fallaci sententia discrimini Vitam exponere? Immo quum nefas sit atque Peccatum pro Opinionum, licet Piarum, tutela tormentis & securibus suum caput offerre; quisnam, rogo, a crimine excusaret pro huiusmodi etiam non ferenda Opinione occumbentem? Neque plura adtexere volo, spe ductus fore, ut haec intimius perpendant, quibus & major sapientia est, & ferventior cura decernendi remedia, si quando perspiciant, ab intemperantibus ingeniis, & in excessus Pietatis incaute declinantibus, perniciofa dogmata venditari, ac temere homines in mortem impelli. Ad Parthenotimum potius redeat oratio, a quo lubenter rescirem, probetne ipse, an improbet Cusentinorum sententiam *De debito Virginis*, eorumque Votum Sanguinarium. Si probat: quid aliud restat, nisi ut demum fateatur, conculari impune posse Traditionem concordem Sanctorum Patrum, & nihil referre Catholicæ Ecclesiae; si quisquam aspernatus sententiam, quae apud Patres, & vereres quosque Theologos, Communis fuit, Novam atque oppositam excogitet ac doceat; & licere quamcunque Opinionem tueri, dum Pietatis lineamenta praeferat; immo & pro illa propugnanda honeste Sanguinem fundi posse, atque inde sperari Martyrii coronam? Si sectaria haec ille devorare in animum induxerit, jam nullum ultra cum eo certamen volo; sed videat ille, quei gravissimam a sacris Iudiciis censuram effugere possit. Quod si Cusentinorum Opinionem ac Votum Parthenotimus averfat, habet ille in hoc uno exemplo, unde intelligat primo, quam inanes querelas adversus Lamindum commoverit, quasi piaculum fuerit, Sanguinarium paucorum Siculorum Votum non revereri, quando a nonnullis Theologis, & quidem Catholicis, adinventum, ac populo propinatum fuit mirabile hoc & magnanimum Vitae contemnendae consilium. Certe qui Cusentinis auctores fuere emittendi par, immo magis etiam magnanimi Voti, Cerdones non erant. Theologos fuisse nemo non agnoscit; & nihilominus quis eorum audaciam ferat, aut excuset? Secundo hinc discet Parthenotimus, raram avem in terris non esse nonnullorum ambitionem, qui in rebus Pietatis, sive quod plus sapere quam reliqui sibi

Tom. V.

E e

per-

persuadeant, five quod Novitate Opinionum famam majoris intelligentiae ac Pietatis conquirant, in excessus Pietatis erumpunt, quos certe & Ecclesia Catholica odit, & Prudentia eliminandos jubet. Tercio deprehendet Parthenotimus, quanta in posterum fides habenda sit professioni toties a se inculcatae, scilicet Voventes tutelam Immaculatae Conceptionis, non morituros pro tuenda *Veritate* illius sententiae, sed pro *Pietate*, quae inest *actui opinativo pro Festo Conceptionis ab Ecclesia praescripto* &c. Scilicet sensit ille, non immerito improbatum fuisse a Lamindo consilium subeundae mortis causa propugnandae sententiae, quae adhuc inter Opiniones conclusa certam nobis Veritatem rei exhibere non potest. En Cusentinum Populum diserte jurantem, se *Sanguinem* fortiter effusurum pro *testificanda Veritate* Immunitatis non solum a *Peccato*, sed & a *Debito*. Idem quoque velle Siculos in concipiendo suo Voto Sanguinario pro tutela Immunitatis a *Peccato*, mihi persuadent eorum formulae, quibus frustra medicamentum adhibet Theologus noster. Denique possent Cusentini ad eadem effugia se convertere, per quae Parthenotimus evadere se posse confidit, protestando, sibi quoque persuasum, non dubiam, sed Certam esse sententiam suam de exclusione *Debiri*; centenos Theologos a Petro de Alva recensitos pro eadem pugnare; atque illam, teste Auctore Historiae Conceptionis, saltem apud Hispanos *Communiorem esse in Scholis*: abhorrere ab honore Virginis deformem *Debiri* illius maculam; ac proinde se mori paratos pro tuenda *Sanctitate Mariana*, pro cultu & honore illius, pro observando Voto, a cuius observantis deficere crimen est. Si Cusentinorum Votum, uti nuper effinxi, a Parthenotimo neutiquam probatur, frivolas etiam, nulliusque ponderis reputet, oportet, eorum rationes; & denique sperandum est fore, ut deprehensa temeritate Cusentini Voti, a patrocinio quoque deficiat Sanguinarii Siculi Voti, quod itidem vidimus temere concipi, & sine scelere non posse compleri.



C A P U T X X V I.

Cae Priscianus in Voto Sanguinario Superstitionem timuerit. Quid sit Superstitio. Ab ista cavendum praecipue viris doctis. Ejus facies in novitio isto Voto deprehensa. Quid Panormitanis Civibus in hocce negotio agendum.

UNUM superest nunc quaestionis haecenus agitatae momentum, de quo jamdudum Lectoris expectationem aluisse me opinor, & cui nunc satisfaciendum fuscipio. Nempe cur Opusculo huic titulum fecerim de Superstitione vitanda. Dixerat Lamindus: Cave, ne amorem & reverentiam Virgini debitam eo usque amplifies, ut Superstitiosam efficias. Non unus autem ego in hoc Voto profundendae Vitae pro Immaculata Conceptione Virginis Superstitionem timeo. Timuit & timet Apostolica Sedes. Aegro animo ista excepit Parthenotimus ac proinde pag. 65. Lamindum iratus monet, ut videat, quo ipsum abripiat ille suus, quem vocat Superstitionis timorem, sed nonnemo diceret audaciam: dum Superstitionis notam Catholicorum (addendum erat paucorum) sententiae injuris. Contra pacato animo ego heic sapientum judicium appello. Alterum de duobus necesse est ex hoc certamine fluat. Si quae attulit Theologus Siculus, eam vim habent, ut Sanguinarium Votum licitum ac laudabile constituent: certe is merito doleat, quod Superstitionis probrum de magnanimo illo Voto timeatur. Contra, si quae haecenus ego congesti, ut evincam, imprudens, temerarium, minimeque ferendum esse ejusmodi Votum, solida sunt ac vera: nemo sit inter Theologiae peritos, qui Superstitionis non dicam lineamenta, sed vitium ipsum in eo non deprehendat. Quid enim aliud est Superstitio docente Doctore Angelico 2. 2. Quaest. 92. Art. I. nisi Vitium Religioni oppositum secundum Excessum; non quia plus exhibet in cultum divinum quam vera Religio, sed quia exhibet cultum divinum vel cui non debet, vel eo modo, quo non debet? Propterea 2 Theologis Cultus Dei inordinatus aut superfluous, qui & in se completitur Cultum inordinatum sive superfluum Sanctorum, inter species superstitionis concordi voto enumeratur. Atque utinam Theologi ipsi, qui in reliquas Superstitionis species longa inquisitione invehuntur,

hanc etiam diligentius excolerent, & luculentius Catechismi Catholici ministris explicarent. Est sane major, quam prima fronte videatur, amplitudo hujusce quoque provinciae, multumque a re foret Reipublicae Christianae, non negligi, immo accuratius pertrahari & istud argumentum. Quum enim eximia pars Religionis sit *Cultus Dei*, atque Sanctorum, copiosaque turba actuum, quibus Christi Fideles suum obsequium ac amorem omnipotenti Deo, ejusque beatis servis pendere possunt, latissimus heic campus sese aperit Theologorum judicio, ut discernant, quid ibi laudandum, quidve culpandum, hoc est quid Deo placeat, sive displiceat. Et quidem miratus sum, quare insalutatum pene argumentum hoc dimiserit Joannes Baptista Thiercius, Doctor Gallicus, qui Tractatum de *Superstitionibus* Anno 1679. Parisiis edidit, foedis vanarum observationum deliriis adeo refectum, ut in duos Tomos excreverit, quos cum utilitate, nescio & an cum pari voluptate, legas. Nonne & errores indoctae sive exorbitantis Pietatis ad *Superstitionem* pertinent, & puritate Sponsae Dei, idest Ecclesiae, officiunt, quae tamen proborum omnium, ac praecipue Pastorum munus est curare, ut immaculata persistat cum in Dogmate, tum in sacra Disciplina? Profecto nemo neget, quin summopere conduceret, si & haec perversa semina aut nunquam nascerentur, aut nata sollicito studio evellerentur. Magnum autem discrimen heic intercedit inter Populum rudem, & Viros doctos, ad quos cura spectat alios imbuendi sanctae Religionis doctrina. Si enim in superfluo aut inordinato Cultu Dei, & Sanctorum errore interdum laborat Plebs rudis, illam ignorantia & simplicitas excusare potest, ita ut nihil peccati, aut summum culpa venialis in eorum actibus occurrat. Et si quidem a rectis Ecclesiae institutis ac sententiis defleunt, certe illorum naevi in arcem Religionis non penetrant; neque enim ex indoctorum opinionibus ac ritibus metienda est veritas & sanctitas Ecclesiae Catholicae, ejusque doctrinae, sed e Catechismis nostris, & e probatis Ecclesiae ipsius Dogmatibus.

Alia vero est doctorum hominum & Theologorum ratio atque conditio. Positi isti in aedificationem Ecclesiae, si quando inordinatum aut superfluum Dei & Sanctorum Cultum inveherent, quibus justis rationibus sese apud Deum excusaturi forent, facile non inveni-
rent. Possent sane & ipsi obtendere bonam voluntatem, piumque affectum in Deum & Sanctos. Sed quid si cum ista voluntate & affectu se misceat Zelus praeeptis, & non secundum scientiam? quid si

con-

conjungat sese Superbia, Ambitio, & Novitatis, sive Singularitatis male urens prurigo, aut Avaritia, aut immoderata Curiositas, aut caeca Aemulatio, alique pessimi humanae mentis afflatus, ut plus sapere, quam alii, plus Pii esse, quam ceteri apud Populum credantur? Et quamvis agatur de *superfluitate in Cultu exteriori, quae inter Superstitiones numeratur*, attamen uti docuit Cardinalis Cajetanus in 2. 2. Sancti Thomae Quæst. 93. art. 2. *est communiter Peccatum veniale, nisi contemptus Ecclesiasticae disciplinae, aut interioris Cultus adsit. Nec tamen leve habendum est Peccatum hoc, quoniam infra Superstitionis latitudinem continetur, quae divino opponitur cultui. Omne autem Peccatum in his, quae Dei sunt, magnum esse constat.* Quid ergo dicendum ac metuendum de iis, qui novas in Religionis doctrina excogitant, ac deprædicant Opiniones, a Revelatione Dei omnino pendentes, præter, & quod longe gravius est, contra Patrum, totiusque antiquitatis Traditionem atque sententiam? Curiositatem & Singularitatis amorem in hisce Novatoribus præsertim offendas, cujus vitii signa describit ac temeritatem multis redarguit Gersonius in *Lectiōe contra vanam Curiositatem* Tom. I. pag. 93. inter cetera scribens: *Constat, quod doctrina Fidei, quamvis Philosophiam superet, habet terminos suos prædefinitos in sacris Litteris nobis revelatis, ultra quos nihil audendum est. Igitur si conjecturis & ratiunculis humanis ultra progredi quisquam Theologizans præsumpserit, quidni protinus turpiter seducatur, ut seducat insequentes? Deficiente enim non sufficiente scala Scripturarum, qualis altera comparabitur scala ad altiorem de Deo cognitionem attingendam? Conferamus nunc ad divinas voluntates non revelatas nobis coelitus, sensum cujusque Theologi, quantumvis Elevati: nullus dubitaverit, quod ad illas coecior sit, quam coecus ad colores. Propterea si de altis istis, & non revelatis veritatibus voluerit huiusmodi Theologus judicare; aut præsumptione raptus, aut pudore oppressus, si non ad omnia quæsitæ sibi responderit, quis non videat quam profundam sibi aliisque erroris abyssum paraverit? Addit etiam (quod utinam nonnulli in penetralia cordis recondere) Quanto securiori humilitate responderent in multis, Nescio: Deus scit, & cui Deus voluerit revelare? In subsequenti etiam Epistola paria tradit, inquiens: Quanto consultius erat uti bene inventis, quam dum quæeruntur inveniendæ, nec illa asferre, quin etiam subvertere bene jam inventa? Sufficiat interim mihi, meique similibus, sobria in humilitate uti bene inventis. Abscedat omnis pomposa super insolitis arrogantia, ne multiplicemus loqui sublimia gloriantes. Sequamur tritum iter*

iter commodius plane, & ab errorum scandalorumque discrimine remotius. Tot habemus Sapientiae salutaris fontes viros; ne quaeso, cisternas dissipatas fodiendo, nos casso, immo stulto, labore fatigemus. Quam postremam sententiam adhibuit, ut supra vidimus, etiam Sanctus Pius V. in sua Constitutione de Conceptione Deiparae. Et ecce quam apposite ad rem nostram Gerfonius & Novatores pios, & Novitates Opinionum castigat, atque a Scholis, eoque magis a Populi auribus amotas cupit. Agnoscebat enim vir magnus, facile ex hujusmodi licentia dogmata nimium male sana effluere posse. Et ad *Superstitionem* quod attinet, jam Sanctus Thomas haec jamdiu nos docuit 2. 2. Quaesit. 92. Art. 1. *Superstitio est, quando traditioni humanae Religionis nomen applicatur.* Utique rectissime. Nam ut monuit Sanctus Augustinus Libro de Ver. Religione Cap. LV. statuenda non est *Religio in phantasmatibus nostris*. Luculentius etiam mentem suam expressit idem Angelicus Quaesit. 93. ibidem, artic. 2. scribens: *Si quid est praeter Dei & Ecclesiae constitutionem, quae secundum Augustinum in Epistola 86. pro lege habenda est, totum hoc reputandum Superfluum & Superstitiosum.* Et nos sane parum laudandi, quoties novitatem ubique desiderantes, contemptis aut neglectis solidis Pietatis exercitamentis, nuperas quasdam Devotiunculas quantis possumus nervis promovemus, atque in iis statuimus summam spem gloriae aut praemii coelestis.

Age vero ad haec principia exigamus *Votum Sanguinarium* Parthenotimi nostri, & Culentinorum. Credere, hoc est Opinari, sive persuadere sibi, Virginem sine macula fuisse conceptam, ad Cultum ordinatum Dei ac Virginis merito pertinet, quia sufficientes ac Probabiles rationes humanis ingeniis adsunt, ut huic Opinioni, postposita contraria, adhaereant, ac praecipue laudante illam Ecclesia. Ad eundem quoque Cultum legitimum spectat celebrare Festum Conceptionis secundum Piam istam sententiam, quum sufficientes rationes Ecclesiae adsint, ut huic Opinativo cultui suffragium ac favorem praestet: quod & illa quotidie praestat in probandis Festis tot Sanctorum, aut Reliquiis, aut Miraculis, quae extra Fidei pomoeria sunt, sed jure intra fines Religionis prudentis versantur. Hucusque recte negotium procedit, & nihil agitur praeter aut contra mentem, aut consuetudinem Ecclesiae; atque omnis *Superstitionis merus abest*. Si vero quisquam hosce limites supergressus, vovere etiam audet, se Sanguinem & Vitam daturum propugnandi causa hanc ipsam de Conceptione sententiam: en *Excessum Pietatis*, en *Cultum inordinatum Dei*
 & Ma.

& *Mariae*, & consequenter *Superstitionem*. Quippe negari non potest, quia hoc sit *prae*ter *Constitutionem Ecclesiae*, quum post Aaunum 1600. inconsulata eadem Ecclesia, tum Novitium hoc Votum, tum aliae periculosaе, aut ineptae, aut temerariae sententiae de variis Deiparae praerogativis emeruerint: quae omnia ignoravit antiquitas, neque Ecclesia unquam probavit: Immo *contra Dei praeceptum & constitutionem Ecclesiae* Votum ejusmodi prodiit. Etenim divina lex prohibet, pretiosum Vitae nostrae depositum discrimini exponere pro tuendis quibuscvis Opinionibus, quamvis piis; & rursus Ecclesia Scottificam sententiam nunquam agnovit, nisi Probabilem & Piam, ac sibi de ejus Veritate judicium reservavit. Atqui voventes adeo Certam, quamquam repugnante Ecclesia, illam contendunt, ut non secus ac pro Fidei Articulis, jugulo suo pro illius tutela pugnare instituant. Deformitatem hanc & ipsi Ethnici sensere. Certe Cicero Academic. Quae. Lib. IV. *Sapiens*, ajebat, *multa sequitur Probabilia, non comprehensa, neque percepta, neque assensa, sed similia Veri: quae nisi probet, omnis visa tollatur*. Haec prudentem Ecclesiae oeconomiam confirmant, admittentis etiam Probabilia in Cultum Dei, illiusque Servorum. At is alibi elegantissime carpit improvida ingenia, quae Certitudinem statuunt, ubi minus decet: *Quid enim*, inquit, *tam temerarium, tamque indignum Sapientis gravitate atque constantia, quam quod non satis explorate perceptum sit & cognitum, id sine ulla dubitatione defendere?* Graviorem quoque Tullio Scriptorem audi, hoc est Sanctum Augustinum, qui Libro II. Cap. XXXVI. de Peccat. Merit. haec habet: *Ubi enim de re obscurissima disputatur, non adjuvantibus divinarum Scripturarum certis, clarisque documentis, cobibere se debet humana praesumptio, nihil faciens in partem alteram declinando*. Sed longe gravius, ac plane intolerandum intemperantis Pietatis ac Superstitionis genus est, pro eisdem incertis dubiisque sententiis in tormenta horribilia Mortemque ipsam incurrere velle. Neque enim Opinio illa intra Speculationis fines amplius continetur, sed in actionem descendit. Agitur heic de merendis hominum Vitis, & quidem temere ac imprudenter, quandoquidem immolandi sunt homines, ut id confirmetur, Verumque ac Certum evincatur, quod tamen Ecclesia ipsa adhuc dubium agnoscit. Agitur de Martyribus prorsus novitiis (nam & hoc suis clientibus polliciti sunt pii Novatores) quum tamen pro imaginatione tantum, non vero pro Dogmate Fidei, aut pro certo actu Virtutis, Sanguis effunderetur. En ergo, quos Lirinensis arguebat, quod *Nova quaerant, & gestiant aliquid Religionis*

adde-

addere. Additamentum sane ingentis momenti, & in quod gregis Christiani Pastores intenti sint oportet, ne invita Ecclesia nova Dogmata Fidei invehantur, ne temere Vitam suam perdant Fideles, ne denique humanis Opinionibus idem habeatur honos, atque Articulis Fidei.


Quod si non ferendum, atque a Superstitione alienum minime est Sanguinarium Parthenotimi Votum, quanquam pro Opinione probata in Ecclesia Dei conceptum: quid dicendum de altero, quod Cusentinus Populus emisit, de danda videlicet Vita pro tutela Opinionis non solum dubiae, sed omnino eliminandae e Scholis ac mentibus Fidelium? Ad finem propero, sed non ante manum e tabula tollam, quam professus fuero antiquum meum erga Panormitanos Cives obsequium, pro quorum honore ac tutela haec me scripsisse, ii ipsi, ut spero, intelligent. Neque ego eos, (quod Parthenotimus fecit) ingeniosa heic peroratione aggrediar, illorum benevolentiam & vota captaturus. Unum tantummodo efflagito: Scilicet animadvertant, quam efficaci ratione illorum constantiam in Voto Parthenotimus idem sibi procurarit: *Professo*, ait pag. 104. *non est Saltem Certum, quod Fidei Catholicae officiat praedictum Votum ac Juramentum.* Quae hactenus ego disserui, fortassis evicerint, reapse abhorrire a Fide Catholica, atque intolerandum esse Votum Sanguinarium, ac proinde nefas esse pro illo observando mori. Attamen arripienda est haec ipsa confessio Theologi nostri, qui dum nobis dat, *non esse Saltem Certum* Voti sui vitium, tacite significat, justam saltem causam superesse de ejus honestate dubitandi. At hoc unum quis non videat, Prudenti homini satis esse futurum, ut abstineat a Voto, ex quo Certus humanae Vitae interitus consequi posset, neque Certum est, an Deo ac Virgini res grata per illum praestaretur; immo in Voto complendo dubitandum foret, an Dei praeceptis, & doctrinae Fidei Catholicae obfisteretur? Nam quod subdit Parthenotimus, inquit: *Ita igitur vobis id servare licebit, ut Majores vestri tradidere.* Quam in rem Canones laudat. *Traditiones praesertim, quae Fidei non officiant, ita observandae, ut a majoribus traditae sunt.* C. Illud Dist. 12. *Quippe in his rebus, de quibus nihil certi statuit divina Scriptura, mos Populi Dei, & instituta Majorum pro lege tuenda sunt* c. 7. dist. 11. Nemo e doctis Panormitanis est, qui quam absone ab isto Theologo adferantur haec, continuo non sentiat. Agunt Canones ii de *Risibus*, ut supra innui: Agunt de Traditione non paucorum annorum, sed antiquissima, & cujus

ejus lateant primordia: Agunt de Consuetudine, quam non pauci, sed Populus integer, divina Scriptura & Ecclesia minime repugnante, observet, a Majoribus acceptam. Atqui Votum Sanguinarium *Dogma* respicit; illudque tantummodo ante centum annos patres & aviorum, qui nunc degunt Panormi, nasci primum viderunt, & pauci exceperunt. Accedit, quod famosae *Granatenses Lamine*, aliaque recentes imposturae ex Hispanicis scriniis depromptae, & fucum, tandem fecere Panormitanis, ad omnia Pietatis officia non segnibus, quasi jam adeo Certum evasisset Conceptionis Virgineae Mysterium, ut pro ejus Veritate tuenda eculei, & atrocia quaevis tormenta, & mors ipsa, prudenter & cum laude, immo cum spe Martyrii, tolerari posse crederentur. Haecce ergo *Traditio*, quam sacri Canones commendant? Apage. Immo inventum, ut ita dicam, heri natum; & Romanae Sedi injuriosum, quae rem dubiam agnoscit, sibi quoque de illa judicium reservavit; & perniciosum Fidei, quum certissimis ejus Dogmatis Novatores isti pares faciant Opiniones hominum; denique contrarium divinae Legi, a qua jubemur non projicere imprudenter ac temere Vitam.

Ceterum quantis potest vocibus pergat Theologus noster revocare in mentem contrerraneis suis *Pietatem ac Prudentiam Majorum in suscipiendo id genus Voto*. Ubi illi recogitent, quibus machinis ad hujusmodi Votum pertracti fuerint Majores sui, & quid Romanus Pontifex postea de Granatensibus Laminis decreverit, & quid factum de ceteris commentis, quibus larvam posterior aetas detraxit: hercle nullus dubito, quin aliter agendum rati, non minori *Pietate*, majori autem *Prudentia* a Sanguinario Voto recedant. Plaudo & ego cuicumque Panormitanos Cives hortanti, ut Pietate cum Majoribus centent, dum tamen Pietas prudens ac solida sit, non imaginaria, non in excessus improvide rapta. Si vera sunt, si solida sunt, quae hactenus adversus Votum Sanguinarium disserui, jam Panormitanos non ego, sed Apostolus his demum verbis Ephes. V. vers. 17. alloquitur: *Nolite fieri Imprudentes, sed intelligentes, quae sit Voluntas Dei*. Et quoniam de re tanti momenti, qualis est pretiosissima hominum Vita, in Panormitano Voto atque in Cusentino agitur: nemo quidem fallatur, Voluntatem esse Dei sibi persuadens, ut Vita servetur in solidae Virtutis ac Pietatis officiis exercitanda: quum ipse Deus aperte praeceperit, ne rem tantam sui juris nos arbitrio nostro abjiciamus. Contra judicio meo fallitur, & saltem judicio omnium falli possit, qui minime certus, an gratum Deo sacri-

ficium offerat, & an Ecclesia ferale hoc Votum probet, aut sit unquam probatura, in mortem certam sub specie Pietatis ruat. Certetur proinde voce & calamo pro tuenda Sententia favente Immaculae Conceptioni Virginis: at Vitae hominum parcatur, dum Quaestionem hanc dirimat Apostolica Sedes, mentis ac Voluntatis Dei legitima interpres, cujus correctioni interim haec omnia mea demisse subiecta volo.

F I N I S.



FER-

FERDINANDI VALDESII

EPISTOLAE,

SIVE APPENDIX AD LIBRUM

ANTONII LAMPRIDII

DE SUPERSTITIONE VITANDA,

UBI VOTUM SANGUINARIUM RECTE OPPUGNATUM;
MALE PROPUGNATUM OSTENDITUR.

THE
JOURNAL OF THE
ROYAL ANTHROPOLOGICAL INSTITUTE
OF GREAT BRITAIN AND IRELAND
VOLUME 38. PART 1. 1908.
LONDON: PUBLISHED BY THE INSTITUTE.
1908.



EDITORIS MONITUM.



UOD Antonius Lampridius eventurum jam praedixerat, accidit. Ubi in lucem prodit ejus Liber *de Superstitione vitanda*, quicumque nulli partium addictus ad illius lectionem se contulit, Voti Sanguinari deformitatem nullo negotio animadvertit. Contra qui eidem Voto favebant, aut eodem sese obligarant, continuo prodidere, quam difficile sit anticipata judicia deponere. Impensus igitur quam antea pro ipso Voto stetero. Si tanti fervoris causam ab eis petas, una, inquit, Pietatis tutela nos movet. Non mihi irascantur, si dixerō; eos ab existimationis propriae periculo & cura acrius incendi. Ingenii causa in primis heic agitur. Fierine potest, ut tam docti viri agnoscant, & quod gravius est, aliquando fateantur, se opinione deceptos, se populum quoque, nolentes tamen, decepisse? Ad arma proinde conclamatum est undique. Panorini praesertim constitutum fuit scriptis verberare, obruere obsistentem Lampridium. Plurimi delecti ad impetum faciendum, unus post alterum, ut pugnatorum si non viribus, numero saltem terreretur, immo conficeretur insensus hostis.

hostis. Haftenus malae causae signa reputatae fuerant contumeliae & probra. Hisce tamen uti pro sua sapientia licitum honestumque censuere ex iis commilitonibus nonnulli. Altera praeterea tutior debellandi hostis ratio excogitata est. Sanguinarium Votum pauci antea apud Siculos concipiebant. Hortamenta, preces, & quidquid roboris eloquentia praestaret, adhibita nuper fuere, ut complures Religiosorum virorum Ordines, Canonicorum Collegia, Congregationes piorum hominum, ipsorumque puerorum, & variarum Urbium populi, in ejusmodi Votum consentirent, ne dicam compellerentur. Publicis etiam typis cura cujusdam Canonici certior factus est terrarum orbis de tanta accessione Pietatis Siculae ad Votum Sanguinarium. Nihil dubitandum (ita illi imaginantur) quin ad immanem hanc Voventium copiam (quanquam ex iis plerique indocti sint, & vel ipsi Literati momenta praecipua controversiae hujus ignorent) contremiscat & excidat cor Lampridio. Quid enim ille in posterum audeat, unus adversus tot millia hominum? Immo sperandum est, ajunt illi, universam Italiam, Galliam, Germaniam, ceterasque Catholici orbis Provincias, haftenus ab hocce Voto abstinentes, aut abhorrentes, Siculorum exemplo excitatas, confertis agminibus ad illud nuncupandum convoluturas. Nam quod tot alia Siculorum millia, non minus doctrina quam Pietate illustria, hujusmodi Votum damnent, aut in illud consentire reculent, flocci faciendum est. Haec illi. Interea quum ad manus meas Epistolae quaedam pervenerint *Ferdinandi Valdesii* ad idem argumentum spectantes, de publica re me bene meritum confido, si easdem in lucem efferam. Omnium nimirum interest nosse, post tot Siculorum conatus, quae rationes etiam ex adverso militent, ne in tanti momenti negotio, quale est Superstitionis & inconsultae Mortis periculum, quisquam incaute fallatur.





AUCTORIS MONITUM.



QUISQUIS tantum patientiae polliceri tibi potes, ut haec legas, unum te rogatum velim. Quo tempore priores haec Epistolae conscribendas suscepi, breve mihi certamen ineundum arbitrabar. Verum supervenientibus novis identidem pugilibus, opus fuit non semel redintegrare proelium. Quum vero & isti eadem objicerent, aut pro se adferrent, quae jam a praecedentibus objecta fuerant, ipsaque majore etiam strepitu & confidentia urgerent: imperare mihi non potui, quo minus ea rursus ad examen revocarem. Hinc interdum oculis tuis exhibita aliis sub verbis eadem rerum facies. Tuum sit, humanissime Lector, quae pauca repetita offendes, excusare. Absolutum aedificium rescire a fundamentis, nimis mihi molestum fuisset. Ceterum quod alibi non semel protestatus sum, sincero corde heic iterum protestor. Si quid ego sum alibi, sum in novo isto agone atuli, quo extenuari posse videtur Sententia, statuens Mariam Sanctissimum ab originali labe praeservatam, eo tantum consilio, immo & ex necessitate factum fuit, ut ostenderem, quam temere, & contra mentem veterum Theologorum, ipsiusque Ecclesiae, posuimus hisce temporibus Debitum ejusdem culpae ab ipsa Deipara nonnulli excludant: quod etiam doctissimi PP. Salmanticenses antea praestiterant. Ad haec quum inter Piae Sententiae affectas complures miren-

tur

tur, ne dicam tacite suspens Apofolicam Sedem, quod tam fufpenfo gradu in ejufmodi controverfia procedat: aliquid in gratiam imperitorum indicandum fuit, quo appaveret, quanta fit in hoc etiam negotio Prudentia & Sapiencia ejufdem Romanae Sedis. Nihil profecto antiquius illa habet, quam ut foveatur & crefcat in Catholicorum cordibus legitima veneratio & amor erga feliciffimam eam Virginem, quam Deus in Matrem unigeniti Filii fui elegit. Atamen probe confcia, non folum in quaefione de ipsius Virginis Matris Conceptione, fed & in omnibus aliis, quae ad Fidem Orthodoxam pertinent, quanta fieri poffit maturitate effe procedendum, atque a divinis Scripturis, & Traditione Sanctorum Patrum, non vero ab ullo partium ftudio, neque ab indifcreta Devotione Veritatem effe petendam; in praefenti autem difputatione praegrandem quidem Probabilitatem adeffe Scotisticae Sententiae, fed multa nihilominus obftare, quae poftremum iudicium fufpendere cogunt: haftenus a dirimenda controverfia abftinuit, accuratiori fortiffis examini rem tanti momenti refervans, certe laudabili interea ratione Chriftianorum omnium pio erga Deiparam affeui confulens.

Veneranda funt ejus Decreta; nihil eis, neque Probabilitati Piae Sententiae ego detractum volo; nihil novandum cenfeo. Piam, inquam, Sententiam, quae adhaerentes, ex corde laudo, neque oppugnare mihi eft animus; abundant enim, quae eam perfuadere poffint, & nihil adverfus illam militat, quod Probabilibus rationibus ab illius patronis non temperetur. Unum ergo mihi conftitutum fuit, fcilicet oftendere, ab ea Sententia Certitudinem abeffe, ac propterea minime ferendum Votum Sanguinarium, fub fomniae hujus Certitudinis perfuafione conceptum. Votum fane graviffimum, quum ibi de Vita hominum agatur; Votum vergens in dedecus Religionis, quae pro tutela Opinionum mortem fubire nos vetat, & in Reipublicae detrimentum, quam vitae fine iufta cauffa prodigi laedunt. Ejufmodi Certitudinem tribuere Piae Sententiae, eamque argumentis ac rationibus tueri, unicuique licet. Sed quando eo ufque prolabitur ingenium hominum, ut quod Certum arbitrat Meditatione, quae fallax effe poffit, Vitae etiam profufione confirmare velint: tunc non folum licet, fed Religionis, Ecclefiae, & Reipublicae intereff, tam improvido confilio obftitere. Tum folum Certa res erit, quum Certam Ecclefia decerneret. Iftam ergo Proteftationem ubique repetitam volo. Si quid in neceffitate pugnandi adverfus male confurum Votum pro avertendo fcandalo mihi excidet, non ad minuendam Piae Sententiae Probabilitatem, ac Privilegia a Summis Pontificibus in eam collata; fed unice ad prodendam ejufmodi Certitudinem fine bonis tabulis venditanti,

tam, adhibitum scies, Veritatis cupide Lector. Tuum postea eris decernere, iustiusne ego pro doctrina Ecclesiae, pro gloria Sedis Apostolicae decertarim; an qui iudicium de ista Quaestione a Romanis Pontificibus sibi reservatum usurpantes, Sententiae nondum Certae illud obsequium, & Vitae sacrificium praestari posse credunt, quod Sententiis ad Fidem spectantibus unusquisque Fidelium debet. Quotiescumque agitur de Dogmatis Fidei, auctoritas Ecclesiae nobis ea proponentis, quum coelitus sit immunis erroris, de rerum Veritate certos nos facit, neque ulla nobis dubitatio superest, quin tunc Tyranno instante vitam pro Certa Veritate dantes Deo placeamus. Verum donec Ecclesia geminas contrarias de Conceptione Sententias vigere sinis, neque hactenus Thomisticam improbavit: quidnam iustificare possit eligentem mori pro Pia Sententia, non video. Certa Veritas ibi desideratur, neque privata Persuasio prodesse possit, quum audienda sit ante omnia Ecclesia, quae secus iudicat, nulum hactenus agnoscendo Peccatum aut Errorem in opposita Opinione. Deficiente autem Certa Veritate in Pia Sententia, & periculo errandi inde nondum sublato, a Superstitione difficile absis, quisquis pro ejus vela Vitam suam impendere velit, quum Bonum maximum & Certissimum pro nondum Certo commutare audeat, & Vitam temere projicere grave sit crimen.

Atque haec praefari opus fuit. Si vero quemquam in posterum actus continuandi proelii invadat (vin enim aliud ab animis tanta affectuum commotione agitata est expectandum) rogatum te velim, Lector, ut animadversas, qua ratione ipsi iterum decerent. Nam ubi, dimisso praecipuo Quaestionis huius negotio, ad parerga, ad conrumelias, ad creandam adversario invidiam deflectant: pugnantes irriso labore facile deprehendentes. Rursus ad controversiae nucleum quod attinet, non antea tibi iudicandum erit, quam certus sis, collatione peracta, fideliter expressa fuisse, quae ego attulerim, sive veterum dicta, sive rationes atque momenta ad controversiam hanc dirimendam in primis idonea. Nisi enim mihi nimium blandior, eo res adducta est, ut in agoni ultra descendendum minime videatur, tibi que satis suppeditatum sit ad dignoscendum, quam temere Voto Sanguinario Siculi sese obstringant. Ad te denique conversus, te humili prece alloquor, quicumque Piam Sententiam amplexus es, aut es amplexurus. Perge sub ea consideratione devoto cultu, scriptisque etiam, si lubet Deiparam Sanctissimam tibi devovere; sed oculos a Magistra omnium Romana Ecclesia ne unquam averte. Huiusmodi Sententiam illa laudat, eique multiplici patrocinio favet: in ipsa tamen Certitudinem nondum agnovit, & videndi sunt

Haeretici, qui secus de illius Decretis judicant. Cur tu privata ingenii ambitione Prudentiam tot Romanorum Pontificum contemnere velis, usque adeo ut quod ii nondum Certum habuere, tu Certum praefracte tibi persuadeas, immo pro imaginaria hac Certitudine tuenda Vitam tuam, quasi pro Dogmate Fidei, vovete audeas? Viri probi ac prudentis est in abstrusis ac difficillimis quaestionibus se ad normam componere Ecclesiae, quam sequentes nunquam errabimus. Huc pertinet Breve quoddam GREGORII. XV. Pontificis Maximi, cujus sensa omni veneratione digna utinam, usi par est, tua quoque facias. Ad Margaritam a Cruce Regis Catholici Amitam Sanctimonialem scriptum illud fuit.

G R E G O R I U S X V.

» **D**ilecta in Christo filia nobilis mulier salutem &c. Latius plane
 » & felicius. regnas arctis Monasterii finibus conclusa Christo
 » inserviens, quam si amplissimas regnatricis Domus tuae provincias
 » ditione teneres. Principibus enim homines quidem plerumque coa-
 » cti obtemperant; at iis, qui Crucem sceptris praetulerunt, Coelum
 » ultro faver, & Angelici coetus famulantur. Proinde nulla nobis gra-
 » tulatio carior accidit, quam tua, cum in tuis religionis precibus
 » maximum nobis praesidium esse credamus. ad Christianae Reipubli-
 » cae dignitatem amplificandam. Tuam igitur obedientiam libenter
 » excipimus, castissimum istud sanctitatis domicilium autoritate nostra
 » tuebimur, ac super illud Apostolicae benedictionis divitias liberali-
 » ter effundimus. Gaudemus praeterea te de Beatissimae Virginis Con-
 » ceptione tam sollicita cogitare. Sed quae causae Pontifices Romanos
 » antecessores nostros retardarunt, eadem nobis impedimento sunt, quo-
 » minus possimus pietati tuae ea in re gratificari. Iis, quae Spiritu
 » Sancto affante Apostolica auctoritas decernit, acquiescere aequum est
 » Nobilitatem tuam; quae existimare debes, melius Virginem ipsam co-
 » li diversis Opumque sententiis, in unum tamen obsequium vol-
 » untate studium convenientibus. Deus, cujus vicem licet immerentes
 » gerimus, nostram benedictionem, quam tibi impertimur, omni-
 » potenti autoritate confirmet. Datum apud Sanctam Mariam Majo-
 » rem 12. Julii MDCXXI. Pontificatus nostri Anno Primo.



CLARISSIMO VIRO, AMICO DULCISSIMO

D. GREGORIO AZEVEDO
FERDINANDUS VALDESIUS S.P.

EPISTOLA PRIMA.



UAE mihi nuper contigerunt, ad te prescribere, mi Azevede, volupe est. Vacare quippe mihi tandem datum fuit, & in delitioso rure posse per aliquot dies consistere. Quare tecum nunc sum, te alloquor, datamque fidem libero. Secunda navigatione Neapolim appuli. Carolo Rege, Maria Amalia Regina nihil benignius, nihil amabilius reperi. Eadem, quae olim, erga me Marchionis sive Ducis de Monte Allegre, & Cajetani Boncompagni Ducis Sorae, humanitas & benevolentia. Marchionem Tanuccium tuo nomine adii. Illustrissimo quoque Galliano & Clarissimo Canonico Mazochio salutem plurimam verbis tuis dixi. De te, de studiis tuis, de iniquitate fortunae, proh Superi, quam multa, quam dulcia! Urbem hanc non semel interea perlustravi, atque impedire minime potui, quia apud me Madritum, quin Hispalis ipsa prae illa decreveret; quantum vero, ne rescire velis quaeso. Alia tu fortassis hac de re a me

G g 2

expe-

expectes; ego vero quod pluris facio, quod maximum est, *narratum* pergo. Tute ipse, ut reor, laudabis, quod quiescitis contentis, quae nunquam somniasses, ingentis gaudii argumenta communia tecum velim. Ad Sanctorum Apostolorum, sexta post ingressum meum in hanc Urbem die, pergebam, medius inter Clarissimos Jurisconsultos: *Josephum Aurelium de Januario*, & *Franciscum Rapollam*, quos honoris causa commemoro. Obvios habuimus Fratres duos Minores Observantes. Dum eis salutem adprecarentur comites mei, excidit eis ab ore nomen *de Luca*. Confisto ego, & sitne ille *P. Joannes de Luca*, anxius percontor. Isdem, ajunt. Tunc ne ulla quidem ab amicis venia petita, ad Religiosum virum aelutatum advolo. Tunc ergo (Italicis verbis laetabundus illico exclamavi) Tunc ergo Pater de Luca, de quo multa mihi fama nuntiavit, & cujus nomen apud Hispanam quoque gentem sonat? Ego sum, inquit. Tum ego: Bene mihi Deus voluit, quod Neapoli inopinare in te incurro, quem Romae quaerere constitutum mihi fuerat, antequam ab Italia abscederem. Quisnam ego, & unde essem, subinde ille sciscitatus est. Ex interiore Hispania missus huc advenit, ex Regno videlicet, ubi potentissimo Regi nostro Philippo tu perquam notus, & a Literatis viris summo in honore habitus celebrior fortassis es, quam apud Italos. Verum inopportunos hic locus. Sine hoc te exorem, ut cras mihi liceat ad Coenobium tuum adventare, mellifluoque tuo sermone, & Magistrali scientia tua aliquantisper frui. Annuit ille, & abiit; ego vero ad amicos regressus, laetior quam antea reliquum diei honestis ac eruditis colloquiis una cum iis transegi.

Sequenti die orto jam Sole, & viae duce mihi conducto, festinus per longum iter ad Monasterium doctissimi viri profectus, in ejus cubiculum humanissime exceptus intravi. Parata super ignitos carbonem Coccolata fumabat. Immisso ligno rapidis manibus hinc inde agitata ubi spumam concepit, e vestigio in geminos cantharulos non una vice injecta, forbentibus nobis voluptatem, simulque vires ad colloquendum adauxit. Tunc ego: Quae me anxia cupiditas urgebat, Reverende Pater, te audiendi, tecum colloquendi, inde nata, quod, ut auidi apud Hispanos meos, in tua unius doctrina sita si spes universae Catholicae Ecclesiae. Spes inquam fore, ut nimium dilata, semperque exoptata definitio Controversiae de Immaculata Virginis Conceptione ab Apostolica Sede tandem procedat. Satis quidem compertum habeo, non deesse relucantes, immo ex quo Neapolim veni; rumores accepi, erupisse pridem ex faucibus, ut opinor, infernalis

lis baratri, Libellum cujusdam (nomen nequaquam teneo) qui *de Superstitione vitanda* agit, in quo fertur Piissimam, immo Certam ex omnium consensu Sententiam in dubium revocasse. Nobisne inde formidandum? & quanam ratio retundendae & compescendae in posterum ejusmodi audaciae ac temeritatis? Heic insurgens eximius Theologus, & manu aperta tabulam percutiens: Bono, inquit, sis animo. Quod est ad insulsum illud & omnino futile Lampridii Opusculum, gemino brachii mei ictu jam confossum attritumque puto. Uno brevi Prologo galeato a me in lucem emittendo, omnes ejus nervos (si vel unum tamen habebat) minutatim refecabo. Immo illud ipsum, antequam nasceretur, jugulaveram in Dissertatione mea *de Immaculata B. Virginis Conceptione* Anno 1739., heic publici juris facta, quam, ut arbitror, cum voluptate legeris, & *Libellatorem* quemdam a me tanta felicitate prostratum animadverteris, ut si is antea ad mortem non festinasset, prae verecundia diutius vivere non potuisset. Ad haec ego: Notam mihi Lucubrationem tuam, Reverende Pater, legere quidem, quum in Hispaniis versabar, vehementer concipivi, laudibus nempe multorum cumulatam; sed quia vix illuc delata pauca exemplaria ab avidis Literatis hinc inde statim arrepta fuerunt, nullus mihi relictus fuit ad Librum adipiscendum locus. Postquam vero Neapolim veni, taurus in me ingruit negotiorum nimbus, ut hactenus pacatum animum ad tantam rem adhibere nequiverim. Tum Pater de Luca: Ad Bibliopolam Mutium ergo perege, & Armamentarium tibi para adversus omnium hac de re cavillationes, quas Deo dante penitus exfussavi. Attamen nescio, an subdubitans, essemne Librum emturus, atque in hac arena invictus pugil ex ejus lectione evasurus, in cathedra compositus, compressisque aliquod agitans labris, in haec verba postea erupit.

Quanquam in ea tempora incidimus, quibus aut stolidi, aut perversi homines nec doceri, & si opus sit, dedoceri se minime patiantur: te tamen pro merito probae tuae voluntatis, paucis afflare verbis constitui, quae ubi altius memoriae mandes, te in exiguum Martem facile transformabunt. Dic ergo conterraneis tuis, Quaestionem de Immaculata Deiparae Conceptione jamdiu fuisse sublatam. Nondum ii satis perspexerunt: perspexi ego, atque causam Scotistis adjudicatam meridiano Sole clarius ostendi. Idque decretum Apostolica Sedes, velit nolit, jamdiu pronuntiavit. Quid stupenti similis me intueris? Aures mihi accomoda. Nonne Conceptionis Festum ac Officium comprobavere Romani Pontifices? Inficiare, si potis es. Quod plus

plus est, Alexander VII. *secundum Piam* Scotistarum *Sententiam* *Fecunditatem* *solemni ritu celebrari* testatus est. Praeterea in Officio ipso *Dignissima* & *Sancta* appellatur eadem Conceptio, hoc est momentum illud, quo infusa est in Corpus Virginis *Beatissimae* Anima. Argumenti vim nunc perpende. Si *Dignissima*, si *Sancta* est, Ecclesia univ[er]sa canente & fatente, *Conceptio* Virginis: ergo culpam omnem excludit, & gratiam & Sanctitatem designat perpetuam comitem Conceptionis, eique affixam & inhaerentem. *Quam qui negat, is non modo Ecclesiam contemnat necesse est, sed etiam Rationis usum prorsus amiserit*; quippe qui facili invictique argumenti nec vim percipiat, nec veritatem hujus *Mysterii*, quod tanto in lumine collocavit Ecclesia caecus adhuc & stupens intruatur. Nervole, optime, invincibiliter: tunc ego complodens exclamo. Atque is: Jam audieris, me in uno Opere meo *Perfectius* dedisse, quidquid hactenus ad Immaculatae Matris honorem tot tantorumque Theologorum elaborarunt Ingenia. Infantem, immo infantissimum appelles, qui nuper est ausus de Superstitione scribere, & cum gigantibus congredi pumilio ridendus.

Continuato deinde sermone dixit perrexit: Potissimum vero, quum exerti armis in *Libellatorem, miserum Magistellum, vilem homuncionem*, insilui, tum illius cornua fregi, tum *Piam* de Conceptione *Sententiam*, quam paucis exceptis nemo nunc est qui non amplectatur, firmissimam, Certissimam, & Romanae, immo & universae Ecclesiae suffragio definitam evici, postquam ineluctabilia, quae ex Conceptionis Festo consecutaria fluunt, in medium protuli. Jam celebri Decreto, ut aiebam, Alexander VII. indicavit & edixit, institutum a tot Saeculis Festum illud, ac deinde ab Apostolica Sede confirmatum, pertinere ad cultum Virginis *secundum Pietatem sentientium*, *Virginem a macula peccati originalis praeservatam immunem*; seque huic *piae, devotae, & laudabili institutioni, & Festo, ac cultui secundum illam exhibito* favere velle. Quare vides, Pontificem declarasse *Objectum* Ecclesiastici cultus, *qui numquam est in Ecclesia*, ut idem Pontifex subdit, *immutatus*. Consequenter festus Conceptionis dies non *Sanctificationem* Deiparae, sed ejus ab originali macula *Immunitatem* respicit. Nunc mecum procede. Cultus Dei atque Sanctorum, mandato Pontificis toti Ecclesiae propositus, ab eaque obedienter & rite acceptus, *Est aperta professio Fidei*. Atqui Ecclesia in deferendo publico Cultu ad Religionem pertinente, hoc est *in Fidei professione, & in regula morum* Christianis tradenda, errare non potest; quippe *columna & firmamentum Veritatis* a Deo constituta: Er-

go neque errare potuit in instituendo, sive probando Conceptionis Festo secundum Piam, hoc est secundum Scotisticam Sententiam. Et sane si Romanus Pontifex in his mandandis & statuendis unquam falleretur, nihil esset errore illo detestabilius. Quibus constitutis, jam vides, jam manu tangis, diremtam fuisse dudum controversiam de Immaculata Conceptione Virginis. Immo in aurem tibi dicam, quod nisi amicis, & quidem paucis, revelare consuevi. Scilicet invictissima argumenta mea eo rem perduxere, ut jam Sole clarius appareat, Virginis Immunitatem manifestum Dogma Fidei evasisse, illudque a Cathedra Petri stabilitum. Modeste tamen unum ego statui, hoc est ejusmodi adversarios ex *Conclusionem Theologica errantes* tantummodo esse appellandos, & nondum Veritatem hanc ad Fidei Articulos fuisse deductam, ne puerilis inscitiae Apostolicam Sedem arguerem, quae non videt, aut se minime videre fingit, jam ab Alexandro Pontifice decisum, quod pervicacia paucorum adhuc indecisum impudentissime contendit. Sed quicumque Logicae ac Theologiae non perfunctorie operam dedit dum lucubrationem meam attente legat, nullo negotio intelligit, jam omnem sublatam fuisse dubitationem de triumpho victricis Piae Sententiae inter Articulos Fidei computandae. Invisis aliis argumentis rationibusque haec ego roboravi, ut in desperationem adversarios adduxerim, & *nesciant miseri quo se vertant, quum ad hunc locum argumento coacti impingunt, nempe ad Ecclesiae auctoritatem. Dolis quidem & fallaciis utuntur, ut evadant; at ego omnem eis jam eripui cavillandi licentiam.* Et quanquam Haereticos eos appellare, a Pontificiis decretis absterritus, ausus non fuerim, eos tamen *errantes, stupidos, non sani capitis*, firma voce, typisque publicis pronuntiare, uti merebantur, non dubitavi. Tum haec rationes & argumenta mihi qua potuit majori brevitate commemoravit.

Talia mihi audienti cor prae laetitia artem faciebat ludicram. Ubi vero is loqui desiit, subdidi ego: Argumentorum tuorum, admodum Reverende Pater, cataphraeta acies hercle tanto robore incedit, ut ne sexcenta quidem armatorum millia contra te stare, ut arbitror, auderent. Sed dic amabo: quum Sententia nostra in tanto lumine collocata jam sit, tua praesertim opera, qui non visa ab aliis lynceo oculo tuo vidisti ac revelasti: cur Romana Sede Veritatis luce percussa, tot Catholicorum Regum nostrorum, & gentis Hispanicae, doctissimae & piissimae precibus fatigata, nondum clarissimo & apertissimo quoquam Decreto eandem stabilivit? tacito enim Decreto, ut tu evicisti, jam ipsam consecravit. Cur abstinuit a declarando Mys-
rio

rio immaculati Conceptus ut rem de Fide, vel falsam infra fidem, sed cum Cerritudine aliqua infallibilis Veritatis? nam, & hoc, uti audiui, oblato ante paucos annos Regio nomine supplici libello impetrandum curastis a Clemente XII. Pontifice Maximo. Heic ille subiratus, detracto sibi e capite pileolo, & in latus projecto, submurmurare coepit, ac tandem inquit: Cicadae ventrem noli quæso, bone vir, ultra titillare. Hoc unum habeto. Justum, necessarium erat, ut Apostolica Sedes in petitionem nostram consentiens, expansis velis ad expetitum Decretum procederet. Verum antiquus Deiparae hostis, calcaneo illius semper insidiatus, homines quosdam isa spiritus Insaniae exagitavit, ut ad veterem cantilenam redeuntes, Summorumque Pontificum auctoritate neglecta, suam facerent Serpentis caussam, & bene coeptum negotium perverterent. Sed quei, reponebam ego, Pontifex contemtores, ut ais, Pontificiae auctoritatis nobis ejusdem assertoribus anteposuit? Quia, inquit, desideratus est, qui invictissimas a me postea excogitatas rationes proferret, & sycophantas illos ac deliros prosterneret; uno hoc nomine quippe ii digni sunt. *Quis enim judicium & sanitatem mentis in illis agnoscat, qui quasi nihil a tot summis Pontificibus ad Piae Sententiae vel tutelam vel ampliationem, collatum esset, intolerandam Blandelli & Spinae temeritatem imitari pergunt?* Auctor tamen sum tibi, ceterisque Hispanis, ut meliora sperent, & quidem brevi. Si fama non me fallit, eam vim in Libro meo plerique sentiunt (neque Romanos ipsos excipio) ut quovis pignore contendam, proximum tempus esse, quo victas dent manus, quum jam vel ipsi terrae cardines ad fulmina ex eo Libro erumpentia contremiscant. Fremat licet tortuosus coluber, non diu stabit; sub hac manu prostratus, sub hoc ense (& calamus digitis apprehendit) Caelo plaudente cadet. Neque plura loquutus est. Ego post humilem gratiarum actionem abii. Studium tuum, Amicorum optime, satis novi pro honore Deiparae, pro tutela Immaculatae Conceptionis. Religioni mihi duxissem, quae fausta hac in re mihi contigerunt, diutius celare te, ac per te reliquam gentem nostram. Vale.

Ex suburbano Neapolis XII. Kal. Junias Anno MDCCXL.

Doctissimo, & amantissimo Azevedo suo Valdesius S. P.

EPISTOLA SECUNDA.

LAUREATAS nuper ad te dedi Litêras. Vide nunc, quam fluxa sit mortalium conditio, quam proximus sereno nubilus dies. Post aliquod tempus non mediocri cum delestatione rure transactum, Neapolim regredior. Quo in loco res meae essent, inquirere prima cura fuit. Otii aliquantulum nactus, die quadam a prandio, revisendi Patris de Luca cupidus, sumto pallio ex aedibus descendebam, quum fores pulsantur. En Romanus quidam vir doctissimus; *Abbatem* appellant, quanquam nondum ullius Abbatiae fercula liguriat. Ejus nomen a me ne pete; quippe prodere piaculum grande putarem, Sacramento ad reticendum obstrictus. In ejus vero amicitiam adduxerant me Amicorum literae, eumque carissimum habebam, quod non solum sacra Eruditione foret excultus, sed etiam in studiis suis unius Veritatis amore duceretur. Exhibuit se ille mihi ducem, quocumque essem profecturus; & jam progressuri eramus, quum ex inopinato nos sistit idem Pater de Luca superveniens, ut me pro sua humanitate inviseret. In conclave ascendimus; multa ibi confabulatio de paucis, quos Scotisticae Sententiae infestos tu quoque nosti; novisque telis *Libellator* rursus impetitus. Inter alia nuntiavit ille, se diu dubitasse, num arma converteret in quendam *Antonium Lampridium*, nullo sibi negotio vincendum, parum laudis, nisi etiam dedecus sibi metuens in confutando homine, qui in solida Theologia plane hospes, nihil nisi ineptias & sophismata Lectoribus suis propinat. Discessurus impetrare a nobis minime potuit, quominus ipsum ambo ad Coenobium suum Sanctae Mariae novae deduceremus. Vix autem inde pedem extuleramus, quum ad me conversus Romanus Abbas, fixisque in me oculis, fallorne, inquit, an prae gaudio exilire mihi videris? Tunc ego: Invidendae felicitati aedepol mihi tribuo, in clarorum virorum amicitiam adrepere posse, atque istius praesertim, quem sibi in maximo negotio Patronum gens nostra delegit. Immo, subdidit ille, tantarum virium, ut unus certamini huic idoneus videatur. Heic ego: miror sane, quae dicis. Si irridendi causa: liceat dicere, pudorem in te de-

Tom. V.

H h

sidero.

sidero. Ejus Libros tam avide ab omnibus conquisitos nondum legere oportet. Ad haec ille: Ain Libros? Quin Opusculum unum dicito fodes. Atque istud mihi est, a quodam necessario meo ante paucos dies dono oblatum, illudque non semel legi. Si non semel legisti, reponebam ego est cur Libro illi gratuler; neque enim nisi Libris optimis tantum honoris defertur, ut pluries legantur. Immo contra, ajebat ille, lectionem iteravi, ut quae in eo prava sunt multa, certius perspicerem. Scriptor enim ille, ut sincere tecum loquar, bonam causam a se susceptam, deteriores incaute effecit, suoque labore plausum fortassis apud imperitos, non vero apud cordatos doctosque viros, sibi paravit. Equidem haec audiens temperare ab iracundia vix poteram; neque incipias ibo: non levis inter nos oborta est altercatio: At ille: Verba abeant. Tu in hujusmodi controversia judicem, ut video, me recusas; neque immerito. Ego contra te judicem volo. Dum grave tibi non sit ad meas aedes cras accedere, ubi una cum aliis Libris me ac Librum Patris de Luca invenies, ibi ad tuum tribunal stabo. Annui, junctisque demum dextris ab eo discessi.

Postera luce amicum virum adii, fluctuante tamen inter spem & metum animo. Post consueta humanitatis officia arripuit Romanus Abbas Patris de Luca Librum, atque hisce exordium fecit. Patrocinium suum religiosus iste vir, ut nosti, Piae Sententiae de Immaculata Virginis Conceptione commodavit. Animum ejus, Sententiam ipsam laudo: atque utinam, is uti ingenium, ita & Prudentiam uberiorem ad hujusmodi certamen adferre potuisset. Non attulit certe: quod ego jurene an injuria eidem obijciendum putem, faciam nunc ut intelligas. Multas congeffarat causas *Libellaror* (ita eum doctus Minorita, hispido sane vocabulo, appellat) cur summo Pontifici abstinendum foret ab agitando ulterius, eoque plus a dirimenda quaestione de Conceptu Deiparae. Neque utile id, neque necessarium; & difficultates occurrere non paucas; imminere etiam pericula. Quid haec Theologus Venetus? Primo statuit, ab Alexandro VII. solemnii Constitutione proditum fuisse, Virgineae Conceptionis Efestum diem celebrari, & celebrandum esse *secundum Piam Sententiam*, illorum videlicet, qui *animam Virginis in primo instanti creationis atque infusionis in Corpus a macula peccati originalis praeservatam fuisse immunem* tradunt. Tum contendit, non posse Ecclesiam errare in publico Cultu ad Religionem pertinente; adeoque quod colitur ab Ecclesia universa, id certo verum & sanctum est, falsumque esse non potest. Variis illi

mo-

modis hoc ille infra repetit & refricat, inde postea Conclusionem hanc deducens: Scilicet. *Cultus Objecto jam designato per Alexandrum Pontificem, ab Ecclesia teneri Sententiam Piam, non tanquam Probabilem, sed tanquam Certam, atque adeo Certam, ut vi Falsum subesse non possit.* Ad haec, quandoquidem in Horis Canonicis Conceptio Deiparae *Dignissima & Sancta* appellatur, hinc epithetis, tam firmo veluti sigillo Veritatis ac Certitudinis, constabilitatem vult Marianae Immunitatis Sententiam, ut qui neget, *Rationis usum prorsus amiseris.* Ita ille. Quod quum audis, ne arbitrare, illum novis & numquam adhibitis armis in contentione ista usum fuisse. Eisdem, & majori quidem cum iudicii usu, longe antea certaverat Joannes Eberardus Nidhardus, e Societate Jesu Theologus, postea Cardinalis, cuius scriinia expilasse videtur novitius iste Scriptor, exorsus etiam ex verbis S. Hieronymi Ep. 142. ad S. Augustinum, a Nidhardo usurpatis, sed nulla illius facta mentione. Compose nunc, amice vir, cum istius Theologi placitis, quae summus ipse Pontifex Alexander VII. in eadem Bulla edixit. *Veramus, inquit, Sixti IV. Constitutionibus inhaerentes, quempiam asserere, quod propter hoc contrariam Opinionem tenentes, videlicet gloriosam Virginem Mariam cum originali peccato fuisse conceptam, Haeresis crimen, aut mortale Peccatum incurran, cum a Romana Ecclesia, & ab Apostolica Sede nondum fuerit hoc decisum, prout Nos nunc minime decidere volumus, aut intendimus. Quin potius contrariam illam Opinionem haeresis, aut peccati mortalis, aut impietatis damnare audentes, praeter poenas, quibus eos subiecit Sixtus IV. aliisque praedecessores nostri Romani Pontifices, gravioribus aliis poenis subijcimus, quas in contrasfacientes huic nostrae Constitutioni superius infliximus.* Sixti IV. Pii V. Gregorio XV. in hanc rem praecpta nihil attinet heic recensere.

At hinc positus iudicium tuum nunc appello. Quodnam, rogo, aliud agi tanto conatu tanto aestu, doctissimus iste Theologus, nisi ut ridendam effuso ore exhibeat malevolis hominibus Apostolicam Sedem? Disertis verbis Pontifices maximi pronuntiant, nolle se dirimere ferventem inter Thomistas & Scotistas controversiam, liberumque sinunt unicuique sentire heic, prout sibi persuasum fuerit. Contra voce imperterrita clamat Theologus tuus, jam ipsius Alexandri P. M. decreto, & universae Ecclesiae consensu, post institutum sive probatum Conceptionis Festum, ita pro Veritate ac Certitudine Piae Sententiae pronuntiatum, ut de ea amplius ambigere non liceat, & sine dubitatione sit falsa contraria Opinio, atque Errore, Inscitia, immo

& Infamia abundet, qui in ea consistat. Exitum heic nullum alium video: aut errat (ne graviore verbo utar) Apostolica Sedes, & Ecclesia, dum idem simul affirmat & negat; aut errare dicendus est athleta tuus, dum haec Romano Pontifici affingit. Utrum ex his eligas, diserte edicito. Fierine potest, ego heic silentio fracto ajebam, ut tantus vir aut ignoraverit, aut dissimulaverit intestinum hujusmodi bellum inter Decreta Alexandri, aliorumque Pontificum, suamque doctrinam? Profecto reponebat Romanus, hoc ille minime ignoravit, neque tacuit; sed elabi se posse est arbitratus, scribens, *Ecclesiam sibi non repugnare, dum Cultum adhibet Conceptioni juxta Piam Sententiam, qui sane Cultus fallax esse non potest; ac simul declarat Conceptionis Mystrium nunc se nolle decidere.* Hanc in rem Semipelagianorum exemplum profert: eos enim ad annum usque 529. Ecclesia toleravit, & denique damnavit. Ineptum plane effugium & exemplum; nullum quippe ante Synodum Arausicanam praecefferat Ecclesiae, aut Romanae Ecclesiae decretum quodpiam, quo concuteretur Semipelagianorum opinio, quum contra Theologus iste contendat, ex institutione Cultus, sive Festi Conceptionis Certam evasisse Piam Sententiam, atque inde exclusam quamcunque Falsi dubitationem, sive suspicionem; Alexander vero VII. eodem tempore & actu Festum de Conceptione probat, & nihilominus indecisam se relinquere Quaestionem profitetur. Quare iterum dico, Theologus iste aut se male rationes iniisse, aut Pontificem parum mentis compotem, prodit. Elige tandem.

At negare non potes, subdidi ego, quin duo diversa sint *Cultus*, & *Mysterium*. Ille jam definitus: istius adhuc expectatur, simulque speratur decisio Papae. Quam callidus & tu bellator es! inquit heic Romanus. Attamen nihil nisi ludum offers. Et quidnam aliud doctissimus Minorita argumentorum suorum phalange molitur, nisi ut Lectoris persuadeat, statuto Festo, sive *Cultu* Conceptionis, statutum simul a Pontifice *Obiectum* Festi, sive *Immunitatem Beatissimae Virginis a labe originali?* Ecclesiam nempe, ait, falli non posse in publico ejusmodi Cultu indicendo; *Dogma Catholicum* hoc ille affirmat, inculcat, & ad raucedinem repetit, etiam addens §. 29. *amen-tem esse, qui non colligas, Ecclesiam in eo vel errare non posse, vel non errare.* Si hoc mihi das, & dare cogeris: jam ex tui commilitonis sententia nulla de *Mysterio* superest quaestio, & a Romani Pontificis Cathedra peremptorium edictum jam processit de Immaculata Virginis Conceptione. Praemissas habes; ego vero inde Conclusionem

hanc

hanc infero. Scilicet Sanctam Romanam Ecclesiam, ex decreto Magistri tui, palam risui omnium exponi, quod una eademque Constitutione quid de Conceptione Mariae sentiendum credendumque sit decernit, simulque se nequaquam velle decernere disertis verbis testatur. Et quei insipientiae, si Superis placet, ac stupiditatis notam amoliri in posterum poteris ab Alexandro Pontifice, qui controversiae huic finem a se factum negavit, neque perspexit, se dum Objectum Celebritatis postremo calculo stabilivit, Sententiam quoque Piam ad Certitudinis apicem evexisse, & contrariae Opinioni nigrum praefixisse theria? En quo inconsultus ardor pugnandi rapit; tam pravi fragore ille tuus Romanae Sedis auctoritatem dignitatemque se tueri pollicetur, neque animadvertit se de illa male mereri, seque eandem exhibendam quibusvis praebere. Heic autem rursus te volo. Aut summum Pontificem, aut acerrimum hunc Minoritam deceptum, & falsis principiis usum, dicas oportet. Haec tua optio est. Tunc ego: Licentiam tuam vix fero, quasi me tam perverbiae mentis arbitrere, ut errorem in re tanta Apostolicae Sedi tribuere unquam possim. Quam nemini concedam veneratione erga Cathedram Petri, tibi alias sancte aperui. Errorem in ea ne suspicari quidem fas est. Sed quid si neque Alexander Pontifex, neque Theologus iste decepti fuerint? Et quidni? Si bene memini, is mihi ajebat, se minime in censum *Haereticorum* propter hanc causam referre Thomistas. Eos tantummodo sub meridiano Sole caecutire, atque in Errore versari, eorumque Opinionem Falsam profitetur. Certam jam esse Piam Sententiam *Theologica Conclusione*, non vero Ecclesiae definitione. Propterea a Pontifice Maximo paucos ante annos petiit, ut Mysterium definiret Immaculati Conceptus, *vel ut rem de Fide, vel ut certam infra Fidem, sed Certitudine aliqua infallibilis Veritatis*. Quare nihil est, quod antilogias aut in Romano Pontifice, aut in Minorita meo somnies.

Itane ergo (tunc in haec verba erupit Abbas) tu nodum solvis? Ne irascere quaeso, Amicorum optime, si haec ego ludibria appello. Torus est ingeniosus miles tuus in ostendendo, Alexandrum VII. dum Festum Conceptionis *secundum Piam Sententiam* institutum indicavit, de ipsius etiam Piae Sententiae Veritate iudicasse; ita ut haec jam Certa evaserit, eaque Certitudine, quae quamlibet Falsi dubitationem excludat; ac ejusmodi Evidentia, ut *mentis expert* in posterum dicendus sit, qui eam non amplectatur. Huc omnis illius conatus collineat. Edisseras nunc velim. Quum Festum diem hunc Alexander secundum Piam Sententiam ab ejus aedibus celebrandum lau-

laudavit, novitne, an non, illius Decreti confectaria? Si minime: intolerando ausu ignorantiae arguis visibile Caput Ecclesiae: Sin & ipse novit, jam Pontificem ex tua, sive ex Minoritae tui confessione habemus illudentem universae Ecclesiae, quando ex institutione Festi agnovit in Certitudinem & Evidentiam immigrasse Piam Sententiam; & nihilominus proteitatur, a Romana Ecclesia, & ab Apostolica Sede nondum fuisse hoc decusum: prout nos nunc minime decidere volumus, aut intendimus. Proinde si ex Orco attollere caput nunc posset pestilens Haereticus Jacobus Picininus, osculis Theologum hunc fatigaret, eum nempe nactus inter Catholicos sibi tacite consentientem; quippe, ut nosti, impius ille Haereticus insultat Alexandro Septimo, tamquam sibi contradicenti, ex quo in sua Constitutione dicat, se nolle *Mysterium decidere*, & postea, approbando Festum, illud decidit. Quid aliud est hoc (impudenter ait) nisi decidere & non decidere; non decidere verbis, & decidere facto? quod est sibi contradicere. Heu quo tandem devenimus! Sed & ludibrium appellandum est, summis labiis monere, nondum Ecclesiae decreto Certam de Fide evasisse Piam Sententiam, Certam tamen evasisse Theologica Conclusionem. Fatente pugile tu §. 26. Piam Sententiam esse conformem Scripturae & Traditioni, argumentando calligitur in hunc modum. In rebus ad mores instituendos pertinentibus Ecclesiam falli non posse, & Verissimum est, & Sacrae Scripturae consentaneum. Colis autem Ecclesia Immunitatem Deiparae; isque Cultus ad mores pertinet; in eo igitur Ecclesiam falli non posse, & Verissimum est, & Sacrae Scripturae consentaneum. Quod si falli non potest, consequens est, Certam esse Deiparae Immunitatem, & in Libro Divino fundamentum habere &c. Immunitas igitur ab originis peccato approbata est ab Ecclesia tamquam veterum Patrum Traditioni consentanea. Immo rectius ita argumentari debuit Magister tuus: Certum est, in rebus ad Mores & ad Cultum sacrum pertinentibus falli non posse Ecclesiam. Atqui Certum apud omnes est, Objectum hujus Festi esse Immunitatem Virginis, in quo Objecto statuendo errare nequit Ecclesia. Ergo immunitatis hujus Certitudo, non Theologica Conclusio, sed Articulus & Dogma Fidei est; ac proinde Haereticus futurus, qui eidem pertinaciter repugnet. Non ausus est hoc dicere Theologus tuus, amentium duntaxat nomine liberaliter sibi adversantes inspergens, ne in se fulmina Apostolicae Sedis pertraheret; verum ex ejus argumentatione necessario id consequitur. Si enim approbata est solenni Decreto, & publica professione in instituto Festo Pia Sententia a Sede Pontificia, atque precepta ab uni-

universa Ecclesia, tanquam Sacrae Scripturae & Traditioni consentanea; atque in hoc *errare nequit Ecclesia*, ut supponitur: per tuam fidem quid ultra exigitur, ut inter Dogmata Fidei referatur? At ego rursus insto ac repeto: Nisi turpis inscitiae per summum nefas Alexandrum VII. immo & Antecessores ejus, qui idem Festum probaverant, insimulare vis, ad fatendum etiam compelleris, ignota iis minime fuisse consecratoria, quae doctus Minorita in Institutione Festi se reperisse gloriatur. Si nota erant, iique agnoscebant, Certam ex ea Institutione avadere, hoc est definiri, Scotisticam Sententiam: cur toties testati palam sunt, se illam noluisse & nolle decidere? Illusissent (iterum ajo quanquam averfante animo) ejusmodi ratione universae Ecclesiae; immo Haereticorum cachinnis, si haec stant, eripienda Pontificiae Dignitatis nescio quis locus nobis superesset. Inanibus ergo argumentis nos pascat Theologus iste necesse est, eumque in dedecus & injuriam Apostolicae Sedis incaute, ne dicam temere conspirasse. Haec quum ille diceret, dolens ego & admirans, vultuque demisso audiebam, neque modus succurrebat extricandi nodi. Collectis tamen viribus, dicere subiit. Sitne heic laesa dignitas Romanorum Pontificum, disputare in praesentia nolo, [quanquam ad hoc credendum oratione adduci nondum potuerim. Certe quae Minorita meus de Festo Conceptionis disseruit, ac de illius consecratoriis, tam solida, tam bene connexa mihi videntur, ut non jam *Insanos* (quod ille facit) sed potius melioris Theologiae, ipsiusque Logicae oblitos esse putem, qui adversari audeant. Tum Romanus Abbas: Quando huc, ait, mens tua deflexit, in me suscipiam ostendere (neque fortasse Herculeis toris opus erit) a Theologo tuo fluxo in loco fundamenta jacta fuisse, ejusque molem undequaque dehiscere. Sed jam satis temporis in hujusmodi disputatione infumsumus; praestat reliqua in crastinum differre. Ita conditum; Liber Patris de Luca mihi ad legendum commodatus fuit; atque ad negotia nostra uterque processimus. Ego quoque Epistolae finem faciam, a scribendo fessus. Vale.

Dabam Neapoli X. Kal. Julias MDCCXL.

*Celebri, atque optimo inter amicos D. Gregorio Azevedo
Valdesius S. P. D.*

EPISTOLA TERTIA.



ALTERO die ad horam statam amici Romani aedes adii, periculum facturus, an ei sat roboris esset ad retundendos arietes Minoritae nostri. Hinc inde obseptum Libris inveni, seque armis, ut videbatur, instruentem ad pugnam. Nec mora, is in controversiam invasit. Hoc primo, inquit, des mihi velim, fieri nimirum non posse, ut simul Alexander VII. Quaestionem de Mariana Conceptione deciderit, & non deciderit: quod absurdum commentum ex improvido Theologi tui aestu affluere antea contendi. Extra omnem dubitationis aleam positum tu quoque fateberis, Pontificem minime eam decidisse, nec voluisse decidere; expressis enim verbis id ipse in Constitutione sua testatus est; & mentiri nequit Vicarius Christi. Restat ergo, ut fallax falsaque sit altera pars, nempe Alexandrum re ipsa decidisse, ac decidere voluisse. Tunc ego. At ne tu quidem negare potes, quin Pontifex edixerit Festum Conceptionis institutum fuisse *secundum Piam Sententiam*, & consequenter firmatum ab eo Festi Obiectum, scilicet Deiparae Praeservationem a macula originali. Quum vero Pontifex, sive Ecclesia in Cultu praescribendo *errare non possit: Sanctaque, ac Dignissima* in Officio ejus Festi dicatur Virginis Conceptio: necessario Pia Sententia in censum earum Veritatum translata fuit, *quibus Falsum subesse non potest*. Inter praecipua vero Catholicae Religionis Dogmata tu quoque procul dubio Ecclesiam falli nesciam agnoscis. Ad haec ille: Praerogativam hanc in Ecclesia quis Catholicorum non agnoscit, non tuetur? Verum Romano ipsi Pontifici, atque Ecclesiae non plustribuendum est immunitatis ab errore, quam ipsi velint, & recta Ratio persuadeat. Levia sane ingenia non desunt, quibus quidquid ab Ecclesia praescribitur, ad divinam Fidem, ad Veritatis Certitudinem spectare creditur, severiore interim Theologia secus censente, dum quae Certa, quae Probabilia sint sedulo distinguit, & quae intentio sit Ecclesiae in tanta rerum varietate sollicitate perscrutatur.

Age

Age vero intelligemus, utrum Alexander Pontifex, Festum probans, Piam simul Sententiam statuerit. En ejus Bullam. Laudat ille *veterem Fidelium Pietatem*, sentientium, animam Virginis a macula peccati originalis praeservatam immunem, atque *in hoc sensu ejus Conceptionis Festivitatem solenni ritu colentium*. Quum in Hispaniis aliqui contrariae Opinioni assertores contra Gregorii XV. prohibitionem pergerent *sum privatim sum publice praefatam Sententiam aut impugnare, aut vellicare, & favorem a Romanis Pontificibus Cultui & Festo secundum illam praestitum ita interpretari, ut frustrentur; immo Ecclesiam Romanam huic sententiae & Cultui juxta illam Beatae Virgini exhibito favere negant*: Propterea considerans, quod *sancta Romana Ecclesia de intemeratae semper Virginis Mariae Conceptione Festum sollemniter celebrat, & speciale ac proprium super hoc Officium olim ordinavit juxta Piam, devotam, & laudabilem institutionem Sixti IV. volensque laudabili huic Pietati, & Devotioni, & Festo, ac Cultui secundum illam exhibito in Ecclesia Romana, post ipsius cultus institutionem nunquam immutato, Romanorum Pontificum, Praedecessorum nostrorum exemplo favere, necnon tueri Pietatem & Devotionem hanc, ut in grege unitas Spiritus in vinculo pacis conservetur, praedecessorum Decreta edita in favorem Sententiae hujus, & Festi, & Cultus observanda decernit, variasque poenas statuit in eos, qui favores per illa dictae Sententiae, & Festi, seu Cultui secundum Piam istam sententiam exhibitos frustrari pergant, vel qui hanc eandem Sententiam, Festum, seu Cultum in disputationem revocare, aut contra ea scriptis seu voce loqui, concionari ausi fuerint, cum ceteris ibi legendis, in quibus nulla vox, & ne gry quidem de Veritate, seu Certitudine Sententiae. Immo dedita opera utitur Pontifex vocabulo *Pietatis, Devotionis, Piae institutionis, Piae Sententiae*, ut secundum normam & loquelam Theologicae Scholae Fideles intelligant, non hic rem esse de aliquo Fidei Articulo, de Veritate & Certitudine Propositionis seu Conclusionis alicujus; sed quidem de Sententia, Festo, & Cultu Intemeratae Virginis secundum eandem Sententiam, quibus laus debita est, a quibus impietas abest, immo quibuscumque Pias consentit, & quibus Apostolica Sedes se favere testatur. Nullum heic verbum; quo damnetur, sive interdicatur Opinio asserentium, Mariam Sanctissimam contraxisse originale peccatum. Nullum verbum, quo interdicatur contrariae Sententiae adhaerentibus illud Festum celebrare sub intentione *Sanctificationis*. Ii tantummodo vetantur in disputationem revocare Piam Sententiam, Festumque & Cultum secundum eam exhibi-*

hibitum, & Favores a Romana Sede eisdem impensos, voce aut scriptis impetere. En ergo salva dignitas Romanae Ecclesiae. Manu tenes, nihil ibi decusum de Conceptionis Quaestione, neque omnibus Christi Fidelibus indici, Festum Conceptionis celebrandum esse *secundum Piam Sententiam*; neque declarari aut definiri, hoc esse unicum hujus Festi *Obiectum*. Proinde etiam intelligis, jure ac merito potuisse Alexandrum protestari, se quod est ad Veritatem seu Certitudinem Piae Sententiae nihil velle decidere. Abeat propterea in malam crucem Haereticus Picininus, dum Romano Pontifici insultat, perinde ac si Quaestionem de Virginis Conceptione tollere, & non tollere eodem tempore voluerit. Nam quod est ad Minoritam tuum, Picinino suppetias ferentem in dedecus Apostolicae Sedis, non eum certe diris eisdem devovebo, quum incaute egerit; sed quidem contendam, abuti eum ingenio suo, dum Alexandri VII. Bulla, seu potius imaginatione sua fretus, Scotiticam Sententiam ad eam Certitudinem & Evidentiam evehere conatus est, cui Falsum subesse nequeat, quum stet contra solennis protestatio ejusdem Pontificis.

Plura dicere volentem hisce ego affatus sum: Numquid inficiari poteris, quin saltem a summo Pontifice laudetur *Pietas* colentium Virginem *secundum Piam Sententiam*? Audebisne dicere, Pontificem errare in hoc posse; aut re ipsa errare? Tunc ille: Laudat profecto Sancta Romana Ecclesia Piam de Virgine Sententiam: laudo & ego, ac Piam, Piissimamque pronuntio. Laudat illa ac probat Festum, & Cultum Deiparae secundum eandem Sententiam ab illius fautoribus exhibitum, eisque faver: laudo & ego, eisque faveo. Insuper lubens addo, vetari in posterum contrariae Opinionis affectas voce aut scriptis quidquam proferre, unde videatur sub nomine Festi *Conceptionis* venire tantummodo Virginis *Sanctificatio* (hoc enim postremis controversiis, & Alexandri Seprimi Edicto causam dedit) quum certum sit, & deinceps futurum sit, ex mente Romanae Ecclesiae institutum fuisse, ac celebrari a Pietate Fidelium Scotistarum Conceptionis Festum *secundum Piam Sententiam*, eximentem ab originis labe Mariam. Tunc ego verba Theologi nostri arripiens e pag. 13. hisce verbis instabam: *Cultus Dei atque Sanctorum mandato Pontificis toti Ecclesiae proposuit, ab eaque obedienter & rite delatus* (verebar heic, ne Romanus Abbas ad haec verba cavillaretur, quasi ad confirmanda mandata Pontificis, obedientia quoque Ecclesiae exigatur: at ille ne tantillum quidem mussitavit) *Cultus*, inquam, *Dei & Sanctorum est aperta professio Fidei Christianae, ut D. Thomas 2. 2. quaest. 93.*

aff. 2. ad Theologi omnes consensu docent. Atqui in Fidei professione errare non potest Ecclesia universa. Ergo Ecclesia in praescribendo Festo & Cultu Virginis secundum Piam Sententiam immunis sit ab errore oportet. Falli autem posset, nisi Objectum Festi & Cultus certum foret. Ergo Pia Sententia (quod idem est ac decere Objectum Festi & Cultus) Certa credenda est, eaque Certitudine, quae nulli amplius sit dubitationi exposita.

Tu rete quidem obtendiiti (ait heic Romanus) at vide, ne muscas tantum concludas. Nolo heic lites serere, quod S. Thomas nihil eo in loco de *Sanctis* habeat. Nolo per singulas partes argumentationem, quam a Theologo tuo mutuatus es, ad trutinam revocare; hoc enim multum temporis posceret: adeo confusa sunt, vaga, & sine ulla distinctione prolata tanti ponderis documenta. Doleo potius, te jam oblitum, quae heri differuimus. Scilicet miror, cur ex praemissis istis non intuleris (faciendumque tibi erat) Piam Sententiam Articulum Fidei jam evasisse. Nam quaecumque statuit, sive praescribit Ecclesia, in quibus statuendis sive praescribendis ex promissione Dei *nulli fallaciae ac errori obnoxia est*: assensu Fidei Christiano Populo sunt amplectenda; Magistro tuo docente pag. 72. *Ecclesiam falli non posse in publico Cultu; Dogma est Fidei*. Ipsa vero errare non potuit in praescribendo Virginis Cultum secundum Piam Sententiam; ipsaque falli posset, nisi certa foret eadem Sententia. Ergo ad Dogmata Fidei ex Ecclesiae decreto jam accessit Immunitas Virginis ab originali noxa. Dase hoc mihi? an potius ex hoc jam sentis, argumentationem illius ob excessum claudicante gradu incedere? Dum ego quid responsi daturus essem, cogitabundus ac tacitus in aerario mentis perquirebam, is sermonem continuavit inquires: Intellectum tuum torqueas nolim; mecum potius progredere. Ad Cultum Dei pertinere etiam honorem Sanctorum, & praesertim Sanctissimae Dei Matris, ego quoque tecum censeo & credo; quippe in Sanctis dona Dei honoramus. Verum in Quaestionem nostram oborto collo pertrahere velle infallibilitatem Romani Pontificis, Catholicaeque Ecclesiae, est hominis parum accurate argumentantis, & Alexandrinae Bullae intentionem aut minime intelligentis, aut vitiantis, hospitisque demum in oeconomia Ecclesiae ipsius. Jam posuimus, ab Alexandro Pontifice commendatam quidem fuisse Piam Sententiam, at nihil ab eo decisum de illius Veritate; nihilque detractum, quod attinet ad substantiam, Opinioni contrariae. Praeterea statuimus, non unum esse *Objectum* Festi de Conceptione uti quarto quoque verbo supponit, atque

inculcat, sed falso supposito utens, ingeniosus Minorita tuus. Ruente autem fundamento, tota moles ejus in praecepta feratur oportet. Tam *Praeservatio*, quam *Sanctificatio* sunt Objectum Festi pro diversitate Opinionum, quas adhuc vigere finit Ecclesia. Pari autem gradu procedit *Cultus* cum *Sententia*, neque plus habet, quam illa, ad quam profertur. *Pia* est *Sententia*; *Pius* & *Cultus*. Laudatur Scotistica ab Apostolica Sede; ejusque favore ornatur; idem de Cultu dicas. Denique Probabilis est, & si mavis Probabilior altera Scotistarum *Sententia*; paria de Cultu affirmare licet. Quod si mordicus adhuc tenes, Certissimum esse Cultum atque inde affluere Certitudinem *Sententiae*: hircocervum mihi exhibes nuper explosum, nempe Romanum Pontificem minime pro Certa habere *Praeservationem* Mariae, & nihilominus velle, & nihilominus statuisset, ut Virgo colatur uti Certissime praeservata, ac tali Certitudine, ut nullum errandi periculum sublit. Stare haec simul nequeunt, ut antea monui, & non sine contumelia Pontificis Maximi excogitantur.

Silentium heic ego fregi. At tu, ajebam, manibus pedibusque haftenus curasti, ut vim effugeres prioris meae propositionis. Falline, an non, Ecclesia potest in praescribendo Cultru religioso & sancto? Palam ediffere, quae tua hac de re sit mens; donec enim fundamentum hoc stabit, meum non nutabit, ut spero, aedificium. Justa petis, inquit Romanus. In oeconomia Catholicae Ecclesiae, cui utinam diligentius studeret doctissimus alioqui Magister tuus, geminae animadvertendae sunt provinciae; altera Divinarum, altera Humanarum Veritatum. Illam regit peculiaris divini Spiritus afflatus, hanc humana Prudentia. Complectitur prior Dogmata Fidei de Mysteriis, de Moribus, de Factis, aut necessaria, aut utilia ad salutem aeternam, ad Pietatis officia, ad morum integritatem, eaque a Deo revelata, & ad nos profecta vel per divinas Scripturas, vel per legitimam Traditionem Sanctorum Patrum, vel per necessariam deductionem ex certissimis principiis. In his nullus erroris locus, & pro eorum tutela, quoties poscat occasio, vita fortiter est danda. Alteram provinciam, scilicet Humanarum Veritatum, constituunt innumera Scholarum Theologicarum scita, aut Opiniones de rebus sacris, de moribus ac ritibus, ad Pietatem spectantibus, atque innumera Facta, quae non a Revelatione Dei, sed ab Historicorum, aliorumque hominum fide accepimus. Sunt & heic quamplurima Certa, non divina quidem, sed Morali Certitudine firma; sunt & Probabilia; sunt disputatione frequenti agitata, ac proinde incerta. Haec sua Prudentia Ecclesiae

clesiae Pastores & probant & in usum deducunt, probabiliora, & quae ad alendam Pietatem aptiora videntur, seligendo. Reliqua certamini doctorum hominum dimittunt. Ad utramque provinciam spectat & Disciplina Ecclesiastica, quae Ritus sacros, Cultumque Dei, & illius Servorum, aliaque praescribit, quibus Ecclesiae universae regimen nititur. Habemus enim & haec multa a Deo revelata, eaque necessaria, quae immutare non licet; reliqua vero ab Ecclesiae Prudentia pendent, quae nova invehit, vetera abrogat, prout satius, & rectius, utiliusve sibi videtur. Propius nunc ad rem, quam prae manibus habemus, accedo. Petisne, ad quamnam provinciam & classem pertineat Cultus Sanctorum? Haec accipito.

Ad Dogmata Fidei referendum est: Honorem Sanctis, eorumque Reliquiis, & imaginibus deberi; eosque invocare tanquam intercessores & mediatores apud Deum, ad impetranda beneficia per Filium ejus Jesum Christum, bonum atque utile esse; minime vero ex aliqua communi lege de Invocatione necessarium. Ecclesiastico tantum praecepto & disciplina illorum Invocatio iis praecipue mandatur, qui sacra celebrant, & ad Horas canonicas obligantur. Inter rationes modosque colendi Sanctos praesertim recensentur jejunia in Vigiliis, & Festi dies in eorum honorem instituti. Si Objectum sive Subjectum hujusmodi Festorum e Revelatione divina per divinos Libros, aut per legitimam Traditionem procedit: supernaturali Fide credendum est, uti Annunciatio, Purificatio, Desponsatio, & Visitatio semper Virginis Mariae, Nativitas & Passio Sancti Joannis Baptistae, aliaque id genus. Sin minime revelata sunt, ad humanam fidem pertinent, quae modo major, modo minor futura est, prout suadent motiva credibilitatis. Postrema autem haec moderatur Disciplina & Prudentia Ecclesiae. Quamvis enim sine numero abundant, qui Pontificis Maximi judicium in canonizandis, ut ajunt, Sanctis minime fallax, immo ad Fidei dogmata spectans arbitrantur, & quorum nomina & argumenta profert & expendit Eminentiss. Cardinalis Prosper Lambertinus, nunc bono Reipublicae Christianae Pontifex Maximus Benedictus XIV. Lib. I. Cap. XLIII. de Serv. Dei Beat. & Canoniz. aliis tamen aliter videtur, quum nulla nova Revelatio detur in Ecclesia Dei, & Canonizatio Sanctorum a testibus pendeat, hoc est a fallaci hominum narratione & fide. Adhuc sub judice iis est. Nemo tamen negat, aut negare potest, quin intolerandae temeritatis argendus foret, suspicionemque incurreret animi haeretica aliqua opinione vitiati, qui Sanctum negaret hominem rite ab Apostolica Sede in San-

Sanctorum fastos inlatum, quum notum sit, Prudentiam Romanorum Pontificum nulli parcere diligentiae, & accuratae circumspectioni, ne in his quoquo modo fallatur & fallat. Atque heic occurrit mihi Theologus tuus, qui §. XXIX. Dissertationis suae Theologos commemorat *negantes, rem esse Catholicae Fidei consecrationem Sanctorum*, at nihilo secius affirmantes, eandem *vel esse certam de Fide, vel Certam infra Fidem, sed Certitudine aliqua infallibilis Veritatis*. Tum addit, in postremo supplici libello ad summum Pontificem Clementem XII. expetitum fuisse, *ut saltem canonizetur primum instans Conceptionis Mariae eo ferme modo, quo canonizatur instans mortis Servorum Dei*. Hoc autem, subdit, & nos petere acqussimum est, & Pontificem dare **NECESSARIUM**. Quod postremum profecto lepidum, seu potius injuriosum in Romanam Sedem dicas, quasi aut quae sunt Necessaria Ecclesia ignoret, aut minime ignorans eadem suppeditare renuat. Is autem pro suo ingenio contendit, ex institutione Festi Sententiam Piam Conceptionis ita jam esse *Certam, ut ei Falsum subesse non possit*. At heic repetendum est, in sacris divinisque rebus Ecclesiam duplici tantum via procedere ad Veritatem, scilicet aut per revelationem, quae ex verbo Dei scripto, aut non scripto, sed ope Traditionis Patrum ad nos deducto colligitur; atque haec constituunt Dogmata Fidei sine ulla haesitatione credenda. Aut humano more, dum nempe adminicula & praesidia adhibet, quibus ceteri hominum in Veritate inquirenda utuntur. Sunt quae ex *evidentia Physica* Certa sunt, uti hunc vel illum hominem vivere; Ignem comburere quae combustionem patiuntur, Solem sereno meridie lucere. Sunt quae Certitudinem accipiunt ab *evidentia Morali*; uti hunc vel illum Principem aliquo tempore in vivis fuisse; proelium hoc vel illud accidisse. Sunt & quae ob *evidentiam Metaphysicam* Certa habemus. Cetera Probabilia sunt, sed minime Certa, & siquidem Certa, non ea Certitudine firmata, quae omnem Falsi dubitationem excludat. An confluere possit in Canonizationem Sanctorum Evidentia, seu Certitudo Physica, aut Moralis, cui nihil Falsi subesse possit, quum ab humana Prudentia Canonizatio procedat, & secundum assertiones hominum propagetur, inquirere nec vacat, nec lubet. Hoc unum novi, post tantam in canonizandis Sanctis adhibitam diligentiam, qua major in rebus humanis adhiberi nequit, adeo Probabilem eorum Sanctitatem evadere, ut nimiae audaciae, ac temeritatis poenas commereatur, qui Falsi eam insimulet; quippe uti recte monet S. Thomas Quodlib. IX. quaest. 8. *Pie credendum est,*
quod

quod nec etiam in his iudicium Ecclesiae errare possit. Ac propterea religiose quidem, pie & honeste coluntur ejusmodi Coelites; minime tamen ad Fidei dogmata spectat illorum Sanctitas, uti post Sanctum Thomam tradunt inter Theologos primarii, Cajetanus, Canus, Corduba, Malderus, Suarez, Vasquez, Raynaudus, & alii. Sed quando abundant doctissimi viri, quibus videtur spectare ad Fidem Canonizatio Sanctorum: Lectori animadvertendum est, quantum discriminis inter eam, & Sententiam Piam intercedat. Nullum enim Sanctae Sedis aut Conciliorum Decretum existit, per quod liberum sit Fidelibus persuadere sibi, hunc vel illum Sanctum canonizatum non frui gloria caelestis; in nostro autem casu libertatem hastenus nobis reliquit Ecclesia sentiendi quidquid magis consonum Veritati arbitramur.

Et sane quod est ad *Sententiam Piam* de Conceptione Virginis, quei aequiparari unquam possit Canonizationi Sanctorum, non video. Cedo idoneos testes rei tantae, quales certe bene multos adhibere solent Romani Pontifices, dum de Sanctorum Virtutibus & Miraculis examen instituunt. Si profers innumeros, qui nunc eidem Sententiae adhaerent, tunc testes idoneos in hujusmodi causa appellare auderes? Una divina Scriptura, aut legitima Sanctorum Patrum Traditio, testari id rite possit. Et ubi testaretur, non Certa solum Pia Sententia dicenda foret, sed etiam ad Fidei Articulos adjungenda. Sublatis hisce testibus, pessum eat Certitudo oportet, non solum quae ad divinam Fidem spectat, sed & Physica, Metaphysica & Moralis; neque enim nos adhuc certi sumus, pendente nempe iudicio Ecclesiae, num divini Libri, Sanctique Patres faveant, an adversentur Scotisticae Sententiae. Atque heic animadvertas velim, rem non levem ab Apostolicae Sedis Prudentia sperasse commilitones tuos, petendo nempe, ut Sanctorum Canonizationi par iudicium de Immunitate Mariana pronuntiaretur, ostendentes interea, ex Canonizatione consequi Certitudinem quidem, sed quae infra Fidem sit. Ubi id impetrassent, tunc in tuto triumphus fuisset; inflatis quippe tubis per plateas, per compita canerent, Canonizationem Sanctorum supranaturalem Fidem exigere, adeoque & Piam illorum Sententiam. At tu, heic ego impatentia ductus ajebam, per vinculos & angiportus adhuc vagaris. Hoc unum a te peto. Probavit Romana Sedes, sive Ecclesia, Festum & Cultum Virginis secundum Piam Sententiam. Dicas tandem velim, an errare in ejusmodi decreto, hoc est in indicendo Cultu publico religioso, Ecclesia possit. Tunc ille: Probavit sane, sed minime Universam Ecclesiam obligavit ad Cultum secundum Piam Sententiam. Ad

cum

eum vero Cultum quod attinet, non is referendus est ad oeconomiam illam, in qua ab errore illaesam usque ad finem Saeculi suam Ecclesiam Deus servabit. Tunc pertinebit, si Pia unquam Sententia, hoc est ejus fundamentum, Fidei Dogmatis adjungetur. Interea is Cultus ab una Ecclesiae Prudentia praescriptus & commendatus est Piae Sententiae sectatoribus, atque ad eam oeconomiam pertinet, cui peculiare auxilium, ne erret, Ecclesiae suae nunquam pollicitus est Christus. Attamen fidenter addendum est, nunquam in his Ecclesiam re ipsa contra Prudentiam errare, & nos ita conquiescere debere ad ejus judicia atque mandata, ut censeamus, nihil ab ea nisi prudenter agi. Agapas in Templis, uti & nocturnas Vigiliis ad Martyrum sepulchra primitiva Ecclesia usurpavit, subsequens sustulit. Erravitne priorum Saeculorum Ecclesia probando, an subsequens improbando? Neutra sane. Hosce ritus ad Disciplinam spectantes prudenter justisque de causis invexerunt illi; isti, aliis causis supervenientibus, pari Prudentia antiquarunt. Idem animadvertas in Cultu Sanctorum. Ubi perspicacia sui Intellectus uti vellet, seque praejudiciis antea eriperet Theologus tuus, is quoque prospiceret, dari Cultum Certum, dari & Probabilem, pro qualitate videlicet Objecti. Et sane quoties in humanis sacrisque rebus explorata certaue Veritas haberi non potest, vir Sapiens Probabilibus locum dat, eaque sequitur; sat enim rationum adest, ut Prudenter operetur, aut decernat. Innumeri sunt Sancti, quos Romana Sedes per Canonizationem non intulit in sacros fastos, eos tamen & ipsa amplectitur, Officia, festosque dies in eorum honorem probat, Indulgentiis donat. Apostolorum Corpora, Jacobi majoris Compostellae, Andrae Amalfi, Jacobi minoris & Philippi Romae, Matthaei Salerni, Bartholomaei Beneventi, aut Romae, Lucae aliis in locis, aliaque Sanctorum Corpora, & Reliquias innumeras, ad Passionem Domini, ad Virginem Sanctissimam, ad ceteros Sanctos spectantes, eadem Sedes Apostolica probat, ac favore prosequitur. In Breviariis quoque Sanctorum gesta ac miracula proponit. Haec omnia vides ad publicum Cultum Servorum Dei esse referenda. Accedat nunc aliquis, & contendat, in his omnibus Ecclesiam errare non posse, atque omnia haec Certa esse. Risum vel nolenti excutiet. Prudenter tamen se in hisce Ecclesia gerit; nam donec nulla in contrarium Certitudo & Evidentia militat, Probabilesque causae suppetunt credendi & colendi eosdem Sanctos, Corpora, sive Reliquias secundum Opinionem diuturnitate temporis, & longa quasi possessione firmatam: satis Prudentiae suae facit, dum haec permittit, aut probat,

bat, eisque favorem impendit. Inania terriculamenta sunt, quae Minorita tuus excogitat, ac si Romani Pontificis dignitas, & Ecclesiae fundamenta ruerent, si in ejusmodi sacros Cultus error ingerere se posset, Certeque non forent, quaecunque ad publicum Cultum exponuntur. Nunquidnam evincere tu unquam poteris, Vera ac Certa esse Caput Sancti Joannis Baptistae non uno in loco adservatum, tot Clavos ad Crucem Domini adhibitos, Sacram Syndonem, tot Corpora Martyrum e Romanis Catacumbiseducta, aliaque hujusmodi innumera? Si in his Certitudinem exigeret Ecclesia, ut Cultum probaret, pauca, immo paucissima nunc haberemus religioso Cultu donata, sive donanda. An autem audiendus sit, qui sic praepostero ordine argumentatur: Publicum horum Cultum aut permittit, aut praescribit Ecclesia: ergo Certo ex hoc evadunt: tu ipse pronuntiabis. Illud quidem Certum est, nunquam imperasse, aut imperaturam esse Ecclesiam, ut omnia haec Certa sine ulla erroris formidine credamus. In his, quae utilia quidem sunt, sed minime necessaria ad alendam Populi Pietatem, neque a Revelatione Dei descendunt, suam tantummodo Prudentiam consulit Apostolica Sedes, & Ecclesia; reliquum arbitrio nostro dimittit, dum contemptus absit, & scandalum. Neque ipsa in his errat, quum sufficientibus semper Prudentiae motivis in re per se incerta ducatur. Adde, neque Populi Pietatem in ejusmodi Cultibus falli; nam etsi forte in Sancto aliquo colendo, in sacris Corporibus seu Reliquiis credendis allucineretur (quod non facile putandum) attamen neque animus, neque affectus colentium unquam fallitur, quum ex sententia Ecclesiae honor & Cultus Servorum Dei in Deum ipsum terminetur, & Certa sint Merita Jesu Christi Domini nostri, per quae vel ipsi Sancti beneficia nobis impetrant ab omnium datore Deo.

Ad has regulas Prudentiae & Probabilitatis, quibus utitur Romana Sedes & Ecclesia in non Revelatis a Deo, aut Physica aut Morali Certitudine carentibus, exige nunc Festum & Cultum Virginalis Conceptionis propositum Piae Sententiae cultoribus; & deprehendes, frustra doctissimum Patrem de Luca asseruisse, *errare non posse Ecclesiam, ubi Cultum praescribit religiosum & Sanctum*; & Sententiam Piam propterea Certam evasisse, atque ad eam consensisse Certitudinem, *cui Falsum subesse non possit*. Nondum certe innouit, an revera immunis ab originali labe concepta fuerit Beatissima Virgo: ne tu quidem id negabis. Attamen quum Probabiles rationes adfuerint, non petita a Granatensibus laminis, non ab aliis imposturis in

Hispania natis, sed a dignitate Deiparae, ab Academicarum placitis, aliisque humanae Prudentiae fontibus; neque in contraria Sententia sive Opinione appareat Certitudo: Pia ista Probabilitas laudabile fundamentum praestitit Romanae Sedi, ut institutum antea Festum diem Conceptionis probaret, ediceretque, illum secundum Piam Sententiam rite a Scriptoribus, eorumque affectis celebrari. Probabilitate Sententiae ducta Ecclesia, Probabilem quoque Cultum amplexa est, uti usuvenit in tot aliis nuper indicatis. Haec Prudenter acta. Etiam si nihil Certi hinc habeamus, quum adhuc sub nube sit Virginis Immunitas, sive Objectum Festi: tantum tamen Probabilitatis in Piam Sententiam confluit, ut ejus quoque sectatores prudenter ad Virginem colendam sub ea consideratione ferantur. Qua in re quamquam obscura, ut dicebam, noister falli non potest affectus, ad Mariam nempe tendens, cui Hyperduliam ex Theologorum consensu debemus, & in Deum denique desinens, cujus voluntatem, quaecumque hac in quaestione fuerit, nostrum est venerari. Pari gradu cum isto procedunt Festi dies instituti in honorem B. Virginis *de Monte Carmelo*, *de Mercede* & *ad Nives*. Hosce etiam dies festos inexit Ecclesia, non ex infallibili Revelatione Dei, non ex Certitudine quapiam Physica, aut Morali, sed ex Probabili narratione piorum hominum. Non Certum propterea evasit eorum Objectum; neque enim unquam Ecclesia in animum induxit obligare nos ad credendum, excluso omni metu Falsi, *Miraculum Nivis*, quae Nonis Augusti in Romanum collem cecidisse fertur; neque *Apparitionem Virginis* Jacobo Regi Aragoniae; neque *Sacellum Deiparae* erectum in Monte Carmelo paucis post Domini Ascensionem annis; neque traditum Beato Simoni *Scapulare*. Quod plus est, disputare & contendere quidem possis, non falli Ecclesiam in canonizandis Sanctis, in indicendis eorum Festis, Certumque esse eorum Objectum, Certas eorum Reliquias, Certa Miracula Nivis, Apparitionis, Sacelli, Scapularis &c. Verum quod attinet ad Festum Conceptionis (huc prae ceteris intendas animum velim) omnem disputationis ansam praeripuit jam Summus Pontifex, protestando, se relinquere Objectum illius Festi in sua Probabilitate, quum quaestionem de Conceptione dirimere noluerit, & contrariae Opinioni vires non ademerit, immo ipsam damnandam vetuerit. Veritatem hanc in omnium oculis incurrentem aio, neque tu negare tandem audeas. Datur autem & Sanctitas Probabilis. In Horis propterea Canonice *Sancta* & *Dignissima* utique appellatur *Conceptio* Virginis, sed sub eadem ratione Probabilitatis, sub qua Objectum ipsum Pie creden-

dendum colitur, non vero Certitudinis, quam contra expressam mentem Romanorum Pontificum invehere nititur Minorita facundissimus. Hujus rei luculentum habes exemplum in hac ipsa quaestione. Probaverat Sixtus IV. & quidem solenni Constitutione *Cum praeclsa*, Officium Conceptionis a Leonardo Nogarola compositum, eoque usi sunt Scotisticae Sententiae assertores usque ad tempora Pii V. Ibi disertis verbis legebatur: *Tota pulchra es Maria, & Macula non est in te. Immaculata Conceptio est hodie. Deus, qui per Immaculatam Virginis Conceptionem dignum Filio tuo habitaculum praeparasti: concede quaesumus, ut sicut ex morte ejusdem Filii tui praevisa tam ab omni labe praeservasti &c.* Reliqua dimitto, pleraque ex dubiis aut spuris antiquorum Libris excerpta. Verum Pius V. Pontifex Officium hoc minime ultra est passus. Evaferatne Certa Sententia Pia ex Officio illo per Pontificem Sixtum probato, non Ecclesiae universae proposito, sed ab ei Sententiae adhaerentibus duntaxat celebrando? Nequaquam. Ipsemet Sixtus Probabilem tantum agnoverat Sententiam hanc, & quamvis propositis Indulgentiis ad Virginem sub hac specie colendam incitaverit, nequaquam tamen a contraria Sententia Probabilitatem amovit.

Pari etiam nomine appellamus *Sensam Festivitatem* Festum Prae-sentationis, Festum S. Mariae de Carmelo, & S. Mariae ad Nives. Num propterea illorum Objectum Objectissimum evasit? Ita S. Mariae Magdalenae Festum tibi ante oculos statue. Ad Fidem pertinet illius Sanctitas. Ipsam vero nobis Ecclesia proponit antea Peccatricem, postea ad meliorem frugem redactam, Christo patienti adstitisse &c. cui sententiae vetustissima Traditio suffragium praebet. Non res tamen Certa, sed tantum Probabilis. Neque Ecclesia unquam indignata est contententibus, tres diversas mulieres fuisse Marias in Evangelio memoratas; & quae colitur, nunquam fuisse famosam illam Peccatricem, cujus elogium in Evangelio eodem contextitur. Rursus eadem Ecclesia, dum nobis Festum S. Mariae de Carmelo colendum proponit, haec de ipsa Virgine ait: *In alio quoque Saecculo filios in Scapularis societatem relatos, materno plane affectu, dum Igne Purgatorii expiantur, solari, ac in caelestem Patriam obitu suo quantocius Pie creditur offerre.* Adigitne nos Ecclesia ad ejusmodi subsidium Certo credendum, atque expectandum a Virgine? Nunquam hoc in mentem venit summis Pontificibus; Ii tantum probant & laudant hanc Opinionem, & *Piam* dicunt, hoc est tantummodo Probabilem. Ex-
 aucte Alexandri VII. Bullam quantum lubet: nihil aliud inde extun-

das, nisi *Piam* appellari Sententiam de Mariae Conceptione, hanc laudari, ac Probabilibus rationibus nixam agnoscī, & sub hac ratione coli posse Virginem Sanctissimam; sed nullam in eam sententiam, uti neque in Carmelitarum sententiam, Certitudinem invehere in animum unquam induxerunt Romani Pontifices, nisi Theologo tuo aliter fuerit revelatum. Hanc in rem consulas velim Adnotationes Eminentissimi Cardinalis Lambertini, nunc in Cathedra Petri tanta cum sui nominis gloria sedentis, Adnotationes inquam in Festos dies Domini nostri, & Beatissimae Virginis; nemo enim haecenus majori Eruditione, magisve subacto iudicio de hisce rebus haeremonem habuit. Male profecto de Apostolica Sede & Ecclesia merentur, qui Infalibilitatem in haec trahere volunt, eam quippe evertendam facile hostibus praebent. Exemplum alterum dabo. Pag. 46. Minoritae verba sunt: *Orta est controversia de Conceptione duodecimo saeculo. Qua tempestate ita fuit in usu Conceptionis vocabulum, ut unam seminum complexionem, quae sit in copula maritali, significaret. Ac proinde mirum non est, reperiri esse, qui dicerent, Conceptionem Mariae sine virio libidinis non fuisse.* Verum (ita is pergit dicere) ex quo docti viri animadverterunt, longe serius post conjugalem copulam & Conceptionem foetus, quam *Libidinosam* appellant, ut is ait pag. 42. Animum in foetum ipsum immitti: nunc idem tantummodo momentum sub *Conceptionis* nomine venit; & elumbis propterea evadit antiquorum de Virginis Conceptione doctrina, si commilitonibus tuis fides, qui grande aliquid se adinvenisse putant, quasi Sanctorum Patrum hac de re documenta infirmari possint, & quasi non idem verificetur de reliquis hominibus, qui tamen contrahunt originale peccatum. Sed hoc nunc omittendum censeo. Unum animadvertas velim, nempe veteres celebrasse Conceptionem Christi Domini, Deiparae, & Joannis Praeursoris mensibus novem ante eorum Nativitatem. Habemus autem Paulum Zacchiam celebrem inter Romanos Medicos, qui in ipsa Urbe Anno 1625. & sequentibus edidit Quaestiones Medico-Legales, in quibus Lib. IX. Tit. I. Quaest. I. & seq. pluribus contendit, Animam rationalem in ipso primo Conceptionis momento infundi in Corpus. Praeter alia argumenta hoc etiam utitur Quaest. 7. *Certum est, Conceptionem Virginis omnino naturalem fuisse, cum fuerit concepta secundum carnis concupiscentiam ex commixtione maris & feminae* D. Thomas p. 3. summ. quaest. 27. art. 2. ad 4. Cum ergo Catholica Ecclesia, quae Errare non potest, Festum ejusmodi Conceptionis solemnizet, inconveniens profecto omnino videtur,

ut dicamus, illam celebrare Festum Embryonis, Anima Rationali, immo ne sensitiva quidem dotata, & qui Hominis nihil haberet &c. Haec ne admittamus, dicendum est, Sanctissimam ac purissimam Virginem in primo momento Conceptionis Rationalem Animam recepisse &c. Jam vides, in incerto nos versari, quum de momento ingressus Animae in Corpus disputamus, & Zacchiae opinioni adhaerentes non desunt, ita ut Incerta pro Certis & heic venditentur. Sed quomodocunque res se habeat, duo hinc colliguntur. Si consilii opinio Zacchiae, corruunt fundamenta Minoritae tui, qui ex dilata infusione Animae in Corpus, eludere se posse putat effata Sanctorum Patrum, atque insignium Theologorum de Conceptione Virginis. Sin falsa est, & admittimus dilationem ingressus: secundum Zacchiam errasse Ecclesia dicenda est, quum Festum Conceptionis statuerit ad diem VIII. Decembris, & consequenter ipsam colere embryonem inanimatum Mariae, non Mariam ipsam eo die. Verum in ejusmodi res obscuras neutiquam est trahenda infallibilitas Ecclesiae. Regitur ipsa motivis Probabilibus, adeoque Prudentia in ea minime desideratur; neque Certum aliquid hac in re nobis proponit, a quo remota sit suspicio omnis Falli. Atque hastenus ex abundantia haec dixi. Nam *Sancta* rite appellata est Conceptio Beatæ Virginis; tunc enim aut *Sanctificata* fuit secundum Thomistas, aut *Praeservata* secundum Piam & Probabiliorem sententiam. Nimirum Fidelibus liberum hastenus reliquere Summi Pontifices sub una, aut sub altera significatione Virginis Conceptionem celebrare.

At Probabilitati Certitudinem successisse ex hoc ipso Festo doctus Minorita, invita ipsa Romana Ecclesia, contendit, eamque propterea incaute, ut vidisti, irridendam nuper hostibus exhibuit, dum persuadere vult, ipsam diremisse, & non diremisse controversiam de Conceptione. Accipe nunc, quei is eandem alterius Imprudentiae accessere pergat, scribens §. 4. *Peccare eum, qui dum celebrat Conceptionem labis expertem* (idest Festum Conceptionis) *apud se tamen fuisse negat Immaculatam. Qui enim Mysterium, dum lingua celebrat, apud se negat, eatenus Peccat, quia sensum animi sui minime accomodat ad Ecclesiae judicium, quod sequi debet. Illud autem Ecclesiae judicium baud sane praeteris ad eundem modum, quo Festus dies immaculati Conceptus quorannis praetervolas; sed continenter manes, manebisque, dum stabit Christiana Religio. Ergo qui censet, contraxisse Deiparam originale Peccatum Ecclesiae judicium contemnis; adeoque peccare dicendus est.* Haec eadem ab eo repetita videas pag. 103. Di-

xi, a Theologo isto argui & heic Imprudentiae sanctam Romanam Ecclesiam. Nimirum eadem, ut omnes norunt, liberum cuicumque permittit animo adhaerere Thomisticae sententiae; rursus eadem, si Minoritae habenda est fides, exigit, ut celebrantes Festum Conceptionis *Certam* credant Virginis immunitatem, & *Peccati* reos edicit, qui non ita sentiant. Ergo Ecclesia uno eodemque tempore permittit, & non permittit Thomisticam Opinionem; *Peccato* absolvit, & non absolvit. Quis talia ferat? Et quemnam heic tu in errorem prolapsus arbitraberis? Itumne Theologum, an Romanae Ecclesiae Pastores summos? Immo dicas velim, quare *Anaschemate* obstrictus dicendus non sit, qui tanta confidentia Thomistis, non creditibus *Certam* Immunitatem Marianam, *Peccatum* obtrudit, posteaquam Sixtus IV. ceterique ejus successores, atque ipse Alexander VII. disertissime *Anaschema* in eos vibrarunt, *qui ausi fuerint asserere, contrariam Opinionem tenentes, videlicet gloriosam Virginem Mariam cum Originali Peccato fuisse Conceptam, Haeresis crimen, vel Peccatum incurrere mortale, cum Nondum sit a Romana Ecclesia & Apostolica Sede decusum?* Ego heic, fateor, inquieto corporis motu satis testabar, me ista aegro auscultare animo. In haec verba tandem erupi. In Theologo meo absente nihil nunc non audes. Si adestet ille, uti persuasum habeo, tibi multiplici sua doctrina os obstrueret. Cras tamen ad eum proficiscar, ut mutuo mihi det scutum, ceteraque arma, quibus tum illum tueri, tum argumenta tua confodere possim. Tunc Romanus: Tantisper, rogo, sustine. Vacabit tibi ab eximio illo tui gregis duce, ejusque Dialectica, suppetias petere. Aliquid mihi dicendum adhuc reittat. Sed quia in longum excrevit oratio, lassus deprecor, ut post sex aut septem dies, quibus fortasse mei non ero juris, te non pigeat reliqua audire. Consensi, & abivi. Vix domum regressus, pro ut memoria suggerebat, quaecunque audiveram literis consignavi, & ad te dedi. Vale.

Neapoli III. Kal. Julias MCCXL.

*Azevedo suo eruditissimo, atque inter paucos amico,
Valdesius S. P.*

EPISTOLA QUARTA.



URSUS Romanum Abbatem ex composito adii, legentemque offendi publicarum in Europa rerum gestarum ephemerides proelo datas. Post multa de publicis negotiis inter nos agitata, confedimus, atque ille ad me conversus: Quale fuerit de Libro Theologi tui iudicium apud Literatorum vulgus in Hispaniis, tu fortasse nosti, noscere autem nunc mea nihil interest. Quod reor ego, emunctioris naris viri docti, quibus Hispanicum Caelum semper abundavit, non aliter iudicaverint, quam Itali melioris & excultioris ingenii. Vix enim fieri potest, quin eorum in oculos incurrat Theologi hujus parum castigata ratio pugnandi, nimiumque concitata oratio. Placidas quaeſo aures, animumque pacatum mihi praebe; ad Veritatem quippe perspicendam suscipiendamque nimius obex est ira. Utinam heic ego fallerer; sed me neutiquam falli, Liber ipse, quem prae manibus habemus, ostendet. Dicas velim, quid tibi videretur de homine, qui ceteros paene hominum insipientes, stupidos, insanos, ac dementes dictitaret, suaeque doctrinae velut invictae unice plauderet? Tu quidem files; at in praecordiis quae tua sit sententia, lego. En Librum. Accipe, quanta moderatione ejus Auctor procedat. Lectorem in ipso vestibulo is monet, *piam sententiam omnino Vram Certamque esse, se Invisis rationibus confirmasse.* Pag. 1. Opinionem Thomisticam jampridem adeo enectam & profligatam pronuntiat, ut mirandum jam sit, ab Alexandri septimi Pontificis tempore fuisse ullos, aut esse, qui scripta eorundem, & Indignas Theologis Pueriles naenias sine stomacho legant. Tum pag. 4. addit: *Quid amplius eo, quod est factum ab Alexandro, poteramus optare ad premendas fauces Desipientium, ut vere dicam, Sophistarum?* Pag. 5. in haec verba erumpit: *Quis Judicium, & sanitatem mentis in illis agnoscat, qui quasi nihil a Sixto IV. nihil a Pio V. &c. ad Piae sententiae vel tutelam, vel ampliationem collatum esset, Thomisticam adhuc Opinionem tueri pergunt?* Pag. quoque 10. eadem ignominia eum onerat, qui ex quo in Horis

ris Canonici *Sancta & Dignissima* Conceptio Virginis appellatur, Im-
munitatem eidem negat. Is enim ex edicto Theologi tui, *non modo*
Ecclesiam contemnat necesse est, sed etiam Rationis usum Profsus ami-
seris. Equidem video Thomistas, quorum etiam longe major, quam
censeat tuus Magister, est in Ecclesia numerus, quanquam in obse-
quiurn Apostolicae Sedis quid sentiant silentio premant, Thomistas,
inquam, nobis notos video placide adhaerere vetustae suae Opinioni,
non ignorantibus id Romanis Pontificibus, aliisque Ecclesiae Pastori-
bus, & viris quibusque eruditis, immo summis ipsis Pontificibus di-
serte interdicentibus, ne eorum Opinioni maledicta inferantur. Eo-
sdem video magno ubique in honore habitos, ob scientiam, sapien-
tiam, Pietatem, devotumque etiam erga Beatissimam Virginem ani-
mum, commendatos, atque ad gravissima Ecclesiae negocia & mune-
ra adhibitos. Attamen istos nunc audire cogimur bestiarum ad insiar
Rationis expertes, mente captos, ac desipientes; idque pronuntiatum
non in aures tantummodo amicorum, sed in Libris calcographiae be-
neficio editis, & per trivia disseminatis. Immo ne ipsos quidem Pon-
tifices maximos, ceterosque Ecclesiae Pastores simili opprobrio eripias,
quando insanos homines foveat, eorumque opera & doctrina ad Ec-
clesiastica munia utuntur. Judicium tuum nunc effragito. Dicendine
ii Infani, an potius prae nimio aestu in transversum raptus tuus ille
unus? Si primum negas, alterum consequatur oportet. Me vero ta-
cente, is dicere perrexit.

Ad haec antequam certamen ineat, Theologus Minorita univer-
so orbi denuntiat, se *Propositionem confirmaturum Magnis quidem ar-*
gumentis, quae causam decernere ita possint, ut inter Catholiceas ultra
referri quaestio non possit. Felicem hominem vel ante pugnam victo-
rem. Tum haec de Catholicis Theologis profert pag. 19. *Qui haec*
devorare tam impia, tam absurda possit, nae ille Stultius & Flagitio-
sus agit, quam Lutherani, vel Calvinistae. Illi enim Cultum omnem
religiosum abjudicant ab Ecclesia Dei, qui diserte non sit expressus Di-
vinis literis. Isti autem Theologi potestatem Ecclesiae tribuunt novum
Cultum instituendi, qui tamen possit ejusmodi esse, ut in re aliqua,
ad venerandum proposita, nec Veritatem attingat, nec Sanctitatem. Ad
hasce declamationes, a fallaci principio, quo is passim utitur, ema-
nantes, quid respondendum sit, ante paucas dies audisti. Eandem
proeliandi rationem animadvertas velim pag. 25. ubi Lectorem is
monet, se *dissipasse prudentiam Theologorum sibi adversantium, iisque*
omnem eripuisse cavillandi licentiam in Apostoli testimonio, appellantis.
Eccle-

Ecclesiam Dei viri columnam & firmamentum Veritatis. Multae profecto habendae sunt gratiae tanto viro, quod ejus cura & diligentia detectus sit Apostoli locus, quem nemo fortassis ex ejus adversariis noverat, aut ejus vim antea senserat. Honestius tamen infra cum adversariis agit, non enim eis *Anathema dicit, non Haereticos vocat*, sed modesto duntaxat nomine eos appellat *Errantes in re gravissima & facili, hoc est bardos, & hebetes, Communisque Sensus & Rationis oblitos.* Quanquam brevi tantae indulgentiae suae oblitus & ipse videtur, quando pag. 26. eos ad arcem *Temeritatis & Perfidiae* deductos exhibeat. Dixerat Libellator, versari adhuc in controversia Praeservationem Mariae a labe originali. Hisce verbis illum castigat Doctor tuus pag. 41. *Hujus hominis Impudentiae quis poterit sine stomacho respondere, qui tam licenter affirmat, de hac Virginis Conceptione adhuc esse Controversiam, ubi lege Pontificis est omnis adempta disputandi libertas, jamque arma cessarunt Religioni?* Immo in Praefatione Libellatorem arguit, quod *Opinionem sepultam paene ab Inferis excitavit.* Tanta nimirum praeoccupatione animi laborantem invenio Magistrum tuum, ut ei stomachum moveat vel levis Controversiae mentio de Virginis Conceptione, & Impudentiae ad ejus tribunal sit reus, qui argumentum hoc Disputationi adhuc obnoxium arbitretur. Verum quis ex doctis ignorat, quis libere non fatetur, vigere adhuc de hujusmodi argumento Controversiam? Summi ipsi Pontifices idem testantur. Quod si pro bono pacis ii Disputationem interdixere, num Controversiam quoque sustulerunt? Longe a veritate abit, rursus ajo, qui hoc cogiter, qui hoc affirmet. Exposcebat sane gravitas argumenti, & munus Theologi, ut haec majori gravitate pertractarentur, ac praesertim quum res sit non adversus Haereticos, sed cum hominibus ejusdem communionis, omnium honore dignis, qui Scriptorio Libello modestissime sese opposuerant. At nos nihil aliud heic offendimus, nisi signum deploratae causae. Tu Theologum te fortasse heic audire putas. Alia erit aliorum sententia.

Non ultra progredior, lubensque dimitto reliqua id genus tela a Minorita tuo adhibita. Eodem pede integer ejus Liber procedit. Tanquam rem Certam, immo tanquam Fidei Dogma statuit ille, Cultum Sanctorum professionem esse *non solum Pietatis, sed etiam Catholicae Religionis*, atque in eo praescribendo Ecclesiam, Romanosque Pontifices *errare non posse.* Tum arrepto uno invicto hoc, ut is sibi blanditur, axiomate, veluti clava Herculea quidquid sibi obicitur, prosternere se posse censet; illud identidem & millies repetens

& inculcans, ac si Conclusio haec sine ullo discrimine in omnibus Cultus sacri casibus vim habitura foret, eamque Ecclesia ipsa inelutabili decreto jam firmasset. Denique argumentorum torrente quodam, e cerebri sui inexhausto fonte eductorum, & decisorio stylo ita Lectores minus peritos obruit, ut fortassis in suam sententiam incautos abripuisse potuerit. Ex eorum numero siue tu quoque, tuum erit excogitare. Equidem ante paucos dies ostendisse mihi visus sum, ex *Objecti* qualitate determinari *Cultus* ipsius qualitatem. Si *Objectum* a divina Revelatione, vel per divinas Scripturas, vel per legitimam Patrum Traditionem descendit, tunc ipse Cultus ad Fidei divinæ Certitudinem assurgit. Sin a prudenti duntaxat Ecclesiae iudicio, Cultus quidem prudens erit, sed minime ea Certitudine munitus, quae omnem metum erroris excludat. Quo plura sunt Prudentiae fundamenta ad Cultum proponendum, eo maiora sunt motiva Probabilitatis & Credibilitatis, quemadmodum in Canonizatione Sanctorum diximus. Atque heic animum adverte ad Theologi tui admirandam doctrinam pag. 22. ubi *Impietatis* eos arguit, qui *Ecclesiam* falli potuisse in consecrandis & colendis Sanctis putant. Hoc enim putare, *Articulum Fidei funditus destruit*, idest Sanctorum communionem. Deinde is addit: *Id in dubium vocare minime possunt Christiani*. Possunt autem, si hoc vel illud de homine quopiam in *Divos* relato *Ecclesias* iudicium falli posse arbitrantur. Neque perspicit vir non mediocri praeditus ingenio, se *Impietatis* notam conijcere in Sanctum Thomam, aliosque celeberrimos Theologos, qui in eiusmodi negotio Infallibilitatem summis Pontificibus nequiquam tribuunt. Quod plus etiam mirere, dum licere putat credere, de homine quopiam in *Divos* relato *Ecclesiae* iudicium falli posse, nonne is una manu destruit, quod altera aedificat? nonne Infallibilitatem tribuere videtur Romanae Ecclesiae in consecratione Sanctorum, ac postea negat? Neque in hanc rem plura addo. Unum dicere satis sit, nimirum si, concedente Theologo tuo, non est omnino Certum atque infallibile iudicium Ecclesiae de hoc vel illo in Sanctorum album inlato, consequens est, neque nos obligari ad credendum Cultum hujus vel illius Sancti tanta firmitate Certum, ut omnis cesset dubitatio erroris; Cultus enim respondere *Objecto* suo debet, & Certum facere nequit, quod Certum in se minime est. Quantum igitur velit, tibi insiet Doctor tuus scribendo pag. 84. *Cultum sacrum a Pontifice praescriptum, ab Ecclesia receptum, & usitatum, non esse modo Pietatis Professionem, sed etiam Catholicae Religionis, D. Thomas, ceterique Theologi consensu docent.*

docent. Non tam magnificis verbis utitur Angelicus Doctor, dum in Quodlib. IX. Quaest. 8. ait: *Quia honor, quem Sanctis exhibemus, Quaedam profusio Fidei est, qua Sanctorum Gloriam credimus, Pie credendum est, quod nec etiam in his iudicium Ecclesiae errare possit. Pie utique credimus, sed minime supranaturali assensu Fidei, ab Ecclesia errorem in his abesse. Quod plus est, exploratum ajo, si fieri etiam posset (hoc autem nunquam eveniet) ut aliquis ex Sanctis aut canonizatis, aut non canonizatis, quos Ecclesia veneratur, caelesti Beatitudine nequaquam frueretur, adhuc nullum errorem formalem in Cultum ipsum cadere. Nam vel in eo casu Populus Catholicus profiteretur, se credere Gloriam Sanctorum, & ad Deum honor & preces pervenirent, quanquam ad eam gloriam fortasse non pervenisset ille Sanctus. Ita profiteamur Articulum Fidei in adorandis Hostiis rite consecratis, quamvis ineluctabili Certitudine careamus, singulas Hostias rite fuisse consecratas. Quare terculamenta sunt, quae Theologus iste, & alii comminiscuntur in hisce ad salutem aeternam minime spectantibus, ut Certitudinem sine ulla distinctione invehant in quaevis Objecta Festorum, & in Cultum Sanctorum. Quamobrem quum pag. 21. ille scribit: *Turpiter ergo Ecclesia errabit in doctrina morum, si legem ferat de colendo Divo, quem colere, si Divus non est, & cum ratione, & cum Evangelio pugnat. Siquidem Evangelio veramur Diabolum colere; nec differt, Diabolum colas, an hominem. condemnatum: nihil aliud haec sunt nisi verba. Vix fieri potest (jam saepius monui) ut Apostolica Sedes unquam fallatur post adeo accuratum examen in referendis inter Caelites viris ex patenti Pietate conspicuis. Sed quando etiam ex Metaphysico supposito (cujus nulum iustum motivum adest) in hoc falleretur Ecclesia: non illa, non Populus coleret ut Sanctum Diabolum, neque damnatum, quum ejus pia intentio recta feratur in Beatum Dei Servum, atque in Deum ipsum, suorum glorificatorem Servorum; in Deum inquam, cujus causa Sanctos veneramur; in Deum tandem, a quo, non vero a Sanctis, beneficia expectamus. Neque ob hoc cessaret meritum Pietatis in ejusmodi Cultu. Nonne & is fatetur pag. 18. hominem erogantem stipem nebuloni, pauperem se simulanti; non solum non peccare, quin etiam mereri, quod probabili ductus argumento Caritatem exercent?* Idem & in nostro casu dicendum. Ita Reliquias interdum veneramur, quae fortassis ad hominem minime Beatum pertinent. Num erramus? Aut error hic, cujus tamen nemo conficius est, tanto strepitu Magistri tui est excipiendus?*

Mecum igitur redi ad Prudentiam Ecclesiae, neque Infallibilitatem ei tribue, ubi opus non est, quam ipsa sibi non tribuit in Festis illis permittendis, aut indicendis, & in iis Cultibus probandis aut imperandis, qui ad Revelationem referri non possunt. Dum Ecclesiae adsint in hisce casibus Probabilia argumenta Veritatis, iustaque motiva Credulitatis, ut Festum aliquod permittat, aut instituat, & Sanctorum Corporibus & Reliquiis faveat: suo illa munere rite functa est; atque uti illa Prudenter in hisce agit, ita nos ei Prudenter obtemperamus. Quod si Theologus tuus toties auctoritatem Ecclesiae crepat, seque pro ea in acie stare distat: contra cordati viri contendunt, auctoritatem hanc per eum ludibrio inimicorum aperte exponi. Nam ubi velis in Cultum Sanctorum Cultumque aliquem particularem Beatae Virginis Reliquiarum &c. nullum irreperere potuisse ac posse errorem, eumque Cultum ex parte Objecti adeo Certum, ut inde periculum quodvis Falsi excludatur: intolerandum Ecclesiae negotium creas, si huiusmodi sententiam tueri ipsa velit, suamque Infallibilitatem in tot casibus factam testam habere cupiat, & praefertim quod tot Sanctos illa nobis colendos proponat, quos non ea diligentia, quae nunc in usu est, in canonem Sanctorum relatos novimus. At satis est Ecclesiae Prudenter in his agere, & sequi Probabilia Pietatis officia; & potissimum quum haec minime necessaria sint ad aeternam salutem, sed utilia tantum ad alendam Populorum Pietatem; neque doctrinae Fidei quidquam detrimenti adferatur, etiam si in haec Facta non revelata materialis aliquis error obreperet. Quamobrem poterunt quidem Heterodoxi in Festum Assumptionis Beatissimae Virginis insurgere, in quo exhibetur non Anima tantum, sed & Corpus illius translatum in Caelum; atque objicere, inniti hanc opinionem spurio libello Sancti Militonis, confecta Epistola Sancti Hieronymi ad Paulam & Eustochium, falsa narratione Dionysii Areopagitae, aliisque apocryphis Opusculis, aut Auctoribus nimium credulis. Tuto in loco nihilominus est Ecclesiae dignitas, quippe cui, inspecta antiquitate Festi & Opinionis, argumenta Probabilitatis non defuere, & Prudenter propterea se gessit in eo Festo, ejusque circumstantiis quibusdam Populo proponendis, quas tamen neque omnino Certas praestare vult, neque firmo assensu credendas jubet. Acta Passionis Sancti Andreae Apostoli ea sunt, ut de illorum fide dubitare merito liceat. Neque firmam sibi de iis opinionem fuisse, satis non uno in loco prodidit vel ipse magnus Annalium Ecclesiasticorum patens Baronius. Ex iis tamen Actis notum est, Ecclesiam traxisse, quae

quae de ejus Passione in sacris leguntur. Verum ista sive credantur, sive minime credantur, nihil ad Fidei doctrinam, nihil ad salutem aeternam Populi Christiani spectant. Heic etiam antiquitas Opinionis praesto fuit Ecclesiae, ut prudenter ista de Apostolo Christi proponeret, quem alioqui regnare in Caelis credimus. Aliis tempero exemplis, dicturus potius, injurium esse Catholicae Ecclesiae Theologum tuum, quum pag. 21. Cultum Dei cum Cultu Sanctorum confundens in haec verba erumpit. *De iis loquor ad Cultum Dei atque Sanctorum, qua in re POTISSIMUM sita est Religionis Professio, referuntur. Continent enim Doctrinam Morum salutarem & publicam, qua CERTO dirigitur ad Vitam aeternam Populus Omnis Christianus.* Ne novitio quidem in Theologia (sit quaelo dicenti mihi venia) excideret adeo enorme effatum; immo principia solida Christianae & Catholicae Religionis oblitus fuerit oportet, qui in Cultu Sanctorum *Potissimam sanctissimae Religionis Professionem* statuit, & inde *Certo* dirigi ad vitam aeternam Christi fideles tradit. Utinam Haereticorum nemo haec legat. Legenti tamen denuntiandum est, haec esse non solum praeter, sed contra mentem Catholicae Ecclesiae. Et quoniam de Actis S. Andreae nuper mentio occurrit, judicabit aliquando Ecclesia, an ex illo vetustatis monumento deduci possit, notam vel ipsius Apostolorum temporibus fuisse Conceptionem Virginis sine macula, uti pag. 45. Minorita scribit, Actorum etiam verba omittens, quasi conscius, nihil inde confici aut exculpi posse ad suadendam Piam Sententiam.

Uti ergo in tot aliis ad Cultum Sanctorum pertinentibus Ecclesia se gerit, ita in permittendo, ac laudando Festo Conceptionis secundum Piam Sententiam celebrando, se gessit. Etiam si nihil Certitudinis in illa agnoverit, Probabilitatis nihilominus tot motiva in ea deprehendit, ut Pietati Fidelium eidem adhaerentium, & sub ejusmodi consideratione Virginem Sanctissimam colentium favere decreverit, libertate tamen Thomistis relicta celebrandi idem Festum secundum suam Opinionem. Prudenter haec omnia. Neque illa plus Certitudinis contulit Objecto Scotistico Festi, quam quod antea in eo ipsa agnoscebat. *Quia major pars Ecclesiae,* inquit Cardinalis Bellarminus Lib. III. Cap. 16. de Cultu Sancti. *Pie credit Immaculatam Conceptionem, inde habuit eadem Ecclesia occasionem instituendi Festum Conceptionis Mariæ Dei.* Quid sit *Pie credere*, jam nosti. Qui vero *Pie credit* Immaculatam Conceptionem, *Pie* etiam colat ipsam sub eadem significatione oportet, hoc est, *Pia* quidem *Persuasionem*, non vero *Certi-*

Certitudine Objecti ductus. Atque heic attente perpendas velim, quae Theophilus Raynaudus e Soc. Jesu Tom. VII. de retinendo titulo Immac. Concept. §. 8. n. 32. animadvertit, ac referuntur ab Eminentiss. Cardinali Lambertino Lib. 1. Cap. 42. n. 13. de Beatif. & Canoniz. Neque, si Gregorius XV. dixit, velle se, ut omnes VIII. Decembris Festum & Officium peragerent sub nomine Conceptionis, sumptae prout ea vox tunc sonabat, hoc est pro prima Virginis animatione, eamque Conceptionem proposuit pro Objecto Cultus Religiosi & laudabilis erga Deiparam Pietatis: consequens est, ut definiverit tamquam ex Fide Certum, quod prima Virginis animatio fuerit labis originariae expers, & immaculata. Nam ad statuendam Conceptionem sic acceptam pro Objecto Cultus sufficit, ut Pontifici visum sit Pium ac Probabile, quod Beata Virgo semper labe caruerit, ejusque prima animatio fuerit immaculata. Et hoc est, in quo Adversarii vel ultro Caecutiunt, vel Obturatos habent oculos, quibus perspiciant, quando definitur, Cultum alicujus personae esse Licitum, & Religiosum, ac Pium, non ideo statui ut ex Fide Certum, quod Persona, cui Cultus decernitur, sit Sancta, & collucens Gratia sanctificante. Potest enim Religiose ac Pie coli ex sola Certitudine Morali, aut ex Prudenti & Probabili Judicio, quod sit Cultu digna. Raynaudo etiam adhaeret Natalis Alexander in Hist. Eccl. Saec. Secundi Dissert. 16. §. 21. ubi ex institutione Festi ostendit, minime resultare Certitudinem quampiam in illius Objectum, & Piam Sententiam nondum Opinionis limites esse praetergressam. Accepisti a Raynaudo, posse Religiose ac pie coli Personam, cui Cultus decernitur ex sola Certitudine Morali: Quod de Sanctis canonizatis ab eo dici existimo; aut ex Prudentia & Probabili Judicio. Potremum hoc respicit Festum ipsum diem, & Sententiam de Immaculata Conceptione; utrumque enim Prudenter Ecclesia probavit, ac Festum sub ea significatione institutum laudavit; Pietatem quippe & Probabilitatem reperit in Scotistica Sententia. Recte propterea idem Raynaudus §. 7. dicit. *Pium esse ac Probabile, Conceptionem Deiparae esse Immaculatam*, fatendo tamen, posse subesse *Falsum propositioni affirmanti, eam animationem fuisse Immaculatam*. Idem quoque infra fatetur, ad statuendam Conceptionem sic acceptam, pro Objecto Cultus sufficit, ut Pontifici visum sit Pium ac Probabile, quod B. Virgo semper labe caruerit. Ita vir doctissimus sibi persuadens a Gregorio XV. statutum Objectum Festi Conceptionis; sed simul agnoscens, non quampiam Sententiae Scotisticae Certitudinem causam aut occasionem dedisse Festo, neque ex Festo ipso derivari posse; & Piam

Piam nihilominus ac Probabilem esse cum Sententiam, tum institutionem Festi, uti summorum Pontificum Prudentia perspexit. Adiciendum tamen fuerat, neque Gregorium XV. neque Alexandrum VII. ad universam Ecclesiam extendisse Objectum Festi Conceptionis, sed agnovisse duntaxat, a Piae Sententiae sectatoribus celebrari hoc Festum secundum eandem Sententiam; neque interdixisse contrariae Opinionis fautoribus idem celebrare sub subintellecto in mente nominis *Sanctificationis*. Quod praecipue animadvertendum est; nam falso hoc supposito nititur tota moles doctissimi Patris de Luca, quasi Romani Pontifices non Scotisticae tantum, sed & contrariae Sententiae affectis indixerint celebrandum Conceptionis Festum sub una significatione *Praeservationis Virgineae*.

Ex his igitur intelligis, clarius quam antea tibi ostenderim, a scopo abludere Theologum istum, dum sibi ostendendum sumit, *Ecclesiam errare non posse, ubi Cultum praescribit religiosum & sanctum*, & ex Conceptionis Festo deducere se posse putat, Certitudinem eam effluxisse in Piam Sententiam, quae Suspicionem omnem Falsi amoveat. Simul etiam intelligis, me in hisce commendare atque haecenus tutatum fuisse Prudentiam Romanorum Pontificum. Minorita vero tuus quid aliud agit, nisi ut eis Imprudentiae non vulgaris notam tanto verborum molimine inurat? Da repetenti veniam. Si verum foret, Pontificem *errare non posse* in Cultus alicujus institutione sive permissione, non aliunde is hujusmodi Infallibilitatem haberet, nisi a Deo, & qua Pontifex & Vicarius Christi; nam qua Homo privilegium hoc, ut puto, minime sibi tribuit. Ergo ad *Fidei Dogmata* spectabit quodcumque illius judicium de *Cultu religioso*. Quam autem edixerint Romani Pontifices, Cultum Virgini exhiberi in Festo Conceptionis secundum Piam Sententiam, uti is dicitur: necessario consequi debet, non minus Festum, quam Sententiam de Conceptione ad *Fidei Certitudinem* esse referenda. En ergo immane dedecus Apostolicae Sedis, quae se habere ait Scotisticam Sententiam pro Pia ac Probabili duntaxat, neque se voluisse aut velle controversiam dirimere: quum tamen, si argumenta Minoritae vim habent, Certa ea evaserit, ac Certitudine tanti ponderis, ut Falsum ibi suspicari amplius non liceat. Egregium profecto Pontificiae auctoritatis patronum, quam quo plus extollit, eo turpius deprimit, exorbitantque Heterodoxorum cachinnis derelinquit. Quod si tuus ille non uno in loco ait, *Mysterium Conceptionis nondum fuisse ineluctabili decreto ab Ecclesia constitutum*, sequae illius Certitudinem *Theologica Conclusio*

ne tantummodo collegisse; ex industria id factum, ne recta adversari videretur apertae summorum Pontificum protestationi, cui tamen revera adversantur quaecumque is adfert, ut appareat, post Bullam Alexandri VII. Certam, immo Certissimam evasisse Piam Sententiam. Qua Certitudine, si superis placet, posita, is impetratu facile sibi persuadeat alterum Sanctae Sedis decretum, quo Mysterium clariori luce Fidei Catholicae dogmatis adjiciatur.

Haftenus pressis labiis ego silueram. Amicum virum interrogare tandem subiit, cur Apostolica Sedes postremo iudicio Quaestionem hanc nondum diremerit, neque ad dirimendum proclivis videatur. Tunc ille: Meum non est in abdita summorum Pontificum consilia penetrare. Hoc unum novi, sive aliquid illa decernat, sive a decernendo abhorreat, ejus Prudentiae essetribuendum; ac propterea laudari non posse Magistrum tuum, quoties *Necessariam* decisionem hanc ait, hoc est ingenio suo leges imponere audet Prudentiae Romanorum Pontificum. Tot jam Saecula abierunt, ex quo ejusmodi concertatio fervet. Primus Sixtus IV. Pontifex Maximus Anno 1476. & 1483. ei frenum aliquod adhibere coepit, tum Pius V. Paulus V. Gregorius XV. & Alexander VII. manus in eam injecerunt; at ex iis nemo nodum huc usque solvit. Non certe politico consilio, uti Magister tuus audacter insinuare videtur, abstinerint ab ejusmodi sententia, sed revera ex legitimis consuetudinis suae Prudentiae motivis, uti ego arbitror, indecisam reliquere Quaestionem. Tantam sane gerit animi devotionem erga Beatissimam Dei Matrem Apostolica Sedes, tanta cura ad sedandas in Ecclesia discordias fertur, ut nisi gravis aliqua intercessisset causa, jam ex Cathedra pronuntiasset, & potissimum tot precibus Regum Catholicorum fatigata. Duplex autem causa, si mihi homunculo credendum occurrisset heic videtur: altera, nulla quae appareat Christiani gregis Necessitas aut Utilitas; altera iudicii ipsius, si res bene pendatur, gravis difficultas. Ad primam quod attinet, sive fuerit sive non fuerit sine labe concepta Maria, nihil interest Ecclesiae, uti tot alia in Scholis disputata, certo cognoscere. Grandi quidem ore Magister tuus pag. 44. in hoc epiphonema erumpit: *Jam vero Mariae Conceptio & Immunitas non modo pertinet ad Religionem, sed etiam Fidei, gravissima capita proxime attingit, hoc est naturam & proprietates originis Peccati occasionem Incarnationis, Dignitatem Deiparae atque praestantiam. Res igitur est maxime digna Ecclesiae iudicio.* Verum gravissima haec sanctae Religionis dogmata, notissima, & passim depraedicata, constant ex apertissimis divinarum Literarum locis,

locis, & ex concordi Traditione Patrum. Ut ea discamus, aut credamus, num opus est noscere, fueritne an non maculae Originalis expers Virgo Sanctissima? Apage. Jamdiu Joannes Gerlonius, Theologus eximius, quamquam Piae Sententiae & is addictus, in Tractatu de Propositionibus ab Episcopo, haereticandis, inter Propositiones ad Fidem non pertinentes minime scandalosas, & quarum potest sine periculo Veritas vel Falsum ignorari, hanc etiam recensebat: *Virgo Maria fuit concepta in Peccato originali. Quia apud maximos Doctores in Theologia, non corruptos affectu vel intellectu* (cujusmodi nescio an dicendus sit Theologus tuus) *judicantur Probabiles, neque scandalizant, nec Oportet eas scire ad bene vivendum, vel credendum.* Postremum hoc esse judicium omnium vere doctorum mihi persuadeo, qui *non corrupti affectu vel intellectu* rem intime norunt, & sincere expendunt. Neque aliter visum fuisse Sancto Pio V. Pontifici Maximo, satis illius hac de re Constitutio prodit. Eminentiss. vero S. R. E. Cardinalis Gottus Tom. I. Cap. IX. §. I. de Vera Christi Ecclesia, controversiam memorans de Conceptione Deiparae adhuc vigentem, ait: *Pendente questa Controversia si sono fatti più Concilj, e ninno l'ha mai determinata: onde è segno, che non è giudicata materia di Fede.* Quid est ergo, quod Doctor tuus pag. 16. sententiam hanc in medium adfert: *Nullus igitur error cadere potest in Pontificem Maximum, & Ecclesiam, cum facienda praescribit & facit, quae ad Mores pertinent, atque aeternam salutem?* Nihil hoc certius, immo nullum est efficacius telum ad confodiendam Haereticorum novitatem atque proterviam. Dogmata statuuntur de rebus revelatis; Opinioniones itidem perversae spectantes ad Mores proscribuntur. Peculiaris afflatu in his Deus Apostolicae Sedi & Ecclesiae semper adstabit, ne Errori sit locus. At quorsum haec ad praesentem Quaestionem? Num ad aeternam Christianorum salutem aut utile aut Necessarium est rescire, fueritne an non concepta Virgo sine labe originali? Nunquid hujusmodi notione indigemus ad Mores? Et quod est ad Cultum obsequiumque nostrum erga Deiparam, ad illud innumerae nos rationes, eaeque certissimae, impellunt, etiamsi Deus Mysterium Conceptionis minime revelaverit. Quum Matrem Dei dicis, omnia dicis. Itaque a Theologo tuo ista commemorantur, quae nihil ad rem in praesentia faciunt, ac tantummodo fallere possunt incautos. Is enim alibi hoc est pag. 22. *Sciolos quosdam ex eorum grege, qui politici nominantur, sibi fingit veluti docentes, Ecclesiam in Morum doctrina eorum, qui ad salutem necessarii sunt, falli non posse, in ceteris*

Tom. V.

M m

ris

ris posse. Tum contendit, ne in utilibus quidem statuendis falli posse Ecclesiam. Sed vix est ut credam, Theologo alicui excedisse unquam adeo crudam sententiam; & parcas velim, si dixerò effatum istud sine ulla causâ sciolis iis politicis mihi ignotis, a Theologo isto imputari. Is enim nulla heic distinctione utitur, quæ tamen summopere necessaria est. In Moralibus actionibus ad salutem æternam non necessariis quidem, sed tantum utilibus præscribendis, Errori minime obnoxia est Ecclesia. At in Factis, a Revelatione minime pendentibus, quamvis utilis foret Certa eorum notitia; uti sunt Reliquiæ, Miracula, atque alia hujusmodi, Infallibilitatem minime sibi tribuit Ecclesia. Nihil vero exempla a Theologo tuo producta ad rem nostram faciunt. Agimus de Conceptione Virginis, hoc est de Facto, quod Ecclesia statuere sine errore potuerit, siquidem a Revelatione aut per divinos Libros, aut per Traditionem, haberi possit, num revera Deus prærogativam hanc Virgini concefferit, an negaverit. Quænam vero utilitas ad salutem æternam, atque ad Mores Populi Christiani ex hujusmodi definitione emanatura esset, quum vacabit, a te libenter accipiam.

Ad Judicii atque definitionis difficultatem nunc venio. Inter plebsque Fidelium jam inolevit persuasio sive opinio (quippe contra hîscere palam nemo audent) Certam adeo evasisse Sententiam de Immunitate Virginis ab originali peccato, ut de hoc amplius disputationi nullus relictus sit locus. Hoc Populo passim denuntiatur vel ab iis, qui interrogati nullam fortasse solidam rationem assertionis hujus adferre possent. Qui vero ipsa Apostolicae Sedis decreta perspecta habet, aliter judicet oportet; neque tu, ut arbitrator, secus judicabis. Rursus, si audimus Theologum tuum pag. 79. *Ad hanc causam discutiendam plus laboris ac diligentiae collatum, quam fieri soleat in Visa & moribus dijudicandis eorum, qui Ecclesiæ decreto sunt consecrandi: atque adeo de Pia Sententia pronuntiari illud posse: Constare de merito, ac procedi posse, quando Sanctissimo placuerit, ad definitionem.* Tum Consultoris munus apud Apostolicam Sedem ille arripiens, pro sua singulari Prudenti regiam eidem viam suggerit, qua ad Controversiæ decisionem sit procedendum. *Satis est,* inquit ille, *paucis Theologis negotium committere* (quod & in libello supplici a Clemente XII. antea per Catholicum Regem petatum fuerat) *qui non causam præfrigeratam de integro recognoscant* (namq; hæc in Scotistarum Libris ad Certitudinis apicem deducta jam fuit, & præsertim in Libro Patris de Luca) *& an sit definienda, in dubium revocent* (hæc enim

nim

nim definita jam videtur, nam, ut is ait, pag. 93. *Nulli sunt Patres, aut fere Nulli, qui non Piae Sententiae adstipulentur*) sed qui duorum, quae proposuimus, alterutrum eligant; hoc est videant inter se, ac Pontifici exponant, *Conceptionis Mysterium sitne definiendum ut res de Fide, an ut Certa infra Fidem, seu Certitudine aliqua infallibilis Veritatis*. Adeo sapientis hominis consultationi miror cur additum non fuerit, paucos illos Theologos seligendos esse e Scotistica Schola; quippe nullus praeter eos certam rationem exerere potest, cur non amplius dubitandum sit, & causa haec sit definienda. Sed ut serio agam, ajo, consilia haec omnia, sive tentamenta, ut vulgari verbo utar, excogitata esse in perniciem Prudentiae & Dignitatis Apostolicae Ecclesiae. Nam primo, fueritne Virgo, an non, immunis in Conceptione a macula originali, ex iis Factis est, quae Sancta Sedes & Ecclesia decidere potest, sitne de Fide, an contra Fidem, quia & hoc potuit revelasse Christus Dominus in sacris Scripturis, aut per Traditionem ad nos usque transmittere; aut necessario deduci fortasse potest ex certa aliqua divinorum Librorum sententia, aut ex legitimae Traditionis doctrina. Si forte Revelatio haec desit, ad quam colligendam & statuendam peculiare auxilium suum pollicitus est Deus Ecclesiae suae: nulla alia ratione potest eadem Ecclesia, sive Petri Sedes, ad *Certitudinem infallibilis Veritatis* evehere Piam Sententiam, quum neque a lumine naturae, neque e concordia Theologorum (eos enim heic discordes habemus) neque ex imaginatione hominum (quis enim *Consiliarius* Dei fuit, ut ait Apostolus? *quis affuit in consilio Domini*, ut inquit Hieremias?) elici possit tanta Certitudo illius Sententiae, ut Falsum in ea suspicari non liceat. Reliquum igitur est, quoties fundamenta forte deessent ad referendum inter inconcussa Fidei Dogmata Piam Sententiam, ut eam Deus revelasse noluerit, atque eadem pergat esse tantummodo Pia & Probabilis, qualis haecenus fuit. En ergo ab eo non satis recte consultum Prudentiae & Dignitati Sanctae Romanae Ecclesiae, qui ab ea statuendam curat ejusmodi Sententiam, si non Certam de Fide, saltem Certam infra Fidem, seu Certitudine aliqua infallibilis Veritatis; & nihil pensi habet, an hostium irrisioni exponat Matris nostrae judicia, dum voti sui compos fiat.

Pejora tamen molitur novus iste Sanctae Sedis Consiliarius, dum non dicam Romano Pontifici, sed Christiano universo Populo persuadere vult, longe majori labore & diligentia pertractatam fuisse Quaestionem hanc, quam fieri soleat in processibus de Canonizatione Ser-

vorum Dei, eamque in tanto lumine jam collocatam, ut pronuntiarum jam possit: *Constare de meritis*; nullumque amplius de ea instituendum esse examen, sed tantummodo pronuntiandum de illius *Certitudine*. Tu haec audiens minime animadvertis; animadverto quidem ego, concedere haec in maximam Sanctae Sedis injuriam, atque in universi gregis Christiani illusionem. Si, uti supponitur, tanta luce Veritatis donata jam fuit Pia Sententia, ut eam superet, quae ex processibus pro Canonizatione Sanctorum resultat: nonne culpandi aut negligentiae, aut inscitiae, aut parum laudandi alicujus affectus summi Pontifices, qui adeo exploratam illius Veritatem adhuc suppressam incertamque volunt, aut sinunt? Sin vero, uti credendum est, post tantam diligentiam tantum lucis nondum in hanc Sententiam inlatum fuit, ut Romani Pontifices rite eandem decreto suo firmare possint: jam sentis, quanto dedecore hic tuus Romanam Ecclesiam aspergat, quae Sanctos in Caelitum album infert, quanquam non tanto labore ac diligentia utatur in *vita & moribus eorum dijudicandis*, quanta hactenus adhibita est *ad discutiendam causam Conceptionis*; & ab ista nihilominus dirimenda alienam se prodit. Sed abeat hujusmodi praestigiae. Apostolica Sedes aut numquam ad solenne plenumve examen controversiam de Conceptione Virginis vocavit; aut si deduxit, id unum vidit, quo Minoritae tui nimia confidentia confundatur. Scilicet nihil aliud invenit, nisi Scotisticam Piam tantummodo ac Probabilem esse, non vero Certam: alioquin eam pro suo erga Deiparam devoto ac filiali obsequio Certam quoque pronunciasset. Rursus vidit, Thomisticam quoque Piam ac Probabilem esse: alioquin eam aut haeticam, aut falsam, aut erroneam, aut scandalosam, aut piarum aurium offensivam denunciaisset. Restat ergo, ut hujus Quaestionis examen instituerint uni Scotisticae Opinionis asseclae, atque immenso labore, & diligentia majori, quam quae ad consecrandos Dei Servos adhibetur, suam demum Sententiam ex cerebri sui sacratio deduxerint ad *Certitudinem infallibilis Veritatis*. Contine nunc risum, si potes, dum audis, Scotistas tuos partis simul & Judicis sibi munus arrogasse; atque nunc edicere Fidelium gregi, nullo amplius examine heic opus esse; Sedemque Apostolicam tantorum virorum fide fretam, causam hanc *praefrigeratam de integro* minime debere *recognoscere*; sed eis duntaxat victoriam clausis oculis adjudicare. Et nisi fateberis, insidias heic structas Prudentiae Romanorum Pontificum, & Sanctae Sedis decori, ego te obtusi ingenii arguere nequam verebor.

Con-

Continuato deinde sermone ajebar: Immo nusquam & nunquam accuratissimi examinis tanta necessitas fuit, quam in praesenti controversia, si quando eam sibi dirimendamsumeret Pontifex Maximus. Constanter enim ajo, causam hanc adhuc pendentem, tanto animorum aestu, tot imposturis, tot sophisticis rationibus, ac falsis interpretationibus ab utraque parte fuisse per plura Saecula agitatam, ut qui eam nunq̃ attingat, in ambages ac praeupta innumera se conjectum illico sentiat. Neque mirum, ubi vigent acerrima studia partium, & dum quisque Gloriam Dei, & Virginis Sanctissimae, ac Veritatis causam se unice tueri arbitrat, minime animadvertit, se ab aliis turbulentis affectibus in aciem praeripi. Agitur heic de laurea Ingenii, de gloria Ordinis, ac Nationis. Ab internis hisce vehementibus animi perturbationibus agitati viri docti, sub Religionis, sive majoris Pietatis obtentu, nullum lapidem non movent, ut si non triumphum, orationem saltem consequantur. Hinc persuadere sibi & aliis, non de re levis momenti, sed de negotio omnium gravissimo disputari. Inde Reges, Academias, & Populos commovere. Interim uberior laus Ordini & Genti, & in aemulos invidia speratur. Et quandoquidem Prudentia summorum Pontificum a duobus ferme saeculis obstruendum os uni parti laudabili consilio censuit, ut tumultibus ac seditionibus esset finis: latior campus alteri parti apertus fuit ad effundendum quidquid sibi liberet, & ad suadendam Certitudinem Sententiae suae, absque metu adversariorum, quibus silentii frenum jamdudum fuit injectum. Itaque si quando solenne judicium Sancta Sedes de hujusmodi Quaestione institutura foret, petas velim a Magistro tuo, an aequiores, & Prudentiae summorum Pontificum magis conformes dicendae essent conditiones, quas ego subnectam, non uti Consiliarius Sanctae Sedis, sed uti unico Veritatis zelo ductus, quam animosi Minoritae consilium de omittenda prorsus cognitione causae, & de statuenda e vestigio Certitudine Piae Sententiae, labore tantum converso ad decernendum, qualis sit ejusmodi Certitudo, talis tamen semper futura, quae dicenda sit *Certitudo infallibilis Veritatis*.

Jam constat inter Theologos, potuisse Deum sinere, ut Maria cum originali labe conciperetur, & potuisse etiam eamdem praeservare. Ex geminis hisce statibus uter Virgini contingerit, non aliunde nos possumus edicere, nisi a Revelatione Dei, si qua est, quae innotescat vel ex divinis Literis, vel ex legitima Sanctorum Patrum Traditione; Nam ex intellectu nostro elicere velle, quae in rebus

non

non necessariis fuerit Voluntas Altissimi, ad temeritatem interdum accedat. *Quis enim homo (rursus dico) poterit scire consilium Dei? Aut quis poterit cogitare quid velit Deus?* Sap. IX. 13. Propterea Gersonius T. I. pag. 452. rigide improbat ita ratiocinantes: *Christus posuit hoc vel illud facere in gratiam Matris suae. Et hoc decuit ipsum facere, quia decuit eum Matrem honorare. Ergo sic fecit.* Itaque si unquam pertractanda foret causa haec ante summum Pontificem, nulla dubitatio est, quin fieret in iudicio contradictorio, & parte altera adversante audita, uti factum fuit in celebri controversia de Auxiliis, & quotidie fit in processibus de Canonizatione, quibus interest, & quaecunque obijcienda sunt obijcit Fidei Promotor, sive Advocatus Fiscalis. Nihil enim tam grande ac delicatum in Ecclesia Dei, quam condere decreta Fidei, & quae intellectum & conscientiam obligent. Ita vero hactenus Ecclesia semper se in tam gravi negotio gessit, ut nunquam Dogma aliquod divina Fide credendum statuerit, quin meminerit secundum Apostoli Petri praeceptum Ep. I. Cap. III. 15. se debere esse *paratam semper ad satisfactionem omni poscenti rationem* de suis decretis, ea ostendendo innixa Revelatione scripta in sacris Libris, aut ad nos per Traditionem Patrum sanctorum transmissa, aut e certis Religionis sacratissimae documentis rite deducta. Itaque primo perpendenda sunt ea Scripturarum sacrarum loca, quae tot Theologi, ac tuus etiam pro Pia sententia adfert. Atque is sane pag. 59. Lectorem monet, *temeritatis intolerandae* esse dicere, *Scripturae loca in sensu literae non favere sententiae suae*, postquam in Evangelio Maria appellatur *κεχαριτωμένη*, *Gratia plena*; & in Canticis Canticorum de ea dicitur: *Tota pulchra es amica mea, & macula non est in te.* Videndum, inquam, an tantum lucis ex Graeca illa voce emanet, ut tuto inferri inde possit Conceptionis Marianae Immunitas, quum Sanctificationi praecedenti eadem quoque aptetur; & an unquam Ecclesia usa fuerit sensu Allegorico, Tropologico, & Anagogico ad fundandum Dogma Fidei; certum quippe est, secundum Literam non spectare ad Virginem sanctissimam verba illa Canticorum. Secundo expendenda sunt Scripturarum loca a contrariae Opinionis sectatoribus producta, ex quorum literalis sensu videretur inferri posse, Mariam cum reliquis hominibus peccasse in Adam, & Redemptione indiguisse. Quum vero nonnullae probabiles rationes concurrant, cur ab illa universali lege excipienda videatur Deipara: tertio loco consulenda est sacra Traditio, ac diligentissime scrutari opus est, noverintne & praedicarint Sancti Patres ejusmodi ex-

prio-

ptionem, an contrarium potius ex eisdem colligatur. Atque heic animadvertendum, sub nomine Sanctorum Patrum, quum agitur de colligenda Traditione divina Dogmatum Christianorum; proprie eos venire, qui per sex priora saecula, post Christi Domini Ascensionem in caelos sanctitate vitae, & ubertate doctrinae floruerunt, & cultodes ac testes fuere Dogmatum a Christo & Apostolis ore traditorum Ecclesiae suae. Eorum chorum claudunt Gregorius Magnus Romanus Pontifex, & Ilidorus Hispalensis Antistes. Reliqui dicendi quidem Sancti, qui deinceps vixerunt, ac Theologi, non vero Sancti Patres, quoties de haurienda eadem Traditione cura est nobis, & quanquam appellare velis Sanctos Patres & istos (neque enim id facere quicquam prohibetur) certe eorum auctoritas, etiamsi non levis pretii & usus sit in Theologia, in comparatione tamen priorum Patrum minor est; eorumque Traditio, utpote ab Apostolorum temporibus remotior, non ejus est ponderis, atque Patrum antiquorum; & nulla etiam foret, si forte veterum dictis adversaretur; aut dubia, quoties facta narrant, quae Veteres minime noverunt, & si novissent, minime tacuissent.

Igitur ad rite hauriendam in hujusmodi, atque in aliis Fidei negotiis Traditionem Patrum, mecum ut puto, concors eris: primo abjicienda esse, quaecunque dubia, interpolata, aut supposititia Sanctorum scripta, quaecunque imposturae, quaecunque loca abs re in causam istam adducta haecenus fuere. Multaque sane ex his offendimus in Libris utriusque partis. Seponendae praeterea quarumdam piarum mulierum Revelationes, quarum nulla unquam ratio habita est in Ecclesia Dei, ubi de stabiliendis iis, quae credenda sunt, actum fuit; atque heic praecipue cavendum, quando novimus contrarias hac de re Revelationes in aciem venisse. Reducta ad unos germanos ceterosque Sanctorum Patrum Libros inquisitione Traditionis, ad controversiam hanc pertinentis, sollicitè considerandum est, num illi faveant Piae Sententiae, an non; & an praerogativam hanc, sive ejus Certitudinem, quum opus erat, minime revelaverint; nam si eam ipsi revera ignorasse deprehenduntur, haec ipsa ignoratio species Traditionis est contraria Scotistis. Utique insurgit Theologus tuus pag. 28. in ea verba erumpens, quae terrorem incutere posse videantur vel ipsis Judicibus sacris, dum inquit: *Est Mendacium Impudentissimum dicere, priscos Patres, & Ecclesiae Doctores a contraria parte stitisse &c. Ridendi sunt, qui non jam Patres, sed Patrum larvas ostendant, tamquam terricula imperitorum.* Utinam ab hisce, aliisque hujus-

jusmodi parum honestis verbis is abstinuisset, ne in caput suum reciderent, si forte post diligentem inquisitionem constaret, non larvas Patrum, sed Patres ipsos ab admittenda Certitudine Pia^e Sententiae longe abesse. Quanquam quid ajo? Pater de Luca ejusmodi periculo jam sententiam Piam eripuit, inquiens pag. 96. *Si Mystrium Apostolica Sedes aliquando definiat (quod ad istorum refranandam audaciam Nece^ss^e est) qui praedicabit, prohibita esse de hoc ipso argumenta Cajetani, Turrecremata, & aliorum Opuscula; in iis Auctoribus Patrum nomina & dicta, vel esse omnino supposititia, vel dolo malo depravata, vel ad causam non pertinentia, is profecto Verissima praedicabit.* Stupens haec audio. Haftenus Romani Pontifices, sive Ecclesia, censuere, decreta Fidei inniti debere sacris Libris, & sententiis Sanctorum Patrum. Vires suas perspectas minime habebant. Animo solo pede ad decernendum deinceps procedant. Tamen si adversantia suis decretis postea apparerent dicta Patrum, haec supposititia, depravata, inepta appellare oportebit. Theologo huic proinde ingentes gratiae habendae, quod rem tanti momenti, antea nemini excogitatum, detexerit, & usu recipiendam edixerit; neque enim quidquam periclitaturam esse ita se gerendo Romanae Ecclesiae Prudentiam, immo & Infallibilitatem, is vadem se offert. Posceret autem locus, ut quando eruditus iste Theologus §. 19. pro Pia sententia commemorat *Origenem*, & Sanctos *Augustinum*, *Fulgentium*, *Hidelp^honsum*, & quosdam Graeculos, quos tanquam luculentiores testes pro eadem sententia ipse selegit, ad examen ego revocarem. Sed pro reverentia erga decreta Pontificum libens abstineo. Erit hoc munus Apostolicae Sedis, si unquam examen istud instituere velit.

Interea aequi rerum aestimatores fatebuntur, si quando decretorium judicium instituat^{ur} de Conceptione Virginis, omnia ab utraque contendentium parte allegata, severo examine indigere; & parum laudabile consilium offerri Prudentiae Romanorum Pontificum ab eo, qui negat retractandam causam, ac sine ulteriori examine procedendum esse ad definiendum, qualis dicenda sit *Certitudo* Pia^e Sententiae, *Certitudinem* tamen hanc futuram esse *infallibilis Veritatis*: quod ubi accideret: quid ultra deesset, ut haec Sententia ad Fidem pertinere crederetur? Modeste fane loquutus fuisse videbatur Libellator, scribens, Ecclesiae sententias *debere esse conformes Sacrae Scripturae, vel Traditioni Patrum.* Sed *sententia de immaculato Virginis Conceptu non est Expresse conformis Sacrae Scripturae, quia auctoritates, quae in illius favorem adducuntur, in sensu literali hoc non expri-*

exprimunt, sed detorqueri debent ad sensum accommodatitium, qui non est regula definitionum Ecclesiae. Nec est Traditioni conformis: quia de hoc Mystero primo dubitatum est, & in primis Ecclesiae Saeculis, a quibus Traditio oritur, alium fuit silentium de Virginis Conceptione. Quid in his verbis adverbium Expresse significet, tu satis intellexisti. Quid vero Pater de Luca? Non ausum Libellatorem ait in majori propositione reperere illud Expresse, quod est positum in minore, ut falleret incautos dissimulando. Tum vero sibi fingit propositionem hanc, scilicet: Nihil esse definiendum, nisi quod est expresse conforme Sacrae Scripturae, vel Traditioni Patrum; eamque haereticam, vel haeresi proximam appellat. Atqui hoc minime dixit Libellator. Nil refert. Ex regulis Logicalibus hoc dicere ille debebat. Tum, ut ostendat Propositionis a se efformatae virus, ait, secundum illam argui posse erroris Tridentinum Concilium, quod in Canonem retulerit Libros Tobiae, Machabaeorum, & Sapientiae; de iis enim contentio pertinax olim fuit; nec ullus Liber Divinus, nec vero certa Traditio Expresse demonstrat, Libros eosdem esse Divinos. De propositione, quam nuper audisti, quidquam differere mihi non est in praesentia animus; sed quidem ajo, inopportuna & incongrua ab eo proferri ad praesentem causam, immo inconsulte, (ne graviore vocabulo utar) ipsum esse loquutum de Tridentino Concilio, quasi Patres ii sine valido & expresso Traditionis suffragio Libros eos in Canonem Catholicae Ecclesiae retulerint. Tobiae Librum uti Sacrum & Canonicum agnovere Sancti Cyprianus, Basilius, Ambrosius, Augustinus, Concilium Hipponense Anni 393. Innocentius I. & Gelasius I. summi Pontifices, ut alios omittam. Neque dissentit S. Hieronymus. Machabaeorum Libris auctoritatem quoque conciliarunt Origines, Tertullianus, Cyprianus, Lucifer Calaritanus, Hieronymus, Augustinus, Concilium Carthaginense III. Innocentius I. & alii. Denique Sapientiae Librum uti Hagiographum laudarunt Justinus Martyr, Origenes, Tertullianus, Cyprianus, Eusebius Caesariensis, Concilium Sardicense, Basilius, Hilarius, atque alii complures. Videat ergo Pater de Luca, an Prudentiam & Eruditionem suam deceat ea proferre, quae Catholicam Ecclesiam laedere possunt, ac si ex arbitrio, & non ex auctoritate certa Traditionis, in Canonem memoratos Libros retulisset, & quae simul suae causae nihil prodesse queunt. Exerat ille, si potest, tot ac tales testes Traditionis faventis Piae Sententiae, quales Tridentina Synodus ad ea efformanda decreta adhibuit: & tunc in eandem Sententiam Ecclesia, nemine refragante, firmissimo decreto.

conceder. At si forte constaret, Sententiam illam non satis conformem esse Sanctorum Patrum Traditioni, certum est mihi, nullum ei sperandum esse, dum Mundus stabit, Romanae Ecclesiae proprium peremptorium decretum.

Hoc unum nos interea concludamus. Pia, Probabilis, Laudabilis est eorum Sententia, qui Immaculatum Conceptum Deiparae tribuunt. Hoc & ego lubentissime amplector. Verum Sententia haec nondum ad Certitudinem affurrexit, neque aliud quidquam tenuit hactenus, & tenet Romana Ecclesia. Certitudo, quam nobis deprædicat iste Theologus, atque alii ante eum præcipue ex Festo Conceptionis, secundum Piam Sententiam ab Apostolica Sede probato, haurire se posse putarunt, ex eorum ingenio prodit, cui quidquid affectus summopere desiderat, nullo negotio verum & sanctum videatur, argumenta deinde fabricando, quibus etiam ceteris idem persuadeatur. Cresconium Donatistam hac de causa S. Augustinus (Lib. VI. Cap. 37. contra eundem) ridebat inquires: *Degradatio mira prædicantium boninum, non iam ut vetus proverbium fertur: Quod volumus, Sanctum est; sed etiam Quando volumus, & Quandiu volumus.* Non ex Cultu religioso determinatur Objectum, sed contra ab Objecto determinatur Cultus. Da mihi Objectum Cultus Certum ex Revelatione scripta, sive non scripta per Traditionem: Cultus quoque Certissimus erit, atque ad Fidem spectabit. Sin Objectum tantummodo Pium est, & unius Prudentiae legibus obnoxium, ejusmodi quoque erit Cultus; recteque semper Ecclesia agit, dum Probabile Objectum inveniens, Cultum Probabilitate eadem innixa constituit. Neque enim Prudentia deest Probabiliter operanti in rebus, de quibus Certitudo haberi non potest, nullaue Certitudo, aut major Probabilitas contra militat. Propone tibi Festos dies S. Annae, & S. Joachimi. Quandoquidem S. Epiphanius Haer. LXXIX. *Joachimi & Annae* meminit, eorumque apud Graecos antiquissima erat memoria, & festus dies, idcirco Latina quoque Ecclesia prudentissime eorum Natalem diem in Sanctorum Fastos invexit; & nos Prudenter cum illa memoriam eorum colimus, ac temere contemneremus. Eadem dicas de Objecto Festi Praesentationis, & Assumptionis B. Virginis, quoriescumque legas, quae de varia illius origine Eruditi viri adnotarunt. Pie tamen ac prudenter dies illi Festi investiti fuerunt, & pie simul ac prudenter a nobis coluntur. Scribit certe Minorita pag. 36. a Cardinali Baronio in *Martyrologio Romano Traditionem de Praesentatione tamquam Certam proponi.* Id apud Baronium non legi. Sed
hujus

hujus Traditionis Certitudinem aequius nos exspectabimus ab eruditione Theologi istius. Si id ei minime succedat, ac potius inverso ordine dicere pergat, ex institutione Cultus Praesentationis Objectum ipsum evaluisse Certum: sciat, se exponere Ecclesiam nimis insultibus inimicorum. Quae enim nos illius Infallibilitatem in ejusmodi factis tutabimur, si legitima Traditio desit?

Igitur vela tandem colligamus. Piam, Probabilem, Laudabilem una cum Apostolica Sede, & reliquis Ecclesiis, agnoscimus Sententiam tribuentem Deiparae immunitatem a culpa originali; Piumque, & Probabilem Festum diem, & Cultum illius secundum eandem Sententiam prudenter institutum celebramus. *Sanctam* quoque ac *Dignissimam* Conceptionem Virginis merito appellamus, quia aut *Praeservata* cum Scoticis, aut *Sanctificata* cum Thomistis in Conceptione creditur. Certitudinem autem *Praeservationis* quicumque ex eodem Festo invehere vellent, contra mentem ipsius Apostolicae Sedis id faciunt, ac principis innituntur, argumentaque constant, quae si consisterent, jam contradicentes sibi haberemus Romanos Pontifices, qui Quaestionem hanc indecisam atque incertam relinquunt; praetereaque omnes Catholicorum Ecclesias, atque ipsam Romanam, coniceremus in immensas & inextricabiles lites de Festis Sanctorum, de Reliquiis, de Imaginibus, de Breviario, ac de aliis ad eundem Cultum Sanctorum pertinentibus. Quod periculum non satis perspicunt, qui unum sibi negotium statuunt, nempe ut Sancta Sedes Sententiam hanc Piam, atque etiam altera Probabilior, ad Certitudinis gradum evehat. Nam quod est ad gloriam Sanctissimae Virginis, num indiget illa hujusmodi decreto, ut sit supra ceteras meras creaturas beata, benedicta, & invocanda, utpote omnibus Virtutibus, donisque caelestibus ornata, & electa a Deo ad ineffabile Mysterium Incarnationis complendum, & pariendum omnium Salvatorem Christum Dominum? Haec me ostendisse tibi arbitror, a Prudentia Ecclesiae pendere, quaecunque a Revelatione scripta aut tradita haberi non possunt; haec omnia Prudenter ab ea peragi, atque praescribi: quod ad ejus Dignitatem tuendam satis est. Quamvis de veritate Sancti allicujus, aut cujuspiam sacri Corporis, aut de aliis ad eundem Cultum Sanctorum spectantibus, dubitatio insurgere possit: nihil detrimenti ex his in Fidem & immobilem arcem Religionis Catholicae redundat. Contra dicendus est male consulere Apostolicae Sedis Dignitati, ejusque Infallibilitatem in discrimen adducere, quisquis ab ea petit, ab ea sperat sine praevio accurato examine causae, judicium

sive Decretum de Certitudine Piae Sententiae. Jam haec ipsa a tot annis triumphat; una deprædicatur, silentium contrariae Sententiae assertoribus religiose observantibus. Attamen tanta haec pro nihilo habentur, nisi ad Certitudinem, quam sibi fingunt in ea Sententia, accedat Sanctae Romanae Ecclesiae decretum. Nunquid igitur se plus sapere arbitrantur, quam ipsa Sancta Sedes? Jam paene trecenti effluerunt anni, ex quo controversiam hanc ad suum Tribunal advocarunt Romani Pontifices. Nullum ex iis mihi ostendas, qui in promovenda Pietate erga Deiparam cum Praedecessoribus non certarit & certer. Catholici quoque Reges nihil non egerunt, ut lis dirimeretur, spe ducti, immo fiducia certae victoriae. Nihil tamen haecenus impetratum. Cur quæso? nisi quia potentissimae rationes Prudentiam summorum Pontificum ab ejusmodi decreto avertebant. Hae autem adhuc vigent; neque enim novimus antiquis veri similibus rationibus, quae Probabilem efficiunt Piam Sententiam, additum quidpiam grande fuisse postremis hisce temporibus, quo Certa eadem reputanda sit. Credendum pariter est, minime Ecclesiae posse placere, dum tanto favore Piam Sententiam prosequitur, si quisquam hujusmodi favore & libertate sibi relicta, & silentio aliis indicto, abuti velit in dedecus & perniciem ipsius Ecclesiae. His dictis finem loquendi fecit Romanus Abbas. Tum ego rogare, ut mihi chartas illas, in quibus ordo disputationis, & Auctorum verba adducta continebantur, commodaret. Is minime negavit. Inde vero haec ego subcisivis horis expressi, & ad te, amantissime Azevede, scripta volui. Quae tua nunc de hujusmodi contentione sententia sit, nisi mihi significaveris, violata necessitudinis nostrae officia iratus conquerar. Vale.

Neapoli XI. Kal. Aug. MDCCXL.

*Nobili & doctissimo viro D. Gregorio Azevedo Ferdinandus
Valdesius S. P. D.*

EPISTOLA QUINTA.

NON semel ad te scripsi, amantissime Azevede, quo plausu a nonnullis, & vicissim quanto strepitu ab aliis, exceptus fuerit Antonii Lampridii Liber de *Superstitione vitanda*. Egomet (sincere fatebor) dum saepe atque intense illius argumenta expenderem, me tandem ad ejus sententiam adjunxeram; atque uti in eam persuasionem descenderam, adhuc Certitudine carere Sententiam, alioqui Piam, faventem Immaculae Conceptioni, ita mihi firmissime persuasi, minime licere pro illius tutela sanguinem & vitam obligare. Attamen quum ingenii mei viribus parum fidere consueverim, die quadam ad Coenobium S. Mariae Novae me contuli, doctissimum virum Patrem Joannem de Luca rogaturus, ut ediceret, rectene ego cum Lampridio sentirem, an cum illo incaute errarem. Inane iter suscepi. Nuntiavit mihi ex religiosis iis viris quidam, Patrem de Luca jampridem Romanam evolasse; spe, immo fiducia praemii adductum, debiti utique viro, qui tam nervose pro Immaculata Conceptione steterat, nullumque amplius locum controversiae reliquerat. Quod minimum contingere potest, ajebat ille, Episcopalis Cathedra in hisce partibus eum manet; aut aliqua saltem illustri Ecclesia in Infidelium regionibus ei procul dubio regenda tradetur. Omnia piis illis viris gratulatus, ego inde abii, animo tamen recogitans, fieri non posse, quin aliquis, immo plures, Librum Lampridii ad trutinam revocarent, unde mihi lux speranda foret. Jamque ferebantur nonnulli calamum arripuisse: molesto nimis homini diem disturi.

Nihil interea imminutum fuerat de amica consuetudine, seu potius necessitudine, quae inter me, & Abbatem Romanum intercedebat. Proxime igitur praeteritis diebus quum apud eum essem, ita me est alloquutus. Nondumne vidisti Prologum Galeatum Patris de Luca? Tum ego: quidnam ais? Ad haec ille: Nuper in hac Urbe e typis erupit Prologus iste, & quidem adversus Lampridium, Voti Sanguinarij damnatorem. Heic ego: Opusculum istud si tenes, ne
mihi

mihi quaeſo diutius occultum velis. Vix haec dixeram, quum ille mihi obtulit, inquiens. Non Opuſculum, ſed quidem unum chartae folium habeto; tam paucis enim lineis fortaliſs arbitratus eſt Minorita tuus, ſe poſſe non brevem Lampridii Librum deſicere, aut ſaltem aſſectas ſuos continere, ne repente a ſe deficientes in adverſarii Scriptoris opinionem ruant. Quae ibi ſcripta erant, conſeſtim legi. Tunc ad me converſus Romanus Abbas, quid inde collegerim ſciſcitatus eſt. Equidem, ajebam, video, ſubleſtae fidei Lampridium arceſſi, quod in adferendis verbis Bullae ab Alexandro VII. Pontifice promulgatae, ubi agitur de Cultu Virginis ſecundum Piam Sententiam inſtituto, haec praeterierit: *poſt ipſius Cultus inſtitutionem numquam immutato.* Quippe hiſ Pontifex docet, Eccleſiam Romanam numquam Cultum immutaviſſe Conceptionis Deiparae cum, quem Sixtus IV. inſtituerat. Piaculum vero is cenſet omiſiſſe, quae Pontificis mentem in hoc Myſterio colendo, atque adeo Romanae Eccleſiae, hoc eſt Catholicae, reſta-
rentur. Ita ego. At Romanus Abbas. Hujusmodi querela nihil ineptius excogitari poſſe mihi videtur. Anno 1714. Lamindi Pritanii (idem eſt atque Antonius Lampridius) Liber de Ingeniorum moderatione primum prodijt. Anno tantum 1729. Theologicam Diſſertationem eidem Candidus Parthenotimus oppoſuit. Poſt duos deinde aut tres annos Lampridius Librum ſuum de Superſtitione viſanda elucubravijt quidem, uti ego aliique novimus, ſed Anno duntaxat 1740. ſivit ut in lucem prodiret. Anno 1739. typis quoque traditus fuerat Patris de Luca Liber, cujus tamen exemplum Anno tantum 1741. ad Lampridii manus pervenit. Niſi Prophetam velis Lampridium, praevidere is minime potuit, quid ſcripturus, quidve editurus foret Minorita tuus. Et dum is per compendium Alexandrinae Bullae, immo & praecedentium Pontificum ſenſa exhiberet, praefentire nequivijt, quanam Pater de Luca commemoranda aut omittenda juberet. Si noviſſet ejuſdem religioſi viri Librum, ejuſque deſiderium, inſtitutum non dimiſiſſet. Quod certe praetiſtit Lampridius, quaecumque praetermiſiſt, per varia &c. alibi quaerenda designavit. Ubinam heic mala fides? Quod plus eſt, id ipſum agnovit Lampridius per alia ipſius Alexandri verba a ſe repetita, videlicet: *Nos conſiderantes, quod Sancta Romana Eccleſia de intemeratae Virginis Mariae Conceptione Feſtum ſolemniter celebrat, ac ſpeciale ac proprium ſuper hoc officium olim ordinavit juxta piam, devotam, & laudabilem inſtitutionem, quae a Sixto IV. Praedeceſſore noſtro tunc emanavit.* Satis haec indicant, Feſtum Conceptionis a tempore Sixti uſque ad Alexandrum VII. nunquam

quam immutatum. Quare insulsam plane querelam hanc ob causam excitavit Theologus tuus.

Praeterea ineptius est venditare, aliquid emolumenti ex iis verbis accedere Scotisticae Sententiae; jam enim manu longe antea tetigisti, ex institutione ac celebritate Festi secundum Piam Sententiam nihil Certitudinis in eandem Sententiam effluere, aut effluxisse. Parum tamen dixi: addendum est, non aliunde efficacius, quam ex praetermissis verbis demonstrari posse, quantum excedat fidem confidentiae Minoritae, quum ait: *Verba decreti Alexandrini, in quibus columen inesse causae omnes intelligunt, pessima fide Lampridius praetermisit.* Fatetur Pontifex, Cultum Conceptionis secundum Sixti institutionem nunquam fuisse immutatum. Ergo nihil Alexander novavit; adeoque non Alexandri duntaxat, sed Sixti etiam temporibus objectum Festi Conceptionis definitum fuerit necesse est. Proinde illudit orbi Minorita contendens, objectum Festi de Conceptione, uti a Scottis celebratur, tempore tantum Alexandri VII. fuisse declaratum. Hoc idem, vel tacente Alexandro, unusquisque deprehendere potuisset, geminas consulendo Sixti IV. Bullas, hoc est *Cum praecelsa, & Grave nimis.* Atqui Sixtus ipse Cultum illum secundum Piam Sententiam instituens, sive longe antea institutum comprobans, Anathema indixit dicere aut scribere audentibus, *Contrariam sententiam tenentes, videlicet gloriosam Virginem Mariam eum originali Peccato fuisse conceptam, haeresis crimen, vel peccatum incurrere mortale, cum Nondum sit a Romana Ecclesia & Apostolica Sede decisum.* Hoc idem ceteri subsequuti Pontifices, & praesertim Pius V. & demum Alexander VII. concorditer, disertisque verbis repetierunt atque inculcarunt; ipsumque Tridentinum Concilium Sixti IV. decreta innovavit. Itaque rursus habes, uti nihil de Cultu, & objecto Festi immutatum unquam fuit, ita nihil immutatum de geminis contrariis Scholarum sententiis, quibus nihil obstante, Festo sua Probabilitas, sive major, sive minor relicta est tam a Sixto, quam ab Alexandro; liberumque esse unicuique heic sentire, quod propius veritati videatur. Igitur si Alexander nihil immutavit, idem statuens atque Sixtus, protereaque Objectum Festi a Sixto instituti nihil detraxit Thomisticae Opinioni: jam tenes, ab hac ipsa confessione *Cultus numquam immutatus* non juvari, sed jugulari quaecumque argumenta tuus Minorita conflavit. Atque ut luculentius appareat, quam facile is in nubibus aedificet, memineris velim, neque Sixtum, neque ullum ex subsequentis Pontificibus sensisse aut statuisse pro Objecto Festi de Conceptione accipien-

dam

dam esse ab universa Ecclesia *Praeservationem* Virginis. Ii tantum edixerunt, sectatoribus Piae Sententiae in celebrando Conceptionis Festo hoc revera esse objectum Cultus. Pro iis vero duntaxat Missam & Officium Sixtus instituit. Et quum Pius V. ad universam Ecclesiam Officium & Missam, quibus nunc utimur, extendit, ita ea temperavit, ut & contrariae Opinioni adhaerentes sub objecto *Sanctificationis* Festum celebrarent. Nunc ergo accipe quid de hoc Festo senserint magni nominis Theologi. Suarez in 3. p. quaest. 27. art. 2. disput. 3. sect. 6. de Festo Conceptionis in haec verba loquitur: *Addo, neque ex Festi celebritate colligi posse tantam Certitudinem, quantum in alicujus Sancti canonizatione esse solet; quia ipsemet Pontifex, qui hoc Festum approbat, declarat, se solum probare Sententiam illam ut Piam, magisque Probabilem. Quod satis est, ut PIE & sine ullo periculo possis hoc Festum celebrari. Accipe etiam verba Valentiae in 3. Disp. 2. qu. 1. punct. 2. Neque obstat Sixti decretum. Nam quamvis approbat, & proponit Christi Fidelibus Festum, & Officium illud Immaculatae, ut inquit, Conceptionis B. Virginis: tamen non imperat etiam Fidelibus, atque adeo toti Ecclesiae, ut Conceptionis ipsius Festum & Officium eo nomine, quod immaculata & experta omni peccati fuerit, concelebrent; ac proinde minime definit, illam fuisse prorsus Immaculatam &c. Addo verba Vasquii in 3. Quaest. 27. Art. 2. Disp. 117. Cap. 15. Summi Pontifices ita instituerunt celebritatem Conceptionis, & Officium illius approbarunt, ut nihil de Fide Certum de illa definitum esse voluerint: quin potius unicuique integrum esse, quam partem velint amplecti. Ut autem hoc Festum Fidelibus concederetur, sat illis fuit existimare hanc Opinionem Probabiliorem & magis Piam esse; nihil enim damni, multum vero utilitatis Fidelibus ex celebratione hujus Festi, etiamsi in sola Opinione Sanctitas illius posita esset, provenire posse jure existimaverunt. Concors hac de re Theophili Raynaudi judicium me tibi exhibuisse, ut puto, recordaberis.*

Negare nequit commilito tuus, quin ex Decreto Sixti, aliorumque Pontificum, vel ante Alexandrum VII. Objectum Festi Conceptionis definitum declaratumque fuerit, atque illud ex confessione ipsius Alexandri *nunquam immutatum*. Attamen vides, ab eximiis Theologis statui, nihil Certitudinis ex eo Festo consequi in Piam Sententiam potuisse ac posse. Qua ergo Dialectica usus est Franciscanus miles, dum ex eodem Festo miram Certitudinem sententiae suae conciliare contendit; & dum *columen causae* collocat in *Cultu numquam immutato*: quum inde contrarium prorsus eximii Theologi dedu-

ducant? Non ergo ex *Cultu nunquam immutato* juvantur, sed prorsus destruuntur meditamenta alioquin inania Theologi istius, qui tamen religioni sibi non ducit crimen facere Lampridio, quod ejusmodi verba omiserit. Neque dubitandum quin is imaginatione sua deceptus, in parem errorem alios admirabili confidentia sua abduxerit, nam pag. 13. Dissertationis suae ex cathedra pronuntiat: *Hoc tamquam Certum sumendum est, Christianos Omnes, ex Ecclesiae praecepto venerari debere Conceptum Deiparae, non qualemcumque, sed beatissimum illud vitae exordium, quo cum Anima infunderetur in Corpus, Divinae gratiae muneribus ornata est.* Lege ac relege Maximorum Pontificum hac de re Bullas, ac potissimum Alexandrinam. Laudat quilibet Pontifex celebrantes sub hac inspectione Festum Conceptionis, eique Festo ita sumto favorem non unum idem impertiunt; at neminem celebrantium illud Festum ii praecepto obligant ad illud celebrandum secundum Piam Sententiam, neque ad inclinandam mentem in illam. Ipsam quippe Sententiam tantummodo uti Piam ac Probabilem, & si mavis, altera Probabiliorem agnoscunt, & qualis antea erat, relinquunt. I nunc, & fidem habe Theologo tuo. Misera sane Theologia, si complures ex hisce Theologizantibus aleret, qui majori supercilio falsa proponunt, quam qui Veritates Fidei. Sed quale sit doctissimi Minoritae hujus ingenium, nondum satis perspexisti. Perge in legendo. Post inique objectatam Lampridio verborum illorum omissionem, non certe ab eo dissimulatam, quum eam per unum &c. designarit, ita is in eundem Lampridium insurgit. *Non ergo tam facile hujusmodi Auctori esse credendum, cum Diplomata Principum, & Chortas veteres, Antiquitatum videlicet Italicarum investigator diligentissimus, nobis OBTRUDIT; posse nos enim suspicari, eum causae servientem, quam suscepisset, falsa veris miscere, Multaque addere Monumenta antiquis, Multa detrabere, uti libitum fuerit.* Risu haec, ut audiui, a compluribus cordatis viris excepta fuere, quasi ille sibi persuaserit, tam enormi obrectatione quidquam officii posse famae hominis de Republica Literaria bene mereri pergentis. Alii tamen in indignationem eruperunt adversus hunc Theologum, quem mira & indigna Theologo dicacitas in quemque sibi adversantem abripere consuevit. Mihi sat fuerit monere, nulli honesto viro suboriri posse suspicionem de Eruditorum hominum fide, qui dum veterum scripta, diplomata, monumentaque tenebris eripiunt, Bibliothecas, Archiva, aliave loca commemorent, unde ea hausta fuere, ut commodum cuicumque sit, si velint, perspicere, an cum

editis membranae, marmora, numismata, & reliqua consentiant. Quare velim sincere edicas, quo demum nomine dignus sit, qui terribilissimam Impostoris notam Lampridio heic sine ulla iusta causa inurit.

Sed progrediamur, audituri, quid Theologus tuus carpendum rursus deprehenderit. Dixerat Lampridius minime interdictum fuisse ab Alexandro VII. Pontifice celebrare Festum Conceptionis Virginiae sub consideratione *Sanctificationis*; proptereaque licere. Ad haec Minorita respondet, manifestum esse, *Ecclesiam Romanam immunem colere ab originis labe Deiparam Virginem*, idque *Alexandrum verbis clarissimis docuisse*; neque *Populo Christiano optionem fecisse, utrum Virginis mallet immunitatem, an a peccato expiationem celebrare: quod in re seria cavillando ostentare Lampridium detestabile est*. Tum mitius agens, auctor est eidem Lampridio, ut exemplum Matris optima imitetur, seque ejusdem Filium prodat, Cultum ab ea propositum tuendo. Ita ille, non ausus quidem ostendere, hac de re esse praeceptum Alexandri Pontificis, sed tantum contendens, ex quo Ecclesia Romana *Mysterium celebrat juxta Sixti institutionem, hoc & facere debere Ecclesiae filios, eosque alio modo vetari Mysterium colere*. Equidem, aiebat heic Romanus Abbas, ne quid te celem Lampridium intime novi, utpote illius familiaritate aliquando usus. Is vero Festum Conceptionis Marianae celebrat, quemadmodum Ecclesia Romana celebrare consuevit, scilicet ejus Festi objectum, qualecumque sit, certe ad Honorem Virginis excogitatum, veneratur. Quare nihil erat, cur Pater de Luca consilium praeceptumque suum interponeret, ut Lampridium ad ejusmodi officium adduceret. Sed finge etiam tibi Lampridium subintellecto *Sanctificationis* nomine celebrantem Conceptionis Festum, quid inde obsecro exculpere poteris? Num quod religiosus idem vir nuper expetebat, videlicet esse Filiorum sequi exemplum Matris, atque hocce exemplo vetari Fideles *alio modo Mysterium colere*? Sed fallitur, seu potius fallit nos Theologus tuus. Desinuntne esse Filii obsequentes Romanae Ecclesiae tot Thomistae, alii, quibus *Sanctificationis* potius, quam *Præservationis* sententia arridet? Veritati adversetur, qui hoc affirmet. Liberum enim eis reliquit Sancta Sedes ita sentire, eosdemque ita sentientes non minus quam alios pios viros Filiorum loco habet. Si id eis liberum, liberum quoque sit necesse est celebrare Conceptionis Festum ad suae Opinionis normam, hoc est sub consideratione *Sanctificationis*; præcipitque tantummodo Pontifex pacis causa, ne quidquam proferant, aut hiscant contra Piam Sententiam, neque Festum *juxta Sixti in-*
stitu-

firuſionem ab aliis celebratum voce aut ſcriptis impugnare, aut afferere ſub *Sanctificationis* nomine celebrandum, audeant. Jam tibi in aliis colloquiis oſtendi, id unum agere Patrem de Luca, ut omnium oculis Imprudentes exhibeat Romanos Pontifices, dum Thomiſticam Opinioneſ intactam volunt, & controverſiam de Conceptione Virginis indeciſam conceptis verbis relinquunt; & contra eodem tempore, eademque Conſtitutione, ſi docto huic viro habenda eſt fides, inſtituendo aut confirmando Feſtum, Piam Sententiam effecere Certam, atque ea *Cerritudine*, cui *Falſum ſubeſſe nequeat*. Eandem nunc ei Imprudentiam aſſingit, dum fateri cogitur, non vetari Thomiſtas ſuae adhaerere Sententiae, & nihilominus in celebrando Conceptionis Feſto eos juberi adhaerere Contrariae. En quo collineent Theologi hujus effata: in dedecus videlicet Apoſtolicæ Sedis. Uti nuper vidimus, Laudat Alexander Pontifex, & favore non uno proſequitur colentes Deiparam ſub nomine *Immunitatis*, Piamque hanc Sententiam, ac Feſtum ad id ſignificandum aliquot ante Saecula inſtitutum; pioſque Chriſti Fideles ſub ea conſideratione illud celebrantes, ab aliter ſentientibus & celebrantibus turbari quoquo modo vetat. Ceterum illos, qui diverſam tuentur Opinioneſ, & in Conceptionis Feſto celebrando Virginis *Sanctificationem* ſuae conformem Opinioni, venerantur: nullo verbo cohibet, proptereaſque in ſuo ſenſu abundare ſinit. Quare cernis, Romanorum Pontificum mentem ab iſto Theologo perverti, atque in eorum converti opprobrium, ſemperque ipſum ſuper ruinoſa fundamenta fabricari.

Dixerat Lampridius: *Eſſi aliquando Thomiſtica ſententia ad Fidem ſpectare ſtatueretur (hoc autem Poſſibile nemo neget) attamen ita res compoſita eſt, ut adhuc illud Feſtum in ſuo vigore una cum ſuo Officio ac Indulgentiis conſervandum foret.* Quid heic Pater de Luca? *Ridiculum*, ait, *in hac tanta celebritate hujus Myſterii, Opinioniſ aſſiſtæ, quam Thomiſticam vocas, definitionem excogitare.* Nimium facile ridet Theologus iſte, neque animadvertit, quid heic ille rideat. Non veriſimile, ut iſte ſibi fingit, ſed *Poſſibile* tantummodo hoc Lampridius ait. Si res adhuc Incerta reſtat, ſi de ea judicium ſibi Sedes Apoſtolica reſervavit, ſi nihil aliud in Pia Sententia niſi Apparentiam Veritatis & Pietatis deprehendit: num eidem Theologus iſte facultatem omnino auferre poterit pronunciandi pro *Sanctificatione* Virginis, ſi eam forte agnoſceret magis conſentaneam divinis Scripturis ac Traditioni? At ille ſubdit: Quum Sixtus IV. Immunitatem colentibus Indulgentias attribuerit, ſi eorum ſententia proſcriberetur,

retur, *foventne conservandae iis Indulgentiae, qui damnatam jam baeresim publice profiterentur?* Vide quaeso, quam belle nodum in scirpo quaerat ingeniosus iste vir, ut Lampridium veluti mente captum exhibeat. Haec ejus sententia est. Si Thomistica Sententia unquam victrix evaderet (quod duntaxat ut Possibile proponitur) Conceptionis Festus dies adhuc celebrandus foret, subintellecta *Sanctificatione*, quemadmodum nunc sit a foventibus Opinionem Thomisticam, & quae nunc Indulgentiae *Immunitati* tribuuntur, tunc *Sanctificationi* Virginis, uti verisimile videtur, tribuerentur; neque ullam propterea opus foret invehere mutationem in Missam, atque in horas Canonicas. Sed larvas excogitat felix ille Theologus tuus, ne desit pugnae & contumeliis locus. Alterum is deinde certamen intrat, atque Lampridium ridet, quod inter Festos dies, quorum objectum sit divina fide credendum, *Nativitatem* quoque *Virginis* recensuerit. Nullum, inquit ille. *Concilium, Pontifex nullus Nativitatem Deiparae Sanctam fuisse definivit. Id non liber divinus, non Patres antiqui tradiderunt.* At tu animadvertas velim, quantum antiquitatis sit Festo Nativitatis Marianae. Circiter Annum Aerae nostrae 690. Anastasio teste Sergius I. summus Pontifex constituit, ut diebus *Annuntiationis Domini, Nativitatis, & Dormitionis Sanctae Dei Genitricis &c. Litaniae exeat a Sancto Adriano &c.* Non tunc, sed longe antea institutum fuisse Festum illum diem, hinc discimus. Eiusdem quoque memoria est in Sacramentario Sancti Gregorii M. Papae, & in altero antiquiore, quod venerabilis Cardinalis Thomasius publici juris fecit, ac Gelasianum est opinatus. Utrobique cultus ille dies dicitur, *quo Felix Dominae Sanctae Mariae inchoata Nativitas*. Si Felix, ergo vel antiquissimis Saeculis Sancta habebatur Nativitas Virginis, & Mariam *Sanctificationem*, antequam nasceretur, credebatur Ecclesia. Ad haec Lib. IV. Cap. 122. Op. imperf. Julianus Pelagianus haec S. Augustino opponerebat: *Jovinianus Virginitatem Mariae partus conditione dissolvit: tu ipsam Mariam Diabolo nascendi conditione transcribis.* Id est: ille Mariam in pariendo Christo virginitate exutam voluit: tu vero Mariam, quum nasceretur, Diabolo obnoxiam facis, originali nempe macula deformem. Quid Augustinus ad haec? *Non transcribimus, ait, Diabolo Mariam conditione nascendi: sed ideo quia ipsa conditio voluitur gratia nascendi.* Obscura haec fateor; attamen nihil aliud inde colligi posse, mecum, ut spero, tu quoque senties; scilicet *Sanctificationem* in utero matris fuisse Mariam. Jam adnotaverat Lampridius pag. 187. in sacris Literis interdum significari *Conceptionem* sub nomine

nomine *Nativitatis*, adductis etiam Sancti Augustini verbis ex Enarrat. in Psalm. LVII. num. V. ubi explicat ex Matthaei Evangelio Angelum dicentem: *Quod enim natum est in te* (idest conceptum) *de Spiritu Sancto est*. Consentientem heic habemus ipsum Patrem de Luca pag. 68. sui Libri, atque ex ipsomet Augustini loco nuper memorato Operis Imperf. deducentem Conceptionis Virgineae *Immunitatem*. Verum non ea unquam mens Augustino esse potuit, sed quidem *Sanctificatam* fuisse Virginem Dei Matrem futuram. Quid scripserit Augustinus contra Julianum Lib. V. Cap. 14. primo videamus. In nullo hominum agnoscebat Julianus originale Peccatum, quod Christus Dominus (illius certe expers) dicatur tamen *missus in similitudinem carnis Peccati*. Nemo autem divinarum rerum peritus est, qui nesciat, nomine *Carnis Peccati* significari idem originis Peccatum. At Augustinus ex hoc ipso ostendebat, deprehendi in omnibus hominibus *Carnem Peccati*, uno excepto Christo, quod is non ex humano semine, sed superveniente Spiritu Sancto fuerit conceptus. Propterea is respondebat: *Sine dubio Caro Christi non est Caro Peccati, sed similis Carni Peccati: quid restat ut intelligamus, nisi ea excepta Omnem reliquam humanam Carnem esse Peccati? Ex hinc apparet, illam Concupiscentiam, per quam Christus concipi noluit, secisse in genere humano propaginem Mali* (idest maculae, sive culpae originalis) *quia Mariae Corpus, quamvis inde venerit* (hoc est concepta fuerit ex Concupiscentia, ideoque originis labem contraxerit) *tamen eam non trajecit in Corpus, quod non inde concepit* (videlicet in Christum, qui sine Concupiscentia, & sine virili concursu conceptus fuit) *Ceterum Corpus Christi inde dictum esse in similitudine Carnis Peccati, quia Omnis alia hominum Caro Peccati est*.

Quid heic Pelagii hyperaspistes Julianus, dum eisdem Augustini Libris novos & ipse Libros opponeret? Eum scilicet incusat, quod originis culpam ad omnes extendens, *ipsam Mariam* Diabolo obnoxiam fecerit, dum ipsam quoque eadem labe infectam disertis verbis pronuntiavit. Insurgit heic Augustinus, & ait: *Non transferibimus Diabolo Mariam conditione nascendi; sed ideo, quia ipsa conditio solvitur gratia renascendi*. Idest statuimus profecto, ne Mariam quidem immunem fuisse a reliquorum hominum Conditione; sed ipsa non diu fuit Diabolo obnoxia, quia conditio illius, sive Servitus, per divinam *Gratiam* soluta sublataque fuit. Quum dicit *gratiam renascendi*, procul dubio praecedentem indicat *conditionem nascendi*: quod idem est ac dicere: Concepta fuit in Servitute Peccati, sed per supervenientem Gra-

Gratiam renata, hoc est reconcepta fuit, atque a Servitute soluta: quemadmodum ceteri homines dicuntur nasci quidem Peccatores, sed per Gratiam Baptismatis renascuntur Justi. Eadem ratione infra eod. Lib. IV. Cap. 134. inquit: *Jeremias & Johannes, quamvis sanctificati in utero matrum, traxerunt tamen originale Peccatum.* Hinc est, quod Sanctus Hildephonsus (nisi is sit Palchafius Ratbertus) in Libro de Virginit. Mariae ipsam *in utero sanctificatam* agnoscit; Teste quoque Sancto Petro Damiani in Serm. 23. de Nativit. S. Joann. Baptistaе, *nulla est ambiguitas, quin Virgo singularis, maternis circumsepta visceribus, sublimiori Sanctificationis genere Mundata sis.* Sanctus vero Bernardus, ut complures Theologi jamdiu animadverterunt, in Serm. II. de Assumpt. B. Mariae n. 8. de Deipara loquens ait: *Quod si originalem a parentibus maculam traxit; sed minus a Jeremia sanctificatam in utero, aut non magis a Johanne Spiritu Sancto repletam credere prohibet Pietas Christiana; nec enim festis laudibus nascens honoraretur, si non Sancta nasceretur.* Postremo cum omnimodis constet, ab originali contagio sola Gratia Mundatam esse Mariam, quippe cum & nunc in Baptismate sola hanc maculam lavet Gratia &c. Certe excogitare. non possunt plerique Theologorum, priorum Saeculorum Ecclesiam, quae tot laudibus extulit, tot praerogativis divinitus donatam censuit Sanctissimam Virginem, reputasse illius Nativitatem inferiorem Nativitate Jeremiae, aut Joannis Baptistaе; ac propterea credendum ajunt, ideo Festum illud institutum, quod Sanctam ejus Nativitatem unusquisque agnosceret. Idem quoque colligi posse videtur ex loco Sancti Joannis Damasceni in encomio Nativitatis Sanctissimae Virginis, quem pro se laudare solent Piae Sententiae patroni, quasi illic de Conceptione agatur. Satis autem haec reor, ut intelligas, *Sanctitatem* Nativitatis Marianae niti gravissima antiquitate Traditionis. Atque utinam paria de Conceptione quoque adferre possemus. Nihilominus finge etiam tibi, quod idem Theologus Lampridio objicit, hoc est nullo divini Libri, nullo antiquae Traditionis praesidio Festum Nativitatis Marianae fulciri: quidnam quaesio inde consequitur? Nihil aliud, nisi institutum fuisse Festum illum diem ex Probabili tantum ac Pia consideratione praestantiae, quam in Deipara omnes suspicimus; atque adeo illius Festi Objectum non ad Fidem pertinere, sed tantummodo ad Probabilem Pietatem, quemadmodum etiam pertinet Festus dies Conceptionis, alique Festi dies complures. Ludit enim Minorita, quum scribit, si *Nativitatem* Virginis a *Conceptione* sejungimus, nos non habere, unde Sanctam fuisse possimus ostendere. Sancti.

ificatam in utero matris Mariam nullus veterum negavit, & aliquot etiam agnoscunt: id satis est ut Sancta appellanda sit illius Nativitas. Utinam (repetere liceat) paria de *Praeservatione* Virginis dicere possemus, quum nullus Veterum agnovit, & aliqui etiam negasse videntur. Proinde, ut alios Theologos omittam, Valentia T. IV. Disp. II. quaest. I. p. 1. conclusionem hanc statuit, scilicet *B. Virginem fuisse sanctificatam ante ipsius Nativitatem, est certa omnino sententia in Ecclesia, ita ut absque Errore non possit negari.* Atque hoc ille decernit, nullo ad Virginis Conceptionem habito respectu.

Ceterum an parvus sit injuriarum Theologus iste, amice vir, mecum intueri. In tam angusto Praefationis campo Lampridium ille, ut vidimus, veluti Impostorem traducit. Deinde *Pejora, & ab infciritia profecta* appellat, quae sui Operis pag. 60. Lampridius habet. Eum rei Theologicae non valde peritum, ne mediocriter quidem in palaestra Theologiae exercitatum dicitur. Quod gravius est, subdit, Lampridium, ut Sanguinarium Votum oppugnaret, *non peperisse* *Mysterio Conceptionis innocuae, non ipsi Festo, non Pontificis Bullae, quam depravare modestissimus homo, & Ecclesiae Romanae reverentissimus non dubitavit.* Praeterea Lampridius *Opinionem sepultam poene ab Inferis excitavit*, hoc est Thomisticam: quod sane in gravem, non dicam Lampridii, sed Romanae Ecclesiae injuriam cedit, quae Sancti Thomae hac in re sectatores caros habet, & favore continuato prosequitur. Praetereaque id injuste Lampridio obijcitur, qui Opinionem Sanctificationis minime proficitur, neque alteri praefert, sed eo duntaxat intentus fuit, ut Scotisticam, quam semper Piam ac Probabilem agnovit, ostenderet *Certitudine* carere: qua certe sublata Votum Sanguinarium neque concipere, neque observare licet. Addit, usum fuisse Lampridium *obsoletis argumentis, quae contra legem Alexandri Pontificis insoluta reliquit; nec id solum, sed etiam solvi non posse judicavit, qua ille re mentitus inepte est.* Ita ille. Si argumenta insoluta is appellat loca Sanctorum Patrum a Lampridio adducta, ac nota antea apud ipsius Piae Sententiae patronos, certe Lampridius simul pag. 104. rationem tradidit, per quam patroni praedicti eadem dicta cum sua Sententia conciliare nituntur, admissio nempe *Debito* originalis culpa, culpa vero a Virgine exclusa, ita ut nesciam, quo nomine dignus sit Theologus Lampridium venditans quasi judicantem, argumenta illa *solvi non posse* a Piae Sententiae patronis. Certe non illa produxit Lampridius, ut eadem Piae Sententiae opponeret, sed ut intemperantiam illorum cohiberet, qui non solum a Deipara *Debitum* ori-

ginalis labis auferunt, sed etiam vitam obligant pro tuenda imaginaria Immunitate Virginis ab ejusmodi *Debito*: quod summum redolet contentum Sanctorum Patrum, & innumerabilem Theologorum secus sentientium; Ecclesiae vero ac Reipublicae interest in examen adduci quascunque perniciosas Opiniones effrenata Ingenia invchere in Ecclesiam Dei identidem audent.

Silentium heic ego fregi, inquires: Ut audivi, Immunitatem quidem Virginis Minoritae fortiter tuentur, at a Voto Sanguinario abstinere. Ipsemet Pater de Luca hac in re concors fortasse cum Lampridio procedit; illud enim appellat *nescio quod Votum Sanguinarium*: tum subdit: *potuisse illud Votum sanguinolentum sine illis fraudibus oppugnari*. Nondum tamen hujusmodi fraudes pugil tuus in Lampridio ostendit, regerebat Romanus Abbas. Contra, qua sinceritate ille agat, animadverte. Nam is probe novit, non alia ratione Sanguinarii Voti vitium patefieri posse, nisi demonstrando, *Certitudinem* desiderari in Pia Sententia. Quei ergo scribit, aliter Votum illud oppugnari potuisse? Rursus idem novit, se statuisse, Ecclesiam *errare non posse* in decernendo Objecto Festi Conceptionis, ac propterea *Certam* evasisse Piam Sententiam, atque adeo Certam, ut ei *subesse error non possit*. Hoc posito (fallaci tamen) principio, in tuto est Sanguinarium Votum. Et nihilo secius illud posse aliter oppugnari Minorita fingit. Hisce ludibriis an tu plaudere velis, edicito tandem. Ad haec ego: Animadverte, Patrem de Luca minime aperte dicere, Piam sententiam ex Bulla Alexandri migrasse in articulum Fidei, sed quidem Certam evasisse; contrariam vero non is *impiam* aut *haereticam* appellat, sed quidem *erroneam & falsam*. Atqui vitam dare non licet nisi pro Dogmatis ad Fidem pertinentibus; ac propterea ex ejus doctrina minime consequitur Sanguinarii Voti innocentia. Jam tibi, ait Romanus, alias significavi, heic etiam latere ludibrium. Qui enim Votum illud concipiunt, Minoritam tuam hisce verbis aggredi possunt: Admodum Reverende Pater, jam Paternitas vestra evidentissime ostendit, *Ecclesiam errare non posse*, ubi cultum praescribit Religiosum, simulque Alexandrum Pontificem ex Cathedra definiisse *Objectum Festi Conceptionis*: sit nobis venia: cur deinde negatis, ad Dogmata Fidei spectare Immunitatem Virginis, neque *haereticam & impiam* contrariam appellare sententiam auderis? Certe inconcussum hoc ex iis, quae posuistis, efformatur argumentum: *Ad Fidem spectat, quidquid Ecclesia decernit in rebus, in quibus ab errore immunis est. At ipsa objectum Festi Conceptionis solemniter definiit, idest Immunitatem*

tatem

tatem Mariae ab originali noxa. Ergo Immunitas Virginis ad Fidem spectat. Non minoris evidentiae Metaphysicae ac necessitatis consequens istud est, quam quum dicimus: Omnis homo est Animal rationale. Petrus est homo. Ergo Petrus est Animal rationale. Hinc autem a sapientia vestra adinventis, ac firmissime stabilitis, quid est quod quasi per contemptum Nescio quod Votum Sanguinarium nostrum appellatis, illudque oppugnari posse fateamini?

Dum Theologus tuus responsum parat, memineris puto, quam fallaci doctrina usus ille fuerit, dum ex Festo Conceptionis ineluctabilem Piae sententiae *Certitudinem* elicere se posse est arbitratus, & quam inani labore uti *falsam* atque *erroneam* propterea traduxerit Opinionem contrariam. Jam & nunc vides, secundum Logicales regulas: *Nihil probare, qui nimium probat*; ipsumque illudere orbi, dum fingit, se pro *falsa* & *erronea* habere Thomistarum sententiam, quum conscius sibi sit, ex praemissis se eam depraedicare velle uti *impiam* atque *haereticam*. Ceterum aliis decernendum relinquo, an Theologus tuus praetergressus fuerit fines a Pio V. P. M. positos, dum praecipit, ut *neutra pars hujus quaestionis veluti Erronea praedicetur*, addens etiam: *Cum Sancta Romana Ecclesia, omnium Ecclesiarum Magistra & doctrinae disciplinae, de ea controversia hucusque non definierit: nemo ABSQUE TEMERITATE praedjudicare, vel alterius partis sententiam Damnae potest*. Tanti Pontificis decretum in hac parte ne uno quidem verbo revocavit Alexander VII. Immo is *innovavit* Gregorii XV. Constitutionem, ubi confirmantur quaecunque Sanctus Pontifex Pius praescripserat. Quae hinc sequantur perpende. Sancti quoque Pii tempore objectum Festi celebrantibus illud secundum Piam Sententiam erat Immunitas Virginis a labe originali. Hoc testatur Alexander VII. hoc voce grandi clamat Minorita. Attamen Pius statuit, neutri parti licere contrariam Sententiam *Erroris* arguere, & *absque Temeritate damnari* non posse alterutram ex iis Opinionibus. Contra Theologus tuus nihil non agit, ut ostendat, ex objecto Festi effluere Certitudinem Piae Sententiae, atque hanc ex iis rebus esse, in quibus Ecclesia errare non potest. Dic ergo tandem, cuinam fides habenda sit, tantone Pontifici, an Theologo isti, contra Pontificium decretum alterius partis sententiam *erroneam* & *falsam* imperterritè pronuncianti atque damnnanti? Sed antequam finem faciamus, animadvertas etiam velim, quam urbane Praefationem suam ille concluserit. *Ridiculus vero, inquit, est adversarius, si, cum ipse ad certamen provocaverit, eo genere armorum uti me nolis, quae ad hanc pugnam*

utilissima esse, & ad rem conficiendam prope sola valere doctissimus quisque existimavit. Ad hominis ingenium uberius dignoscendum hoc deerat. Nunquam Lampridio, quum sua literis mandabat, in mentem venit, se *adversarium* habiturum esse Theologum istum, quem ne de nomine quidem noverat, & cujus ignotum sibi Librum edendum divinare nunquam poterat. Praeterea non Lampridius, non alius quisquam Librorum Auctor tam sui oblitus est, ut ceteris interditi putet adversari sibi, quum eodem jure, quo quilibet Auctor fruitur, fruantur & alii. Attamen quasi cadere in Lampridium dementia haec possit, in irrisiorem illius confidentissime descendit. Aedepol si is putat, nihil aliud negotii sibi esse, nisi grandi boatu, miroque contemptu cujuscumque sibi adversantis, male digesta argumenta effundere, & pro solidis rationibus injurias proximo suo identidem rependere: vereor ne is fallatur, atque ne id pugnandi genus sapientioribus videatur, aliam plane a Theologo artem exercere: His dictis alio conversa est oratio nostra; te vero, Azevede amantissime, de rebus quae heic acciderunt, certiores volui. Vale.

Neapoli XIII. Kal. Aug. MDCCXLI.

Eruditissimo viro D. Gregorio de Azevedo Ferdinandus Valdesius S.P.

EPISTOLA SEXTA.



TRES Epistolas Italica Lingua ad Antonium Lampridium, idest adversus illum scriptas, typisque Panormitanis traditas, nuper mihi comparavi, ut ad te, doctissime Azevede quum se offeret occasio, mittam. Earum Auctor fertur Religiosi cujusdam insignis Ordinis alumnus juvenis, & quamquam vel senio confectus foret, juvenem, uti ostendam, ipsa illius meditationum produunt. Jam pluries animadverteris (ajebat mihi Romanus Abbas de hisce Epistolis agens) quantum tumoris secum adducant e Schola Philosophica & Theologica egressi Discipuli, vivido alioquin ingenio praediti, eoque magis e Cathedra erumpentes Magistri, in umbratili circulatorum pugna diu exercitati. Nulla quaestio, nullus nodus occurrit, cui dissolvendo se pares non putent. Et quidni? quum scibile cerebro suo se complecti placida adulatione sui arbitrentur, suisque syllogismis & Enthymematibus

tis turbare quoscunque adversarios, aut terrere tandiu didicerint. Verum quod saepe contingit, e Scholis minime refertur eximium illud prae ceteris emolumentum, amor nempe & criterium Veritatis. Eis pro Veritate est, quidquid a Magistris acceperunt, quidquid factio proficitur. Pro istis veluti pro aris & focis pugnandum censent, ea persuasione ducti, nihil certius, aut saltem veri similis nihil, aliunde esse expectandum. Jam judicant, inepti propterea non raro ad melius judicandum. Quum vero de Theologicis rebus controversiae quaedam sese offerunt, ad rectum Veritatis examen quam multa in iis desiderantur, utinam non quotidie perspiceremus. Suis certe laudibus minime fraudanda est Theologia Scholastica. Verum non ibi sita est omnium Veritatum fodina. Ad Theologicas Quaestiones adhibenda plerumque est Historia Ecclesiastica, Dogmatica & Polemica Theologia, immo & Ars Critica. Ejusmodi subditiis ubi sit destitutus Theologus, atque una sua Scholastica doctrina armatus in aciem prodeat, ad digladiandum cum nubibus, quam ad res abstrusas illustrandas aptiorem se prodit. Cur in postremo agmine isto collocandus mihi videatur juvenis iste Theologus, trium Epistolarum Auctor, paucis, si potero, indicabo. Ita Abbas Romanus, qui deinde sumto in manus Opusculo illo ita loqui perrexit.

Exordium pugnae is pag. 3. facit inquires, se in Lampridii Libro offendisse *certi tratti di penna fanatica*. Non leve accusationis genus. Sed cedo loca, cedo tabulas, five rationes. Nihil ille profert, immo neque proferre potest. Fatendum tamen est, eum postea ad modestiam plane compositum profiteri, se non malevolo animo, sed *sola discendi cupiditate*, quosdam Lampridio proponere difficultates. Quatenam istae sint, audiamus. Quum Lampridius pag. 56. tria memorarit *Certitudinis* genera, nempe primam *Fidei Divinae*, alteram *Objectivam*, tertiam *Persuasionis*: insurgit juvenis Theologus inquires, se quum Logicae operam daret, didicisse, tria dari Certitudinis genera, nempe *Moralem*, *Physicam*, & *Metaphysicam*. Tum quasi Theses ex Cathedra defenderet, singula ex hisce generibus explicanda sumit, & Lampridium nescio an ad ferulam poscat, quasi haec ille ignoret, & quod inter *Certitudinem Persuasionis*, & *Opinionem* discrimen excogitarit, inquires, eum *surpiter in limine quaestionis* caespitasse. Acutissime profecto. At si quando mihi contingeret, ut accusatorem hunc alloqui possem, libenter ei in aurem dicerem: Juvenis Theologae, quibus oculis aliena legit Reverentia vestra? Haec scribit Lampridius eadem pag. 56. de *Certitudine Objectiva* loquens: *Ejusmodi*

Certitudinem in compluribus, immo & innumeris tam Physicis, & Metaphysicis, quam Moralibus notionibus reperimus; atque haec Evidentia Intellectum tanta efficacia determinat &c. Quicumque Latinae Linguae, & Logicae compos est, heic habet *Certitudinem Obiectivam*, quae videlicet ex Evidentia, sive Certitudine Obiecti procedit, genus esse, in tres species subinde divisum. Si *Physicum* est Obiectum, *Certitudo Physica* inde exsurgit. Si *Metaphysicum*, aut *Morale*, par etiam Certitudo inde nomen accipit. Praeterea idem Lampridius pag. 59. multisque aliis in locis haec tres species *Certitudinis* agnoscens, Cardenae, aliisque sese opponit contententibus, Scotisticam sententiam ascendisse ad statum *Certitudinis Moralis, Physicae, & Metaphysicae*. Quare luditne, an serio agit Reverentia vestra, quum talia scribit? Gravius etiam impingit Reverentia vestra, dum amplecti nolle videtur *Certitudinem Subiectivam*, quod eam in Schola sua non didicerit, quum illam tamen aliae tradant, sitam nempe non in Obiecto, sed in Intellectu, ac propterea appellandam non immerito *Certitudinem Persuasionis*. Haec autem in Philosophicis ac Theologicis quaestionibus saepissime occurrit, quum non ex intrinseca Veritate Obiecti cognita, sed ex rationibus a nobis excogitatis, ita nobis persuademus, aliquid Verum Certumve esse, ut falli nos minime posse credamus. Inter *Opinionem*, quacum semper comes procedit formido Erroris, & *Certitudinem* hanc Persuasionis, discrimen aliquod intercedat oportet. Itaque caveat Reverentia vestra, ne ferere cavillationes, aut nugas agere, dum haec objicit, videatur.

Dixerat Lampridius pag. 59. suiue dicti rationes attulerat: *deliria esse piae phantasiae asserta Cardenae, neque eum de temeritatis culpa excusari posse, dum Scotisticae sententiae Certitudinem tribuit Moralem, Physicam, Metaphysicam &c.* Quid heic juvenis Theologus? Aut, inquit pag. 5. Lampridius significare vult, *imprudenter* solum ac *stulte* dubitari posse, verane sit, an falsa Scotistarum de hoc Mystério doctrina: & tunc ei assentitur. Sin significat, *rationabili dubitationi falsitatis* de eadem doctrina locum amplius superesse: tunc *Temerarii* nomen apud Contradictores minime effugiet. Ita ille, postea subdens, sibi in mentem venire phantasticum illum virum, qui proxime praeterito Saeculo scriptum reliquit, nunquam *Franciscum I. Galliarum Regem* captum in praelio fuisse a *Carolo V. Augusto*, sperans, post annos centum & ultra quemquam adeo dementem futurum, ut sua auctoritate delusus ea de re dubitet. Si non aliunde, certe ex has una perquam peregrina eruditione mirandum juvenis

Theo-

Theologi ingenium colligere poteris; neque enim felicius pedi elegans calceus aptatur, quam paritas Captivitatis illius & Piae Sententiae. Quod solum me angit, non Lampridio duntaxat *Temeritatis* notam inurit juvenis iste Theologus, sed universis etiam contrariae Opinionis sectatoribus, qui doctrina, pietate, ac sapientia Lampridio praestant, neque aliter quam ipse Lampridius judicant a Pia Sententia abesse Certitudinem, ac Prudenter de ea dubitant: quod nisi stultus de captivitate Regis Francisci dicat. Immo in ipsos etiam Pontifices Maximos haec Theologi juvenis censura cadit, quando post tot Saecula controversiam hanc vigere sinunt, neque dirimunt, quanquam precibus Regum fatigati; & contrariam Opinionem sectari unicuique liberum sinunt, eamque damnari & impugnari vetant. Nonne & illi aperte ostendunt, se Prudenti Dubitationi Piam Sententiam adhuc obnoxiam credere: quod quoties non crederent, jam pro ea judicassent? Grande solatium profecto habiturus est Lampridius, dum non se unum, sed simul Romanos Pontifices *Temeritatis* nota inultos considerat.

Sed exerat tandem juvenis Theologus inconcussas illas rationes, unde Certa, aequae atque Regis illius Captivitas, ostendatur Pia Sententia, ita ut in dubitantem de illius Certitudine *Temeritatis* culpa conjici possit. Quod in primis animadversione dignum est; is Cardenam deferit, *omnes* ab eo decantatas *Certitudines* tueri nolens; sed sibi tantummodo demonstrandum proponit, *Virginis Praeservationem ab omni culpa* esse Objectum Festi Conceptionis Marianae; ex eo autem Festo evidenter colligi Certitudinem Mysterii, sive Sententiae Scotisticae. Hanc in rem (prae modestia puto) non suis, sed famosi Patris de Luca armis est usus, adferens quae ille commentatus est in Bullam Alexandri VII. ut ex definito Objecto Festi Conceptionis exculperet, Piam Sententiam ad ejus Certitudinis gradum conscendisse, *cui error subesse non possit*. Ita ille, solidis Suarii, Vasquii, Valentiae, & Raynaudi argumentis straminea praeponens nuperi Scriptoris. Verum ego nuper, atque in aliis praecedentibus colloquiis, me prorsus evicisse confido, nihil Certitudinis per Bullam Alexandrinam additum Scotisticae sententiae, nihil Probabilitatis e Thomistica fuisse detractum. Attamen audiendus est juvenis Theologus, scribens pag. 9. *Postquam Pontifex Cultum Conceptionis secundum Piam sententiam definivit, sive confirmavit, eumque Licitum, Lampridio farente, agnovit: hoc unum manifeste destruit Cultum Conceptionis sub nomine Sanctificationis*. Sed nihil heic pugnae, nihil contradictionis. Quia adhuc

adhuc lis pendet, & utrique sententiae de Conceptione Virginis locus in Ecclesia dei relinquitur, quanquam tuenti *Sanctificationem* Virginis silentium fuerit indictum: uterque etiam modus colendae Deiparae Pius est & licitus, Sententiarum nempe qualitati conformis. Nullus autem Pontificum haecenus omnes Christi fideles adegit ad Cultum tantummodo Scotisticum, quem certe ii laudant, eique favorem impertiunt, sed minime interea improbant Thomistarum Cultum, uti neque Sententiam. Si quando controversia dirimetur, tunc unus Cultus licebit, tunc omnes eadem ratione Festum Conceptionis celebrabunt.

Jam vidisti, quantopere nasum corrugarit P. de Luca ad ea Lampridii verba: *Si Thomistica sententia ad Fidem spectare statueretur: attamen res ita composita est, ut adhuc illud Festum in suo vigore una cum suo Officio ac Indulgentiis conservandum foret.* Non solus Minorita, sed & nunc Theologus juvenis, se haec minime concoquere posse ajunt, nisi potius simulant. Num Sententia Scotistica pergeret adhuc esse Pia? Num Indulgentiae secundum illam attributae perderent? Nequaquam sane. Abscedant argutiae quaeso. Nemo est, qui non videat, Lampridii mentem (repetere ideam cogor) hanc esse. Ubi Sedes Apostolica pro *Sanctificationis* sententia pronuntiaret, tunc sub consideratione ipsius *Sanctificationis* celebraretur Festum Conceptionis, & nihil in Missa, nihil in Officio immutandum foret, iisdemque Indulgentiis sacratu ille dies, si sanctae Sedi placeret, ornaretur. Decretum hujusmodi *possibile esse* Parthenotimus pag. 55. agnovit, sed juvenis Theologus negat pag. 10. Minoritae hanc in rem verba adducens, hoc est: *Si Ecclesia Opinionem hanc tuam definiret, eo ipso declararet, sese olim errasse, cum Deiparae immunitatem publico honore est prosecuta. Atqui Ecclesiam in hoc errare non posse invictis argumentis probatum est. Praeterea ex Opinionis tuae definitione consequens esset, qui Piam sententiam deinceps teneret, cum Haeticum esse dicendum. Atqui hoc dicere judicavit erroneum Sixtus IV. &c.* Sed qui ista comminiscitur, necesse est uno tantum oculo, eoque infirmo utatur. Nam si vis ejusmodi non argumentis, sed argutiis, futura esset, consequeretur etiam, sublatam quoque fuisse Apostolicae Sedi facultatem improbandi & damnandi Thomisticam sententiam. Nam qui eam postea teneret, *Haeticus esset dicendus. Atqui hoc dicere judicavit erroneum Sixtus IV.* indicto Anathemate in eos, qui *Haeticam* appellarent Thomisticam Opinionem. Viden ergo, quam ridenda sit haec argumentandi ratio? Ceterum sive hanc, sive illam sententiam possit-

postremo calculo decerneret Ecclesia, nequaquam erraret. Et ne nunc quidem errat, prudenter quippe agit, Pietatem agnoscens in Scotistica, quia Pietatis lineamenta, atque Apparentiam Veritatis in ea considerat. Neque errat, liberum cuicunque dimittens celebrare Festum subintelleto nomine sive objecto *Sanctificationis*, quum & in contraria Opinione lineamenta & Apparentiam Veritatis agnoscat, quae profecto nullus Pontifex adhuc ei ademit, Rursus eo minus erraret Ecclesia, quotiescunque unam aut alteram ex iis ad Fidem pertinere statueret; nam tunc non Prudentiae solum regulis, sed subsidio divino freta, quod ei Christus pollicitus est ad Dogmata stabilienda, decerneret Pietatem Intrinsecam ac Certissimam sententiae illius, cui tunc Apparentia Veritatis & Pietatis cederet. Si quod multis persequutus est in suo Libro Lampridius Cap. XIII. pag. 95. & seq. ut ostenderet dari *Pietatem Opinativam*, juvenis Theologus legere voluisset, aut lectum pacato animo expendisset, heic sibi fortasse silentium imperasset. Verum is quae molesta sunt placide supergreditur, ad illud unice tendens, quo incautis Lectoribus difficultates obrudat, quas tamen antea Lampridius dissiparat. Quum vero Sedes Apostolica aequae amet Aquinatis & Scoti sectatores, quanquam in huiusmodi controversia discordes, sibi que iudicium de ea reservarit, *Temeritate* non careat, quicumque *Errorem* eidem sanctae Sedi objicit, si forte pro Thomistica iudicaret.

Doler deinde juvenis Theologus, quod ad manus Lampridii ante sui Libri editionem non pervenerit Dissertatio *Magni illius viri* idest Patris de Luca; certum namque ducit, si Lampridius hanc legisset, *Magni Bellarmini* sententiam de Festo Conceptionis minime ab eo producendam fuisse. Habes heic, unde gratuleris Minoritis, quod Pater de Luca, Dissertationis nempe Auctor, *Magni* titulum fuerit consequutus, ac tam brevi itinere, sive tantillo Libro, ad illud gloriae fastigium pervenerit, quo eximius Cardinalis Bellarminus post tot labores, atque immortales Libros pervenit. Expendamus, an recte & heic rationes inierit juvenis Theologus. Dixerat Bellarminus Lib. III. Cap. 16. de Cultu Sanctorum, *Fundamentum Festi Conceptionis praecipuum non esse Conceptionem Immaculatam, sed simpliciter Conceptionem Matris Dei futurae. Qualiscumque enim fuerit illa Conceptio, eo ipso quod Conceptio fuit Matris Dei, singulare gaudium offert Mundo &c.* At Pater de Luca pag. 82. suae Dissertationis licuisse ait olim haec scribere Bellarmino, cum de Cultus objecto Catholici viri magnopere discrepant. Nunc, objecto jam designato, qui ve-

lis

lit adhuc ad Bellarminum confugere, temulentus ac furens foret appellandus. Bellarmini verbis usus fuerat contra Picininum Haereticum Clariss. Cardinalis Gottus. Quid Minorita? Si viveret Picininus, inquit is pag. 87. *MERITO* Gottum (id quod tanti viri pace dixerim) *RIDERET*. Diceret enim, *Alexandrum VII. declarasse, quod sit obiectum Ecclesiastici cultus in Conceptione, hoc est, esse Deiparae Praeservationem ab originis labe &c.* At huic Theologo, qui arrepto illius Festi Obiecto nihil non sibi licere ducit, & ex Cathedra quemcunque obfistentem deridet, ac prostratum denuntiat, respondeas velim: Ipsum quoque Cardinalem Bellarminum eodem in loco scripsisse: *Quia major pars Ecclesiae Pie credit Immaculatam Conceptionem, inde eadem Ecclesia habuit occasionem instituendi hoc Festum*, scilicet secundum Piam Sententiam. Attamen is censuit, *praecipuum fundamentum* hujus Festi non esse Immunitatem Virginis, sed quidem latiori significatione *Conceptionem Matris Dei*. Et quare? Quia, ut ille subdit, *hoc Festum etiam illi celebrant, qui putant Virginem in peccato conceptam*, idest qui in Conceptione *Sanctificatam* arbitrantur. Si Festum hoc ab iis quoque celebratur, & celebrandum est, qui Virginis *Praeservationem* iniciantur: ergo (inferebat sapientissimus Cardinalis) non est *Praecipuum*, hoc est speciale, sive particulare Festi hujus fundamentum *Immunitas* Mariae. Nihil postea hac in re novavit Alexander VII. Proinde si viveret Picininus, nulla ei foret irridendi Cardinalis Gotti causa, dum Bellarmini verbis utitur ad ostendendum per institutionem Festi Conceptionis nunquam fuisse divergentiam controversiam de Conceptione Virginis, Piamque Scotistarum sententiam nondum e finibus Opinionum egressam, quem non minus nostris, quam Bellarmini temporibus, liceat celebrare Conceptionis Festum, subintellesta *Sanctificatione* Virginis Beatissimae.

Attamen ut haec clarius intelligas, animadvertendum est, ab iis tantum, qui Deiparam ab originali labe praeservatam credebant, institutum fuisse Festum Conceptionis Saeculo Christi Duodecimo. Hoc ii celebrarunt usque ad tempora Sixti IV. qui uti Minorita huic Sententiae addictus, ac Festo secundum ipsam instituto favere volens, Missam & Officium a Nogarola compositum, ac diserte de *Immaculata Conceptione* loquens, probavit, ad eorum tantummodo usum, qui cum Scoto facerent. Increbuerunt subsequitis temporibus hanc ob causam lites & jurgia in Scholis, & extra Scholas, adhibentibus Thomistis in ejus Festi celebratione Officium simile alteri, quod etiam num usurpatur in Nativitate Sanctissimae Virginis. Qua-

re Pius V. Sanctissimus Pontifex, ut pacem inveheret, deleta Nogarolae Officio & Missa, & etiam titulo, quod ibi spuria quaedam minime ferenda legerentur, Thomisticum Officium ac Missam invenit, quae tam affirmantibus, quam negantibus Praeservationem Virginis convenire possent, & neutri sententiae obessent. Propterea Cardinalis Bellarminus, post Pium V. scribens, aiebat, tempore suo unicam Deiparae *Immunitatem* non esse fundamentum Festi illius, quum de hac praecipua, sive particulari intentione Festi nihil in Missa & Officio dicatur, & utraque contendendum factio Festum celebraret ad suae Opinionis normam. At heic ingenti fragore Minorita insurgit, inquit: *Declaravit Alexander VII. quod sit objectum Ecclesiastici Cultus in Conceptione, hoc est esse Deiparae Praeservationem ab originis labe &c.* Praeterea declaravit, *Cultum secundum Piam sententiam institutum nunquam fuisse immutatum.* Quum vero in praescribendo Cultu, & objecto Cultus, *Ecclesia errare non possit*: ergo Certa evasit Sententia Scotistica; immo, ut is tacite insinuare voluit, Certa etiam de Fide. Ita ille pro Picinino in dedecus Romanae Ecclesiae argumentatur. Ego contra aequius, ut puto, Picininis insultantibus Apostolicam Sedem, jam in aliis colloquiis respondi, ex institutione Festi nullam Piae Sententiae Certitudinem accessisse: quod etiam facti antea fuerant insignes Theologi e Societate Jesu. Repeto nunc, ne Alexandrum quidem Septimum quidquam heic novasse. Ejus Bullam quicumque sine studio partium legit, hoc facile deprehendet, si cur haec edita fuerit, nunc recolamus. Anno 1622. uti ex Bullario Romano constat, Gregorius XV. Pontifex Maximus Festum & Officium Conceptionis Deiparae confirmavit, ab utroque Clero celebranda, praeciens, *ut in sacrosancto Missae Sacrificio, ac divino officio celebrandis, non alio quam Conceptionis nomine uti debeant*: ad mentem nempe Pii V. ut utraque factio sine suae Opinionis laesione Festum illud celebrare posset. Verum sub Innocentio X. prodire duo Thomistae; qui sub ejusdem Bullae obtentu contendebant, non licere in posterum Scotistis *Immaculatam* appellare *Conceptionem Virginis*, & a Gregorio immutatum fuisse Objectum Cultus. Adversus illos in arenam descendit Theophilus Raynaudus e Soc. Jesu Vir Cl. evulgata Dissertatione *de retinendo Titulo Immaculae Conceptionis B. Virginis*. Et juste quidem; quamvis enim in Missa & Officio vetentur Scotistae & Thomistae alio quam nudo *Conceptionis* nomine uti: liberum tamen Scotistis semper fuit, extra divina Officia *Immaculatam* appellare *Conceptionem*; immo & Festum celebrare

brare subintellecta *Praeservatione* Virginis. Hisce litibus finem facturus Alexander VII. Bullam suam emisit, in qua is narrat, institutum Festum Conceptionis a pie sentientibus, Virginem fuisse Praeservatam; eorum crevisse numerum, postquam Sixtus IV. Cultui huic, ipsique adhaerentibus, non unum favorem impertiit. Sed quandoquidem post immutatum Officium & Missam a Pio V. & sublatum inde quidquid *Immaculatam Conceptionem* sonabat, contendebant Thomistae, immutatum quoque fuisse Obiectum Festi, ita ut non amplius de *Praeservatione*, sed de *Sanctificatione* Virginis Festum celebraretur; unde variae lites & scandala oborta fuerant: testatur Alexander *numquam immutatum* fuisse a quoquam Pontifice Cultum Virgini praestitum ab adhaerentibus Piae Sententiae; ac propterea improbat quosdam adversantes, scilicet *contrariae Sententiae assertores*, quod *Cultui secundum Piam sententiam Beatæ Virginis exhibitio Romanam Ecclesiam favere neget, pios Christi fideles a sua pacifica quasi possessione deturbare conando*. Quamobrem poenas in eos decernit, qui in posterum favores eidem *Piae sententiae, Festo, & cultui* concessos, arrodere audeant, aut eandem *Sententiam, Festum, seu cultum in disputationem revocare &c.* Unum ergo illud, quod praestitit Alexander, situm est in hoc decernendo, videlicet Piae Sententiae addictos in celebrando Conceptionis Festo *Praeservationem* illius semper coluisse, & colere; & quod est ad eos, & ad Cultum ab iis Virgini sub hac significatione exhibitum, nihil unquam immutasse Romanos Pontifices. Verum quod est ad Thomisticæ, sive contrariae Opinionis affectas, & quod attinet ad Festum, Cultumque ab eis sub consideratione *Sanctificationis* in cordis intimo praestitum Virgini, nihil contra eos decernit, hoc est illos in sua possessione relinquit; ita ut eisdem liceat celebrare Festum sub alia intentione quam Praeservationis, videlicet accommodate ad suae sententiae tenorem. Quam in rem meminit decreti a Gregorio XV. promulgati, ac nuper a me laudati, dum praecipit, *ut in sacrosancto Missæ sacrificio, ac divino Officio celebrandis, tam publice, quam private, non alio quam Conceptionis nomine uti quicumque debeant*. Idem voluisse Clementem XI. dum Conceptionis Festum de praecepto statuit, testis est praelaudatus Eminentissimus Gottus; appellavit enim illud *non Festum Immaculae Conceptionis Beatæ Virginis Mariae, sed Festum Conceptionis ipsius Beatæ Mariae Virginis Immaculae*. Et ex Libello supplici Thomistarum (edito ab ipso Patre de Luca pag. 129.) habemus, indoluisse eundem Pontificem, quod suae Constitutionis edi-

tor

tor quidam extra Urbem hunc ei titulum inscripssisset. *Ux Festum Immaculae Conceptionis Beatae Mariae &c.* & sub die 12. Octobris 1709. Ordinario loci mandasse, ut acriter corripere alterationis hujus auctores, & vitiata impressionem supprimeret.

Haec ergo summa rei est. Nihil aliud declaravit Alexander VII. nisi *Praeservationem* Deiparae esse objectum Festi celebrantibus illud secundum Piam Sententiam, idque nunquam fuisse immutatum. Neutiquam vero praecipit, ut quisque Fidelium sub ea consideratione celebret Festum; quum enim praecedentium Pontificum more, discretis verbis, liberum cuicumque relinquat contrariae etiam adhaerere sententiae, & controversiam se minime velle dirimere profiteatur: liberum quoque eis relinquat oportet Virginem colere Cultu conformi Sententiae, seu Opinioni suae. Propterea non alio nomine a Pio V. & subsequutis Pontificibus donata est Missa & Officium, quam *Conceptionis*; veritumque, ne *Immaculata Conceptio* heic dicatur, ut utraque pars sine suae sententiae detrimento, atque ad illius normam, Virginem conceptam laudent ac venerentur, scilicet sub consideratione *Praeservationis*, aut *Sanctificationis*. Quare a vero abscedit Minorita, dum tanto verborum strepitu contendit, ab Alexandro VII. declaratum fuisse *Objectum Ecclesiastici Cultus in Conceptione*, quasi sub hac una significatione omnibus celebrandum sit hoc Festum, & quasi tunc primum innotuerit, a Scotistis celebratum semper fuisse Festum Conceptionis ad suae sententiae normam. Falso hoc supposito, quo tamen tanquam ineluctabili telo passim utitur, sive abutitur Minorita: vides, non immerito scriptum a Cardinali Bellarmino, *fundamentum Festi Conceptionis praecipuum* (idest unicum, speciale, seu peculiare) *non esse Conceptionem Immaculatam, quum hoc Festum etiam illi celebrent, qui putant Virginem in peccato conceptam*. Comprehendit enim generica, ut ita dicam, vox *Conceptio* sub se tam *Immunitatem* Deiparae, quam *Sanctificationem* ex institutione Pii V. & subsequentium Pontificum. Alexander vero Septimus a suis Praedecessoribus neque discors est, neque aliud novi hanc in rem invenit. Tuum ergo nunc erit edicere, an honestatis fines excefferit Minorita, dum uti *Temulentos* ac *Furentes* traducit, qui in hanc rem celeberrimi Cardinalis Bellarmini auctoritate adhuc utuntur, & irridendum ab impio Picinino exhibet Eminentiss. Gottum, ejusdem Bellarmini verba adducentem. Ex his autem simul intelligas, quam iniquis cachinnis idem Picininus Romanis Pontificibus insultet, quasi post Festum Conceptionis controversiam diremerint, quam tamen se

diremisse negant. Per institutionem vero Festi Conceptionis nihil Certitudinis accrevisse Piae Sententiae, alibi fusius demonstravimus. Denique his positis inanes in auras solvuntur tot argumenta, sive sophismata a Patre de Luca fabricata, ac super unum illud falsum suppositum Objecti declarati fundata, quasi Alexander VII. unumquemque coegerit Festum Conceptionis celebrare sub consideratione Objecti illius, quod peculiare est adhaerentibus Scotisticae sententiae.

Memoraverant alii, memoravit & Lampridius Cap. IX. *Festum Conceptionis Johannis Prodromi*, celebratum olim a Latinis & Graecis, atque inscriptum in antiquis Martyrologiis, teste Cl. P. Papebrochio ad diem 24. Junii, quanquam Ecclesia illum quidem in utero Sanctificatum, non vero in Conceptione Praeservatum agnoscat. Quod insuper animadversione dignum est, adhuc idem Festum celebratur Melitae, atque in aliis Ecclesiis a sacro Ordine militari Sancti Joannis pendentibus. Heic ait juvenis Theologus, non animadvertisse Lampridium quid subdiderit idem Papebrochius, videlicet: *Sed si appellatio Conceptionis utriusque est eadem, diversa est, & NOTA SATIS utriusque acceptio ad Deiparam, Prodromumque relata. Etenim CONSTAT*, quod Ecclesia hujus Conceptionem celebrat cum respectu ad Sanctitatem Mysteriorum ad ipsam spectantium; de illa vero agit ut *SANCTA IN SEMETIPSA*. Idem quoque, sed brevius, dixerat Cardinalis Bellarminus, dixerant & alii; sed per hanc rimam doctissimi viri minime evadent. Semper enim verum est, olim in honore fuisse Festum Conceptionis Sancti Joannis Sanctamque habitam illam diem, etiamsi ab originali labe nemo unquam putarit praeservatum Domini Praecursores. Quod si ais, Sancta illius Conceptio Sancta est respectu ad Sanctitatem Mysteriorum: cur non idem de Festo Conceptionis Deiparae dicere Thomistis liceat? Idem certe visum jamdiu animadvertimus insigni viro Cardinali Bellarmino. Verum addis: *Ecclesia de hac agit, ut Sancta in Semetipsa*. Quis haecenus hoc revelavit? Sancta quidem illius Conceptio dicitur, sive quod a macula Praeservata, sive quod statim a Deo Sanctificata fuerit. Hujusmodi autem Sanctitas utro ex principio fluat, incertum adhuc est. Neque enim aliter credere cogimur, dum suum judicium de ista controversia haecenus Ecclesia suspendit. Quod vero Graeci Conceptionem Sanctae Mariae appellent Conceptionem Sanctae Annae; Conceptionem vero Sancti Johannis dicant, non vero Conceptionem Elisabeth: tam nullius momenti est, ut nulla responsione indigeat.

Exi-

Eximium Theologiae Dogmaticae paene parentem Petavium in hanc arenam traxerat Lampridius, testantem videlicet, se nullum ex antiquis Patribus novisse adducendum pro tutela Piae Sententiae. Immo quos ipse deprompsit, in contraria sententia fuisse aut faserur, aut suspicatur. Quid heic juvenis Theologus? Con buona pace del P. Petavio io sento altrimenti. Ita is ait pag. 14. in illa voce lo maxiam, ut reor, vim faciens: quum enim & ipse Theologi nomine sit exornatus, pedem conferre cum Petavio Theologo cur ei non liceat? Et fortasse si viveret Petavius, ad hanc terribilem vocem lo totus contremisceret. Postquam vero in laudes Petavii ipsius excurrit juvenis Theologus, haec subdit: *Ma cid che monta? Abbiamo noi a concedergli quel privilegio d' Infallibilit , che la sua Nazione contrasta al Vicario di Cristo?* Ad haec animadverterat idem Petavius, inferri nihil posse ad Piae sententiae subsidium e Latinorum Patrum dictis, aut e Graecorum versionibus, Intemeratam aut Immaculatam appellantis Deiparam. Non male habeat Petavius, si irrisorio stilo iterum excipitur a Censore isto; nam ut ut Petavium virum magnum fama extollat, attamen ne hic quidem Cenfor, quanquam juvenis, infimi subbellii Theologus habendus est, quum in addiscenda Theologia scholastica quatuor integros triverit annos. Is igitur inquit: *Ma io vi torno a dire, che in tutta la sacra Bibbia, in tutti i Concilj, in tutti i Padri non truovo* (neque sane dubitandum, quin omnes a vertice ad pedes diligentissime is legerit & excusserit hanc unam ob causam) *che Cristo prometteffe al P. Petavio il privilegio di essere ne' suoi giudizi Infallibile.* Tum conversus ad P. de Luca, Virum nempe illum Magnum, quem Bellarmino nuper opposuit, nunc etiam opponit Petavio, ex ejus Dissertatione derivans, quae ille commentatus fuit, ut ostenderet, neque e sacris Literis, neque ex Traditione colligi, Nativitatem Deiparae Sanctam fuisse, sive Sanctificatam in utero Matris fuisse Mariam. Ad Franciscani autem sui argumenta se non invenire ait, quid responderi possit. At quoniam hac de re nos antea egimus, nihil pro Petavio, nihil adversus Minoritam heic addamus. Quae sint Petavii vires in ejusmodi agone, satis Respublica Literaria novit. Certe si levibus hisce responsis suis, & aereis armis pugnare perget juvenis Theologus, eum male instructum accessisse ad pugnam, nullo negotio docti viri animadvertent. Propterea neque opus est quidquam loqui de consensu Academicarum & Populorum, quem ille commemorat pag. 17. Cur Populi ita sentiant, satis compertum est. Nulla vero Academicarum Piae Sententiae addictarum esse credenda est, quae non

non eam adhuc intra fines Opinionum conclusam fateatur, exceptura cum veneratione quodcunque iudicium aliquando prolatura foret Cathedra Petri.

At juvenis Theologus pag. 18. complures se audivisse tradit, quibus Lampridius videtur sub specie impugnandi *Certitudinem* Mysterii, impugnasse quoque rationes, quibus innititur illius Probabilitas. Quam in rem quando alia exercere non potuit, hoc uno est usus argumento iniquiens, Lampridium in fronte Capitis XII. titulum hunc scripsisse: *Communis olim Theologorum sententia contraria Scortificae*. Hoc autem is appellat *argumenta contra eam sententiam afferre & insoluta relinquere*. At nemo est, qui non videat, adnotatum hoc fuisse a Lampridio, non uti argumentum contra Piam Sententiam, sed ad refellendos eos, qui ut suadeant illius Certitudinem, qua postea abutuntur ad perdendam hominum vitam, praeter alia proferunt etiam Theologos veteres, Anselmum, Thomam, Bonaventuram &c. veluti ejusdem Sententiae assertores; quod sane a veritate abest. Haec postea subdit juvenis Theologus pag. 19. *Quali sono i fondamenti, che rendere possono probabile la Pia Sentenza? Le Scritture, i Padri, i Concilj, le Decisioni della Chiesa Romana, l'Autorità de' Teologi. Qual Probabilità dunque resta a questa Sentenza, se di tutti questi argomenti la forza in fumo si dissolve, e svanisce dispersa all'aria, come voi pretendete?* Verum si Scriptor hic licere sibi putat falsis declamationibus agere adversus Lampridium, non Theologus in posterum erit habendus, sed alio nomine compellendus. Etenim ubinam Lampridius quae nunc ei tribuntur literis mandavit? Milles, ut ita dicam, ille Piam atque Probabilem Scortificam sententiam est fassus (potissimum videas velim pag. 53. & 248.) Probabiliorem etiam altera appellari moleste minime tulit; Thomisticam vicissim uti Piam atque Probabilem tantummodo agnovit. Denique adversus unam *Certitudinem* is certavit, quam nempe investam doluit, ut Christi Fidelibus persuaderetur, honestum esse pro tuenda Pia Opinione mortem oppetere. Porro is addit, indignatos praecipue fuisse quosdam, quod pag. 62. scripserit Lampridius *Naram ejusmodi Certitudinis persuasionem e fraudibus, quas nonnulli contexerunt olim &c.* videlicet ex ementitis Flavii Dextri, Liutprandi &c. Libris, & ex Laminis Granatenlibus. Atque heic Cardinalis Pallavicini verba adfert, Paulum Suavem culpantis, quod Devotionem erga Deiparam ex fraudibus sensim auctam exhibuerit; Suavis autem spiritum videri per hereditatem pertransisse in Lampridium. Utique haec dum lego, mirari fa-

tis

tis non possum hominem exerentem sub aliorum nomine, non dicam halce ineptias, sed tam virulentas calumias in Lampridium, qui tamen tot in locis, ac praecipue pag. 14. & 103. sollicitè Devotionem erga Virginem commendat, non ex fraudibus, sed ab ipsis divinis Literis, & ex perpetua Ecclesiae doctrina enatam. Ceterum juvenis ipse Theologus inficiari nequit, quin post evulgatas spurias ejusmodi merces, quasi Certa evasisset Pia Sententia, Sanguinarium Votum erumpere coepisse, atque ob eam causam susceptum fuisse, quod confictis hisce monumentis fides adhiberetur, uti Lampridius ex Voto Ducis Ossunae palam fecit. Piae vero Sententiae ob hujusmodi figmenta coeptam esse tribui *Certitudinem Moralem, Physicam, & Metaphysicam*, exemplo P. Joannis de Cardenas idem ostendit. Quicumque vero venditare velit, Fidelium Devotionem erga Deiparam minui ab iis, qui ostendunt, Piam Sententiam nondum assurrexisse ad *Certitudinis* alicujus gradum, in gregem Imprudentium, aut audacium Theologorum a prudentibus, ut puto, erit conjiciendus. Si non minuunt, qui veram censent contrariam Opinionem: minuentne qui tantummodo ostendunt, Certam nondum evasisse Scotistarum Sententiam? *Imprudenter* quoque Lampridium arguit juvenis Theologus pag. 20. quod Augustinum le Blanc in Hist. Congreg. de Auxiliis adduxerit ludibrium testem, quae olim passa est in Hispania Doctoris Angelici Imago ob controversiam de Conceptione. Theodorus enim Eleutherius, *confictas Revelationes & Miracula* pro sua sententia tributas Minoritis a le Blanc, tribuendas esse scribit Fratribus Praedicatoribus, uti Spondanus animadvertit ad Annum Ch. 1508. Sed ineptiis rursus indulget juvenis Theologus; neque enim Lampridius de Revelationibus aut Miraculis confictis ibi quidquam habet, neque pro iis testem adhibet le Blancum. Cur ergo is, huc invitos trahens Eleutherium & Spondanum, non est aequius Imprudentiae arcessendus?

Rursus quod mirere, in scaenam invehit juvenis Theologus pag. 21. Concilium Basileense, & Avenionense, jam deploratae auctoritatis monumenta. A Natali Alexandro appellari ait *Pium & salubre Concilii Basilienfis de Immaculata Conceptione Decretum*: quasi Basileenses eam doctrinam ad Fidem retulissent, quum tantummodo *tantumquam Piam, & consonam cultui Ecclesiastico, Fidei Catholicae, rectae Rationi, & Sacrae Scripturae tenendam asseruerint*: quibus ex verbis uti disertissime idem Natalis Alexander prodit, nunquam ejusmodi sententia evasit Fidei Dogma. Et quum Ecclesia universa heic pendeat e Decretis Romanorum Pontificum, cur quaeso nos detinet juvenis

venis Cenfor inutili hac merce; hoc est Schismatico tunc paucorum Concilio, atque additis Carthusiani cujusdam Anonymi verbis, quae profecto nosse nil nostra refert? neque enim quidquam ponderis adferre possunt Schismaticorum illorum Decreto. Pag. 23. iterum erumpit Concilium Tridentinum, in quo, teste Cardinali Pallavicino actum fuit de *Pie credenda Immunitate Virginis in Conceptione*. Cui deliberationi obstitere Patres Ordinis Praedicatorum, *opponendo essi, che ove il credere una parte si dichiarasse Pio: il credere l'altra verrebbe a dichiararsi Empio: il che tacitamente era diffinir la quistione*. Hinc ansam argumentandi arripit juvenis Theologus: *Se il dichiarar quella Pia, era per essi un dichiarar' Empia l'altra, il diffinire, che ha fatto Alessandro VII. lecito il celebrar la Festa della Concezione secundum Piam istam sententiam, non sarà un dichiarar' illecito il celebrarla secondo l'Opinione contraria? Ne vorrei la disparità*. Immo fortius argumentari debuit Logicus iste juvenis: Quum Alexander Piam declararit Scotisticam sententiam, non *Illicitum* duntaxat, sed *Impium* erit celebrare Festum secundum Opinionem contrariam. Verum continuo quisque agnoscat, ex Alexandri Bulla nil consequi ex iis, quae Ordo Praedicatorum formidavit in Tridentina Synodo. Quamvis enim Pontifex iste Piam appellet Scotistarum Sententiam, hoc est licet laudabilem Pietatis apparentiam in ea deprehendat: nihil tamen addit, per quod vetetur altera factio suam quoque reputare Piam; immo Anathema indicit audentibus eam appellare *Haeticam*, sive *Impiam*; atque antea Pius V. interdixerat *Erroncam* dicere eorumdem Thomistarum Opinionem: quod sane Decretum Pii Alexander non fustulit, immo confirmans Constitutionem Gregorii XV. illud quoque confirmavit. Quamobrem si licet Thomistis suae adhaerere Sententiae, sive Opinioni, liceat quoque necesse est eisdem Festum celebrare secundum eandem Sententiam. Alioquin, uti jam non semel diximus, si quisquam cum Theologo juvene secus cerebro suo suadeat, is manifeste Imprudentiae sanctissimum Pontificem arguit. Otio suo postea abutitur idem Theologus, quum incautae genti persuadere nititur, *conclusum in Tridentino Concilio, ut decerneretur, Virginem Sanctissimam conceptam sine peccato originali fuisse; sed ob instantissimas preces aliquot Episcoporum &c.* Hanc in rem is Lancizium, Catherinum, & Ormacheam testes advocat. At cur ista? Nisi ut dubia Catholicis, atque Haeticis Aëta Concilii Tridentini eruditus iste Theologus exhibeat. Natalis quoque Alexander auctor est Hist. Eccl. Saec. II. Diss. 16. §. 21. neque in primis editionibus Tridentini Concilii

Lu-

Lutetiae factis, neque in Collectionibus Conciliorum a Caranza & Crabbe adornatis, legi in Decreto de Peccato Originali, cui omnes obnoxii dicuntur, ullum de Deipara verbum. Num propterea licebit in suspicionem adducere additamentum illud in ejus favorem conceptum? Abeant ejusmodi praestigiae. Habemus Acta Synodi Tridentinae sincera, probataque a Romanis Pontificibus. Temeritate non careat, quisquis privatorum relationes contra eorum fidem obtrudere velit. Atque in hanc rem pluribus non est opus. Quum vero post haec objectiones finem primae suae Epistolae fecisset juvenis Theologus, Abbas quoque Romanus quiescendum censuit, atque in posterum diem conditum fuit reliquum Censurae examen. Haec autem, Azevede mi, an recte se habeant, pro tua sapientia, atque doctrina judicabis, & quid sentias, ad me, ut spero, rescribes. Vale.

Neapoli III. Non. Octobr. MDCCXLI.

Azevedo suo Ferdinandus Valdesius S. P.

EPISTOLA SEPTIMA.



T Fidem meam liberem, Azevede supra ceteros mihi care, en tibi cetera, quae Romanus Abbas in Epistolas juvenis Theologi, me audiente, differuit; nam quae pauca ego identidem interserui, referre supervacaneum dico. Itaque postera die convenimus, & Censoris illius Epistola secunda in manus sumpta, amicus vir in haec verba loquutus fuit. A cavillationibus cursum suum instituere mihi videtur pag. 25. juvenis iste Theologus, dum post Parthenotimum conqueritur, Lamindum Pritanium (idem iste est atque Antonius Lampridius) disertis verbis non probasse Votum de tuenda voce & calamo. Scotistica Sententia. At Lampridius haec Pritanii verba attulerat: *Satis quibusdam non fuit calamo & rationibus Immaculatam Deiparae Conceptionem tueri, quod procul dubio cum Vera Pietate consonat.* Nemo est qui non intelligat, hisce probari Votum de eadem tutela; nam ex quo aliquid cum Vera Pietate concordat, legitima est Voti materies. Attamen juvenis Theologus hoc sufficere negat; jurene an injuria, erit aliorum judicium. Propositiones Lampridii is deinde oppugnandas arripit. Quarum prima est pag. 92. *Imprudenter ac temere emissi. Votum de*

Tom. V.

R r

san-

sanguine fundendo pro sacra Scotisticae sententiae, quum Vita hominis Certum ac evidens Bonum sit, minime impendendum ad tuendam Sententiam, quae Certitudine adhuc caret, & nondum e pomorio Opinionum excessit. Occurrit statim juvenis Theologus, inquit, se in priori Epistola ostendisse Certam hujusmodi Sententiam. An id ille praestiterit, laudatis duntaxat argumentis, hoc est falsis Minoritae suppositis, plene, ut arbitror, jam animadverteris. Is deinde & Scholastico promptuario non brevem lectionem expromit de variis speciebus Certitudinis, inquit, praeter Certitudinem Fidei, & Evidentiam dari alteram minorem Certitudinem, quam tandem Moralem definit, & Lampridium alloquens, Magistrali Caritate ait: Intenderelo bene, perchè qui è tutto il vostro Equivoco. Tum dicere pergit: Ma siccome la Certezza Morale può essere solo Rispettiva, così non è maraviglia, che la Sentenza della Vergine concepita senza macchia originale non sia ugualmente Certa a tutti. Dal che ne segue, che per quelli i quali non giungono a penetrare i motivi di tenerla per Vera e Certa, secondo i vostri principj non è lodevole il Voto di spargere anzi il sangue, che lasciarla. Se volete, io vel consento; e dacechè voi siete uno di questi, no nol fate, che sareste uno stolto. Ma poi perchè a voi non è Certa quella Sentenza, perchè voi non potete far questo Voto, non volere, ch' Ella ad altri sia Certa, che altri facciano quel Voto, Signor mio; o questo sembra a me troppo. Ita ille, atque ea placida pugnandi ratione, a qua optandum foret, ut is nunquam recessisset.

Ad ista ut respondeam: primo temperare poterat juvenis Theologus ab ea de Certitudine lectione, quando nihil aliud is nos docet, nisi Certitudinem Moralem dari: quod vel ipsi Tirones nprunt, neque de eo quisquam dubitat. Secundo quid est quod ille jam ad pacta venit, liberum cuicumque relinquens non credere Certam Scotistarum sententiam, dum sibi suisque commilitonibus liceat eandem reputare Certam? Nos heic petimus: an is veram stabilemque censeret Minoritae sui doctrinam, quando eam unice nobis antea objecit, ut evinceret, Piam Sententiam in Certitudinem immigrasse; immo eam in ipsa Certitudinem deprehendi, cui Falsum subesse non possit, quum dementes, & rationis expertes idem Minorita ingenti fragore toties decreverit, quicumque id non videret ac fateretur? Si Veram ne ipse quidem reputabat, quei illa est usus, ut nobis ac Populo suaderet, Certam evasisse Sententiam suam? Sin Vera, neque dubia, sibi videbatur Minoritae doctrina: cur contemtis Athletae sui argumentis, nobis licere nunc ait Incertam credere eandem Scotistarum Sententiam?

Dum

Dum is quid respondere possit excogitat, nos ultra pergamus. Ut igitur vides, *Certitudinem Moralem* Pia^e Sententiae tribuendo, juvenis Theologus arbitratur, sibi suisque licere vitam pro ea tuenda obligare. Expendendum heic primo esset, an Vita, quae danda est, ut recte datur pro tutela Dogmatum ad Fidem spectantium, licite effundi possit pro sententiis Moraliter quidem Certis, sed in censum Veritatum Fidei nondum relatis. Quaestionem hanc ego praetereo, quaesiturus duntaxat, an revera de hujusmodi Certitudine Morali certi sint, & plaudere sibi possint affectae Scoti, & quibus rationibus atque argumentis eam fulciat atque demonstret juvenis Censor. Sed nescio quo fato hoc ille facere oblitus est. Ad statuendam hanc Certitudinem primum illi & postremum fuit, memorare invicta argumenta Patris de Luca, quae an talia sint, jam vidimus. Quo facto, eam Certitudinem dein procedendo semper supponit, falso propterea supposito utens. At heic situs est cardo nostrae disputationis. Pluribus vero Lampridius antea palam fecerat, Piam quidem & Probabilem esse Scotisticam Sententiam; dicas etiam, si mavis, contraria Probabiliorem; nullam tamen Certitudinem ulla ex parte ad eam haecenus accessisse. Ut ergo illius aedificium consistat, unum opus erat, scilicet legitimis tabulis aut testibus ostendere, *Certitudinem* minime deesse in Pia Sententia; & eam quidem, quae formidinem *Erroris* excludat, uti mox dicam. Si secus accidat, Sanguinarium Votum, quia Imprudenter ac temere susceptum, ruat oportet.

Ex verbis juvenis Theologi nuper productis didiceris, qualis sit Certitudo illa, quam de Pia Sententia concipit is, ejusque collegae. Scilicet ejus generis, ut sibi ac suis id Certum videatur, quod tamen is fatetur Incertum aliis videri. Quare nihil aliud ea Certitudo deum dicenda est, nisi *Certitudo Subjectiva*, sive *Persuasionis*, quam inculcavit Lampridius, ineptamque ostendit ad Sanguinarij Voti tutelam, quippe una *Certitudo Intrinseca* seu *Objectiva* in casu nostro exigitur. Dejicienda erant, non dissimulanda illius hac de re argumenta. Sed fallor. Pag. 31. juvenis Theologus nonnullis exemplis ostendendum sibi proponit, *Che con tutta l' Incertezza, in cui uno sia della Pia Sentenza, pure è Virtu il voler dare la Vita per difendere questo pregio alla Vergine*. Ubi id ille nobis ostendat & probet, non amplius juvenis, sed senex Theologus erit mihi, immo & magnus Apollo. Parthenonitum, virum certe in Scholastica palaestra veteranum, sequutus iste juvenis, statuit, licere Votum concipere pro qualibet *Vera Virtute*, Sotum citans, & Angelicum, quasi non omnes Theo-

logi in id consentiant. Tum addit, sufficere, ut earum Virtutum Obiectum sit licitum & honestum, prout apparet Intellectui. Ita Hostiam consecratam in divino Sacrificio adoramus absoluto, non conditionato cultu Latriæ, quum tamen nemo prudentem timorem expellere possit, nec sit moraliter Certum, Hostiam illam fuisse consecratam. At quidnam quaeso agit juvenis iste Theologus, quum ejusmodi exemplum ad praesentem causam pertrahendum putat? Vel rudes intelligunt, se nullius culpa reos, quod Hostiam adorent, consecratam putantes, quae talis forte non sit; nam adorare a Religione jubentur, atque uti Angelicus Doctor heic ab ipso juvene Censore memoratus tradit, fides colentis ad verum Corpus Christi tendit, quod certe est adorandum, non ad eas species panis, quae se oculis offerunt; ac proinde nihil mali aut flagitii inde manaret, etiamsi is falleretur. Verum qui vitam vovet pro tuenda Immunitate Virginis in Conceptione, quamvis Certum sibi non sit, eam a macula originali immunem fuisse, ignorare non potest, aut non debet, nullum exstare Praeceptum, aut Consilium a Fidei doctrina praescriptum de credenda, aut tuenda Scottitarum Sententia; & contra sibi Praeceptum a Natura, atque a Deo impositum fuisse conservandae Vitae, neque profundendae ad arbitrium nostrum. Imprudentia propterea ac temeritatis culpam non eflugiet, si Bonum hoc Certum, evidens, & post Animam inter creatas res omnium pretiosissimum, perdere velit pro Incerta Virginis sanctissimae praerogativa, & quae neque Vera neque Certa evadet, etiamsi innumera hominum millia temere pro illius tutela sese gladiis offerrent. *Insunderelo bene*, Theologe mi juvenis, *perchè qui è tutto il vostro equivoco*, ad eum & ego libenter dicrem. Pro Obiecto, sive pro Opere Intrinsecae, hoc est ad Fidem spectantis Virtutis, mortem subire meritorium est, & species quaedam Martyrii. Contra pro Incerto Virtutis Obiecto vitam, pretiosum Certumque Bonum, impendere velle, quum contra Prudentiae leges sit, ac Praeceptum naturale ac divinum sine justa causa tunc violetur, culpa non caret.

Attexit deinde juvenis Theologus alia exempla, idonea, ut ipse sibi persuadet, ad dealbandum Sanguinarium suum Votum. Licitum est concipere Votum de *elemosyna danda cuicumque Pauperi occurrenti*; & quanquam tribuatur paupertatem mentientibus, non desinit esse meritoria. Licitum est *Militibus vitam dare pro Principe in bello*, quamvis ignoret, an justum sit illud bellum. Praeterea si probum quemquam hominem ego credam, qui tamen omni improbitatis.ge-

nere

vere abundat; & exerto gladio quisquam mihi mortem intenter, nisi eum hypocritam, aut adulterum credam: tunc ut abstineam a temerario judicio, sive a mendacio, honeste mortem subibo. En ergo, ita ille concludit, quamvis Objectum minime sit Certum, & falli possit Judicium Speculativum, Practicum tamen Judicium non fallitur; atque hoc sufficit, ut Prudenter, & non sine merito tunc agatur. Atque ejusmodi exemplis ille rem confecisse sibi videtur, dum Sisyphi more *versat saxum sudans nitendo, neque proficit bilum*. Et quare? Quia nunquam recogitat, deesse in nostro casu Praeceptum aut Consilium Catholicae Fidei de credenda sive tuenda Pia Sententia, quum contrariae Opinioni adhaerere liceat; & contra vigere naturale & divinum de custodienda, & non projicienda Vita Praeceptum. Ad Eleemosynam quod attinet, nos Deus Consilio ad Fidem spectante, propositoque praemio ingenti ad eam hortatur, atque interdum ad ipsam quoque obligat. Si error occurrere potest in dignoscendo Paupere, nullius momenti error iste est; neque enim errat animus id operans, ex Principio certos nos faciente, opus illud Deo placere. At quum vitam voves pro Opinione tuenda, Probabili quidem & Pia, sed minime Certa: nonne vides, te Certo violare divinum Praeceptum de vita custodienda; & Incertum contra esse, an quod tueri vis Deo placeat ac mereatur defendi? neque enim Probabilitas formidinem Erroris excludit. Quod est ad eum, qui mortem tolerat; ne occidat, ne fornicetur, ne blasphemet, uno verbo ne in Peccatum incurrat: is rectissime operatur, quia Praeceptum Domini tunc implet, atque a doctrina Fidei certus fit, tunc non temere, sed iuste & meritorie Vitam impendi; tunc enim cessat minus Praeceptum Vitae servandae, quum urget Praeceptum majus Fidei aut Virtutis ad Fidem spectantis tuendae. Sed numquid ulla lege jubemur veram credere *Praeservationem* Virginis? Num peccare eos dicas, qui *Sanctificationem* potius credendam putant? Nemo hoc asserere audeat. Quamobrem in casu isto praeferrenda est conservatio Vitae confessioni Immunitatis Marianaе, quia grave Malum habetur nolle servare Vitam, quando nullum est Malum asserere nolle veram aut certam immunitatem praedictam. At, inquit juvenis Theologus, fallax est hominis illius speculativum Judicium de improbo, quem probum credit; & nihilo minus in Judicio Practico is recte agit. Ad hoc respondebo, postquam me expediero a tertio exemplo, scilicet Militum vitam pro Principe dantium in bello, quamquam nulla eis Certitudo sit de justa causa belli. Sed Milites, quum ad bellum pergunt, animo ducuntur, de-

fenden-

fendendae Reipublicae, non vero subeundae mortis, quam per accidens postea incurrere possunt. Et quamvis illius periculo sese exponant, nulla est eis imposita obligatio investigandi, an bellum sit iustum. Ad Reges & Principes belli auctores id spectat; ad Milites duntaxat pertinet ex praecepto Dei obedientia, sive parere iussis Principum suorum. Audi S. Augustinum Lib. 22. Cap. 74. contra Faustum. *Sive Deo, inquit, sive aliquo legitimo imperio jubente, gerenda ipsa bella suscipiuntur a bonis, quum in eo verum humanarum ordine inveniuntur, ubi eos vel jubere tale aliquid, vel in talibus obedire, iuste ordo ipse constringit.* Tum Cap. 75. *Vir iustus si forte sub Rege homine etiam sacrilego militet, Recte potest illo jubente bellare civicae pacis ordinem servans: cui quod jubetur, vel non esse contra Dei praeceptum certum est, vel utrum sit Certum non est, ita ut fortasse reum Regem faciat iniquitas imperandi, innocentem autem militem ostendat ordo serviendi.* Quare non Milites Deo rationem reddere debent, si in bello cadunt, sed Princeps, qui ex potestate sibi a Deo data eos ad certamina & caedes ducit. Haec omnium Theologorum sententia est. Pag. etiam 39. animadvertit juvenis Theologus, licere non solum pro Rege, sed & pro Amico mori, *quamquam Amicitia non sit Virtus, sed solum proxima Virtuti.* In longum nimis procederet oratio, si cuncta persequi vellem, quae hac de re Theologi differunt. Eorum contexere catalogum nihil opus est. Sunt qui negant, & cum eis concors ire videtur S. Augustinus Lib. I. Cap. II. Soliloqu. scribens *Illam legem amicitiae iustissimam esse arbitror qua praescribitur, ut sicut non minus, ita nec plus quisque amicum, quam se ipsum diligat.* Alii ad servandam vitam parentum, Regis, seu hominum Reipublicae utilium, licere vitam dare arbitrantur; pro ceteris nequaquam, nisi de eorum salute aeterna agatur. Alii amicos, non vero extraneos, cum vitae suae dispendio defendendos volunt. Alii denique extraneos quoque juvandos decernunt, quum & heic militare videatur regula Caritatis, nempe laudabile esse facere alteri, quod nobis ab altero factum vellemus. Quod heic animadvertendum praefertim reor, qui Amico ab hostibus impetito suum auxilium commodat, non ea intentione pro illo periculum subit, ut pro illo mortem oppetere velit, sed spe ductus non minus vitam amici, quam suam servandi. Attamen hoc etiam minime considerato, illud evidens est, quum homo pro Amico periclitante vitam periculo exponit, tunc ipsum defendendum suscipere Bonum Certum; quale est Amici vita. At in nostro casu toties dictum est,

Cer-

Certitudinem desiderari in tutante Scotisticam Sententiam, ac propterea in Prudentiam & Caritatem peccare, qui pro ea Certum vitae propriae bonum impendere velit.

Audiendus nunc nobis rursus est juvenis Theologus, dum pag. 32. tradit, Judicium Directum & Speculativum fallax esse posse, & nihilo secius Judicio Reflexo & Practico recte posse hominem agere. Falli possumus in adoranda Hostia non consecrata; in credendo probum, qui improbus sit, in eleemosyna danda ficto pauperi. Definire propterea laudabilis esse ac meritoria actio? Neutiquam. Ita quamvis Certum non sit, sed *Probabile dumtaxat, an Virgo sine labe fuerit concepta, ac Probabile propterea sit Speculativum Judicium: Judicium tamen Practicum*, affirmans, *Pium esse credere Virginis Immunitatem, Cerrissimum est, quum Certum sit illius obiectum*. Ita Theologus, qui etiam nos docet, Virtutum Moralium Obiectum licitum honestumque evadere posse, dum intellectui nostro tale appareat, quamquam revera tale in ipso non sit; quum contra in Virtutibus Theologicis necesse sit, ut Obiectum concipiatur ab Intellectu nostro, quale est in se; atque hanc doctrinam *apud omnes Theologos ille Cerrissimam* appellat. Non est mihi animus in quaestionem hanc divertere. Id solum habeto, non satis caute scriptum, doctrinam hanc ab universis Theologis tradi. Ut autem vides, eo se recipit Theologus iste, ut saltem a peccato excuset Voti Sanguinarii professores: quod sane parum emolumenti ejusdem sectatoribus videatur. Nam, ut is significare vult, etiamsi Certa speculative non foret Pia Sententia, & quamvis considerato in se Obiecto vita pro ejus tutela temere profusa videretur: nihilominus quia Obiectum illud intellectui appareret licitum atque honestum, practice culpa caret Votum Sanguinis, & Vitae jactura. Sed ne sic quidem justam excusationem commilitonibus suis Theologus iste parabit, neque ab eis culpam amovebit. Etenim ubi agitur de actionibus a Deo vetitis & in se malis, ut mitissime loquar, non sufficit per adhaesionem intellectus Obiecto illi ipsi reputare honestum, sive malitia destitutum; sed etiam accedat oportet *Ignorantia Invincibilis*, ita ut si dubitatio de bonitate seu malitia actionis occurrat, ac modus & tempus detur inquirendi, an revera Obiectum tale sit, quale intellectui apparet: tunc obligetur homo ad inquisitionem Veritatis, ne in errorem & peccatum incurrat. Inquirere autem nolens, aut negligens, sui que intellectus fallaciam praefraسته sequi volens, divino judicio se culpabilem reddit. In nostro autem casu quatenam, quaesio, Ignorantia Invincibilis adduci potest,

potest, praefertim a viris Theologiae cultoribus? Nemo est, cui lex Dei & Naturae ignota sit, nempe Vitam nostram servandam, neque temere profundendam sub gravissima poena peccati; hoc enim species Suicidii est. Rursus cuicumque si mente utatur, in mentem veniat oportet dubitatio, saltem ex quo mora lis est, an eandem vitam dare liceat pro tutela Piae Sententiae. Posita dubitatione, jam recedit Ignorantia Invincibilis, & subintrat Vincibilis, quae a culpa nequaquam excusat; tunc autem jubetur Christianus nulli diligentiae parcere, ac sincero corde, sublatisque amoris proprii consiliis, curare, ut Veritatem inveniat, ne in re tanti momenti, qualis est hominum vita, per imprudentiam fallatur. At cui sano intellectui (sit verbo venia) apparere unquam poterit, post adducta in examen quaestionis hujus momenta, & praefertim (quod tam facile est) consideratis Romanorum Pontificum hac de re decretis, adeo Certam esse Piam Sententiam, atque Certum est nos vivere, Vitamque nostram ex praecepto Dei & Naturae esse conservandam? Saltem dubitatio aliqua superfit. At haec una satis est ex regulis Theologiae, ut conscientia Certum sequi debeat, & crimen consequenter incurrat, si praeferre non Certum Certo pervicaciter velit.

Hisce positis, ad juvenem Theologum, atque ad tria ab eo producta exempla redeamus. In iis duo distinguenda sunt, scilicet id quod Certum est, atque id quod Incertum, sive tantum Probabile. Certum est Religionis Praeceptum de adoranda Hostia in incruento Sacrificio, aut in sacris supplicationibus venerationi omnium exposita. Contra non est Certum, an consecrata sit Hostia illa, sed Probabile duntaxat. Certum est Legis nostrae Consilium de facienda Eleemosyna, Certa sanctitas Voti de eadem Pauperibus distribuenda; Incertum contra, & dubium, an veri Pauperes sint, qui ad illam accipiendam accedunt. Denique Certum est Praeceptum Legis de non mentiendo, & de non temere judicando de Proximo, & eligendam potius esse mortem, quam temere judicare, sive mentiri; quum contra Certum non sit, an probum credens, qui improbus est, fallatur. Cur vero in tribus istis casibus homo recte agat, facile dignoscitur; ille enim semper secundum Religionis Praeceptum aut Consilium agit, de quorum Certitudine dubitare non potest; & nihil propterea refert, an falli possit aut fallatur contra spem suam in eo, quod Incertum Dubiumque est. At in nostro casu, quod inverso ordine homo operetur, Imprudens propterea & damnanda evadit illius actio; nam Praeceptum Dei de custodienda Vita Certum & Evidens ille violat,

violat, ut Incerta ac Dubia Ingenii sui phantasmata amplectatur, sive confirmet. Praecipit Deus, ne Vitam proiciias, cujus non tu, sed ille dominus est, non praecipit, ut tueare Sententiam Scotisticam, cujus Veritas adhuc latet. Licetne tibi contemnere Praeceptum, ut quod non praecipitur tuearis, atque Incertum praeferre Certo? *Domus ista tibi locata est, non donata*, inquit Sanctus Augustinus de Vita loquens Enarr. in Ps. 148. num. 7. Num obligare, aut dare illam tibi licet ad arbitrium tuum, ut incerti juris fundum tibi compares? Rufus Lactantius Lib. III. Cap. 18. ait. *Sicut in hanc vitam non nostra sponte venimus, ita rursus ex hoc domicilio corporis, quod ruendum nobis assignatum a Deo est, ejusdem jussu recedendum est, qui nos in hoc corpus induxit, tamdiu habituros, donec jubeat emissi.* Ad Ecclesiam decernere spectat, quando oporteat, vel liceat vitae periculum, ipsamve mortem incurere. At ecquando Ecclesia nos docuit, pro tutandis Opinionibus fas esse mortem eligere?

Piget me hisce subtilitatibus diutius detinere Lectorem, sed cogor denuo audire juvenem Theologum, quem nondum cedentem videre mihi videor. Inquiat ergo: Tu nuper laudasti finentem se interimi, ne mentiatur, neve temere judicet; & nihilominus fallax diximus illius judicium de homine improbo, quem probum credit. Ergo etiamfi daremus, fallax esse posse Judicium de Veritate Piae Sententiae, non falleretur tamen, qui pro illa tuenda postremum toleraret supplicium. Ita is, sed omnibus minime perspectis, quae longe dispares casus efficiunt. Recte agit pugione impetitus homo, & mortem eligens potius quam mentiri, aut temere judicare; nam in amphractu illo is Judicium suum Practicum mutare nequit, atque urget Religionis Praeceptum de non mentiendo, neque temere judicando. Sed ubi homini credenti probum, qui improbus est, congruum tempus relinquatur investigandae Veritatis, is ad hoc praestandum obligatur; & quoties debitae diligentiae desit, ut mortem effugiat, Suicidii reus erit. Casum nostrum nunc respice. Nemo ex iis, qui Piae Sententiae adhaerent, in angustiis positum se videt; omnibus liberum est, immo opus est, antequam vitam pro illius tutela voveant, diligenter investigare, Certane sit eadem Sententia, an Incerta, sive tantum Probabilis. Probabilem vero non Certam, dum examen instituunt rite & sine studio partium, deprehendent. Juvenis ipse Theologus pag. 33. *ci permette, che il suo oggetto sia solo Probabile*; quodque rem conficit, Decreta Romanorum Pontificum dubitare nos minime sinunt, quin Incertum adhuc sit hujusmodi My-

sterium. Hoc facto, quis Prudens Vitam Certissimum Bonum, neque suum, voveat pro Sententiae non Certae tutela? Et quei culpam Temeritatis, & fraudati domini sui effugiet? Attamen etiam si juvenis Theologus objectum nobis concedat uti tantummodo Probabile, is nihilo minus pag. eadem addit: *Judicium Praeticum affirmans: Pio è il credere, che la Vergine sia Concepita senza macchia: istud est Certum Certissimum, quum Cerrum sit illius objectum.* Ergo is fatetur, objectum Voti Sanguinariū esse, non jam credere absolute Virginem sine labe conceptam; sed duntaxat *Pium esse credere Virginem ab omni labe immunem fuisse.* Quibus verbis quid aliud jam agitur, nisi incautis illudere velle Lectoribus? Voventes Votum Sanguinariū interroga, aut illos, quibus ejusmodi Votum, tanquam mirabile arcanum devinciendae sibi Deiparae, proponitur. Ii fatebuntur non alium in finem illud concipi, nisi ut defendatur *Veritas* Piae Sententiae, & ut per Sanguinem paratus quisque sit ad praestandam illius Certitudinem, uti etiam quibusdam exemplis confirmavit Lampridius pag. 7. & 82. Verum ubi arctari se sentiunt ab iis, qui Votum improbant, dum Certitudinem hanc eis eripiunt, & *Persuasionis Certitudinis* nequaquam sufficere ad justificandam mortis electionem ostendunt: tunc ad anchoram *Pietatis* confugiant, fingentes, hoc unum esse Voti sui objectum, videlicet *Pie credere* Praeservationem Virginis in Conceptione: qua voce sperant ineruditis saltem iri satisfacturi, quando Apostolica ipsa Sedes *Piam* agnovit eorum Sententiam. Non haec ego repetam, quae Lampridius multa congestit Cap. V. & sequentibus, ut evinceret, nihil aliud esse *Pie credere* nisi *Opinari*, sive nisi credere, *Apparentiam Pietatis & Veritatis* in aliquo existere objecto; *Pietatem* vero *Opinativam* justum nobis non praebere fundamentum, ut pro ea vitam impendere liceat; haec enim duntaxat danda est, quum *Pietas Intrinseca* defendenda occurrit, hoc est ubi negare cogimur Propositionem quampiam, aut Virtutis opus, de quibus Fidei doctrina certos nos facit. Vigentibus adhuc Lampridii rationibus, frustra cantilenam hanc ingeminat juvenis Theologus. Quod si revera voventes hoc unum vellent, en quale foret eorum Votum. *Ego Pie Credo, idest Opinor, Deiparam sine labe fuisse conceptam, quum Pietatis & Veritatis Apparentiam in Credulitate seu Opinione ista deprehendam: Incertus tamen, an revera talis fuerit Deiparae Conceptio, & non sine formidine, me falli posse in hoc credendo, aut opinando. Proinde Voveo, me vitam libenter daturum, ut Credulitatem istam, sive Opinionem defendam.* Num prudens, num licitum

licitum huiusmodi Votum appelles? & quis umquam illud conciperet? Non pro Apparentia Veritatis, sed pro Veritate Certa ad Religionem spectante (iterum dico) iustum licitumque tantummodo est mori; neque ullum Ecclesiae Praeceptum aut Consilium adducas de subeunda morte pro Incerta Veritate. Parthenotimus ipse non semel fassus est, nefas esse pro *Opinione* mortem velle oppetere, addens pag. 15. *Nullum Theologorum* sibi occurrisset, qui secus senserit. Praeceptum ergo de custodiendo ingenti Bono Vitae semper recogita, nullumque jus nobis esse illius profundendae ad arbitrium nostrum: atque intelliges, non sine culpa impendi eam posse pro tot rebus & factis, quae *Pie* duntaxat in Ecclesia creduntur.

Dixerat Lampridius pag. 94. *Si forte Scristica Sententia errorem completeretur, nemo non videt, mortem tuam nihil operaturam, ut Sententia illa Vera fiat, Veritatemque, qua caret, per Sanguinem tuum accipiat. Cur ergo rem adeo pretiosam proicis, ut nihil consequere?* Suppositum hoc minime negat juvenis Theologus pag. 35. sed exempla nuper allata repetens, inquit: *Follie, follie. Non conseguirò, che l'Ostia diventi consecrata: che la Guerra sia giusta: che quel tale sia buono; ma non perciò lascierò di conseguire il merito di quell'azione virtuosa. Non v'ha bisogno d'altra applicazione.* Repetendum heic est, adorari Hostiam, non ea intentione, ut consecrata evadat; quae consecrata non sit; sed quidem ut fiat satis Praecepto Religionis de adoranda Hostia exposita in sacris. Audi Sanctum Thomam in 3. p. Dist. IX. qu. 1. Art. 2. *Qui adorat Hostiam non consecratam, adorare eam oportet cum conditione scilicet, si est consecrata. Non tamen oportet, quod haec conditio semper sit actu explicita, sed sufficit, quod habitu teneas illam. Unde non peccat adorans eam, quia non adorat puram creaturam, sed Christum secundum intentionem suam.* Neque mortis periculo sese exponit Miles, ut iustum probet bellum, quod fortassis injustum est; sed ut obedientiae erga Reges a Deo praeceptae satisfaciatur. Propterea utriusque laudanda est actio. Tertius vero mortem tolerat ne improbum dicat, quem probum credit, quia in eo conscientiae statu, & nullo sibi relicto temporis spatio ad Veritatis examen, parendum videt Praecepto eligendae potius mortis, quam mentiendi. Posito enim errore Conscientiae, ab invincibili Ignorantia procedente, tunc non solum minime peccat agens secundum Conscientiam erroneam, sed etiam secundum illam tunc ei agendum est. In nostro autem casu, praeterquam quod adduci in subsidium nequit Ignorantia Invincibilis, Voventium finis ac intentio est, Vitae suae

non parcere, ut probetur per eam Certitudo Sententiae Piae, five Persuasio Certitudinis in illa. Quod sane monstrum est, atque unum, si bene consideretur, prodere potest Sanguinarii Voti Imprudens & male sanum consilium. Certam enim vides ex una parte profusionem Vitae, quam sub Praecepto custodire jubemur, & consequenter Praecepti transgressionem. Ex altera vero habemus, ipso concedente juvene Theologo, etiamsi complura hominum millia sanguinem darent pro Scotistica Sententia, non propterea Veram Certamque illam evasuram, nisi Ecclesia praecedat, & rem suo firmet decreto. Ergo ingens damnum, nullumque fructum in Voto deprehendens, non Virtutis opus, sed Imprudentiae ac Temeritatis inventum illud appellare tandem cogeris. Praetereo nunc quae juvenis Theologus pag. 36. adfert de *Infallibilitate Ecclesiae*, quam quisque suspicit, ac de ipsa agnoscante *Piam* Scotisticam Sententiam: quod is satis esse arbitratur ad dandam Vitam pro ejus vocis tutela. Nam ubi, qualis sit vocis hujus vis in Theologicis Scholis, explices, ut jam diximus, nihil nisi *Apparentiam Pietatis* significat; & quum Ecclesia dicit, se aliquid *Pie credere*, eo ipso indicat, se rem Incertam relinquere, neque de illius Veritate aut Falsitate se velle quidquam decernere; & potissimum quod veret contrariam sententiam *Impietatis* ad *Erroris* arcessere. Redit igitur sermo semper ad illud, quod Ecclesia ipsa improbat, scilicet non licere mori pro Incerta assertionem Pia, quia Opinionem tueri velle Sanguine nostro, Temeritatis ac Imprudentiae facinus est. Quod si iterum is pag. 37. in scaenam exempla trahit, quae nuper inepta ad rem nostram vidimus; sique Scholasticis terminis *Objecti Materialis, & Formalis* ineruditos erudire se posse existimat: nihil mihi addendum est ad ea, quae ante disseruimus.

Praeterea scribebat Lampridius pag. 112. *Si aliquando Romana Ecclesia Fidei Dogmatis adjungeret Scotisticam Sententiam, quid ultra, quid majus faciendum Parthenosimo restares ad testandum se Divina Fide credere Sententiam eandem?* Ad haec juvenis Theologus pag. 40. respondet: *Si ere pure il buon Uomo. Allora in primo luogo non vi sarebbe bisogno di Voto, e senza d'esso sareste anche voi obbligato a dare per essa il sangue. In oltre il morire allora sarebbe atto di Fede, ed ora solo di Religione.* Tunc in me oculos figens Romanus Abbas inquit: Explica quaeso mihi, quid plena haec modestiae vox *buon Uomo* in loquela sociorum juvenis Theologi significet; vereor enim, ne plus ei energiae sit adversus Lampridium, quam quod prima fronte videtur. Ad ista ego subridens: Modus hic loquendi, aiebam, ne

vetu-

vetustis quidem Latinis ignotus fuit. Itaque perge in coepta pugna, & reliquias Latinae Linguae reverere. Heic ille dicere perrexit: Ut vides, minime inficias it juvenis Theologus, quin qui Votum Sanguinarium concipiunt, Dogmatis Fidei nunc aequent Scotificam Sententiam; nam non secus pro ista atque pro illis, parati sunt effundere Sanguinem, & mortem subire. At ego rursus insto: ferendumne est diutius in Ecclesia Dei, parem honorem haberi iis, quae a Deo revelata credimus, & iis, quae adhuc in Opinione hominum versantur? Verum, inquit juvenis Theologus, nonne videt Lampridius bonus vir discrimen, quod intercedit inter Fidei Dogmata, & praesentem Piam Sententiam? Pro illis Vita ex obligatione danda est, nec Voto est opus; pro ista sponte datur. Mori pro illis est *Actus Fidei*; pro ista *Actus Religionis*. Ita ille, qui se putat magnum aliquid dixisse, quum aut nihil, aut id quod in quaestione est tantummodo dixerit, & quidem eo ipso in loco, ubi ridet Lampridium. Nunc enim inter nos disputatio est, an pro tuenda Sententia, quae neque ad Fidem pertinet, neque Certitudinem continet, expendere Vitam liceat. Affirmat ille, negamus nos. Ille Actum Religionis istum appellat; nos Imprudentiae, seu Superstitionis. Commodum nimis est ad solvendos nodos eo ipso uti, quod adhuc in quaestione est. Praeterea quis unquam concedat, Prudens, & non Temerarium Religionis opus esse pro Opinionibus quanquam Piis velle mori? Ad haec animadvertendum, nos minime falli, si mortem appetimus pro tuendis certissimis Dogmatis Fidei, aut pro verae certaeque, immo & non levis Virtutis opere, aut ne contra Legem Sanctam peccemus, quia divinae Literae, & Ecclesiae auctoritas certos nos faciunt, tunc recte eligi ac tolerari mortem, quum majus Bonum, illudque Certum, cum Bono minori vitae nostrae commutamus. Tunc Praeceptum minus servandae Vitae cedit Praecepto majori confitendae Fidei, & Peccati evitandi. Dicat obsecro juvenis Theologus, qua auctoritate fretus de Vita, quae sua non est, disponit, licitumque sibi vovere mortem arbitratur pro Piae Sententiae tutela? Non sacras Literas, non Ecclesiam heic memoret sibi in ejusmodi sacrificio adstipulantem. Nul- lum heic Praeceptum dandae Vitae pro hisce quaestionibus Scholasticis; immo heic unum occurrit Praeceptum custodiendae Vitae. Nul- lus heic Peccati metus, sive hanc, sive contrariam amplectaris Sententiam. Quei ergo in casu isto liceat ei vitam prodigere, immo & hunc appellare *actum Religionis*? Immo *Superstitionis*. Quaecunque enim ad Religionem spectantia Pie tantum vera creduntur (innume-

ra autem heic habemus) si timorem errandi minime excludunt, Sanguine nostro velle confirmare tanquam Certa, nihil aliud est; quam Religionem Sanctissimam risui inimicorum exponere. Quenam est haec vestra Religio, tunc ii dicerent, in qua licere putatis Vitam, Bonum videlicet Certum, & non minus a Natura, quam a Religione nobis sub gravi praecepto commendatum, pro Incerta re perdere? Imprudentiae ac Temeritatis facinus mors vestra tunc esset, quando in his casibus nemo vestrum certus foret, num pro Veritate, an pro Errore in mortem rueret. In re tam gravi, qualis est Vitae iactura, vel solum periculum errandi vitare jubemur; & qui eidem sese ultro exponit, peccat. Vita hominum Certa res est, non Opinio. Illam dare pro Objecto, quod ab Opinione pendeat, parum sani capitis esse quis neget? Inficiamini, si potestis, quin Sententia vestra adhuc intra Opinionum septa concludatur, quando Tridentinum Concilium, & Pontifices Romani, quibus culmen auctoritatis desertis, contrariam Sententiam stare & vigere sinunt, neque illius sectatores improbant aut contemnunt. Ita illi. Quamobrem semper ea recurrit Conclusio, scilicet: Absurdum esse acquare velle Veritatibus Fidei, quae nondum fines excessere Opinionis, neque formidinem fallaciae excludunt. Simulque intolerandum esse abusum, Dei ac Naturae Praeceptum contemnere, morteni ex arbitrio nostro eligentes, nisi Certum Vitae Bonum cum Certo & majori sit commutandum.

Quod Lampridius pag. 114. scripserat, scilicet *per Sanguinarium Vetum Doctrinam ac Prudentiam Catholicae Ecclesiae irridendam hostibus nostris praeberi*: juvenis Theologus hac arte excipit. Rationes nempe pro Conclusionem ista a Lampridio adductas sicco pede transiliens, ad eum conversus pag. 40. ait: *Come avete mai senza scrupolo veruno potuto fare un Libro così ingiurioso alla Chiesa Romana?* Immo Lampridii Liber, & quae nos antea differuimus de Dissertatione Patris de Luca, tantum abest ut in injuriam Apostolicae Sedis cedant, ut praecipuum sibi scopum praefixerint ostenders peculiarem Prudentiam & Constantiam Romanorum Pontificum in controversia de Conceptione Virginis; proptereaque Sanctae Sedis hac de re Decreta atque doctrinam a Catholicis omnibus, atque ab ipsis Heterodoxis laudari debere, culpari non posse. Ita in ipsa Urbe aeterna judicant, qui masculum in mente & corde robur gerunt, atque unius studiosi sunt Veritatis, & honorem verum Ecclesiae supra cetera in tuto ponendum norunt. Addit ille: *Che avranno a dire gli Eretici, quando dopo le censure di Alessandro VII. contro a chi per qualunque*
Prete-

Preteſto ſotto qualunque Maſchera oſaſſe ſcrivere o direttamente, o indirettamente contro il Miſtero (hoc nomine unam ſcottiſtarum Sententiam ii appellare conſueverunt) leggeranno i Capi IX. X. XI. e XII. del voſtro Libro, ne' quali per abbatterne la CERTEZZA, tuſſi cercate di ſnerbare gli argomenti, ſu' quali ſi fonda? Gratiae habendae Cenſori ſincere tandem fatenti, eo collineaſſe totum Lampridii conatum, ut *Certitudinem* tributam Piae Sententiae nullo niti fundamento oſtenderet. Ceterum quod eſt ad ipſam Sententiam, eam cum Eccleſia Romana Lampridius centies Piam, & Probabilem agnovit. Inſuper pag. 203. non ei adverſari ſacras Literas confeſſus eſt; denique poſt Sanctorum Patrum loca adducta, a quibus contraria Opinio perſuaderi videtur, rationem quoque indicavit, qua ſcottiſtae ſe ab eorum auctoritate eximunt, admittendo in Deipara *Debitum Peccati originalis*. Proinde vel ipſi Haeretici, nedum Catholici, ſatis perſpiciunt, nihil deflexiſſe Lampridium a mandatis ac mente ſummorum Pontificum. At is *Certitudinem* impugnat. Utique, & ſidentiffime; quum hoc ipſum ad mentem procedat ipſius Apoſtolicae Sedis, quae Incertam haecenus reliquit huiusmodi Quaestionem, illam dirimere nolendo, & praecipiendo, ne quiſquam *Erroris*, aut *Impietatis* contrariam Opinionem, ejuſque ſectatores Peccati inſimulet. Nihil ergo mirentur Haeretici Lampridium ſic agentem; ſed quidem mirabuntur Catholicos illos, qui Vitam ſuam obligare, & prodigere audent pro tutela Scholaſticarum Opinionum, quarum inconſperta adhuc eſt Veritas; atque Imprudentiam, fortaliſ etiam Fanaticiſmum ac Superſtitionem nobis obijcient: quod probrum Lampridius a Romana Eccleſia avertit, atque a tot Populis, qui ab iſto Sanguinario & inconſulto Voto abſtinent, aut abhorrent. Poſt haec juvenis Theologus, birtutum ſuper caput ſuum manu fortiter premens, erectoque vultu ita Lampridium alloquitur: *Cbi ſiete Voi, che Uomo privato abbiate a ſacciare d'Imprudente, di Temerario, d'Intollerabile, di Dannevole un Voto fatto da Ordini Equeſtri, da Governatori di Provincie, da Città, ſapendolo Roma, che che voi v'ingiaſſe l'oppoſto, e tollerandolo?* Non aegre feret Lampridius, ut puto, ſi pro eo reſponſum ad huiusmodi interrogationem dabo. Nihil aliud eſt Lampridius, niſi triobularis homo, ſed qui nulli factioni addictus, quanto poteſt ſtudio Veritatem ubique venatur, ad tuendum decorem Eccleſiae atque doctri-nae Catholicae, quantum ſuae vires ferunt, praecipue animatus. Unicuique autem in Chriſtianorum Republica juſ fuit, ſemperque erit, ſi quam Opinionem a Dogmatis ſanctae Religionis diſſonam oſſendit,

in eam infurgere. Commune enim Bonum est germana Ecclesiae Doctrina, Commune Bonum Veritatis tutela. Jam nosti, ante annos multos Lamindum Pritanium, sive Lampridium, Voto Sanguinario litem, sed obiter, intentasse in Libro *de Ingeniorum moderatione*. Siculos quosdam, aliosve eorum commilitones tunc is minime cogitabat; neque enim illos noverat Sanguinario Voto constrictos. Unus facer Orator, qui ad magnanimum idem Votum amplectendum Mutinenses fuerat hortatus, nullumque ex iis, quanquam Devotione erga Deiparam aequae ac ille ferventibus, sibi obsequentem invenerat: causam praebuit Pritanio improbandi ejusdem Voti, uti imprudenter ac temere concepi. Nihil ultra additurus is erat, incultaque jacuisset hujusmodi controversia, nisi Parthenotimus Siculus justo Libro typis edito in aciem prodiiisset, Votum hoc vindicaturus. Poterat ille Siculis paucis, aut multis idem voventibus, privato aliquo scripto, aut praedicatione consulere: ea ratione ulteriori pugna opus minime fuisset. At quando is universae Christianorum Reipublicae veluti legitimum hoc Votum probandum, simulque suadendum suscepit: hinc natum Pritanio, in Lampridium postea converso, Opusculum *de Superstitione vitanda*. Si iis vitiis Votum & doctrina Parthenotimi revera deformatur, quae Lampridius in eo deprehendisse sibi videtur: eratne dissimulandum vulnus hoc, qualecunque sit, infictum Ecclesiae? At homunculus est Lampridius. Non abnuo. Tu non illum respice, sed ejus argumenta atque rationes expende. Si ex istis forte conficitur, intolerandum esse Votum: quid refert, veniatne iusta Censura ab homine nullius pretii, an ab illustri alicujus Dignitatis viro?

Certe neque aliquot Ordines Equestres, neque Siciliae Praefides quidam, neque unus & alter Episcopus, Voto huic, ubi temeritate laboret, quidquam praesidii conferre poterunt. Fortassis etiam dubitare licet, num Ordines aliquot Equestres, aliique dum vovent, se Immaculatam Conceptionem tutaturos *usque ad mortem*, tutelam hanc polliceantur, dum vixerint, an sint suam vitam pro illa daturi. Quod postremum ubi statuas, restaret ut ensiferi illi viri armis correptis pro Conceptione duellum sive pugnam inirent, & adversarios necarent: quod Voti Sanguinarii reatum mirifice augeret. Certe fertur, eos putare munus suum ensen evaginare, si quando a quoquam audirent negari Immaculatam Deiparae Conceptionem. At Roma, inquit juvenis Theologus, *Voti istius conscia est, illudque tolerat, quamquam se contrarium credere fingat Lampridius*. Contra rerum periti norunt, nihil Sedi Apostolicae notum dici, nisi quod rite & juridice ad supremum

premiū ejus Tribunal deferatur. Si quando accidat, ut ad ejus Dicasterium controversia hæc deferatur, tunc constabit, sitne Roma toleratura, an explosura hoc paucorum Votum, a quo abstinet Roma ipsa una cum tot aliis Religionis Catholice Provinciis, immo & abstinent innumeri doctissimi ipsius juvenis Theologi sodales, qui non minori tamen Devotione, quam Siculi, Virginem Sanctissimam prosequuntur. Quanquam quid ajo? Pro Lampridio heic Sanctus Augustinus responsum dabit, dum inquit Epist. LV. olim CXIX. Cap. 19. *Ecclesia Dei inter mulsam paleam, mulsamque zizaniā constituta, multa tolerat: & tamen quæ sunt contra Fidem, vel bonam vitam non approbat, nec tacet, nec facit.* Seu potius, uti habent plerique Codices manuscripti, testibus Benedictinis Sancti Mauri: *Et tamen quæ sunt contra Fidem, nec Bonus approbat, nec tacet &c.* Jam vidisti concessum Lampridio a juvene Theologo *Boni viri* nomen; concedat ergo ei quoque opus est, ut vitiosum credens hoc Votum, neque illud approbet, neque taceat. Si fides postea eidem Theologo pag. 41. accommodanda est, antequam censuram Voti Lampridius iniret, consilium Sancti Bernardi in Epist. 174. ad Canonicos Lugdunenses amplecti debebat, hoc est: *Si sic videbatur, consulenda erat prius Apostolica Sedis auctoritas.* Neque videt ingeniosus iste Theologus, non Lampridio præbendum fuisse consilium istud, sed quidem iis, qui primi Sanguinarium invexere Votum. Agebatur tunc, non jam de Festo aliquo instituendo, quod Probabilibus tantum de causis institui potest; sed de profundenda, sive obliganda ad tormenta atque secures hominum Vita, & ad tolerandum Malum, quod omnium temporalium teterrimum est. Agebatur de Novitate Opinionis & moris, cujus vestigia nulla erant in tot præcedentibus Ecclesiæ Saeculis, idest de morte subeunda pro tutela Opinionis, sive Sententiæ, quæ non solum Fidei, sed cujuscumque alterius Certitudinis genere caret. Decernere de Vita hominum estne res parvi momenti? Immo nihil majus in Religionis rebus præstari potest, quam Vitæ nostræ Sacrificium. Hicce ergo Novatoribus consulenda erat Apostolica Sedes secundum Deuteronomii præceptum: *Si difficile & ambiguum apud te judicium esse perspexeris, venies ad Sacerdotes, & ad Indicem, qui fuerit illo tempore, qui indicabunt tibi judicii veritatem.* Secus agendo timendum eis erat, ne forte zizania pro tritico in Ecclesiæ agros importarent. Sed ii a natis paulo antea quibusdam imposturis decepti, & nihil ultra quaerendum rati, neglecta auctoritate Sedis Apostolicæ, vitiosum peperere Votum; immo in eum finem pe-

perere, ut vel absque Sanctae Sedis decreto appareret, diremtam fuisset controversiam, simulque Sancta Sedes ad illam dirimendam adigeretur. Suis ergo consilia haec adhibeat juvenis Theologus, non Lampridio Theologos quosque imitanti, qui dum in Opiniones incurrunt, quas perverfas putant, libero calamo illas infestantur, & quantum possunt proscribunt. Denique idem sibi suisque ante oculos statuatur ejusdem Sancti Bernardi praecedentia verba in eadem Epistola: *Nulla ratione Virgini sanctissimae placebit contra ritum Ecclesiae praesumpta Novitas, mater Temeritatis, soror SUPERSTITIONIS, filia Levitatis*. Ubinam unquam Ecclesia probavit Vitae sacrificium pro tutela Opinionum? Si pro Novitate Festi Bernardus tantopere est indignatus, quid contra Novitatem Voti Sanguinarij non dixisset?

Lampridium male rationes inire, contendit juvenis Theologus pag. 42. quod: quum singulari divinae Gratiae auxilio sit opus ad in-eundum Martyrium pro Catholica Fide, promissum hoc a Deo auxilium sua Dogmata consentientibus coram Tyrannis, inquit minime sperandum iis, qui vovent Votum Sanguinarium, quando Votum illud sine divinarum Literarum, aut Ecclesiae suffragio, immo saltem tacite contradicente Ecclesia, concipiunt. Nam inquit idem Theologus: *Dio non mancherà di fortificare colla sua Grazia, chi per una Virtù incontra la Morte; e massime per una Virtù, che abbia per base l'infallibilità della Chiesa nell'approvare una Sentenza, che a Misteri della Religione appartenga*. Animadvertite primo, quam aequivo-ca, & ad fallaciam composita sit assertio hominis scribentis, probatam fuisse ab Ecclesia Scotisticam Sententiam. Uti *Piam* tantummodo agnovit Apostolica Sedes Sententiam illam, hoc est in ea deprehendit tot lineamenta Probabilitatis, eamque Apparentiam Pietatis, ut illam tueri voce & scriptis liceat, ac secundum eandem Sententiam laudabile sit celebrare Festum Conceptionis; nunquam vero illam uti Veram Certamve probavit. Secundo alteram aequivocationem habes in mentione heic facta *Infalibilitatis* Ecclesiae. Ea procul dubio falli nescia est, quum res statuit ad Doctrinam aut Disciplinam, quae a Revelatione Dei sive per sacras Literas, sive per legitimam Traditionem ad nos venit. In reliquis Infalibilitatem minime sibi tribuit, sed per Prudentiae & Sapientiae suae lumen eadem regit atque praescribit. Et re ipsa in laudanda uti *Pia* ac Probabili Scotistarum Sententia; in instituendo aut probando Festo secundum eandem Sententiam: non Infalibilitatis suae privilegio usa est Sancta Sedes, sed quidem Prudentiae. Quod praecipue elucet ex reservato sibi jure

de.

decidendi, Verane sit, an Falsa eadem Sententia, & ex Anathemate indicto audientibus contrariam Opinionem Erroris & Impietatis arguere, & dum indicens Festum neminem cogit ad illud celebrandum secundum unicam Scotistarum mentem. Succedit tertia aequivocatio praecedentibus longe gravior, & sub cujus umbra evadere se posse tandem confidunt, qui Sanguinario Voto sese obstringunt. *Pro Virtute*, sive *pro actu Virtutis nos Voventes moriemur*, ajunt. Quanto sophismate laboret hujusmodi effugium, paucis accipe, atque huc aciem mentis tuae plus quam antea convertas velim. Nollent agnoscere Theologi isti, dari *Pietatem Opinativam*, & quale inter eam, & *Pietatem Intrinsecam* discrimen intercedat. Sed meridiano Sole clarius est, aliam esse Pietatem, cujus objectum sit aliqua Certissima Veritas ad Fidei dogmata spectans; atque aliam, cujus objectum sit aliqua Opinio. Utraque profecto est Virtus, donec Prudentiam comitem habet, ac Prudenter se gerit; deficiente enim Prudentia, Virtutes omnes in Excessum ac Temeritatem damnabilem declinare possent. *Intrinseca* ipsa *Pietas* excessibus & Imprudentiae obnoxia est; sed quoties cum debitis circumstantiis Mortem potius eligit, quam negare quae ad Fidem spectant, Prudenter operatur; immo aliter agere prohibetur ex evidenti doctrina Evangelii & Ecclesiae; nos enim gravissimum a Deo Praeceptum de morte tunc subeunda habemus, gravissimumque Peccatum foret negare Fidei Dogmata. *Opinativa* vero *Pietas*, quandiu consistit in tuendis pio affectu, & voce, & calamo, quae in Probabili Pia Opinione versantur, laudanda Virtus est, quia Prudenter agit, sufficientibus nempe motivis ad id operandum adducta. Etiam si in objecto suo falli possit, nullum tamen per hoc Praeceptum Dei violat, & nihil detrimenti ex eo Errore plerumque redundare potest in Ecclesiam. Verum ubi *Pietas* ista *Opinativa* eo progredi velit, ut Sanguinem & Vitam dare eligat pro ejusdem Opinionis tutela: in Excessum continuo rapitur, in Imprudentiam, in Temeritatem; & quae antea Virtus erat laudabilis, in Vitium convertitur, & vitiosa ac damnabilis *Pietas* esse incipit. Falsum est, Mortem heic eligi pro *Pietate*. Sophistica ars saltum hunc latentem a Veritate ad *Pietatem*, sive ad *Virtutem*, adinvenit. Illud verum tantummodo est, *Pietatem Opinativam* eam esse, quae temere & erronee pro tuenda Veritate Incerta, perperam ducta fallaci Persuasione de Certitudine illius, eligit ruere in mortem: quod omnino pugnat contra Prudentiae leges; neque enim morte nostra fieri unquam poterit Certum, quod Incertum est; simulque pugnat contra divinum

Praeceptum de Vitae nostrae custodia. Ac propterea qui pervicaciter illud violare vult, quanquam monitus de Incertitudine Objecti, & de fallacia Persuasionis: Temeritatis, Imprudentiae, & Peccati notam incurrat oportet. Neque huc trahendus *Honor Deiparae*, pro quo sibi persuadere possunt Piae Sententiae patroni, sibi licitum occumbere. Nam Opinativus est etiam hic *Honor*, & in Opinionem resolvitur. Quis enim Certum te facit, nisi Ecclesia hoc statuatur, Deo olim placuisse, quod tu nunc ex solis conjecturis imaginaris, & Apparentiam duntaxat Veritatis, non Veritatem ipsam secum gerit? Illud tantummodo honorificum Virgini Sanctissimae fuisse censendum est, quod decreta divina voluerunt; neque profecto Dei Matris Honorem minuunt, quicumque illius *Sanctificationem* tantummodo credunt, & Ecclesia minime reclamante aliam a Scotistica Opinionem fovant. Dejecto igitur Sophismate supra decantato, ad quod veluti ad anchoram sacram confugiunt Voti Sanguinarii affectae, jam tandem intelligis, ad ejusdem Voti Temeritatem damnandam nobis esse procedendum.

Aggrediamur nunc pauca, quae restant. Dixerat Lampridus pag. 117. *Si Martyrio sese offerre temere, & absque iusta causa, vel quum agitur de Veritatibus Fidei propugnandis, a Sanctis Patribus improbat: quanto minus licebit pro Scotistica Opinione duntaxat Pia? Ut male compactum argumentum hoc ostendat juvenis Theologus, alterum ipse efformat, inquit: Non è lecito presentarsi senza giusto motivo ad un Tiranno per la difesa della Fede: dunque molto meno è lecito obbligarsi a morir per la Fede.* Neque perspicit ille, ideo licitum ac laudandum esse Votum de morte subeunda pro Fide, quia ipsius Fidei doctrina certos nos facit, futurum id Deo gratissimum. At quandonam Catholica Fides nos docuit, placere Deo sacrificium Vitae pro tutandis tantum Opinionibus? Immo fatentibus ipsis adversariis, pro Opinionibus occumbere velle flagitium est. Ad haec inter eas rationes, ob quas Sancti Patres Temeritatis arguebant sese ultro offerentes Tyranno atque suppliciis, non ultima illa fuit, ne Fideles contra divinum Praeceptum Vitam perderent, quum conservare possent. Tum solum ejus iactura ferenda est, quum Fidelem invadit necessitas aut abjurandae Fidei, aut Mortis tolerandae. Proinde hinc dicas, quanti conservationem Vitae facerent Sancti Patres, quando Tentationem Dei reputabant illam sponte in discrimen adducere, vel quum agebatur de testanda divinatorum Dogmatum Veritate. Atqui ne nos quidem, inquit juvenis Theologus, pro Pia Sententia offeremus nos Tyranno, sed placide expectabimus minitantem nobis tor-

men-

menta & postremum exitium. Neque considerat, multo vehementius detestatur fuisse Sanctos Patres Sanguinarium Votum, quia per illud sine ulla necessitate obligant se Fideles ad dandam Vitam, quotiescumque Tyrannus eos ad deponendam credulitatem de Veritate aut Certitudine Piae Sententiae adigat. Nulla heic, inquam Necessitas, nullum Praeceptum de credenda ac tutanda hujusmodi Sententia, eoque minus de impendenda Vita pro illa. Et contra militat Praeceptum de non danda Vita, nisi quum necessitas urget Fidei tutandae, aut Virtutis Intrinsecae, sive ad Fidem spectantis, sive gravissimo Ecclesiae Praecepto commendatae, inter tormenta servandae causae. Quid ii praeterea dicerent, animadvertentes destinari sacrificium Vitae non pro Dogmatis Fidei, sed pro adhuc Incerta Sententia, quod idem est ac dicere pro Opinione? Et quodnam quaeſo praesidium a Deo sibi polliceri quisquam possit ad toleranda tormenta, mortemque subeundam pro Opinione, quando Tentatio Dei est habita vel ipsum offerre se Tyrannis sine necessitate, quanquam ageretur de tutela caelestis doctrinae? Si consecraria haec nequaquam discernit juvenis Theologus, aut se minime discernere fingit, non irascatur, si eum malae causae patronum quisquam appellet. Reliqua vero, quae is adtexit in Epistola II. in contemptum praecipue Lampridii, utpote verba, nihil opus est recensere. Nulla pariter confutatione indigent, quae pauca is habet in Epistola III. summis tantum labiis prolata, de Sanctorum Patrum, aut veterum Theologorum locis ab eodem Lampridio memoratis, ad unice persuadendum, eximi non posse Deiparam a *Debito Peccati originalis*. Ne is quidem ejusmodi exemptionem disertis verbis tribuere audet Virgini Sanctissimae. Optasset tamen, ut quae Granadus & Salazar attulere ad ea loca interpretanda, Lampridius ad examen revocasset. Sed quum innumeri Theologi, & Salmaticenses in primis, ex iis & aliis locis *Debitti* ejusdem necessitatem concordi calculo deduxerint: terendumne erat tempus in re dilucida, & tot insignium Virorum suffragio probata? Praeterea quia Sanctus Augustinus non semel dixit *Solum Christum sine peccato Natum* esse, infert ex hac forma loquendi contendere quemquam posse, Deiparam quoque in peccato Natam fuisse. Haec ille, ignorare se fingens, interdum *Natum* pro *Concepto* accipi: quod ipse Augustinus, uti alias monuimus, ipsius Evangelii auctoritate confirmat, atque ipse Pater de Luca sincere confessus est.

Denique, ut alia nullius momenti omittam, consisto in postremis illius verbis, quibus Lampridium alloquitur: *Vi ricordo solo, che*

la gran Vergine Madre non è il Petrarca, sicchè ne' Pregi di Lei, e sul suo Culto possiate far da Censore con quella libertà soverchia, con cui scherzaste su i Sonetti del primo. Quantum a Petrarcha differat Virgo Sanctissima, quis nisi demens ignorat? Quis sine injuria memorem tanti discriminis Lampridium faciat? Quod tamen in primis dolendum est, non videt juvenis Theologus, se nihil aliud agere sophisticis hinc terculamentis, quam irretire incautam gentem, & sub umbra Pietatis patrocinium suscipere cujuslibet Erroris & Excessus, qui in veram Christiani Populi Pietatem irrepere possit? Ad Lampridium quod attinet, is cuncta Deiparae vera privilegia, & minime dubias praerogativas veneratur, laudat, depraedicat. Ipsam quoque Scotilicam Sententiam Piam, Probabilemque ubique agnoscit, concors in hoc cum Apostolica Sede, quae hoc unum in ea agnoscit. Culpandumne quisquam eum dicat, qui cum Sancta Sede Magistra nostra sentit? Fortasse juvenis Theologus praeterea exigit a Lampridio, ut Certam quoque credat eandem sententiam, & licitum pro ea sacrificium Vitae appellet? Verum non hoc docet, non istud credit Apostolica Sedes; & ubi solida sint Lampridii argumenta non sacrificium Deo & Virgini gratum, sed superstitionem Deo ac Virgini prorsus invisam in eo Voto fateri opus est. Decipit ergo se ipsum, & alios Theologus iste, dum venditat, Censuram Lampridii adversus Virginis Honorem ferri, quum unusquisque intelligat, ab ejus argumentis unum impeti Votum Sanguinariū super somniata Certitudine Sententiae fundatum, hoc est perniciosum consilium prodigendae Vitae pro tutela Opinionis illius; ac proinde non laedi quidquam de veris Deiparae ornamentis, sed quidem duntaxat incusari nimiam voventium confidentiam, Novitatem atque Excessum. Uti toties diximus, non laedunt Honorem Virginis, qui eam tantummodo in Conceptione Sanctificatam credunt. Si laederent, jam improbati, jam damnati ab Ecclesia fuissent. Quanto autem innocentior Lampridius, qui minime negat, quin Deipara fuerit a macula Immunis, & hoc unum contendit, nihil Certitudinis in Pia Sententia deprehendi, ut a Voto temere suscepto Fideles avertat? Quamobrem monendus iterum est juvenis Theologus, non esse statuendam Religionem in Phantasmatibus nostris, uti Sanctus Augustinus aiebat, & declinare posse ex hominum vitio sive defectu Pietatem ipsam in Anomalias & Excessus non paucos, quos indicare in Dei gloriam, & decus Ecclesiae redundat. Atque utinam naevos ejusmodi nunquam offenderemus in scri-

scriptis, in Panegyricis Orationibus Virginalis & Sanctorum, aut in aliis Christianae plebis utibus. Dicat iste Cenfor: suntne ista ferenda, laudanda, an potius improbanda, & si fieri potest eradicanda? Si eum audimus, invidia creanda est ejusmodi Cenforibus, quod Deiparae, quod Sanctorum gloriae & Honori aut invideant, aut adversentur, quanquam exploratum sit, non contra Sanctos, sed contra corruptores Pietatis sit bellum. At qui sapienter judicant, qui veram Pietatem discernunt, exercent, & docent, quales innumeros ipsius juvenis Theologi socios ego agnosco atque suspicio, eos bene mereri de Christiana Republica fatentur, qui ejusmodi Excessibus obstant. Quid? quod vel ipsa sacra Synodus Tridentina idem cupit atque summopere commendat. Nam postquam statuit, quid credendum sit de veneratione & invocatione Sanctorum. Sess. XXV. Cap. II. haec subdit: *In has autem sanctas & salutare observationes, si qui abusus irrepserint, eos Provisus aboleri Sancta Synodus Vehementer Cupit; ita ut nullae falsi dogmatis imagines, & rudibus periculosi erroris occasionem praebentes, statuuntur.* Abeant ergo deceptoriae juvenis Theologi querelae, & melioribus armis, si potest, pro Sanguinario suo Voto decertet. Non heic agitur (rursus inclamare cogor) de Virginis Honore, cujus Certissima Merita ac Praerogativae, ut aiebat Sanctus Pius V. P. M. in Bulla *Super specula*, ubi hac de re loquitur, *ne Angelica quidem lingua satis referri possunt.* Agitur de Vita hominum, re scilicet summi momenti, quam prodigere nemini unquam licebit, dum intra fines Opinionum Pia sententia verferur, ne forte pro Falstrate mors eligatur. Agitur de iis, qui ut idem Sanctus Pontifex subdit, *Simplicium animos Indiscretas Devotionis obtentu, vel potius loquacitatis & ostentationis affectu, ad Votum Imprudens, ad superstitiosum Sacrificium impellunt.* Nullo labore, vultuque ridenti concipitur hodie hujusmodi Votum a plerisque, momenta controversiae istius omnino ignorantibus, quia verbis tantummodo Vita, idest res tanta obligatur, nullo vel minimo metu promissa solvendi. Si Tyrannus adesset, si tormenta & secures instarent, tunc vel ipsum vulgus vim sentiret Lampridianae Censurae, & nemo fortasse foret, qui vitium Voti, aut Ignorantiam non caussaretur, Vitaeque suae ex Praecepto Dei servandae, neque proiciendae, sollicitus non prospiceret. At nunc, ne expectato quidem Tyranno, ad doctos viros pertinet, deposito cujusque factionis studio, intime in hujus Voti viscera penetrare, & quid de eo statuendum sit edicere. Si Certam, non fallaci Persuasione duntaxat, sed re, praestare possumus Piam Sententiam,

tiam, victus est Lampridius. Si hoc deest, neque pro Pietate Opinativa, five pro Opinionibus tutandis Vitam dare licet, Lampridius vicit. Judex interea erit Theologorum eorum chorus, qui nulli factioni nomen suum dedere; atque utinam Judicium hoc arriperet ipsamet Apostolica Sedes. Tunc eluceret, num in Lampridium, an in Voti Sanguinarii patronos, coniiciendum sit effatum hoc Senecae Lib. 2. Cap. 9. de Ira: *Inter cetera mortalitatis incommoda & hoc est, caligo mentium; nec tantum necessitas errandi, sed errorum amor.* Atque in haec verba desivit Romanus Abbas, quem tibi quoque, mi Azevede, loquentem exhibui. Vale

Neapoli VI. Id. Novembr. MDCCXLI.

Egregio, atque inter paucos amico viro Gregorio de Azevedo Valdesius Sal.

EPISTOLA OCTAVA.



ARBITRATUS forte fueris, mi Azevede, respirasse aliquantisper Antonium Lampridium post tres Literas adversus eum scriptas, de quibus antea longum ad te sermonem habui. Sed aestuantibus nimium animis adversariorum, brevi spectandum heic se praebeuit nova quaedam Epistola, ad eruditum Equitem scripta, ac Panormitanis typis edita. Auctor illius uno folio rem conficit, tamque gloriosum militem sese prodit, ut inflatis buccis edicat, *che per gistare a terra la gran macchina del Libro d'esso Lampridio, è più che sufficiente uno scarso foglio.* Felicissima profecto ingenia Siculum solum parit, & egregios Theologos; an autem inter eos numerandus sit Auctor Epistolae hujus, tute judicare poteris, ubi Epistolam ipsam legeris, cujus exemplum ad te mitto. Injucundum tamen fortasse tibi non erit rescire interea, quae egomet hac de re accepi a Messanensi quodam nobili amico meo, proxime praeterita aestate Panormi versato. Non postremus est ille in eruditionis amore, & quum controversia de Voto Sanguinario ferveret, enixe curavit, ut dignosceret, quae identidem ea de causa Panormi accidissent. Is ergo mihi narravit, quam plurimos in ea Civitate pro Pia Sententia stare, quod fane laudandum; sed neque deesse Theologos a Voto Sanguinario alienos. Suppressa ibi, quoad fieri potuit, Lampridiani Libri exempla; verum

ex

ex quo innotuere varii clamores, diversa judicia, hinc laudes clandestinae, inde irae in propatulo, & contumeliae in Lampridium erupere pro vario hominum studio. In secretum ergo Consilium coiere quadam die praecipui Voti hujus patroni, deliberaturi, quid heic agendum foret. Erant qui suavis cachinnis Lampridii ineptias flocci facerent; prudentiores vero vultu serio, & continenti silentio, fati fatabantur, non tam facilem esse certamini eoque minus victoriae locum, neque contemnenda arma Lampridii. Post longam consultationem itum in vota, atque statutum, ut *P. Candidus Parthenosimus*, doctus sane & veteranus Theologus, suam, communemque causam novo Libro protegendam susciperet. Interea vero ne animum desponderent, aut defectionem inirent Voti fautores, visum fuit, brevi aliquo Libello Italice scripto contineri posse vulgus in fide, si in suspicionem vitatae Religionis adduceretur Lampridii nomen. Jansenianis erroribus infectum appellare in promptu erat, consueto jandiu dicterio in quemlibet sibi quacunque de causa adversantem. Is Honori Deiparae infensus, is adversus illius Cultum blaterans. Per plateas, per compita notam hanc inurere Lampridio, certus gradus videbatur ad omnem ei fidem abrogandam. Forte illultris quidam & eruditus inter Primores Messanenenses per eos dies Literas dederat ad unum ex Panormitanis commilitonibus, petens, quid de Lampridii Libro sentiendum foret. Visi sunt Superi occasionem hanc obtulisse, qua posset Panormitanus in rescribendo probra quae vellet conicere in Lampridium. Jamque formidanda Epistola ad proelum parata erat, atque imminentem ignem expectabat Bomba supra mortarium imposita: quum ad aures illius Scriptoris quidam accedens: Nondumne, ait, accepisti, alienum adeo a Jansenii castris esse Lampridium, ut etiam adversus illum militaverit, ac Libros *Lescii Crondermi*, hoc est D. Celsi Cerri Abbatis Canonicorum Regularium Salvatoris, & *Francisci Dirayssi*, adversus Jansenium exaratos, in lucem ediderit, fati longa Praefatione sua exornatos? Risum vel a severioribus excutias, ubi foedus cum Jansenistis Lampridio obicere audeas. Ad hanc vocem soluta est machina, animique converfi ad aliam fraudem concinnandam.

Itaque utile rursus censuerunt spargere in vulgus, Lampridium pro Theologo minime habendum, eumque ne in limen quidem Theologiae unquam penetrasse. Nullam propterea imperito homini, & manus in alienam messem temere immittenti, fidem esse habendam; auscultandos heic tantummodo veros & doctissimos Siciliae Theolo-

gos, quorum est in rebus ad Religionem spectantibus erudire Populos, non corvum inter olores crocitare ausum. Omnium suffragium tulit consilium istud, atque ad illud complendum festinabatur, quum prudens unus e fociis superveniens, & quid agitatum fuerat audiens: Consectaria, inquit, consilii hujus attentius quaeso considerate. Si forte contingeret (quod tamen vix crederem) ut in isto agone pars nostra succumberet, nonne in majus nostrum, nostraeque Scientiae dedecus illius victoria verteretur, quando a non Theologo nos Theologi vinceremur? Itaque praestat id nominis ei minime negare; conatus vero omnis futurus est in deliciendis, & si quisquam etiam mavult, in irridendis illius argumentis: a quo tamen postremo, si me auditis, abstinendum quoque erit, quum honestior semper pugnandi ratio sit eligenda. Tum addidit: Exciditne vobis e mente, quod hoc ipso anno nuntiatum nobis est de celebri controversia, an cum usu carniū Jejunium conjungi posset, sive conjungendum a non aegrotantibus foret? Istam quidem Mantegatius Placentinus excitavit, at in ea quoque noveritis immixtum fuisse Lampridium, cujus Votum pro Mantegatii sententia prodit. Ambos virulento scripto nonnulli Theologi exceperunt, atque inter alia a Lampridio *Theologi* nomen abjudicarunt. Acrius deinde invaluit proelium succrescentibus hinc inde copiis. Sed arma cessere, postquam Sanctissimus Pontifex BENEDICTUS XIV. summa sapientia, summo zelo atque doctrina, sententiam Probabiliorē, quae Mantegatii & Lampridii fuit, ineluctabili suo Decreto firmavit. Hinc discite. Theologum facit non nomen, non vestis, sed quidem accurata veri inquisitio, & pondus rationum. Et sane ridendi sunt, si qui sunt, apud quos nihil est nisi larva Theologi, quicumque non fuit *Baccalaureus, Licenciatus, Doctoratus, Magister, Lector, Exlector*, aut *admodum Reverendus Definitor*; sive quicumque ad omnem disputationem adhibere non noverit formidandas illas voces *Formaliter, Transcendentaliter, Virtualiter, Cerritudinaliter* &c. & promptus non sit ad quamlibet Quaestionem, proposita poena constitendi sese indoctum, & nullius pretii hominem, nisi eam magistraliter dirimat. Longe quaeso abeamus nos ab hujusmodi ludibriis; atque his distis conticuit. Nova igitur ab iis deliberatio habita, atque omnium vox fuit, traducendum esse Lampridium uti hominum anathemate perculsum. Saltem credulae plebi horrorem incutiet hujusmodi fragor, exciderque una cum Libro nimis invalescens fama Lampridianae Censurae. Tradita aeternum typis Epistola, sparsaque per Panormum illius exempla, e quibus etiam

etiam non pauca ad praelaudatum Magnatem missa fuere, ut Messanensium quoque Civium animos in foedere confirmaret. Quod profecto mirabere, ajebat Messanensis amicus, tantum absuit, ut Epistola haec in Voti Sanguinarii tutela Magnatem ipsum, & complures alios antea vacillantes continuerit, ut eos in contrariam sententiam potius impulerit. Eventus hujus testem habeo ipsius eximii viri Responsum ad Epistolae Auctorem, cujus exemplum post multas preces ab eodem impetravi. Ego heic enixe rogare Romanum amicum, ut ejus legendi copiam mihi faceret. Quum is postero die Responsum illud ad me misisset, rapido calamo omnia descripsi, & nunc ex Italico in Latinum sermonem a me conversa, tibi quoque, mi Azevede, legenda exhibeo.

EPISTOLA.

Illustrissimi P. de A. ad Patrem I. P. &c.

ADmodum Reverende Pater, Domine semper colende. Epistolam Reverentiae vestrae, & eam quidem publicis typis vulgatam, non dicam legi, sed singulari aviditate voravi. Quippe quale tuum foret de audaci consilio Lampridii peremptorium iudicium, jamdiu anxie rescire cupiebam. An tua adversus illum argumenta bene intellexerim, fortasse dubitare queam; dubitandum tamen minime videtur, quin is dejectus, prostratusque sit, quando tu, cujus ingenium & doctrinam semper miratus fui, omnimodam victoriam tam brevi certamine tibi tribuis. Atque utinam hoc idem meis quoque Civibus persuadere haecenus potuissem. Nam uti contrariis studiis, ac non levi tumultu exceptus heic primo fuit Lampridii Liber, ita & ingentem pulverem excitavit ipsamet Epistola Reverentiae vestrae. Quod gravius est, atque ego in primis doleo, eidem Epistolae infestos sensi non solum adversarios vestros, sed & non paucos Voto vestro antea consentientes. Quorum censuras, cum circumferantur per ora multorum, meum puto ad te referre, ut quid eis reponendum sit, significare mihi quamprimum possis.

Inquis pag. 2. *Le assicuro, che il Signor Lampridio è incorso nelle Scomuniche fulminate dalla Chiesa, contro coloro, che ardiscono scrivendo d'impugnare l'Immacolata Concezione.* Quam in rem eadem Alexandrinae Bullae verba, quae Lampridius attulerat, tu quoque refricas. *Le assicuro?* ajunt. Ad hujusmodi vocem quis non solvatur

in risum? Immo in iram. Et ubinam in Immaculatam Conceptionem pugnavit Lampridius? Scotisticam ille Sententiam passim laudat, passim Piam ac Probabilem fatetur. Nihil amplius quam hoc a nobis haecenus exegit Ecclesia Romana. Is unice profilit in *Certitudinem*, quam nemo ferme Veterum noverat, & Saeculo tantum proxime praeterito affingere quidam coeperunt eidem Sententiae, spuris monumentis nempe decepti, ut incautam indoctamque gentem ad Votum de obligando Sanguine allicerent. Certitudinem hanc in ea Sententia nunquam agnovere summi Pontifices, eoque minus probaverunt exstructum super fluxa haec fundamenta tanti momenti Votum, quod minime ferendum compluribus argumentis Lampridius ostendit. Itaque ajunt: imponit atque illudit Panormitano Populo hujus Epistolae Auctor, dum contra totius Italiae judicium anathemata obiicit Lampridio, qui morigerum ubique se praebeat Sedis Apostolicae decretis, immo pro ipsius decore ac tutela in aciem venit. Nimirum ille iis tantummodo diem dicit, qui favoribus ejusdem Sanctae Sedis abutentes, & silentio adversariis indicto freti, nihil non sunt ausi; & Fidei Veritatibus Probabilem tantummodo Sententiam parem facientes, contra mandatum Dei vitas mortalium in terrorem discrimen adducunt. Panormitanis autem expendendum relinquitur, an hocce hominum genus unquam audierint in privatis colloquiis, atque ex ipso sacro suggesto *Haeresis & Impietatis* non Lampridium duntaxat arguere, sed & cunctos illos, qui aut Piam non amplectuntur Sententiam, aut Sanguinis pro ea Votum exhorrent. Si hoc verum est, ii quidem in Censuras illapsi sunt, non vero Lampridius, qui nihil a mente summorum Pontificum recedit. Gravior praeterea Messanensibus illusio videtur, immo calumniam appellare non veretur, quod Reverentia vestra subdit, inquit: *Così vedrà V. S. Illustriss. che il Lampridio si scaglia contra un tal Voto per raffreddare il Culto di Maria Santissima, per mostrare il suo mal talento contro il singolare Privilegio della nostra Signora, e per irritare i suoi seguaci nelle medesime Scomuniche.* Non Lampridium, ajunt, unum hujusmodi maledicentia ferit. Ecquando enim nisi per summum nefas *Frigidi* appellentur in Devotione erga Deiparam, atque in ejus Cultu, qui *Praeservationem* illius non credunt, aut credentes, a Voto tamen vitae pro ea dandae abstinere, sive abhorrent? Plerasque Catholicorum Provincias, innumeros etiam Panormitani Theologi sodales per Catholicum orbem sparsos videas ab eodem Voto abstinentes. Caecus sit oportet, si quis in iis aut Devotionis defectum, aut odium

somnia

somniet adversus Privilegium Virginis, & anathemata quoque eidem ob hanc ipsam causam quodammodo minetur. Neque ferendum ajunt, appellare Praeservationem *Singulare Privilegium* Deiparae. Sancti Patres ejusmodi Privilegium uti *singulare* venerati sunt in Christo Domino. Improperie ergo hoc transferatur in Virginem, & hominis Theologi erat accuratius loqui.

Quod postea pergit dicere pag. 4. & sequ. Reverentia vestra, non Messanenſes complures tantum, sed fateor, memetipsum in graves angustias conjecit. Ex quo Alexander VII. uti *Piam* agnovit Scoticistarum Sententiam, vos contenditis, impositam cuicumque Fidelity sub poena gravis Peccati obligationem non solum ore fatendi, sed corde etiam credendi *Piam* hujusmodi Sententiam, immo & vitae in quibusdam circumstantiis dandae, ne afferatur: *Sententia haec minime Pia est*. Addis, uti Martyres gloriosam mortem subierunt, ne dicerent: *Falsus est hic Articulus Fidei*: ita qui sub rigido Ecclesiae Praecepto cogitur credere ac fateri *Piam* Praeservationem Mariae Sanctissimae, obstrictus quoque est ad eam suo Sanguine tutandam; ac propterea (quod obliſus est dicere) is pro Martyre habendus erit, si vitam suam pro hac tutela impendat. Nova haec omnino visa est Messanenſibus Theologia; neque enim quisquam haſtenus arbitratus fuerat, pro tutela Scoticisticae Sententiae Sanguinem sibi esse fundendum. Quid illi respondeant, accipe. Quanquam liquidum ii minime putent, an Apostolica Sedes adigere voluerit ad credendam *Piam* in cordibus suis Scoticisticam Sententiam eos, qui contrariae adhaerent, suamque tantummodo veram putant: disputatione tamen ista nunc abſtinentes, illud negare in praesentia nolunt. At quid inde? Num Sancta Sedes unquam docuit, aut indicare voluit, Sanguinem quoque pro ejus Sententiae quamquam Piae tutela esse fundendum? Tu ex Alexandrina Bulla id consequi tibi persuades. Contra illi contrarium uti evidens statuunt, neque in cogitationibus tuis evanescere audacter ajunt, quod vim vocis *Pius*, & *Pie*, aut nescis, aut dissimulas. Quicumque dicit *Pie hoc credo*, *Pia est haec sententia*: continuo fatetur, se nescire an illud sit Verum, unamque agnoscit in objecto illo *Apparentiam Veritatis*, & *Pietatis*, nullam vero Certitudinem. Petat nunc (ajunt Messanenſes) Panormitanus Theologus a Theologis, liceatne pro Opinionibus vitam expendere. Negant illi. Immo qui *Piam* Sententiam praeſtaſte ad Fidei Dogmata referre volens, pro ea mortem subiret, uti Lampridius ostendit Cap. VI. grave saltem Temeritatis peccatum incurreret ex sententia Alphonsi de

de Castro, Vasquii, Suarii, & Theophili Raynaudi. Ergo liceat quidem voce & calamo tueri uti Piam, scilicet uti Probabilem, & Aparentiam Pietatis & Veritatis praeditam Scotistarum Sententiam, non vero liceat tutelae Opinionis hujus vitam nostram devovere; id enim ab Ecclesiae mente ac sapientia quam longissime abest.

Cap. XVII. sui Libri opinatus fuerat Lampridius, eligendam potius esse mortem, quam asserere *Impiam* Scotilicam Sententiam, addideratque, *che questo non morirebbe giammai per la difesa del primo Istante Illibato di Maria, ma per ubbidire al Precetto di difenderlo*: tu post non unam irrationem reponis: *Ascolti il Signor Lampridio la risposta alla sua pincchè puerile difficoltà, la quale porrebbe ostendere, non dico da qualsivoglia Theologo di Sicilia, ma ancora dagli Scolari più inesperti Siciliani. Siccome si può dire con tutto rigore, che chi dà la vita per ubbidire al Precetto Ecclesiastico di digiunare, o d'ascoltare la Messa, muoja per il digiuno, o per il sacrificio dell'Altare: così ancora può dirsi con tutta la proprietà, che chi si soggetta alla morte per ubbidire al Precetto di difendere come Pia l'esenzion dell' colpa della Madre di Dio, sparga il sangue in difesa della sua Purissima Concezione. Veniam heic obsecro det mihi Reverentia vestra, ut ei significem, quid Messanenſes heic evomuerint. Scilicet male esse Panormitanis, dum ejusmodi Consiliariis aut Magistris utuntur, qui vel ante pedes posita non vident, simulque in contemptum adducunt quoslibet Siculos Theologos, quasi ex eis nullus Lampridiani argumenti vim capiat, aut adeo miserabili ratione, simulque tam ridendo fastu, eludendam putet. Afferentes *Impiam*, sive *Haeticam* Scotistarum Sententiam Sixtus IV. Pontifex *Anathemate* perculit. Hinc deducebat Lampridius, minime parcendum vitae, si quando Christi Fidelis ad hoc asserendum cogeretur. Tunc autem, non pro tuenda Immaculata Conceptione, sed ut Pontificio mandato pareret, collum securibus praebetur. Plus quam puerile effatum hoc appellat Reverentia vestra. Verum si gladio exerto ad mortem tibi inferendam quisquam paratus foret, nisi *Haeresis* sive *Impietatis* argueres Thomistarum de Sanctificatione Virginis Opinionem: nonne pari ratione mors potius foret eligenda, ne hoc diceres, quando idem Sixtus Papa *Anathema* promulgavit in audentes inurere hac nota Thomisticam illam Opinionem? Ubi tu in isto casu occumberes, dic rogo, num pro Veritate aut Cerritudine Thomisticae Opinionis caderes, an tantummodo ne mandatis Ecclesiae adversando peccares? Ubinam ergo puerilis Lampridii difficultas? Quod ille asseruit, profecto & tu, ut*

arbi-

arbitror, assereres. Proinde ut vides, irrisiones in Lampridium adhibitae in venerabile caput tuum denique recidunt. Sed quoniam absurdum videtur, tam Scotistas quam Thomistas pro contrariis de eadem re Opinionibus ad mortem tolerandam impelli: Prudentis erit, uti Lampridius inquit, antea consulere Apostolicam Sedem, quae fortasse decerneret, neutro in casu Vitam esse impendendam.

Deinde subdunt Messanenſes, a te dici, *Che chi dà la vita per ubbidire al Precetto Ecclesiastico di digiunare, o d'ascoltare la Messa, muore pel Digiuno, o pel Sacrificio dell'Altare*, ac ratione pari dici posse, *che chi si soggetta alla morte per ubbidire al Precetto di difendere come Pia l'esenzion della colpa della Madre di Dio, sparga il sangue in difesa della sua Purissima Concezione*. At isti ajunt, ejusmodi exemplis caussam, quam prae manibus habes, nihil juvari, immo potius profligari. Votum enim faciendi id quod Praecepto Ecclesiastico jam faciendum erat, ut in exemplis hisce evenit, ii quidem admittunt, & laudant; verum licere etiam Vitae sacrificium pro tuendis hisce Votis ii negant, secluso contemptu Religionis & Scandali. Vovisti jejunare, recurrentibus Feriis Quadragesimalibus, audire Sacrum die Festo, abstinere a carnibus Feria Sexta & Sabbato. Quotiescumque occurrat periculum Vitae sive ob aegritudinem, sive ob aliam justam caussam te invito natam, neque agatur de testanda bonitate operis illius contra negantem: tunc Ecclesiasticum Praeceptum, & Votum tuum cessat, atque implendum est tibi alterum Praeceptum servandae Vitae. Qui ergo, inquit, Panormitanus Theologus hisce exemplis utitur ad honestandum Votum suum? Sed fac etiam liceat dare Vitam pro tutela Jejunii, aut Missae audiendae, aut abstinendi a carnibus: dissimiles adhuc sunt casus, quia dissimile est Objectum. Ad Fidei Dogmata pertinet credere, Opera bona ac meritoria esse sacrum Jejunium, Sacrificio incruento adstare, a carnibus secundum Ecclesiae Praecepta abstinere. Qui proinde Vitam suam pro tutela hujusmodi Veritatum exponeret, pro Fidei doctrina moreretur. At in nostro casu Panormitanus ipse fatetur, ad Fidem non pertinere Sententiam de *Præservazione* Virginis. Nos contra nuper ostendimus, *nullum esse Praeceptum* de defendenda Sanguine nostro ista Sententia, immo nefas esse pro tutela Opinionum, hoc est pro re adhuc Incerta, Vitam, cujus domini non sumus, expendere: quo ergo abeunt exempla a Panormitano producta? Et nihilominus haec ille pag. 7. addit: *Si adira il Signor Lampridio, grida, si dibatte nella sua Cattedra, e sta oramai per morire per la gran difficoltà, che sperimen-*

men-

menta in ascoltar questa a lui tanto disgustosa Dottрина. Putabamus, ajunt Messanenſes, a Theologo nos erudiri. Ecce declamatorem pro Theologo offendimus, cujus nugae, & straminea argumenta an cuiquam terrorem aut anxietatem incutere possint, jam vidimus. Verum Panormitanus gloriabundus, suiſque securus (dicere pergunt Messanenſes) ait: *Ma farò, voglia o non voglia, che la Confessi. Ssimo, che un uomo tanto erudito, quanto egli è il Signor Antonio, sia ben pratico dell' Erudizione, che si contiene nel Breviario, quale FORSE ha ogni giorno alle mani. Apriamolo &c.* Tum adfert exemplum Sancti Joannis Nepomuceni, qui ne Sacramentalem Confessionem revelaret, mortem subeundo illustrem Martyrii Coronam est consequutus.

Nisi hinc discunt sapientes Panormitani (loquor Messanensium verbis) quam infidis patronis commendata sit causa Voti in controversiam adducti, dormiant necesse est. Vera Theologia *Detractionem* damnat, ut omnes norunt. Diversae proinde Theologiae Professor sit, qui nunc in re gravi detrachere non veretur Lampridio honestae famae viro, ac Sacerdoti, dum publico Libello *suspicionem non recitari Breviarii* adversus eum disseminat. Qui non sentit se heic prave agere, nil mirum; si neque animadvertat, se prave sentire in Sanguinario Voto tuendo. Sed quod est ad hanc injuriam, eum nos ad tribunal Dei dimittentes, potius consideremus, quid ille inferat ex Nepomuceni Martyris exemplo. Lampridium is provocat ad dicendum, cur Nepomucenus depraediciari non possit mortuus *pro Sacramentali silentio* (uti revera in Oratione de illo Ecclesia loquitur) sed tantummodo occisus, ut Praecepto obediret. Tum pomposam e Candidato suo Eloquentiam mutuatus, haec adjicit: *Messa fuori tutta la sua reconditissima Erudizione, rilegga tutte le Storie, a cui fece bellissime Prefazioni, se pur le lesse la prima volta* (hoc unum deerat ad sigillum immodicae confidentiae in Theologo isto deprehenſae, quasi tot Historias manu exaratas, aut cum Codicibus manuscriptis conlatas, evulgare potuerit Lampridius, ac de eis agere in Praefationibus, & Notas interdum addere sine earum lectione) *cui Dottori, ricorra &c.* Sed quid ineptiis diutius immoramur? Hicce nihil aliud agitur, quam pugnis verberare aerem, quam decipere rudem popellum. Quae nunquam Lampridius negavit, is negata somniat. Quod revera Lampridius dixit, supra vidimus, & in ejus sententiam concedere Panormitanum quoque debere evicimus. Exemplum nunc repetamus Sancti Martyris Nepomuceni. Lex Dei & Naturae est, servandum esse Naturale, nedum Sacramentale sigillum, sive silentium; & quum id

tan-

tanti momenti sit, ut eo non servato in posterum discrimen adduceretur Sacramentalis Confessio: gravissimi Peccati reus propterea foret, qui illud violaret. Et qui contra ne illud violet, mortem tolerandam eligit, atque ad eligendam cogitur, pro certo Religionis principio, sive pro Virtute Intrinseca, & pro Lege Dei sui moriens, ad Coronam certissimam in Caelis evolat: Nihil heic simile cum Voto Sanguinis pro tutela Scotisticae Sententiae; & qui hoc imaginatur, vereor ne etiam possit imaginari.... sed os comprimo. An apud Deum vera sit haec Sententia, incertum est; neque Certam quicquam adhuc demonstravit. Et quanquam Probabiles rationes abundant, cur opinemur gratam ei esse tutelam huiusmodi Opinionis: deficiente tamen luce, quam sola Ecclesiae auctoritas praebere in huiusmodi casu potest, hac in re nulla Certitudine ducimur; liberumque est omnibus contrariae adhaerere Opinioni, atque aliter credere. Reliquum igitur est, ut qui pro Pia sententia mortem subire velit, non pro certa Lege Dei, non pro opere Virtutis ad Fidem spectantis, sed pro Sententia, quae non desinit esse Opinio, moreretur: quod nefas esse omnes fatentur. Si vero Panormitanus Theologus iterum objiciat Praeceptum, omnibus, ut ipse censet, commune, defendendi eandem Sententiam uti *Piam*: rursus responderetur, Praeceptum hoc falso supponi; & quando etiam daretur, intelligendum esse de defensione illius Probabilitatis voce & calamo, non vero Vitae nostrae iactura, ut sanctissime fit pro defendendis Articulis Fidei. Neque enim unquam Ecclesiae in mentem venit, dum nihil aliud agnoscit in ea Sententia nisi Apparentiam Veritatis & Pietatis, obligare quemquam ad dandam vitam pro re tam modica & incerta, qualis est eadem Apparentia. Immo eadem censenda est praecipere in casu tali, ut obtemperemus divino ac naturali Praecepto minime dubio servandae vitae in concursu Praecepti mere Ecclesiastici, si tamen heic ullum Ecclesiae Praeceptum est. Et sane (sit repetenti venia) praecipit Ecclesia, ut interdum jejunemus, abstineamus a carnibus, audiamus Sacrum, peccata confiteamur. Ubi cum hisce Praeceptis concurrat periculum Vitae, tunc illa Praecepta cessant, & implendum est Praeceptum Naturale de ejusdem Vitae conservatione; & qui praefraet mortem eligere vellet, ne ab implendis iis Praeceptis averteretur, dum absit contentus Religionis & Scandalum, in reatum gravis Peccati incurreret. Tunc enim parvitas materiae unius Praecepti cedit gravitati materiae alterius Praecepti. Ita innumeros Sanctos, innumeras eorum Reliquias Pie credimus honorandas, & Pie ac prudenter re

ipsa honoramus, quibus etiam Apostolica Sedes, Cultum, Festum, ac Indulgentias largitur; nunquam tamen quisquam in animum induxit, pro hujusmodi Pietate Opinativa (neque enim Fidei Dogma est, hunc vel illum Sanctum, frui caelesti gloria; has aut illas Reliquias ad Sanctos illos pertinere) Sanguinem esse fundendum; immo qui funderet, imprudenter ageret, & pro Martyrio Superstitionem in Ecclesiam inveheret: Quare ludit ac illudit Panormitanus Theologus, dum demum decernit, Lampridium, atque universos Fideles obstrictos esse *a spargere il sanguine in difesa dell'Immacolata Concezione; perchè ancor egli è obbligato ad ubbidire alla Chiesa, la quale Tutto ciò ci comanda.* Nos quoque demum decernimus (ita Messanenſes agebant) omnium maximam hanc esse Panormitani Theologi illusionem, qui incaute plebi venditat, ab Ecclesia ipsa praecip. Vitae sacrificium pro Pia Sententia, quasi Ecclesiae doctrina credenda non sit: nefas esse pro Opinionibus tutandis velle Vitae suae detrimentum pati; & quasi Panormitanus ipse confessus non fuerit, Sententiam Scortificam ab Ecclesia commendari nobis duntaxat ut *Piam*, quod idem est ac dicere, sola Veritatis & Pietatis lineamenta in ipsa haberi, ipsamque adhuc intra pomœrium Opinionum concludi. Itaque nos pergemus agnoscere ut *Piam* Sententiam faventem Praeservationi Deiparae, ejusque Festum devote celebrabimus secundum Ecclesiae Romanae mentem: at piaculum reputabimus vovere vitam pro illa, Votumque Sanguinis a nonnullis conceptum irritum ac nullum censēbimus: donec Sancta Sedes aliter credendum aut faciendum nos doceat. Ita Messanenſes, quorum argumenta atque etiam verba audaciam fortassis spirantia, occultare Reverentiae vestrae religioni mihi duxissem.

Ad me vero quod attinet, ut sincere fatear, in hujusmodi quaestione valde titubantem me sentio; immo ignoscas velim dicenti, nisi meliora prodeant argumenta, defectionem meam a castris vestris brevi suceſsuram. Etenim, ut mihi videtur, duplex Votum concipi potest. Alterum: *Ego voveo tueri usque ad Sanguinem Sententiam de Praeservatione Virginis uti Veram ac Certam.* Alterum: *Ego voveo tueri Sanguine meo Sententiam eandem uti tantummodo Piam.* Adversus primum Votum praecipue militant Lampridii argumenta, quippe pro somniata *Certitudine* illud concipitur, & fallaci fundamento innititur. *Certitudinem* Piae Sententiae, utpote rem desperatam, ne tu quidem, ut suspicor, attingere, nedum demonstrare ausus es. Ergo primum Votum improbandum est, ipsum inquam Votum, quod Pa-

nor-

normitanum Capitulum, & Senatus concipere dicuntur, quum pro *Veritate* ejusdem Sententiae in eo *Sanguis* voveatur, licet in primo exemplo ejusdem Voti nulla sit *Sanguinis* mentio. Superest igitur, ut Reverentia vestra, quae haecenus tantummodo contendit, *Piam* esse appellandam Scotistarum Sententiam ad normam Alexandrinae Bullae: hortetur Cives suos ut alterum deinceps Votum amplectantur, voveantque, se Sanguine suo, testaturos, *Piam esse Sententiam de Praeservatione Virginis*: qua occasione, ut arbitror, vim vocis hujus unicuique Reverentia vestra explicabit, scilicet eos Sanguine suo hoc unum testaturos, scilicet in ea *Sententia* adinveniri *duntaxat Apparentiam Pietatis & Veritatis*. Sed ubi haec sincere depraedicentur Populo, quis tam sui oblitus sit, ut pro re tali, qualis est *Opinio*, tormentum: & securum eligere velit, immo hoc nefas esse non sentiat? Interea in eum duntaxat finem vos Votum Sanguinis suscepisse videmini, ut orbi Christiano, atque ipsi Romanae Ecclesiae, si fieri potest, persuadeatis, *Veram* ac *Certam* esse Sententiam vestram, non vero duntaxat *Piam*, sive Probabilem: quae credulitas minime excludit; immo includit formidinem Falsi atque Erroris. Hoc autem facientes adhibitant nonnulli, an insultare velitis eidem Sanctae Sedis, quasi eadem non videat, quod perspicacia vestra tam aperte discernit.

Attamen ut apertius dignoscat Reverentia vestra, quam parum solide omnibus Christi Fidelibus, atque ipsi Lampridio obligatio tribui, sive imponi, mihi credatur dandae Vitae, ne Pia negetur Scotistarum Sententia: dico, mini & ceteris Fidelibus licere in conspectu Tyranni dicere: *Ego credo ac seneo, gloriosam Virginem Mariam cum Originali peccato fuisse conceptam*, neque ob hoc nos fore *Peccati* reos. Si vestra Reverentia id neget, meque peccatum contendat, grave *Anathema* incurrit, indictum a Sixto .IV. Alexandro VII. & Concilio Tridentino iis, qui ausi fuerint asserere, contrariam *Opinionem* tenentes, videlicet gloriosam Virginem Mariam cum Originali peccato fuisse conceptam, Haeresis crimen, vel Peccatum incurere mortale. Ergo in cerebro tantum vestro natum est Praeceptum de numquam negando, vel quum Tyrannus urgeat, *Piam* esse Sententiam vestram: quum Ecclesia disertis verbis edixerit, licere Fidelibus etiam credere, & consequenter urgente mortis periculo, profiteri contrarium, scilicet Virginem revera contraxisse Originale Peccatum. Rursus ex confessione vestra habemus, non esse dandam vitam protutandis *Opinionibus*. At quid aliud est nisi *Opinio* id, quod *Pie* tan-

tum credimus? Tyranno igitur mortem minante, nisi abnegemus Piam Sententiam, ex una parte videmus, nullum esse Ecclesiae Praeceptum de ea tenenda sive credenda, & licere adhaerere contrariae; ex altera vero vigere Praeceptum divinum & naturale de custodienda Vita. Proinde in isto casu servanda est Vita, & parendum certo Dei mandato, non autem imaginario Ecclesiae Praecepto. Neque dicat Reverentia vestra, si id ego dicerem, peccarem, *Votum* videlicet a me conceptum violando, simulque mentiendo, quum corde credam, Veram ac Certam esse Deiparae Conceptionem ab omni labe immunem. Nam quod est ad *Votum*, uti concipere illud non licuit ad arbitrium vestrum, quia Vitae nostrae domini nos non sumus, & pro Opinionibus Vitam dare nefas est: ita vos ab eo re ipsa solutos agnoscere debetis. Ad *Persuasionem* vero quod attinet de Veritate & Certitudine Sententiae vestrae, nullam vobis illa justam excusationem praebebit. Quum enim de re summi momenti agatur, idest de adducenda in discrimen Hominum Vita, sollicito studio, ac pari sinceritate investigandum prius est, certisne an dubiis fundamentis, atque Imaginatione tantum Credulitas vestra nitatur. Ubinam vero sunt Certa haec documenta? Probabilia quidem adferuntur, sed hoc idem est ac dicere Dubia, & consequenter Certitudo in teneas auras resolvitur; & Prudentia, rectaeque Ratio exigit, ut *Persuasio* vestra emendetur. Certitudo autem haec speranda profecto non est e confictis monumentis, non collocanda in *Phantasmatibus nostris*, sed petenda ab omnium Magistra Apostolica Sede, a qua ne vestra quidem Reverentia dicat respici uti Certam Piam Sententiam, quum meridiano Sole clarius sit, uti Incertam haecenus ab ipsa haberi. His autem positis, mihi videris, amantissime Pater (sit verbo venia) illusisse Panormitanis tuis, immo universis Christi Fidelibus, inauditam antea obligationem cuicumque imponendo Sanguinis vel sine Voto fundendi pro tuenda Immaculata Conceptione. Si bene rationes inibis, nullo negotio deprehendes, sophistico argumento te in re tanta usum fuisse, atque immerito postea in tui ingonii plausum erupisse, quasi uno folio integrum Lampridii Librum in nihilum redegeris. Avertat Deus a nobis conscientiarum Tyrannos. Si tamen imminerent: tunc nullo negotio omnes ad Lampridium deficerent. Sed num expectandus Tyrannus, ut quid nobis agendum sit discamus? Haec ad te conscribenda habui, doctissime Vir, non inutilia forsitan nobis unice Veritatem quaerentibus. Interim ne quid de tuo erga me amore depereat, supplex rogo. Vale. Messanae III. Idus Octob. MDCCXXI.

Ha-

Habes, mi Azevede, quod spoponderam. Fertur brevi proditurum alterum Opus Parthenotimi de hoc ipso argumento. An melioribus quam antea ventis ille suam navigationem instituerit, incertum est adhuc. Certum interea mihi videtur, iuste neminem posse irasci, quod ista hinc inde diligenti disputatione agitentur. In utilitatem quippe Christianae Reipublicae vergit, aut tolli abusus, si qui sunt, aut innoxia ostendi, quae censurae obnoxia ante videbantur. Quum vero agatur de eximenda purissima Ecclesiae doctrina ab infectione perniciosarum Opinionum; agatur etiam de Vita hominum, cui inter Bona terrae nullum par ostendas: nostra potissimum interest scire, liceatne an non obligare ac fundere Sanguinem pro Opinione, quamvis Pia, qualis adhuc non desinit esse Scotistica Sententia. Vale.

Neapoli IV. Kal. Decembr. MDCCXLI.

Doctissimo Azevedo suo Ferdinandus Valdesius S. P. D.

EPISTOLA NONA.

NONDUM extinctum est, immo vires majores in dies incipit bellum excitatum inter Theologos quosdam Siculos, & Lampridium, de Voto Sanguinario ad ravim usque contententes. Novi quotidie erumpunt Libelli adversus ejusdem Voti Censorem, atque ante paucos dies delata ad me fuit Epistola Italica Lingua ad ipsum Lampridium scripta, & Panormi edita, Auctore personato viro *Petro Antonio Saguas*. Alterum illius exemplum tibi procuravi, & quam primum potero ad te mittam. Recensere tamen statui antea quae Abbatis Romani hoc de Opusculo sententia fuerit. Adivi ego Amicum illum, & continuo sciscitatus sum, num Epistolam legisset Panormitani Saguas. Utiq; inquit, ante aliquot dies legi, ejusque examen suscepi; atque utinam nunquam opus fuisset legere. Ad Literarias namque controversias lubenter accuro, ea spe ductus, Veritatem ex agitatione & collisione Ingeniorum aliquando emerfuram. At ubi certamen in postremam maledicentiam, & continuatas paene calumnias disabitur, tunc ad nauseam stomachus meus commovetur, & misereor Veritatem periclitantem, dum conatus praecipuus ad denigrandam depressendamque adversariorum personam declinat. An hujusmodi rationem pugnandi elege-

elegerit Saguas, tute, ut arbitror, animadverteris. Ego heic amicum rogare, ne me exoptantem Opusculi Panormitani examen, defereret. Non erat is eo die sui juris ob negotia quaedam sibi commendata; quare in posterum diem convenire rursus decrevimus. Sequenti mane tempestive me ad illum contuli, paratos inveni Libros, atque in haec verba dicere exorsus est Abbas. Sibi fumsit, ut vides, Panormitanus Saguas ostendere *Antonium Lampridium* discordem nimium fuisse a *Lamindo Pritanio*, Auctore Libri *del buon Gusto*, quamquam sub diverso hoc nomine unus homo lateat. Ne unum quidem verbum faciam ego de huiusmodi commento; neque enim Pritanius aliter unquam sensit quam Lampridius de Voto Sanguinario, & in una Panormitani phantasia somnium conceptum fuit de illorum discordia. Eoque lubentius ab his abstineo, quippe ad rem nostram nihil faciunt, neque hic verus Panormitani scopus est, sed quidem omnem movere lapidem, ut Lampridium Voti Censorem infcitiae, malae fidei, ac paene adversus Religionem Catholicam initae conjurationis arguat, atque dilaceret.

Primo is pag. 6. ita Lampridium alloquitur: *Voleste voi nel Cap. 24. entrare a discutere la Quistione, se la Vergine fu esente, o no dal Debito di contrarre il Peccato Originale; e in esso non solo non ci date quelle notizie, ch'erano necessarie per capire il Punto della Quistione; ma in oltre ci mostrate di non aver voi quella Erudizione, che basti a capirlo.* Tum inflatis velis secum Lectorem deducit ad agnoscendum, dari Debitum Proximum, & Debitum Remotum: quae distinctio necessaria erat ad Quaestionem hanc intelligendam, postea subdicens: *Io farei scommessa, che voi Maestro dell' Erudizione, Formatore delle Repubbliche Letterarie, e Moderator degl' Ingegni, non la sapete?* Et quare? Quia nullam Distinctionis hujus mentionem Lampridius fecit. Ita ille, sed in ipso vestibulo Censurae suae Lectores manifesta fraude decipiens. Nunquam enim Lampridius agitandam ex prolesso suscepit Quaestionem, fueritne, an non, Deipara immunis a Debito contrahendae labis Originalis. En tibi Caput 24. ejus Libri. Is Historice tantummodo, ac paucis verbis tradit, quo tempore in Scholas penetraverit excogitata Immunitas a Debito, quum Communi calculo antea Theologi Piae Sententiae adhaerentes Debitum ipsum Deiparae tribuerent. Hoc satis Lampridio fuit, nihilque opus erat in Quaestionem hanc ultra inquirere. Alteram illusionem accipe. Cur heic e Magistrali Cathedra pompam faciat Theologus Saguas de Distinctione praedicta, frustra inquiras. Superstitionis arguerat Lampridius.

pri-

pridius Cusentinorum Votum de danda Vita pro tutela Immunitatis Marianae a Debito Peccati. Non audet Saguas ejusmodi Votum probare, neque ullum ei patrocinium praebeat. Rursus Lampridius post educta tot Patrum loca ad controversiam de Praeservatione Virginis spectantia, ait Cap. 25. arbitrari Scotistas, nihil ea loca officere Sententiae suae, dum in Deipara *Debitum* admittatur. Interpretationem hanc subinde minime impugnans, judicium de ea dimittit Apostolicae Sedi. Quid est ergo quod Saguas hanc invehit Distinctionem, *Debiti Remoti & Proximi*? Si forte pro Cusentinis tacite pugnare animus ei est, Lectores iterum fallit; nam Cusentini sine ulla Distinctione imperterriti *Sanguinem & Vitam* obligant, ut propugnent, Deiparam in Conceptione sua non solum non contraxisse Peccatum Originale, sed ne ipsius quidem Debitum; quum transfundi nequeat inflexa hereditas Adam in illam, quae ut Mater futura Verbi aeterni praevisa fuit in signo antecedenti Adamum: quibus verbis tum Remorum, tum Proximum Debitum excludunt. Super hanc autem Opinionem, a praestantioribus Theologis improbatam, superstruentes Cusentini Votum suum Sanguinarium, quei a Superstitione excusandi sint, Saguas, ut puto, minime ostendet. Tertio illudit Lectoribus idem Theologus, dum contendit, Lampridio ignotam fuisse Distinctionem *Debiti Proximi & Remoti*, ut eum veluti indoctum traducat. Sed, uti vidimus, nullus erat huic Distinctioni locus in controversia. Ad haec quin probe conscius de ea foret Lampridius, nisi qui temere agat, negare nequit; Salmaticenses enim Theologi, scilicet Carmelitae Excalceati, qui accuratissime supra ceteros Quaestionem hanc de *Debito* Virginis pertrastarunt, Tract. XIII. de Vitiis & Peccatis Disp. XV. Dub. III. uti *Communem & Veram* Sententiam statuunt: *Exceptionem Deiparae a Debito Culpaе originalis, si detur, omnino praejudicaturam ejus Redemptioni*. Addunt etiam: *Haec Conclusio est nobis adeo certa, ut credamus esse de Fide, definitam per Zosimum Papam*. Praeterea Theologi iidem non solum memorant Distinctionem *Debiti Proximi & Remoti*, sed etiam solidissimis argumentis ostendunt, non sufficere Debitum *Remotum*, sed omnino admittendum in Virgine *Proximum*, praemature oppugnantes Panormitanum Theologum, qui pag. 10. censet, admissio tantum *Debiti Remoti* explicari posse chorum Sanctorum Patrum, a quibus depraedicator unus Christus Dominus expers maculae Originalis. Et male certe erit semper sacrae Theologiae, si quisquam credat, ratiunculis & distinctiunculis, ab uno hominum ingenio, sine ulla Patrum, veterumque Theologorum auctoritate excogitatis, manifesta

nifelta divinatorum Librorum, sacraeque Traditionis monumenta posse eludi. Haec apud Salmaticenses legerat Lampridius; eos Cap. 24. & 25. praecipue laudaverat, uti istius *Debiri* assertores: & nihilominus tanta Panormitano Theologo fiducia est, ut praedictam inutilem aliqui Distinctionem ignotam Lampridio affirmet, nihil pensi habens, an Lectores fallat, sibi fidem habituros, dum ignorantiam Lampridio sine ulla iusta causa heic objiciat.

Ad quartam illusionem procedo. Pag. 11. ita Saguas Lampridium interrogat: *Qual necessità avevate per provare, che sia illecito il Voto di difendere sino col Sangue l'Immacolata Concezion della Vergine, d'impugnare l'Esenzione del Debito del Peccato con sedici pagine?* Quenam necessitas? Equidem haec legens mirari satis nequeo, quae tam absona interrogatio homini docto exciderit. Etenim patet, atque ipse Saguas probe novit, numquam Lampridium in *Exemtione a Debito* insurrexisse, ut illicitum ostenderet Sicularum Votum; sed tantummodo ut ostenderet, minime ferendum esse hunc alterum graviolem excessum, videlicet Cusentiorum Votum; a Siculis enim adoptata minime videtur eadem *Exemtio*, & contra a Cusentinis haec ita extollitur, ut pro ea Vitam se profusuros polliceantur. Sed progrediamur. Pag. 25. novum accusationis caput instituit Saguas. Ufque ad Annum 1615. (scripserat Lampridius Cap. 24.) omnes *FERRE*, qui a macula Peccati originalis *exemtiam* credidere *Sanctissimam Christi Matrem*, agnoscebant tamen, & fatebantur, illam nequaquam fuisse immunem a Debito ipsius Peccati. Quid ad haec Panormitanus? Lampridio non sa, che prima del 1615. alcun Autore sostenesse una tal Sentenza: dunque nessun Autore prima di tal Anno la sostenne. Inquit etiam: Voi qual ragione ci apportate per farci credere, che Debitum peccati originalis Veteres omnes (& praetermittit illud *Fere*) in *Virgine* agnovere? Oculisne caret Theologus iste? Salmaticenses Theologos sui disti testes locupletissimos adduxerat Lampridius; & nihilominus Saguas fe hoc minime vidisse fingit. Deinde Lampridio insultat, quod neglexerit inquirere, quot Theologi ante Annum 1615. ab ejusmodi Debito Virginem exemerint, atque post enumeratos sexdecim Theologos, qui eandem tradidere sententiam, Eruditionem in eo Cenfore desiderat. Sed quid opus erat ad intentionem & causam Lampridii inquirere, quis ante illum Annum Debitum hoc a Virgine excluderet? Unum satis erat & fuit eidem, statuere, *Communem* ante illum Annum Theologorum fuisse sententiam, ab ejusmodi Debito eximi non potuisse Deiparam. Quam in rem si Lector cupit Theologorum

gorum immanem copiam, Salmaticenses supra laudatos in eadem Quaestione adeat, quos, ut dixi, idem Lampridius disertis verbis testes Conclusionis hujus appellavit pag. 201. Contra hanc Theologorum nubem adferat si quidquam potest Panormitanus Saguas. Heic autem sita est vis Lampridianae argumentationis contra Cusentinos; pauci enim a Saguas memorati, leviter in Quaestionem hanc ingressi, pro nihilo reputandi sunt prae ingenti agmine agnoscentium Debiti necessitatem. Habes heic Salmaticenses: an ita sese res habeat, perspice. Quod etiam mirere, ex sexdecim Auctoribus ab eo in hanc rem productis, excipiendi sunt *de Cusa, Catherinus, Viguerius, Salmeron, Turrianus, Angles, Barrada, Magallianes, & Justinianus*, uti Salmaticenses iidem jamdiu animadverterunt Tract. XII. Disp. V. §. 3. quippe *Debitum* hoc & ipsi agnoverunt. *Galatinus* quoque Librum de Arcan. Cathol. Verit. hisce verbis concludit: *Oppositam Opinionem Deus permisit, ut videretur, quantam gratiam Matri suae contulerat, eam a Peccato originali, quod naturaliter, nisi praeservata fuisset, contrahere Debebat, immunem atque immaculatam praeservando.* Eidem ad-junge *Cornelium Mussum* super Cap. 4. ad Rom. quanquam & hunc suae sententiae Saguas adjunxerit. Perlege etiam Dominici Soto locum in Cap. V. ad Rom. pag. 150. edit. Antwerp. Anni 1550. Ibi ne syllaba quidem de exemptione a Debito. Immo is a Praeservatione admittenda se alienum sat prodit, quum contrariam Sententiam nequeant docti viri *publicitus prodere absque odio & invidia*. Ubinam ergo bona fides? Ineptis propterea accusationibus indulget heic Saguas; quas etiam ineptiores deprehendas, postquam animadverteris, nihil haec prodesse ad dealbandum Cusentinorum Votum, cujus tutelam fortassis arripuit Saguas; eoque minus spectant ad patrocinium Voti Siculi, quod, sive Debitum admittas, sive neges, ex aliis causis improbandum Lampridius contendit. Attamen temperare sibi nequit Saguas, quin & pag. 87. in scaenam rursus eandem Quaestionem pertrahat, Lampridio sinceritatis defectum obiiiciens, quod *Catherinum* memoret *Haeresis* postulantem Sententiam, quae a Virgine Debitum contrahendi peccatum excludit, & *Suarium, Valentiam, Canisium, Becanum, Fabrum, Castropalaum, & Raynaudum* tradat reputantes *Proximam errori*, aut *parum Probabilem* eandem Sententiam. Deinde post adducta nonnulla Scriptorum verba, quibus nulla inuritur huic Sententiae censura, rotundis verbis *Impostorem* Lampridium appellat, *quod auctoritates fingat, ut falsum tradat.*

Tom. V.

Y y

Heu

Heu quo devenimus, quando pii viri sibi licitum putant tam opprobriosis nominibus, ac tam facile, onerare Proximum suum, idque sine legitima causa; immo per patentem calumniam. Primo nullam auctoritatem finxit Lampridius, quia nullius verba adduxit. Haec ille tantum habet pag. 204. Eam (scilicet Opinionem excludentem a Virgine Debitum peccati) *Parum Tutam in Fide Cardinalis Bellarminus denuntiavit* (quod negare ausus non est Saguas) & *Proximam Errori, aut Parum Probabilem censuerunt Medina, Suarez, Vasquez, Valentia, Faber, Canisius, Becanus, Castropalaus, Theophilus, Raynaudus &c.* Secundo, quoniam Saguas hoc etiam exigit, auctoritates adferamus. Certe *Medina* eandem exemptionem a Debito damnavit. Vasquez vero Tom. 2. in 3. p. S. Thom. Quaest. 27. Art. 2. Disp. 115. Cap. 3. *Agamus, ait, ratione efficaci, & Catharinum Erroris convincamus, quod dixerit, B. Virginem neque in Adamo peccasse, neque Necessitatem contrahendi originale peccatum subiisse.* Porro *Suarez* Tom. 4. in 3. p. Disp. 2. Quaest. 1. pun. 2. haec habet: *RECTE Cajetanus in Opusc. de Concep. B. Virginis Cap. 3. affirmat, omnino esse Certum, quod B. Virgo contraxerit hoc Debitum incurrendi peccatum &c. neque posse hoc ipsum negari ABSQUE HAERESI, cum aliqui sequeretur &c.* Praetereo alia illius verba legenda in Tom. II. in 3. Quaest. 27. Art. 2. Disp. 3. Sect. 2. Quare vides, quam moderate scripserit Lampridius, qui quamquam posset censuram *Haeresis* derivare a Suario, mitiorem tamen ei, uti & Vasquo, sententiam tribuit: tam longe is abest ab Imposituris. At, inquit Saguas, alia Suarii verba sunt in 1. 2. Disp. 9. de Peccat. Sect. 4. num. 4. *Talis Opinio non potest Censura notari &c.* Verum Suarez ipse eandem Opinionem postea impugnat: quod satis est, ut ostendatur, ei *Parum Probabilem* visam fuisse. *Censurae* nomine intelligimus notare Opinionem uti Haeticam, Erroneam, Falsam; non vero uti *parum Probabilem*. Theologorum nullus sibi vitio vertit, quod sententia sua parum Probabilis dicatur. Praeterquamquod haec in Opusculo post mortem ejus edito leguntur, quibus fortasse non tanta est adjungenda fides, atque editis eo vivente. Certe *Suarius* in exordio Opusculi ejusdem fatetur, *numquam se eam Sententiam de Debito Virginis admittendo, putasse adeo Veram, ac bodie judico.* Denique in eodem Opusculo addit, *quemlibet Prudentem Theologum (cum venia Patris Saguas) & Dominae nostrae valde affectum, debere non inclinare ad illud extremum (hoc est ad exemptionem a Debito) quoniam ad honorem Virginis nihil refert, neque ejus*
Imma-

*Immaculatae Conceptionis veritatem juvat, praebetque occasionem ad-
versariis dicendi, non posse nos Immaculatam Conceptionem defendere,
nisi declinando ad Opiniones vel Censura dignas, vel diminuentes Chri-
sti Redemtionem, vel saltem apparentiam talem habentes. Theophilus
vero Raynaudus in Diptyc. Mar. Par. 2. pun. 2. n. 64. inter emen-
tissimos Honores, quos Virgini circa materiam propositam affinxere nonnulli,
enumerat immunitatem a Debito peccandi, atque hoc Fursur, & ina-
ne Virginis decus appellat: quod postremum etiam Faber sensit. Quum
vero singuli isti Auctores Debitum saltem Virgini tribuant, aut etiam
contrariae Opinionis patronos impugnent (quod fateri coactus est
Saguas) nonne licuit Lampridio scribere, eos reputasse parum Pro-
babilem Opinionem eandem? Et ubinam Imposturae? Superest, ut
aliquid & de Catherino dicamus. Is secundum Lampridium Haeresis
postulavit excludentes Debitum. Saguas contra adfert locum, in quo
is Virginem a Debito exemtit. Pro Lampridio Theophilus Raynau-
dus responsum dabit. Nam is in Diptych. Marian. loco supra lauda-
to haec verba Catherini refert ex ejus Lib. IV. contra Cajetanum
§. circa Tractatum. Quod Cajetanus declarat, quod esset Haereticus,
si quis diceret, B. Virginem sic fuisse immunem ab originali peccato,
ejusque reatibus, ut non solum non habuerit illud, sed nec Habere
Debuerit secundum suae naturae conditionem, Verissimum est. Sed Ne-
mo Catholicorum hoc defendit. Haec est enim positio nostra, quod B.
Virgo, licet ut Adae filia Debuerit illud peccatum, & maculam, &
iram Dei, & servitutem Diaboli & peccati contrahere: tamen praeve-
niente gratia Dei ex meritis Christi, ab eo peccato & reatibus ejus
praeservata fuit. Animadvertite, quaeso, quid sua aetate Catherinus
testaretur scribens: Sed Nemo Catholicorum hoc defendit, scilicet nemo
docet, Immunem fuisse Beatissimam Virginem a Debito culpae ori-
ginalis. Subdit deinde Raynaudus: Manifeste beic Catherinus admisit
in Virgine Debitum peccati originalis, & contrariam assertionem agno-
scit Haereticam, nullique Catholico probatam. Nec contrarium sensit,
& Debitum contrahendi peccatum originis removit a Virgine Lib. de
Peccato orig. Cap. ultimo, ut passim refertur. Quin potius ibi §. Vi-
de, diserte agnoscit in Virgine hoc Debitum: tametsi ait, quoad in-
cursum actualem exemptam esse a pacto. Ubinam ergo, bone Deus,
Imposturae? Denique si Panormitano fides, Gregorius de Valentia Tom.
2. Disp. 6. q. 11. punct. 2. haec habet: Cum haec utraque solutio
bona sit, secunda mihi videtur esse melior. Quamquam juncti priorem
solutionem quoque intelligi possit, B. Virginem fuisse Redematam, hoc*

ipso quod a lege etiam exempta esset, quam alioqui in Adam praevaricata fuisset. Quid ibi Valentia velit, nihil mea nunc interest inquirere. Illud noris, in eodem ipso loco Valentiam in haec verba loqui: Sive peccatum originis Virgo contraxeris, sive non, samen hoc ex FIDE CERTISSIMUM, atque adeo extra controversiam est, illam incurrisse Necessitatem sive Debitum contrahendi peccatum originale quoniam fuit Adae filia, ut ceteri. Hanc autem revera suam mentem fuisse, ex ejus Tom. 4. Disp. 2. q. 1. punct. 2. ediscas, ubi ex professo de Sanctificatione B. Virginis disserit. Quod antequam aggrediatur, quaedam Certa praemittit, scribens inter alia: Tertio est Certum, neque a Debito incurrendi peccatum originale fuisse B. Virginem liberatam; quandoquidem id Debitum annexum est carni humanae ordinaria via ex Adamo propagatae. Itaque RECTE Cajetanus in Opusculo de Concep. B. Virginis Cap. 3. affirmat, omnino esse Certum, quod B. Virgo contraxerit hoc Debitum incurrendi peccatum &c. neque posse hoc ipsum negari absque HAERESI, cum alioqui sequeretur, B. Virginem minime fuisse redemptam per Christum. Ex his igitur habes, quantopere fallatur, aliosque fallat Panormitanus Saguas, immo & non levis flagitii sit apud Deum reus, dum Lampridium tam immerito Impositoris nomine fugillat, & fingentem auctoritates exhibet, idque publicis typis praestat, ut ei longe lateque infamiam conflent. Monendi prae terea sunt discipuli, quos idem Theologus imbuit Opinione de Immunitate Debiti, ut ab eo petant, cur Salmaricenses Theologos Quaestionis hujus omnium fortassis accuratissimos tractatores, suorumque dictorum vades a Lampridio adductos ne uno quidem verbo dignatus fuerit. Si hos legerent, continuo animadverterent, quae illi Tract. XIII. Disp. 15. Dub. 6. §. 2. num. 227. habent, ego vero heic exhibenda censeo. Ex his, ajunt, manifeste deprehendes, Falso dixisse Jacobum Granados, praedictam Opinionem negantem Debitum Deiparae, assentis omnibus esse Probabilior, quam opposita; sicut etiam insulse, & sine fundamento a quibusdam junioribus spargi coepsum est, quod jam talis Opinio sit Communis. Quo pacto enim Probabilior, aut Communis dici potuit Opinio omni antiquitate destituta, Triginza Sanctorum Patrum stylo reprobata, aliorumque Census Quadraginta Auctorum, cum antiquorum, tum juniorum calculo explosa, & inter Haereticas, vel Erroneas, aut gravi alia censura dignas, Duodecim, quos nunc dedimus, censoria virga rejecta: licet a paucis neotericis in tutea sit, qui nec rem plene examinarunt (immo plures eorum nullo praemisso examine) neque ad ita asserendum vero & firmo alicujus Patriis testimo-

testimonio, aut legitima ratione nituntur, ut ex solutione eorum, quae pro se afferunt, statim patebit? Num major censenda erit pro concilianda Probabilitate, vel Communi assensu, decem vel duodecim Theologorum, seu Concionatorum auctoritas (si tot praedictae Opinioni usque modo subscribunt) quam centum & quadraginta (omissis adhuc Patribus) neque minoris notae, neque inferioris classis, qui illam impugnant, & nostram sententiam suentur? Denique si Saguas velitationibus hisce putat, se posse Cusentinorum Votum, (quod tamen nominare non audet) eripere Censurae: is fateatur necesse est, se nihili facere non solum tot ac tam insignes Theologos praecedentium Saeculorum, sed etiam tot Sanctos Patres, quos explicare Scotistae nesciunt, nisi admissio in Virgine Debito peccandi. Pergamus nunc.

Pag. 13. moleste fert Saguas, *Scotificam* appellari a Lampridio Sententiam faventem Immaculae Conceptioni, quod haec omnium fere Fidelium Sententia sit. Neque perspicere vult, id brevitatis causa factum, atque ut eam *Thomisticae* opponeret. Ceterum plurimis in locis, atque ideo semper, illam uti *Piam*, *Probabilemque* Lampridius agnoscit, eique *favere Romanos Pontifices* fatetur: quod potissimum vide pag. 53. & sequ. Lampridium deinde Saguas inculcat, quod in dubium revocaverit, sitne Objectum Festi de Conceptione *Sanctificatio*, an *Praeservatio*, quando dalla Chiesa si ordina sotto *Precesso* il celebrarsi da Tutti la Festa e l'Uffizio secondo la Pia Sentenza. Quam aliena sit à veritate suppositio Praecepti hujus, satis arbitror, me antea in aliis colloquiis demonstrasse, neque heic repetenda reor. Subinde in Lampridio Saguas criminatur *l'esporre con tanta gagliardia Tutti gli argomenti dell' Opinione contraria, da noi per altro sepunti: e scbiervare con tanta ordinanza e Scrittura, e Sansi Padri, e dir, che i Dottori favorevoli alla Pia Sentenza non aliam conciliandi tollerabili aliqua ratione loca Scripturarum, Patrum, ac veterum Theologorum cum Sententia sua, nisi statuendo in Virgine Debitum Peccati Originalis &c. e poi soggiungere: an autem sit haec mens Literarum sacerarum, & an sufficiat interpretatio ista ad rite explicanda tot loca Patrum, & veterum Theologorum, erit Apostolicae Sedis nos infallibili judicio edocere: il che è lasciar gli argomenti senza risposta*. Quisquis haec legit, in animum suum certe inducat, Lampridium composito agmine in Sententiam *Piam* insurrexisse, argumentaque adversus illam militantia insoluta reliquisse. Sed haec nihil aliud sunt, nisi exaggerationes merae, eaeque virulentae, aptissimae quidem ad subvertendum eorum judicium, qui Opusculum Lampridii nunquam
lege.

legerunt, sed injustae, uti judicabunt qui legerunt. Etenim ubinam, immo & tanta vi, *Omnia* Opinionis adversae *Argumenta* ille in medium protulit? Ubinam tanto ordine divinas *Scripturas* in aciem eduxit, Piae Sententiae adversantes? Loca erant indicanda, neque sine tabulis instruenda erat atrox ejusmodi accusatio. Contra Lampridius Cap. 8. pag. 53. *Scotisticam*, inquit, *Sententiam* laudavi, iterum laudo, non uti *Certam*, sed uti *Probabilem* ac *Piam*. Non enim defunt graves conjecturae & congruentiae ad eam persuadendam; & quamvis explicite non habeatur in *Scripturis* sacris, neque in *Sanctorum Patrum* scriptis, implicite tamen contineri posse in iis videtur. Neque contrariam explicite habent divini *Libri*. Quod si *Patrum* sententiae *Immunitatem* hanc a *Deipara* excludere videntur, curant ejusmodi patroni, ut illorum dicta explicant, sibi quae minime contraria ostendant. Denique Piae huic Sententiae favent *Romani Pontifices*. Similiter Cap. 16. pag. 122. ait: Docente nos in primis *Ecclesia Romana*, scimus, *Probabiles* adesse rationes, propter quas *Sententia* haec non videtur hactenus adversari *Dogmatis Fidei*, immo videtur consonare cum ipsis, ita ut jure *Pia* appellanda sit. Ita Cap. 25. pag. 203. postquam dixit, a Thomisticae Sententiae patronis opponi ex Apostolo: *Omnes in Adam peccasse*, Lampridius subdit: At quum **NON IMMÉRITO** responderetur, non ita rigide accipiendas semper esse universales quasdam Sacrae Scripturae propositiones, ut eximere ab eis quaedam particularia non liceat, si id suadeant rationes ab ipsa Scriptura legitime deductae &c. Itaque Lectori imponitur, dum a Lampridio producta in medium divinorum Librorum loca dicuntur ad oppugnandam Scotisticam Sententiam.

Cum veritate quidem consentit, ab eo in aciem, atque ordinatim, educta fuisse complurium Sanctorum Patrum, ac veterum Theologorum loca Cap. 24. At quare? Num ad Piae Sententiae perniciem? Apertissimum est Lampridii consilium. Is, ut Opinionem eximentium Virginem a *Debito* contrahendi peccati originalis, nimis temere inventam in Scholas ostenderet, Patrum arma adversus illam exeruit. At quandoquidem eadem loca militare etiam videbantur in *Piam* Sententiam, rationem addidit, per quam illius patroni sese ab iis expediunt, admissa nempe *Necessitate*, seu *Debito contrahendi peccatum*. Ergo perperam venditur, sine responsione relinqui argumenta Piae Sententiae contraria. Neque certe contra summorum Pontificum Bullas militat dicere; judicaturam aliquando, si velit, infallibili judicio de hujusmodi interpretatione Sedem Apostolicam: immo secundum eorum mentem est, postquam de celebri ista Quaestione in suis Bullis summi

summi Pontifices judicium sibi haftenus reservarunt. Ceterum uti nunquam Eruditi prohibiti sunt in *Debitum* illud negantes arma convertere, ita neque Sanctorum Patrum armamentario in eisdem uti. Et quando omisum minime fuit, Lectorem monere de ratione adhibita a Piae Sententiae professoribus, ne illam inde laesam ostendant: quid ultra faciendum fuit? Progreditur Saguas in alias furentis animi exaggerationes pag. 19. Lampridium accusans, quasi is scripserit, a confictis in Hispania Historicis quibusdam; atque a spuris Laminis Granatensibus *abbia l'origine l'universal Consentimento alla Pia Sentenza*. Proinde ait, a Lampridio censura impeti *numerum innumerabilem Doctorum*, eademque involvi (si Superis placet) ipsosmet Pontifices Gregorium XV. & Alexandrum VII. Sed quam sit interdum Veritatis deploranda conditio, quando in manus hominum defertur ira & odio exaestuans, nunquam melius quam hinc edificere poteris. Ubinam, quaeſo, Lampridius in tam enormem, falsamque propositionem erupit? Lege Caput X. Libri ab eo compositi, ac desine mirari, si potes, quanta vertigine animi & oculorum haec pertractentur a Siculo Saguas. Agnoscit ibi Lampridius, non a fraudibus iis emerſisse dignitatem Piae Sententiae, & favorem, quem ei impertiunt Romani Pontifices, atque innumeri doctissimi viri. Hoc unum ille contendit, ex Historiis, ac Laminis Granatensibus sub finem Saeculi XVII. confictis *persuasum multis, Dubitationem omnem de Veritate Sententiae Scoticæ sublatam fuisse, factumque esse, ut tam firmo assensu eidem adhaeserint Nonnulli, atque inter eos non pauci doctrina Theologica excultri*. Accipe nunc, quam disertis verbis mentem suam ibi Lampridius explicet: *Fraudes, inquit, figmenta, falsaeque interpretationes, quae sese in istam intrudere controversiam, Rationibusque Legitimis, quas Theologi melioris notae pro Immunitate Virginis attulere, & quas non solum Probabiles ac Pias agnovit, sed etiam intuitu pacis impugnandas verius Apostolica Sedes, sese addiderunt: in causa fuisse, cur Certitudinem, ignotam adhuc Romanae Ecclesiae, omnibusque rite Eruditis, Nonnulli sibi persuaserint se intueri in eadem Sententia*. Unde nata Probabilitas Piae Sententiae, diserte his indicat Lampridius. Extra se ergo nimium vagabatur Saguas, quum Lampridio tanta confidentia affinxit adeo temerarium, ejusque menti & confessioni contrarium effatum. Certe durum est concoquere debere, neque alte conqueri de abominanda hac pugnandi ratione; & praecipue quod is irridendo addere non vereatur: *Questo è l'argomento d'una Verità, che è base di tutto il vostro Libro*. Eritne unus, qui Lampridii Librum

brum legerit, atque ibi invenerit scriptum, tantummodo post effossas Laminas Granatenfes *cominciò a crescere il numero de' Seguaci della Pia Sentenza?* Id unum Lampridius arripuit ostendendum, scilicet post ea tempora invaluisse in Segovienfi, Abulensi, & Tolofana Ecclesiis, *Traditionem publici Cultus Immaculae Conceptionis* ab *Apostolorum* discipulis, aut a primis Ecclesiae Saeculis ad nos venisse. Inde natum *Votum Sanguinarium*, cujus prima origo creditur Anno 1618. in Segovienfi Ecclesia, unde postea penetravit in Siciliam Anno 1624. Nam quid sibi non permissum licitumque putarent homines pii, qui tot figmenta incaute sumentes pro minime dubiis Antiquitatis venerandae monumentis, ad tantam *Certitudinem* evectam fuisse Piam Sententiam sunt arbitrati, ut pro ejus tutela Sanguinem vovere justum ac meritorium in posterum foret? Hanc Veritatem, hanc Certitudinem eorum Vota sonant, atque in primis Ducis Ossunae Votum, quod Lampridius sub finem Capitis XI. dedit. Nunquam ergo somniavit Lampridius, ex iis fraudibus exordium coepisse fundamenta Piae Sententiae, quam *Rationibus Legitimis* longe antea invectam Piamque & Probabilem, & a plerisque Fidelium, atque ab ipsis summis Pontificibus laudatam confessus est. Inde solum erupit *Certitudo*, sive *Persuasio* tantae *Certitudinis*, pro qua tutanda licitum *Nonnulli* censuerunt Sanguini ac vitae suae non parcere: quod antea nemo fuerat ausus. Inde etiam invalescere coepit exemptio Deiparae a *Debito* peccati originalis: quam Opinionem concors Theologorum Schola antea improbatat. Videndus in hanc rem est P. Joannes Perlinus Complutensis Academiae Professor in Apologia Scholastica pro magnae Matris ab Originali Debito Immunitate. Quamobrem judicabit tandem doctorum hominum Respublica, Lampridiusne, an Saguas, mendacia diffeminet, & Catholicorum mentes imposturis in transversum agat. Veniam heic poposcit quiescendi Romanus Abbas, atque in diem tertium convenire decrevimus, ut quae examinanda supererant reciperemus. Proinde amantissime Azevede, mihi erit alterius Epistolae occasio, quam huic adnexam accipies. Vale.

Dilectissimo Azevedo Ferdinandus Valdesius P. S.

EPISTOLA DECIMA.



URSUS convenimus Romanus Abbas, & ego, reliquum Epistolae a Saguas conscriptae ad trutinam revocaturi. Abbas tamen, antequam in examen invaderemus, ait: Ad unum fortasse certamen putas te hodie venisse; at novem rem nobis in posterum futuram cum geminis commilitonibus; nam ante duos dies ad me delatus fuit novus *Parthenotimi* Liber adversus Lampridium. Tanta mihi erat ejus legendi aviditas, ut non ante cubili & somno me tradiderim, quin oculos ad umbilicum illius perduxerim. Ego heic. Quanquam prior in Lamindum Pritanium, sive Lampridium, copias Parthenotimus moverit, attamen ab eodem Lampridio deinde exagitatus, aequius quam ceteri in arenam iterum descendere potuit. Verum dic, rogo, num ille felicioribus quam antea armis pugnam instauraverit. Tum Romanus Abbas: Non est, ut nosti in quemquam praecipitanda sententia. Ad Lydium lapidem oportet exigere illius rationes & argumenta; facillique deinde erit ad sententiam gressus. Sed quando tam Parthenotimus, quam Saguas, eandem interdum accusationem instruunt in Lampridium, utrique & nos responsum dabimus. Pag. 38. Saguas, & Parthenotimus num. 247. ad Logicae Regulas advocant eundem Lampridium, quod pag. 10. sui Libri ex Academiæ formulis spondentibus defensionem Immunitatis Deiparae, sed nulla Sanguinis quoque profundendi obligatione apposita, inferre voluerit, eas idcirco ab eo additamento abstinuisse quod germanae Pieratis metas transgredi sibi videretur, illam Sanguine quoque velle testari. Claudio pede procedere argumentationem hanc ostendunt, exemplo non uno adducto: quasi a controversiis eliminanda forent argumenta a Probabilitate deducta, & Lampridius pag. 141. Cap. XIX. sincere fassus non fuisset, se *justae Conjecturae* loco habere hujusmodi argumentationem. At quaerentibus nobis, an Sanguinarium Votum honeste liciteque concipi possit, occurrit statim immensum illud agmen Religiosorum aut Saecularium hominum, inter quos innumeri etiam ex celeberrimo piissimoque Instituto ipsius Parthenotimi, qui quamvis Piam Sententiam profiteantur,

Tom. V.

Z z

aut

aut etiam sese obligent juramento, vel Voto ad illam tuendam calamo ac voce; a Vita tamen pro illius tutela obliganda abstinere. Non ii certe in cultu & amore Immaculatae Conceptionis quidquam Siculis concedunt; & nihilominus non eo usque procedendum censent, ut pro ea Sententia Sanguinem suum vovere velint. Num doctiores, num ferventiores in Pietate erga Deiparam dicas paucos Siculos, & alios quosdam qui alibi Votum illud suscipiunt? Immerito hoc dicas. Non alia ergo verisimilior caussa potest excogitari, quam quod ii animadvertant, Piam Sententiam, pendente judicio Ecclesiae, carere adhuc firma illa Certitudine, quae necessaria est ad Vitam nostram rite ac laudabiliter impendendam pro tutela Veritatum ad Sanctam Religionem spectantium, & quod eam Sententiam Piam quidem & Probabilem habeant, nondum vero ab omni formidine falsi liberatam. An iusta appellari possit hujusmodi Conjectura, atque an influxum habeat ad controversiam hanc dirimendam, non Parthenotimi, non Saguas, non meum judicium, sed hominum sine studio partium ista expendentium, attendas velim.

Pag. 45. Panormitanus Saguas divisionem refricat Certitudinis in *Moralem, Physicam, & Metaphysicam*, & dimissis postremis duabus, quas tribuerat Cardenas Piae Sententiae, in prima insistit, cujus exemplum profert, nempe *Julium Caesarem* Romanorum Imperatorem olim in vivis fuisse. *Moralem* ergo Certitudinem in eadem Pia Sententia deprehendi contendit, ex quo communis Fidelium Persuasio, Doctores celeberrimi, celebrioresque Academiae ipsi adhaerent, eique favet auctoritas Apostolicae Sedis. Verum huic Theologo respondeas velim, restare ei adhuc probandum, tot Academias, tot doctos viros ideo tutari Scotisticam Sententiam, ut de illius Veritate nulla amplius eis supersit dubitatio. Quod eam reputent Piam ac Probabilem, immo Thomistica Probabilior, libenter damus. Quod certam, non concedimus; adoptio enim Sententiarum in Scholis, ex majori Probabilitate plerumque, non vero a Certitudine procedit. Natalis Alexander Sorbonicus Doctor in Hist. Eccl. Saec. II. Diff. 16. §. 21. haec ait: *Sententiam de Immaculata Deiparae Virginis Conceptione, non solum ut Probabilem & Piam, sed ut propriam Facultatis nostrae doctrinam propugnabimus, si de ea dicendi scribendive detur occasio. At contrariam Opinionem Falsam, Impiam, & Erroneam, Ecclesia prohibente, & sacra Facultate, quae suum Ecclesiae judicium subijcit & accommodat, probante, non dicemus.* Eundem vide in Hist. Eccl. Saec. XV. Diff. VIII. n. 11. Quid reliquae Academiae, ceterique doctissi-

mi homines sentiant, erit Panormitani Saguas ostendere. At is pergit dicere, illam haberi *Certitudinem Moralem*, quae prudentem errandi Timorem excludit; nihili enim fit Timor Imprudens huc irrepens. *E quale Arricolo di Fede, o quale Evidenza abbiamo noi, che Giulio Cesare fu nel Mondo? Dunque dobbiamo dubitarne prudentemente?* Ita ille, neque erubescit haec scribere. Utinam Piae Sententiae ea foret Certitudo Moralis, quae Julii Caesaris existentiae: nihil amplius de Controversia hac superesset disputatio. Coaevos Scriptores, innumera Monumenta habemus, quae Imperatoris illius vitam & facta evincunt, & neminem dabis negantem, quin is olim vixerit. At quod est ad Factum Conceptionis Virgineae, neque divinae Scripturae, neque Sancti Patres priorum sex Saeculorum, qui rem novisse potuerunt, quidquam de hoc habent; immo id potius negasse videntur: quod etiam expresse factum videmus ab antiquis Theologis. Quis ergo nisi praecipitis iudicii Scriptor aequare audeat Piam Sententiam existentiae Julii Caesaris? Quid nisi affectibus obcaecatus negare, quin Prudens Timor supersit, ne Morali Certitudine careat Virginis Sanctissimae Praeservatio? Quod plus est, Romana ipsa Ecclesia, Mater ac Magistra nostra, Certitudinem hanc minime deprehendit, dum Piam tantummodo agnoscit, ac Probabilem, sibi eodem tempore iudicium de Veritate ejusdem Sententiae reservat, & contrariae suum locum relinquit. Annon ergo justus & prudens Timor supersit? Nihil autem opus est terere tempus in perpendendis Logicalibus argutiis, in quas expatiatur ingeniosus Saguas, se demonstrare posse arbitratus, apud Academias, doctosque viros *Certam* esse Scotisticam Sententiam. Quum nulla Academia, nullusque Catholicorum Doctorum excogitari possit, qui hac in re, uti ratio suadet, suum iudicium non accommodet iudicio Sedis Apostolicae in iis, quae eadem haecenus decrevit, decreturaque in posterum sit: frustra ingenium suum torquet idem Saguas in obtrudenda nobis Certitudine ejusdem Sententiae. Frequens ipsa formula Voventium, se videlicet polliceri tutelam Piae Sententiae *juxta summorum Pontificum Decreta edita, vel edenda*, quae illorum sit mens morigera summis Pontificibus, sat prodit. At pag. 58. Parthenotimus insistit adhuc, ex Alexandri VII. Bulla deduci, non solum Piam ac Probabilem, sed *Moraliter Certam* evasisse Scotistarum Sententiam, quum ibi dicantur *ad eam accessisse celebriores Academiae, & jam fere omnes Catholici eam complectantur*: ad quod eadem semper recurrit responsio, nempe easdem Academias nihil aliud sentire, nisi quod Romani Pontifices, atque ipse Alexander VII. sen-

fere, scilicet agnovisse eos quidem, & agnoscere Piam Sententiam Probabilem, & si mavis, altera Probabiliorem, sed nunquam Morali-ter Certam. Nam si postremum hoc visum tandem fuisset Romanae Ecclesiae; cur a duobus & ultra Saeculis controversiam hanc adhuc indecisam reliquisset? Cur nunquam contrariam Opinionem aliqua censura perculit, eam aut Falsam, aut Erroneam, aut Scandalosam &c. declarando? Restat ergo, frustra niti Saguas, ut uos ad Moralem hanc Certitudinem Piae Sententiae tribuendam adducat. Quum apertissima heic sint tot Romanorum Pontificum, & Concilii Tridentini Decreta: nostrum est, ab iis erudiri, non vero ab iis, qui sibi ac factioni suae adulantes, ad rectum hac de re iudicium ferendum quodammo- do impotes se produunt.

Is tamen animum minime despondet, sed *Festum Conceptionis* adsumens, in eo spem victoriae certae collocat. At nos in aliis colloquiis, quum de Libro Patris de Luca ageremus, ea animadvertimus, quibus spero satisfactum iri rationibus Scottistarum ad eam anchoram confugientium. Invitus tamen in Quaestionem hanc a vociferante Saguas iterum revocor. Meminit ille Bullae Sixti IV. in qua Festum & Officium *Immaculae Conceptionis* probata fuerunt. Meminerat & Lampridius. In dubium revocat Decretum Sacrae Inquisitionis interdicentis sub Innocentio X. appellari *Festum Immaculae Conceptionis*, ea ratione usus, quod P. Esparza sub Alexandro VII. scripserit de Conceptione, atque usus expresse fuerit termino *Immaculae*. Addit: *Decise Alessandro la nullità di un tal Decreto colla nuova impressione del Titolo d'Immacolata nell' Anno 1655.* Denique statuit Alexandrum VII. declarasse objectum Festi de Conceptione esse *Disparae Praeservationem*. Egregie profecto ad confundendas Lectorum mentes. Nunquam negavit Lampridius, quin liceat, semperque licuerit sectatoribus Piae Sententiae *Immaculatam* appellare Virginis *Conceptionem*. Neque ullus Romanorum Pontificum, neque Sacra Congregatio id unquam prohibuit. Quid ergo vetitum? Id unum, quod alibi demonstravimus. Scilicet postquam Sanctus Pius V. abrogatis Missa & Officio a Nogarola compolitis, & a Sixto IV. in usum tantummodo adhaerentium Piae Sententiae probatis, Missam & Officium de *Conceptione* praescripsit Ecclesiae universae, ea ratione concinnata, ut utrique factioni sine suae Opinionis detrimento celebrari possent: exorti subinde sunt, qui contenderent sub *Conceptionis* nomine in celebratione Festi subintelligi *Sanctificationem*, & contra alii, qui *Festum Immaculae Conceptionis* appellandum censerent. Anno igitur

1622. Gregorius XV. ut est in Bullario Romano Constit. 29. ejusdem Pontificis, decretum hoc emisit: *Cum S. R. E. de Beatissimae Virginis Conceptione Festum solemniter & Officium celebret, omnibus &c. praecipit, ut in Sacrosancto Missae Sacrificio, ac divino Officio celebrandis, tam publice, quam privatim non alio quam Conceptionis nomine uti debeant. Contravenientes autem Sanctitas sua voluit & declaravit subjacere debere, & subjecit censuris &c.* Quod mirere, Panormitani ambo, & praesertim Parthenotimus Cap. XI. num. 85. Lampridius insultant, quod partem hanc Constitutionis Gregorianae omiserit, eam quippe Sententiae Piae faventem arbitrantur. Neque vident, per eam reipia jugulari argumentum e Conceptionis Festo derivatum. Si sub Conceptionis nomine celebrandam jussissent Romani Pontifices Praeservationem duntaxat: quis non statim intelligat, nihil obtulisse, quominus Festum Immaculae Conceptionis illud esset appellandum? Immo sine dubitatione haec ei appellatio tribuenda fuisset. Verum ii tam severe praecipientes, ut non alio quam Conceptionis nomine illud Festum donetur, satis nos docuerunt, suae mentis esse, ut tam qui Piae Sententiae adhaerent, quam qui contrariae, sub generico, sive latiori vocabulo Conceptionis Festum illud celebrantes, Virginem Sanctissimam honorent, caelestibus gratiis perfusam, sive Praeservata, sive Sanctificata fuerit. Gregorius ipse XV. in eadem Constitutione post vetitas omnes disputationes colloquia & scripta adversantia Piae Sententiae, diserte loquitur inquit: *Per hoc tamen Sanctitas Sua non intendit reprobare hanc Opinionem (scilicet Thomisticam) nec ei ullum prorsus praepudicium inferre &c.* In subsequenti vero Constitutione Eximii &c. veniam facit Fratribus Ordinis Praedicatorum, ut de cetero in quibuscumque privatis eorum colloquiis, seu conferentiis, inter se duntaxat, & non inter alios, aut cum aliis, de materia ejusdem Conceptionis B. Mariae differere & tractare libere, & licite possint & valeant. Neque heic mihi elabatur volo a Parthenotimo petere: qua conscientia is in Indice novi Libri sui ad vocem Opinionis haec scripserit: *Opinionis nomine numquam Alexander VII. in sua Constitutione usus est ad significandam Piam Sententiam; ac proinde minus castigare loquitur Lampridius, qui FERE SEMPER eam vocat Opinionem, & ab hac Pietatem appellat Opinativam: atque is Lectorem remittit ad Diss. II. Cap. 11. n. 252. Libri sui.* At rogandi sunt Lectores, ut perspiciant, an non sit plane statuendum contrarium, quum Lampridius *Fere Semper Scotisticam Sententiam* commemoret, eamque uti *Piam Sententiam* non uno in loco appelleret. Jurene vero, an injuria,

juria, is eandem *Sententiam* dixerit nondum egressam e finibus *Opinionis*, ex ejusdem Lampridii rationibus colligendum est, & in eum ipsum finem haec nostra progreditur oratio. Ceterum an in disputationibus placitisque dubiis ea sit vis vocabulo *Sententiae*, ut *Opinionis* naturam exuat; & quae *Opinio* dicitur, dici etiam non possit *Sententia*: nihil est quod inquiremus; usus enim Scholarum hac in re patentissimus est. Neque certe quidquam deperit dignitati Piae *Sententiae*, quod in praelaudata Constitutione XXIX. Gregorius XV. eandem *Opinionis* nomine donarit, scribens: *Sub eisdem Censuris & poenis mandans, quod negantium Opinionem, videlicet quod non fuerit concepta cum peccato originali, in praedictis publicis actibus asserentes, aliam Opinionem non impugnent &c.*

Ad Alexandrum VII. quod attinet, jam in aliis colloquiis certissimum ostendimus, ab eo laudari *Pietatem sentientium animam Beatissimae Virginis in primo instanti creationis atque infusionis in corpus fuisse &c. a macula Peccati Originalis praeservatam immunem, atque in hoc sensu ejus Conceptionis Festivitatem solemniter ritu colentium & celebrantium*: qui cultus numquam immutatus fuerat; simulque eos improbari, qui *Ecclesiam Romanam huic Sententiae & cultui juxta illam Beatae Virginis exhibitio favere negant, pios Christi Fideles a sua pacifica quasi possessione deturbare cogendo*: Quibus verbis (en ut centies hoc idem repetere cogor) laudantur, probantur, quicumque idem Festum celebrant secundum Piam *Sententiam*. At nihil habet Pontifex, quo improbet celebrantes illud sub significatione *Sanctificationis*, propterea illos quoque in sua quasi possessione relinquens; neque Fideles omnes ad id Festum celebrandum adigit secundum intentionem Scottisticae *Sententiae*: quod sane contra mentem illius Pontificis nunc Panormitani Theologi factum supponunt ac venditant. Verum Parthenotimus Diff. I. Cap. 14. n. 107. Certitudinem Piae *Sententiae* erui posse censet ex ipso nomine Festi *Conceptionis*. Nam sub nomine *Conceptionis* intelligi nihil aliud potest, si ei credimus, nisi instans primum, quo Virgo Beatissima concepta fuit; tunc enim praeservata ab originali macula dicitur ab Alexandro VII. Aliter sentiendo, appellandum fuit Festum *Sanctificationis*, non *Conceptionis*. Neque is animadvertit, uti toties innuimus, ad utramque *Sententiam* accommodari genericum nomen *Conceptionis*, quum in ea Conceptione honorem Virginis statuant, tam qui eam tunc *Praeservatam*, quam qui *Sanctificatam* credunt; & non minus commode dicatur primum instans, quam secundum *Conceptionis*. Fortassis etiam ad primum instans

flans Conceptionis referre quisquam posset Opinionem de culpa contrasta, simulque Sanctificatione. Nam uti Suarez Qu. 27. Art. 2. Disp. 3. sect. 4. ut alios praeteream, agnoscit, *Beatam Virginem in propria persona fuisse Peccato obnoxiam in Primo Instanti suae Conceptionis, & nihilominus in eodem potuisse carere peccato, & praeveniri Gratia Dei*; ita fortasse non incongruum foret cogitare, in eodem primo instanti Beatam Virginem contraxisse labem, & sanctificatam fuisse. Quod ex abundanti dictum volui, nam Ecclesia nihil heic statuit; atque exploratum est; nunquam Alexandrum VII. interdixisse Thomistis celebrare Festum Conceptionis, subintellecta Opinione Sanctificationis, sublequutae, ut ipsi censent, in secundo instanti. Neque is immutatum voluit Decretum Gregorii XV. de celebrandis Missa & Officio non alio quam Conceptionis nomine; immo idem renovavit. Cur autem non secus ille, quam Clemens XI. (uti Lampridium ex Cardinali Gotto deduxit) *Immaculae Conceptionis Festum* appellari noluerunt, nisi ut Fideles discerent, ejus Festi Objectum non restringi ad unam Piam Sententiam, sed extendi etiam ad contrariae Sententiae, sive Opinionis affectas? Componamus ergo nos ad veram Pontificum mentem, atque evanescent continuo argumenta e Festo Conceptionis per adversantes petita. Quod si in Horis Canonicis *Sancta* appellatur Conceptio, hoc ei nomen merito convenit; nam secundum hos Beatissima Virgo *Praeservata*, secundum alios *Sanctificata* in Conceptione fuit.

Praetereo quae Panormitanus Saguas pag. 64. & seq. addit, inferre volens ex eo quod Ecclesia licitum ac laudabilem agnoscit Cultum Deiparae secundum Piam Sententiam, Certam quoque evasisse Sententiam eandem. Praetereo quod is habet adversus Lampridium, scribentem Cap. IX. pag. 60. si aliquando Ecclesia Thomisticam Sententiam praeferret (quod possibile nemo neget, & Parthenotimus ipse *Physice possibile* fatetur Diff. I. Cap. IX. num. 62.) ita rem esse compositam, ut *ad huc illud Festum una cum suo Officio ac Indulgentiis conservandum foret*. Quippe haec in aliis colloquiis diluimus, & rursus de primo agemus, ubi cum Parthenotimo uno manus conferemus. Nam quod spectat ad alterum: uti jam monuimus, tunc sub *Sanctificationis* significatione Missam & Officium omnes celebraturi essent: quod nunc soli Thomistae Opinionis sectatores faciunt. Cetera etiam, quae Saguas adjicit in Sanguinarij Voti tutelam, attingenda heic minime sunt, sed reservanda novo certamini, ad quod nos Parthenotimus invitat, de his agens uberiore doctrina; ipsius e-

nim scrinia Saguas expilasse videtur. Persequamur igitur, quae pauca apud eundem restant examine digna. Pag. 96. negligentiae is arguit Lampridium, quod Joannem Baconum in 2. Sent. Dist. 30. adduxerit, adversantem Scotisticae Sententiae, quam *Haeresim adulatoriam*, & *nimis devotam* appellat, ac multis oppugnat; quum idem Baconus in 4. sent. Dist. 2. q. 3. art. 3. suam hanc Opinionem retractaverit. Minime certe animadvertit Lampridius secum pugnantem Baconum; sed non propterea certum est, Baconum recessisse a priore sententia, atque in postrema constitisse. Nam ut is erat ad *Quodlibeta* efformanda mire compositus, modo unam tuebatur Opinionem, eandemque mox aliis argumentis improbat. Is profecto in 4. Sent. atque in eadem (animadvertite attente) ipfissima Dist. 2. q. 3. art. 1. & 2. a Saguas memorata, conclusiones has statuit, scilicet: *Quod Solus Christus excipitur a culpa originali de facto. Secundo, Quod Solus Christus, quia non fuit per generationem carnalem procreatus, excipitur non solum a culpa, sed a causa & Necessitate contrahendi culpam originalem.* Haec ille cum Angelico Doctore consentiens, qui 1. 2. Qu. 81. Art. 3. scribit: *Secundum Fidem Catholicam firmiter est credendum, quod omnes Homines, praeter Solum Christum, ex Adam derivati, Peccatum Originale ex Adam contrahunt.* Quapropter ejusmodi conclusiones Baconi dubitationem alicui ingerere possunt, inne, an alius quicquam post ejus mortem, Deiparam quoque a culpa originali de facto exemerit, lacinia ejus scriptis adjecta. Certe is etiam Lib. 3. Quodlib. qu. 13. scriptum reliquit: *Quarta particula est, quod dicere, quod B. Virgo fuit privilegiata, ne de facto contraheret Originale, Temeraria est, & contra Canonem Bibliae.* Neque omittendum, quod ille decernit q. 4. art. 1. videlicet: *Posito quod Beata Virgo contraxerit peccatum originale, nihilominus est ejus Conceptio Festivitate celebranda:* ut intelligas, jam tum sensit Theologos, ex Conceptionis Festo deduci non posse Certitudinem Scotisticae Sententiae.

Topicum quoque locum de invidia quantis possent viribus constanda Lampridio, non omiserunt Saguas pag. 83. & Parthenotimus Diss. I. Cap. 11. num. 84. & sequ. Generosam gentem tuam Hispanicam, mi Valdesi, ab eo contemtam, immo proficissam contendunt, quod ad tutelam Scotisticae Sententiae apud vos prodierint Historiae Dextri, Liutprandi, atque aliorum, & Laminae Granatenles. Uti Bonam & credulam gentem, non adeo felicem in melioris criticae, solidaeque Eruditionis cultura &c. traduci ajunt; & quidnam non effutiant, ut odia concitent nobilissimae vestrae gentis in adversarium Lampridium.

dium, quom eo usque ejusmodi accusatorum mala fides processerit, ut sine ullo discrimine Hispanis cunctis idem Lampridius probrum inuisse dicatur? Relege quaeso haec ipsius verba Cap. X. pag. 69. unde venenum est haultum. *Notum est, inquit Lampridius, quantum regionum illarum Populi, quibus & Lusitanos jungo, amore Gloriarum ferviant, ac potissimum ad hanc inbiare in Pietatis rebus, & recta Fide Catholica in sinu suo conservanda.* Haftenus vides, non in contentum, sed in laudem Hispanicae gentis haec verti. *Sed simul notum est, Felicissimam illam gentem, quae acutissimi ingenii viros parit, totque insignes Theologos, duobus praecipue praeteritis Saeculis dedit, non adeo felicem semper fuisse in melioris Criticae, solidaeque Eruditionis cultura.* Post tot veras laudes, modestius non poterat innui defectus, non stabilis, sed fortuitus, neque universae Literatae genti in Hispania tributus, uti mox videbis. Pergit Lampridius: *Itaque illuc Interdum non difficilis aditus ipsi imposturae fuit, dum Pietatis speciem praesferret.* Neque vero ibi desiderati *UMQUAM* fuisse gravissimi Viri, subactio iudicio, & Eruditione praeclari. Qui ita loquitur, num de universa Hispaniarum gente obloquitur? Contra vero qui dissimulatis hisce tam apertis in Hispanorum laudem Lampridii verbis; ea tantum corradunt; quae Hispaniae decus ferire videntur: num fati eos consuluisset conscientiae suae arbitraris? Addit continuato sermone Lampridius: *Sed non Semper eis licuit nimium praecipiti minus doctorum torrenti obistere: ubi res erat de augenda aut minuenda gloria Nationis. Satiis propterea illi duxerunt sibi sapere, & publica odia vitare; aut etiam silere sunt iussi.* Tum enarrare pergit, quanto plausu & gaudio consistat illae Historiae fuerint exceptae, quanquam adversus eas non unus in Hispania ipsa insurrexerit. Ista vero confirmat auctoritate Clarissimi inter Hispanos tuos viri, scilicet Nicolai Antonii, cui celebratissimum alterum, piissimumque Scriptorem Hispanum addit, Cardinalem scilicet de Aguirre. Atque ut amplius elucescat; nunquam desideratos egregios in Hispania viros, severiori Criticae; & Eruditioni solidae operam dantes, quod antea affirmatum a Lampridio vidisti: sincere is subdit, adulterinos eos foetus publicis censuris oppugnatos fuisse a Johanne Perez, atque, a multis e Societate Jesu doctissimis viris, inter quos numerat Petrum Ribadeneyra, Johannem Mariana, Ferdinandum de Salazar, Cornelium a Lapide, Melchiorum Inchofer, ac potissimum a Marchione de Mondexar eadem signenta conscripta fuisse meminit. Quod vero apud Hispanos tunc non defuerint homines docti quidem, sed severioris Criticae imperiti, dixit

quidem Lampridius, sed praeunte nuper laudato Cardinali de Aguirre, qui Tom. II. Diss. 3. de Concil. Hispan. scribit: *Hieronymum Roman de la Higuera*, aliosque Auctores ea confirmasse, miseranda corruptione Historiae Hispanicae, ac delusione imperitarum plebium, semidoctorum hominum, immo & multorum ex doctis alioqui, sed minus in Critica aut Eruditione solida & antiqua versatis. Ista commemorans Lampridius, tantorum virorum, & quidem Hispanorum auctoritate fretus, culpandusne a quoquam probo erit? Is autem addit, in Lusitana Academia spurios eosdem Libros adhuc laudari, istamque veritatem ex Tomo I. illius Academiae confirmat. Igitur non injuria scripsit, adhuc ibi Literatos viros reperiri, quibus suadendum est severioris Criticae studium.

At piissimos Hispaniae Reges illusos Lampridius ait. Et cur non? Quae is habet Cap. X. pag. 73. & Cap. XI. vide, ubi etiam *dolendum*, ait, *inclutam gentem Hispanicam, tam prudentem, tam doctam, fuisse diu, ac sine se ludificari hisce fabulis*. Paria ante dixerant Nicolaus-Antonius, & piissimus Cardinalis de Aguirre. Quid vero in Hispania actum fuerit, ubi spuriae Laminae Granatenses emerferunt, apud Lampridium ipsum legas. Si tantum potuere Piissimorum Regum officia, ut ab Anno 1595. usque ad tempora Innocentii XI. protracta fuerit earum damnatio: num negari poterit, quin eisdem Regibus fucum diu fecerint, eorumque patrocinio abusi fuerint ejusmodi figmentorum patroni? Atque haec longiori quam optassem sermone sum persequutus, ut intelligas, nunquam defuisse Lampridium obsequio & existimationi a cunctis debitae erga Hispanicam vestram gentem, virosque ibi Literarum cultores; non enim paucorum vitia in omnes refundere ei umquam in animum venit, immo contrarium mature professus fuit. Confer nunc cum hisce, quae partim concionavit, partim dissimulavit Saguas, ut exosum faceret Lampridium Hispanis vestris. Quod de paucis Lampridius scribit, calumniose alter ad universam Hispanicam Nationem transfert, quam tamen nunquam idem Lampridius *Mendacem*, nunquam *subtilitatibus postam, fabellarum Patronam, imposturarum opificem*, appellavit. Memoranda erant accusatori Saguas loca, ubi haec Lampridius Hispanicae genti universae affinxerit. Nisi id probet, qua poena apud Deum & homines multandus ipse sit, iusti rerum aestimatores edicent. *Bonam & Credulam gentem* profecto Lampridius pag. 80. ait plaussisse *Concilio Apostolorum*, in quo Conceptionis sine macula mentio occurrebat; res quippe nobilissima est, atque ab iisdem Hispanis deprædicatur. Sed quatenam
haec

haec gens? non alia, quam quae uti nuper vidimus, a Cardinali de Aguirre descripta fuit; neque alia esse potest, quando Lampridius ipse testatur, *meliores* inter Hispanos credulitati huic obtiisse, multoque in ea figmenta calamum arripuisse. Nicolaus autem Antonius apud eundem Cardinalem de Aguirre, quamquam de gentis vestrae honore sollicitus, libere tamen scripsit, innumeros fidem incaute habuisse fraudibus iis, uti ejus verba antea a Lampridio adducta dubitare nos non sinunt. Ajebat praeterea eximius ille vir, uti scribit idem Purpuratus, exasperato stylo in ejusmodi fabulatores insurgendum esse. *Tantam enim stragem Historiae Hispanicae, praesertim sacrae, ab iis Pseudo-Chronicis illatam fuisse, ut oporteat ea palam traducere, & execrari nominatim auctores illorum, veluti perniciosos bono communi ac Veritati. Cujus rei exempla attulit, etiam ex Sanctis Patribus desumpta, quibus persuasus fui ad idem sentiendum.* Infra addit idem Cardinalis: *Interest Republicae Literariae, ac tuendae Veritati Historicae, praesertim sacrae sive Ecclesiasticae, necessarium est, ut fraudes, fictiones, & commenta similia cum suis artificibus, sive architectis, innotescant, & de cetero cum visu aut execratione repellantur.* Si haec dicere licuit eximiis summisque viris in Hispania natis atque educatis de rebus suis: num se iis adjungere pari censura, crimen erit Lampridio? At inquit Saguas, Lampridii verba sunt Cap. XI. pag. 75. *Neque enim nova sunt eorum detestanda exempla, qui mentiri pro gloria suae Patriae, immo & pro Pietate non erubuerunt, fortassis etiam licere putarunt.* Quid quaelo heic carpendum Saguas offendit? Num ad solos Hispanos pertinent haec? Immo ad omnia tempora, & ad cunctas gentes referri, ac referenda esse, agoscit quicumque Historiam Literariam, sacram, & profanam non leviter callet. Si haec nescit, aut non videt Saguas, ingens eorum est numerus, qui haec norunt, simulque detestantur. Irafuntur etiam Saguas iterum, & Parthenotimus, quod imposturas & fraudes a tutoribus Piae Sententiae structas Lampridius commemoret, dimittat vero insalutatas, quas contrariae Opinionioni faventes moliti fuere, & Spondanus ad Annum Ch. 1508. ex Surio commemoravit. Sed ubinam bona fides in hominibus ista scribentibus? Diserte Lampridius Cap. XI. pag. 76. in haec verba loquutus est: *Porro eadem ratione arguendus erit, quicumque traditur adulterasse loca Patrum in Contrariae Sententiae patrocinium, aut Revelationes confinxisse Conceptioni Immaculatae adversantes.* Haec omnia execrantur probi viri, Veritatis unius, non gloriae propriae amantes; & praesertim execratur Apostolica Sedes. Addit Saguas: *Le imposture,*

le frodi, gl'inganni inventati da talun difensore della *Pia Sentenza*, han presso di voi indebolita, resa sospetta, e degna di derisione la *Pia Sentenza*. Sed rursus ajo: ubinam heic bona fides? Neque veretur caecus ille Cenfor ignominiam in se contrahere apud omnes, qui Lampridii Librum legerint, & nusquam invenere tanti criminis vestigium? Centies ille uti laudabilem, Probabilemque fassus est *Piam Sententiam*, eamque nullo in loco despexit. Immo post memorata commenta illa, de quibus haecenus egimus, Cap. XI. pag. 75. protestatus est, *se nihil mustitare adversus doctrinam Illibariae Conceptioni Virginis faventem, quae non Imposturis niritur, sed Rationibus ab ipsa Sancta Sede probatis, immo se pro illa dimicare. Nam si titulis confectis atque mendaciis quisquam sibi sumat eandem tueri, nae ille Populum seducit, atque id unum tandem lucrari potest, ut ab ea credenda vel ipsos antea credentes imprudentia sua, ac mala fide avertat. Gnaviter ergo, quantum lubet, pro Virginalis Privilegii Opinione Piorum ingenia pugnent. Bonam causam protegent, quoniam stant pro gloria, quamquam Opinativa, illius, cui fecit magna qui Potens est. Eadem quoque professus fuerat idem Lampridius Cap. X. pag. 69. Attamen adeo enormem accusationem a Panormitano Saguas audire cogimur. Fierine ergo potest, ut ad Veritatem in disputatione hac attingendam aptum se prodar homo, qui ira & odio undique fervens religioni sibi minime ducit tam foede ipsam pervertere atque insectari? Sed jam vela contrahamus. Ita Romanus Abbas, ac deinde ad publica negotia conversa est oratio nostra.*

Quid, amantissime Azevede, ego quoque adjecerim ad ea, quae differuit Romanus iste amicus in causa, quae praesertim ad gentem nostram pertinet, nihil est quod ad te perscribam. Dicam tamen, impediri nullo tempore potuisse, quin unus aut alter interdum in qualibet amplissima Natione imposturas ac spuria monumenta procuderet atque evulgaret, populusque incautus eisdem figmentis plauderet, ac praecipue si pro Pietate militare credebantur. Huic infortunio obnoxia fuit unaquaeque Natio, & quaelibet Civitas, neque Italia ab huiusmodi peste exentam se unquam jactavit. Attamen ubi constet, abundasse etiam cordatos doctosque viros, eosque adversus easdem fraudes arma movisse, tuto in loco est cujuscumque Nationis honor. Hoc idem Lampridius de Hispanis agnoscit, sincereque fatetur. Quare tibi, ceterisque Eruditis nostratibus auctor sum, ut non ex venenatis accusationibus Papormitani Saguas huiusmodi confictorum monumentorum memoriam petas, sed ex ipso Lampridii Libro;

enim

enim Italicorum quemquam hactenus novi, qui imminutam ab eo arbitretur Hispanicae universae gentis gloriam ob fraudes illas omnium execrationi expositas, quando is simul prodit, graviore etiam detestatione exceptas eas jamdiu fuisse ab ipsis Hispanis. Vale.

Neapoli V. Id. Januar. MDCCXLII.

*Eruditissimo viro, Amico summe colendo D. Gregorio Azevedo
Ferdinandus Valdesius S. P.*

EPISTOLA UNDECIMA.



AUCI abierant dies, mi Azevede, ex quo dimiserat Romanus Abbas examen controversiae de Voto Sanguinario, quum novum ab eo colloquium impetravi. Itaque in ejus domo confedimus, sumtoque in manibus altero *Candidi Parthenorimi* Libro, cui titulus *de Pietate in Deiparam* amplificanda *Dissertatio duplex*, illius examen aggressi sumus. Is Liber Anno proxime praeterito Panormitanis typis excusus prodiit. In prima Dissertatione defendit hic Auctor Votum conceptum pro tuenda *Immaculata Deiparae Conceptione citra mortis periculum*. In altera certat pro Voto ejusdem tutelae *etiam cum Vitae periculo*. Non is insolentissima pugnandi ratione, neque continuatis irrisionibus atque conviciis, est usus, quam ab aliis illius commilitonibus, uti vidisti, usurpatam probus quisque, ni fallor, est abominatus; sed uti vir doctus & pius temperanti plerumque stylo rem suam agit contra adversarium Lampridium. Et quamquam aestuare interdum videatur, & ad injustas criminationes rapi se sinat, condonandum est homini, maligno minime consilio adversarium obruere conanti, sed ad suam causam protegendam non satis semper considerare quaecumque occurrunt tela adhibenti. Ceterum quod ad primam illius Dissertationem pertinet, in qua protegitur Votum in Academiis familiare de tuenda *voce & calamo Immaculata Virginis Conceptione*, pauca nobis dicenda viderentur, postquam Lampridius ejusmodi Votum non semel laudavit, & verae Pietati conforme confessus est. Neque enim is unquam in animum induxit turbare hunc usum, eoque minus litem inrentare tuentibus Piam Sententiam, quam Probabilem semper agnoscit, atque etiam altera Probabiliorem posse reputari concedit. Unus ei scopus

pus *Vorum* improbare *Sanguinarium*, a Panormitanis multis usurpatum, atque a Parthenotimo nondum, ut sibi idem Lampridius persuadet, honestatum: quod sane interest Christianae Reipublicae perspectum habere, ne in Pietatis regnum superstitione irrepat, ubi vera sint, quae ipse Lampridius disseruit. At quandoquidem nonnulla Parthenotimus in eandem primam Dissertationem intulit, quae ad trutinam revocanda sunt, age in eadem invadamus, progressuri postea ad id, quod praecipuum est in controversia praesenti.

Dixerat Lampridius Cap. I. pag. 9. de Voto agens, quod plurimi Religiosi viri, atque Academiae concipiunt, de tuenda sine Sanguine Sententia eximente Deiparam a labe originali: *Prudenter agere, qui voce & scriptis propugnaturus se vocent ejusmodi Sententiam; Prudentius agere, qui eandem Sententiam tuentur, sed Voto omisso. Prudentissime denique agere Academiae, si patris causa, rursus ejusdem Sententiae Vorum adjungunt.* Hisce verbis tacite improbari ipsum Votum arbitratur Parthenotimus, aut saltem haec inter se pugnare; quum enim Votum futurum sit *de meliori Bono*, & Prudentia major depraedicatur in tuentibus sine Voto Piam Sententiam, consequens etiam videtur, Prudenter suscipi non posse Votum illud. Quod certum est, numquam in animum Lampridii incurrit improbare illud Votum, quod cum Prudentia susceptum ait, & cavillatoribus tantum id in mentem venire potest, qui facile nodos in scyrpo quaerunt. Igitur ideo *Prudentius* propugnari Sententiam Piam ab iis, qui a Voto abstinent, Lampridius scripsit, quia Voluntas quidem libera est in homine, non vero Intellectus. Quum vero agatur heic non de certa per Fidem, sed quidem de Probabili duntaxat Opinione; & fieri possit, ut in perpendendis rationibus, Immaculae Conceptioni faventibus, dubitationes insurgant, sitne concors cum divinis Libris, ac Traditione Patrum, eadem quamquam Pia & Probabilis Sententia: liberum tunc non est homini imperare Intellectui suo, ut tueatur tanquam verum, quod sibi offeratur tanquam diversam faciem habens. Proinde qui consideratione ac timore isto ducuntur, *Prudentius* agunt, si pro Pia Sententia pugnent, sed a Voto abstineant. At istorum Prudentia nihil officit aliorum Prudentiae, qui persuasum habentes, nihil sibi occurrere posse, unde Piae Sententiae Dignitas imminui apud se possit, Votum intrepide de tutanda Immaculata Conceptione emittunt. Eadem res bona uni potest esse Majus bonum, alteri vero minime; ad normam nempe Prudentiae, quae circumstantias perpendit, & quid praefendum aut postponendum sit, nos docet.

cet. Exigeret fortasse Parthenotimus, ut pro *Prudensius* dixisset Lampridius *Prudenter quoque*, neque comparativo usus fuisset. Sed hoc est tricar, idque ex ipso exemplo, quod ille adhibet, constabit. Praestat sine dubitatione Matrimonio Votum Virginitatis, aut Continentiae. Crederetne ille mihi, si dicerem, Melius ac Prudensius interdum agi, eligendo Nuptias, quam Continentiam & Virginitatem? Si mihi non credit, saltem credat Apostolo scribenti, in quibusdam circumstantiis, *Melius esse nubere, quam uri*. An propterea definit esse Bonum Majus, Matrimonium, quam Virginitas? Hoc ita verum est, ut non defuerint, qui ipsum Matrimonium posse esse nonnumquam materiam Voti censuerunt. Suarez Tom. II. de Relig. Lib. 2. Cap. 9. num. 9. eorum opinionem referens, ait: *Dicunt hi Auctores in eo casu, quo persona est adeo fragilis, ut ad vitandum carnis lapsus, iudicio Prudentum, Melius illi sit nubere, quam uri. Ratio est primo, quod tale Votum de nubendo in tali persona simpliciter est de Meliori bono, cum Paulus dicat 1. Cor. 7. Melius esse nubere, quam uri. Secundo declaratur, quia Consilia Dei licet generatim dentur, tamen in particulari applicanda sunt, expensis circumstantiis personae, loci &c.* Haec Suarez, qui ab huiusmodi Voto in quibusdam circumstantiis minime abhorret. Quare Parthenotimo nulla haec erat iusta causa censurae.

Sed alteram audi, qua in primis delectantur, sibi que plaudunt tam Parthenotimus pag. 124. num. 129. & pag. 178. num. 197. quam Saguas pag. 71. qui & eandem crambem recoquit pag. 72. Si Parthenotimum audimus, Lampridii verba sunt Cap. V. pag. 35. *Sancta & Sanctissima semper fuit, est, & erit.... Beatissima parens Salvatoris nostri, siue fuerit, siue non fuerit concepta sine originali peccato.* Insistens deinde Parthenotimus in adverbio *Semper*, rem nulli antea notam nos docet, nempe illud accipi *pro omni tempore*, uti Jurisconsulti scribunt. At si peccatum Dei futura Genitrix in primo instanti incurrisset, tunc *Sancta* non fuisset. En ergo duas propositiones, quas Logici contradictorias appellant: *omni tempore fuit Sancta, aliquo tempore Sancta non fuit Deipara*. Idem repetitum videas ab altero Theologo, in magistralem fastum semper composito, nisi quod is integrum Lampridii locum sincere refert; Parthenotimus vero in duobus locis truncatum, quasi ad germanum Lampridii sensum intelligendum omisissis verbis nihil opus esset. Sed quis non stupeat, aut rideat ejusmodi cavillationum genus? En Lampridii verba: *Sancta & Sanctissima semper fuit, est, & erit supra omnes mulieres, supra omnes*

mnes Sanctos & Angelos Beatissima parens Salvatoris nostri, sive fuerit, sive non fuerit concepta sine originali peccato. Si bona fide egisset Parthenotimus, nihil horum omittendum fuerat. Non ergo Lampridius, quem uti mente captum Panormitani pugiles incautis propinare vellent, tantummodo dixit: *Sancta & Sanctissima semper fuit &c. Beatissima Virgo.* Dixit *Sancta & Sanctissima supra omnes mulieres supra omnes Sanctos.* Cur ii disjunctum volunt, aut dissimulant, quod Lampridius conjunxit? Negent ii, si possunt, quin Mariae Sanctitas praeccellat omnium Dei Servorum Sanctitatem. Hoc verba Lampridii sonant, haec illius aperta mens. Alioqui poterant etiam cavillari contendendo, adverbium *Semper omne Tempus complecti*, & Lampridium censuisse Deiparam, vel antequam fuit concepta, *Sanctam* fuisse.

Pag. 32. Cap. 6. num. 41. docet Parthenotimus, Piae Sententiae favisse *Sanctum Bernardum*, & Cap. 7. *Sanctum* quoque *Thomam*, quamquam uterque pro contraria Opinione steterit. Et quare? Quia animadvertentes nunc, si in vivis essent, Festum de Conceptione celebrari per universam Ecclesiam, eumque cultum deferri Deiparae *secundum Piam Sententiam*, uti Apostolica Sedes praecepit: procul dubio, secundum principia ab iis posita de Festo *Nativitatis* Deiparae, & de *auctoritate Sanctae Sedis*, mutata Opinione uti Certam amplecterentur Piam Sententiam. Sed non est heic immorandum. Satis jam expendimus Librum Patris de Luca, atque in postremo etiam colloquio, satis evicisse me puto, super falsum suppositum aedificatam fuisse hujusmodi argumentationem. Neque enim cum veritate consentit, Romanos unquam Pontifices, & ne ipsum quidem Alexandrum VII. universae Ecclesiae praecepisse, ut Festum & cultum Deiparae celebrent sub una significatione *Praeservationis*. Laudarunt quidem celebrantes Festum secundum eandem Sententiam, eisque Indulgentias elargiti sunt; sed liberum reliquerunt aliis secus sentientibus Festum illud celebrare sub significatione subintellecta *Sanctificationis*. Propterea nulla esset ratio, cur Sancti Bernardus & Thomas, a sua Sententia forent discessuri. Parthenotimus vero, qui pro aliorum more ex hoc Festo potius ducit spem deducendae ad Certitudinem Piae Sententiae, Cap. IX. num. 63. militaris hujus machinae vim pluribus versat, & quasi nihil dixisset, eandem rursus suo sermone objicit Lampridio Cap. XIV. num. 105. & sequi. ubique ingeminans *Praeceptum* Ecclesiae de Cultu ab omnibus impendendo Beatae Mariae *secundum Piam Sententiam*. Verum si pius iste vir, praedictis positus, Alexandrinam Bullam attentius legerit, & cur Gregorius XV. & Clemens

XI. interdixerint appellare *Immaculae Conceptionis Festum*: ipsum in sententiam Lampridii de hoc Festo concessurum esse confido. Alibi etiam vidimus, stare adhuc Cardinalis Bellarmini responsum de *Festo Conceptionis*, quod Lampridio eripere se posse post alios arbitratus quoque est Parthenotimus Diss. I. Cap. 9. num. 63. & Cap. X. num. 69. Pergit Siculus Theologus ibidem num. 65. edocere, titulum *Immaculae* nunquam interdictum a Romano Pontifice, aut a sacra Congregatione, additum *Conceptioni* Virgineae ab adhaerentibus Piae Sententiae. De hoc nulla est disputatio inter Parthenotimum, & Lampridium, qui postremus aliter sensisse a Parthenotimo perperam supponitur. Unum hoc uti certum statuendum est, non alio nomine quam *Conceptionis* appellandum esse Festum Conceptionis, ut Gregorius XV. mandavit, a cuius mente nullus Successorum Pontificum recessit. Immo decretum hoc idem Alexander VII. confirmavit. Quod si Parthenotimus Cap. IX. num. 62. falsus est *Physice Possibile* Apostolicae Sedis Decretum pro Thomistica Sententia, & postea Cap. X. num. 72. *Moraliter Possibile* hoc negat, adductis in istam rem quorundam Theologorum essatis: erit ejusdem Sanctae Sedis animadvertere, an compedes auctoritati suae injicere possint quorundam uni factioni adiectorum vota sive consilia. Nam quod est ad Lampridium, ei pro Thomistica Opinione venire in aciem animus non fuit; ipse vero nemini unquam concedit in obedientia & veneratione erga Apostolicam Sedem, si quando ad celebrem istam controversiam dirimendam eadem procederet, illamque revera dirimeret. Neque is moratur Academicarum, Populorumque consensum in Piam Sententiam, a Parthenotimo laudatum num. 109. Semper enim, ut toties diximus, quaerendum superest, num tot docti viri Certam eam putent, an tantummodo Probabilem, praeunte Apostolica Sede, quae sibi iudicium de controversia hac reservavit, finitque, ut contrariae Opinioni quicumque vult sese adjungat, & sub consideratione *Sanctificationis* Festum ab iis celebretur. Accedit, quod complures ex iis Academicis unam Piam Sententiam elegere tuendam, ut lites & jurgia in posterum nulla essent. Quamnam vero sententiam in corde foveant Theologi illi, rescire non possumus. Celebris ipsa Parisiensis Facultas multos alit, quibus minime probatur ipsius Facultatis hac de re Decretum.

Dixerat Lampridius, *minime derogari Sanctitati Virginis ab iis, qui contrariae sententiae de illius Conceptione adhaerent; nam Ecclesia eos ut Pios, & Orthodoxos, amat & honorat.* Sed pergit Parthenoti-

mus Diff. I. Cap. 16. num. 130. contendere, eos aliqua ex parte Deiparae Sanctitati detrabere; haberi autem pro Orthodoxis, amari, & honorari, non quia hanc Opinionem sustinent, sed quia omnes Fidei Articulos per Ecclesiam Catholicam propostos libenter admittunt. Lepidum profecto est, non eos amari atque honorari, quia hanc Opinionem sustinent; id enim nemo unquam somniavit. Sed ex quo illi Opinionem hanc sustinent, & nihilominus ab Ecclesia amantur, atque honoribus augentur, quid quaeso consequitur? Nonne ad Articulos Fidei spectat Deiparae Sanctitas? Huic Sanctitati derogare, crimen Catholicus quilibet fateatur; neque Ecclesia tolerat, nedum amat, atque honorat, eidem derogantes. Quum ergo ex Parthenotimi confessione Ecclesia amorem & honorem nequaquam neget contrariae Opinionis sectatoribus: necessario deducendum est ex hoc Ecclesiae iudicio, nihil eos derogare Sanctitati & Honori Deiparae. Si derogarent, eos illa detestaretur atque puniret. At nos, inquit Parthenotimus, Piae Sententiae patroni eos derogare arbitramur. Utrique credo. Sed suntne ii regula Veritatis ac Bonitatis, an Ecclesia? Ceterum dicere, per eos Honori Deiparae derogari, atque hoc palam quoque venditare, videant illi, an hoc sit aperte arguere ac laedere eos amantem & honorantem Ecclesiam, atque ejus mandata despiciere. Peccat enim quisquis Honori Sanctissimae Virginis derogat. Ecclesia vero Anathema promulgavit in quemcumque affirmantem, peccare afsecclas contrariae Opinionis. Interea, donec pendeat Apostolicae Sedis iudicium, fueritne annon Praeservata Maria, incertum remanet, volueritne feceritve, an non, hoc Deus: cujus viae & cogitationes, uti toties diximus, non sunt humano more metiendae, sed e Sacris Litteris, ac Traditione Patrum hauriendae, & firma Fide credendae, quoribus Ecclesia ex iis fontibus hauritas nobis proponit. Quodcumque vero divinae Scripturae, ac Traditioni per Ecclesiae vocem, factum a Deo innotuerit, id sine dubitatione Honorificum Virgini Matri credendum erit, non quod in quorundam Phantasia pro suae factionis amore agitur.

Pauca haec ex Dissertatione I. Parthenotimi excerpti; neque enim opus est cetera persequi, quum nihil ille attulerit, unde viris doctis, studio partium liberis, persuadeatur, haecenus Piam Sententiam e gradu Probabilitatis ad gradum Certitudinis affurrexisse. Hoc unum contendit Lampridius, non moleste interea ferens, immo laudans quemcumque eidem Piae Sententiae addictum, & secundum illum cultum praebentem Immaculae Conceptioni, dum corde, voce,

oe, & calamo hoc ei obsequium praestet ac voveat. Verum quod est ad Votum tutandi proprio Sanguine eandem Sententiam, is adhuc id minime ferendum in Ecclesia Dei censet, neque Parthenotimus quidquam secundis curis ad illud honestandum attulit. Ut hoc perspiciamus, ad alteram illius Dissertationem progrediendum est. Primo multa is habet num. 134. & sequentibus de *Præcepto Vitæ conservandæ*, multaque congerit exempla, quibus licet animam ponere pro Bono spirituali, aut corporali Proximi. Nulla dubitatio est de iis, qui Vitam suam periculo exponunt, ut peste infectis inserviant. Disputationi quidem obnosum est, an liceat mortem oppetere pro Amico: quod alibi perpendimus. Dubium quoque est, an liceat homini lacerato ab hoste permittere, ut ab eo occidatur, quum integrum sibi sit illum perimere. Disputatur etiam, an qui iurejurando se obligavit ad reditum in carcerem, ad fidem servandam adigatur, quamquam sciat fe in iuste morte multandum. Ita contrariis sententiis quaeritur, an Carthusiano liceat potius extremum vitae periculum subire, quam carnibus vesci, a quibus abstinere voverat. Post ejusmodi exempla num. 146. haec Soti verba Parthenotimus adfert: *Altero modo id contingit, per accidens scilicet, quando quis propriam Vitam non servat, quam servare potest; & hoc non reputatur homicidium, nisi quatenus ipsam servare tenetur. Et quamvis homo non sit suae Vitæ dominus, sed custos, non tenetur eam omni possibili modo servare. Potest quippe eam non solum pro Virtute, verum & pro bonis temporalibus exponere.* Verba haec numquam fore e memoria oblitteranda ait Parthenotimus, nam Sanguinarij Voti affectae nolunt certe sibi manus inferre, sed inlatam ab aliis tolerare, ne a Piaee Sententiae tutela recedant. Lampridius vero tradit, hunc esse unum ex iis casibus, in quibus ex Soti sententia homo *Vitam servare tenetur*. At Parthenotimus num. 146. inter convicia numerat, quod idem Lampridius pag. 32. habet, inquit, *Imprudentem, aut Fanaticum, aut Dementem cum esse, qui non renuit mori pro Pietate in Deiparam sine originali labe conceptam.* Pium hunc Theologum lubenter ego, si adesset, rogarem, ut accuratius adversantium referat verba. Accipe germanum Lampridii textum. *Quod Pium sit aliquod Opus, non continuo sequitur, prudenter aut licite pro illo Vitam posse impendi &c. Nimirum necesse est, ut Bonum, pro quo subeunda mors est, non solum pretio superet Bonum Vitæ nostrae, sed etiam sit aequae ac illud Certum. Si enim incertum ac dubium Bonum sit, quocum commutanda est Vita, quis rogo non Imprudentem, aut Fanaticum, aut Dementem cum appelles, qui Bonum tam*

pretiosum & Certum, & cuius possessio manu tenetur, deponere sponte velit, ut Bonum consequatur, de quo dubitatio est an existat, & fieri potest ut numquam existat? Ubinam in his verbis tutela Piae Sententiae? Generatim loquitur Lampridius, multosque casus complectitur, in quibus Imprudentia, aut Fanaticismus, aut Dementia posset deprehendi; & nemo, ut arbitror, neget, quin iusta sit eo in loco Lampridii sententia. Proinde conscientiae suae non satis consuluisse mihi videtur Parthenotimus, qui ut invidiam Lampridio conflaret, unice haec ab eo contra Votum Sanguinarium pronuntiata fuisse, supponere incautis Lectoribus non dubitavit. Subdit postea haec Lampridii verba desumpta ex ejus Cap. VII. pag. 46. *Mori pro Pietate enormis est regula, & fallacissima doctrina, quae aut stoliditatis, aut Superstitionis, aut Fanaticismi dedecus ac reatum, aut saltem Imprudentiae culpam derivare potest* &c. Theologum hunc adeo pium; exoratum rursus vellem, ut majori fide ac diligentia aliena referat verba. Lampridii verba sunt: *aut stoliditatis, aut Superstitionis, aut Fanaticismi, aut saltem Imprudentiae culpam SAEPE in nos derivare posset*. Non ait Lampridius *Semper*, uti mutilatus a Parthenotimo textus insinuat, re vult. Ait *Saepe*, idque exemplis confirmat, quae attingere, nedum negare, ausus non est Siculus Theologus. Sed his postpositis, quae ad rem faciebant, Votum de non comedendis carnibus a Carthusianis emissum (quod tamen non Votum, sed Consuetudinem alii appellant) iterum produciens, illud inquit a nemine haecenus *Fallacissimae doctrinae, stoliditatis, aut Superstitionis, aut Fanaticismi* damnatum. Sed extra chorum non abeat Parthenotimus, Si nemo Votum illud hisce coloribus denigravit, ne Lampridius quidem id fecit. Attamen si Carthusianus, aut quisquam alius Votum idem susciperet, atque in evidenti mortis periculo versaretur, nisi comederet carnes, quas tantummodo in promptu haberet ad effugiendam mortem: tutius, ut puto, auctores ei forent Theologi, ne mori potius eligeret, quam vesci carnibus. Praeceptum Ecclesiae est abstinendi a carnibus certis diebus; & nihilominus aegritudine superveniente, tunc cessare Praeceptum omnes sentiunt. Quanto magis cessabit Votum, si certa mors Voventem maneat, nisi carnes comedat alio quocumque deficiente cibo? Imprudentia ac Temeritas in hisce casibus foret praefraسته mori vellet. Certum quippe est, a Deo praecipi Vitae nostrae tutelam, & iuste praesumitur Deus tunc in his casibus gratam non habere Vitae nostrae iacturam, quum Pium quidem sit opus ob amorem Dei castigare corpus abstinendo a carnibus, sed non ejus momenti ac pretii opus,

opus, ut praeferendum sit conservationi Vitae nobis ab ipso Deo iunctae. Quae Cap. IV. n. 148. & seq. habet Parthenotimus de iis, qui olim sine ulla necessitate sese Martyrio offerebant, heic refricare nihil opus est. Quod enim scripsit Lampridius pag. 33. scilicet eos tantummodo commendatos, qui mortem non improvide quaesitam, & quam alia ratione evitaverant nisi peccando in Deum, forti invictoque animo pro Deo tolerabant: hoc antea tradiderat Clemens Alexandrinus, Origenes, Athanasius, Nazianzenus, aliique Patres. Si eorum sententias a P. Theophilo Raynaudo congestas in Lib. de Martyrio per Pestem Par. 2. Cap. 5. n. 9. Parthenotimus nondum legit, integrum ei erit legere quum libebit.

Sed jam in arcem disputationis hujus invadamus. Licere putat Parthenotimus Vitam impendere pro tutela Immaculatae Conceptionis. Negat Lampridius. Primo ille statuit Diss. 2. Cap. 5. num. 167. concipientes Votum Sanguinarium vovere Sanguinem & Vitam non pro tuenda Veritate assertionis de Praeservatione Deiparae, sed pro Veritatis Pietate, hoc est quia Pium est credere, Virginem Sanctissimam originalis maculae immunem fuisse. Deinde Cap. 6. pergit docere, iuste ac licite Vitam nostram dari posse non solum pro tutela Dogmatis Fidei, sed etiam pro quacumque Virtute, atque opere Virtutis, dum referatur in Deum, & finem habeat Christum. Tum num. 182. Syllogismum huic instruit. Communi Doctorum calculo, duce & auctore Angelico Praeceptore, receptum est, quod honestum sit mori pro quocumque Bono faciendo, seu pro actu Virtutis. Atqui tueri Immaculatam Deiparae Conceptionem calamo & rationibus, cum vera Pietate consonat (uti Lampridius ipse confessus est) vera Pietas, & vera Virtus est. Ergo mori ob tutelam Immaculatae Conceptionis Deiparae honestum est. Ergo Votum ejusmodi tutelae est honestum. Lege ac relege: ad hoc unum propugnaculum se recepit tota Parthenotimi spes atque industria, ut Votum Sanguinarium censurae eripiat. Proinde is num. 192. nos docet, non ideo esse Pium tueri Sententiam Immaculatae Conceptionis, quia Affectus Pietatis praecise respiciat Opinionem; sed quia illa Sententia propugnans Mariae Sanctitatem in primo instanti est eidem perbenorifica. Similiter Votum usque ad Sanguinem non fertur in Sententiam, seu in Opinionem de Immaculata Conceptione, ut Opinio est; sed, quia desert bonorem Sanctissimae Dei parenti, est Pietas, est Cultus, est Virtus; & pro Virtute licitum est, laudabile est mortem oppetere. Sed ut contractas in unum accipias Parthenotimi de re ista rationes, lege quae is habet Cap. XI. n. 222.

Eli.

Elicitur actus Intellectus, quo putetur immunis Deipara a labe originali; & huic concinit alter ejusdem facultatis actus, quo judicatur, Deiparae honorificum esse in illa hanc immunitatem agnoscere & profiteri. Elicis etiam Voluntas actum, quo Intellectui imperat, ut sentiat, Deiparam fuisse sine noxa Originali conceptam. Et quia Voluntas ad id Imperandum movetur ab Honore, qui Deiparae accederet ex illo iudicio, Imperium illud ad Virtutem Pietatis spectare debet. Deinde eadem Voluntas vovet, seu Deo promittit, ut in posterum semper ita de Immaculata SS. Dei Genitricis Conceptione sentiat. Essent heic tot subtilia imaginationis Parthenomitanae meditamenta ad examen revocanda, atque extricanda; sed haec aliorum iudicio dimissa volo. Deinde is addit: prior actus Intellectus, quo judicatur immunis a noxa originali Deipara, ex probatis in priore Dissertatione Saltem est Moraliter Certus: quod Saltem interpositum videtur, ut Certus etiam de Fide credi is actus possit, quamquam Parthenotimus non uno in loco se fateatur ab ea credulitate alienum. Is autem Lampridio permittit, quod sit solum Probabilior; attamen hoc etiam posito, Pietas & Virtus est tueri Virginis Immunitatem, quando idem Lampridius non renuit Sententiam de Immaculata Deiparae Conceptione appellare Piam; & Pia esse neguit, nisi ab hoc actu Voluntatis. Eiusmodi enim Votum primo & potissimum respicit actum Pium Voluntatis imperantem: quamquam duos alios Intellectus actus remore respiciat, videlicet actum, quo putetur, in laudem, obsequium, & honorem B. M. V. cedere, quod ita sentiamus, & priorem actum, quo ita sentimus. Alibi vero indignatur Parthenotimus, quod a Lampridio in ea Sententia fuisse credatur, licitum esse pro ruenda Opinione mortem subire: id enim ipse improbat, semper contendens, & potissimum Cap. XI. num. 229. Sanguinarium Votum concipi pro actu Voluntatis, in quo sita est Pietas, & Virtus, pro qua mori licitum est, neusquam pro actu Intellectus, qui non sit Fidei divinae. Habes, ut puto, expressam Parthenotimi mentem, simulque rationem, ob quam non solum a quacunque censura liberum ab eo credatur Votum Sanguinarium, sed etiam honestum, laudabile, Deoque gratissimum sit appellandum. An solida sint ejus meditamenta, nunc nobis perpendendum restat.

Primo, non est mihi animus te conjicere in disputationes Metaphysicas de vi Intellectus in Voluntatem, & rursus de Voluntatis vi in Intellectum. Scholis haec dimissa volo. Illud tantummodo statuendum est nobis, Voluntatem nostram, aut velit, aut nolit, agat, aut non agat, pendere ab Intellectu indicante quid agendum, aut

agen-

agendum non sit. Si fallitur Intellectus, quod ex multis causis contingere potest, & potissimum si perversi Affectus hominis iudicium perturbant, Voluntas quoque ad perversas electiones & actiones rapi solet. Intellectus autem noster non in humanis tantum rebus, sed & in divinis, plurima noscit iudicio Certo ob earum evidentiam atque ob rationes ineluctabiles ex principiis minime dubiis Veritatis aut Bonitatis deducas; alia vero noscit iudicio tantum Probabili, quia rationes duntaxat Probabiles, modo graviores, modo leviores occurrunt, quae eidem Intellectui repraesentant in illa re Apparentiam Veritatis aut Bonitatis, modo maiorem, modo minorem. Hominum autem vita non Certissimis tantummodo regitur rerum notionibus atque ideis, sed etiam Probabilibus; saepe enim desiderantur primae; & nisi alterae in subsidium adhiberentur, in summam inertiam, incredibilemque confusionem mortalium conditio prolaberetur. Quare ubi non desit Prudentia, in iis etiam actionibus, quae Probabilitate constant, recte iudicare, recte agere possumus atque solemus. Dixi in divinis quoque rebus, & ad Religionem spectantibus, utrumque accidere. Sunt in sanctissima Religione Principia & Dogmata complura Certissima, de quibus dubitare non licet, & praesertim quae in Symbolo ac professione Fidei continentur. Praeter haec multa habemus in Ecclesiastica Historia, minime quidem referenda in censum Veritatum caelestium, Certa tamen ex earum Evidentia. Rursus innumera alia occurrunt, quae sive ad credulitatem, sive ad actionem referantur, veri similibus sive Probabilibus tantum rationibus nituntur, & ad amplum Opinionis, simulque ad amplissimum Pietatis Regnum pertinent. *Pietas* autem, uti *Virtus* est, & concipitur uti aliquid a *Religione* diversum (liceat mihi eam ita definire, sive describere) est Affectus Christiani hominis tendens in Deum, ut ad Patrem, amorem suum filialem, atque obsequium erga illum ostendere & comprobare cupiens cultu atque operibus, quae ei grata sciuntur, aut creduntur. Quum vero Sanctorum honor tendat etiam in Deum, utpote qui eos amat & glorificat: hinc est quod veneratio & invocatio Sanctorum, & praesertim Deiparae Beatissimae, prae ceteris Sanctis Deo carae, sine dubitatione intra ejusdem *Pietatis* fines concluditur. Porro *Pietas vera* appellatur, tam quae in Voluntatem nostram influit ex motivis & rationibus a Revelatione Dei per Ecclesiam nobis propositis, & *Pietas Intrinseca* a nobis appellatur; quam quae eidem Voluntati proponitur ab Intellectu, inclinante in Veritatem non ex Fide Certam, sed Probabilibus tantum argumentis Prudenter innixam, quam nos

Opi-

Opinativam dicimus, quia in Opinione fundata est. Idque ea, ut diximus, de causa, quod mortalibus impervia est Veritas Certa innumeris in rebus, & satis est ad recte agendum Apparentia Veritatis, ex vi rationum Probabilium in iis rebus & actionibus perspecta, & cum Prudentiae legibus consona. Proinde exempli causa, etsi minime ex Revelatione Dei, neque ex Certitudine Evidentiae habeamus, has illasve Reliquias pertinere ad Sanctos, quibus tribuuntur, quum tamen Prudens Probabilitas Intellectui nostro hac de re addit, *vera Pietate* iidem coluntur, & invocantur, eorumque Lipsanis honor merito habetur. Fieri quidem potest, ut in his Intellectus fallatur, neque enim is formidinem omnem erroris excludere hinc potest; sed certe non fallitur Affectus ille tendens in Deum, in quo Pietatem sitam esse praediximus, quandoquidem rem Deo gratam tunc etiam Fidelis praestare se putat, bonamque hanc Voluntatem Deus habet acceptam. Praeterea etsi Error occurrere heic possit, nullum inde detrimentum redundare potest neque in Pium Errantem, neque in Ecclesiam, neque in Rempublicam. Quamobrem quamvis ex iis, quae Lampridius, & nos antea differuimus, Certa nequaquam appareat Pia Sententia de Immaculata Virginis Conceptione, dum Ecclesiae iudicium pendet: attamen quum Probabilem ipsam una cum universis paene Fidelibus Lampridius, & nos quoque fateamur, immo contraria Probabiliorem Ecclesia agnoscere & depraedicare videatur: certum est, *Verae Pietatis* opus peragi in illius patrocinio, & proinde *Votum* de huiusmodi Sententia voce & calamo tuenda laudabiliter, ac prudenter emitti, quum id Deo gratum, ac Deiparae honorificum merito credatur, & nullum, etiamsi Error intercederet, in Voventem, aut in Ecclesiam detrimentum effluere possit.

Haftenus cum Parthenotimo concordēs processimus. At hisce positis ita ille argumentatur. *Vera Pietas*, & vera *Virtus* est ex confessione Lampridii, tueri voce & calamo Immaculatam Virginis Conceptionem. Atqui ex Theologorum consensu habemus, honestum, licitum, & meritorium esse, pro Virtute Sanguinem vovere, Vitamque impendere. Ergo Votum de tuenda Pia Sententia vel cum Vitae sacrificio, honestum, licitum, & meritorium erit. Ita ille. Sed optandum erat, ut vir pius & doctus liberiori ingenio atque accuratius in hanc rem contraria argumenta expendisset. Faciam ego, & aequivocationes, falsaue supposita in Parthenotimi argumentationem incurrentia, ni fallor, a nostra Quaestione removebo. Prima aequivocatio est, Voventes mortis periculo sese exponere pro *Pietate*, non vero pro

pro tuenda *Veritate*, quam inesse in Pia Sententia credunt, sive sibi persuadent. Singulos ita videntes interroga. Nullus erit, qui non respondeat, se ideo polliceri Vitae suae iacturam, ut Sanguine suo testetur, *Veram* esse Sententiam de Immaculata Virginis Conceptione. Hoc ipsum ex ejusmodi Votorum Formulis, a Parthenotimo Diss. II. Cap. 5. n. 157. productis manifeste elucet. Capitulum Panormitanae Metropolitanae Ecclesiae Anno 1698. hisce verbis vovit: *Prostitemur, & affirmamus, Beatissimam Virginem Mariam Dei Genitricem absque originalis peccati macula in primo instanti conceptam. Et hanc VERITATEM non modo nunquam impugnatos, sed &c. propugnatos juxta Decreta Summorum Pontificum jam edita, aut edenda, ac etiam si opus fuerit, usque ad Sanguinis & Animae effusionem (Dei gratia cooperante) defensuros spondemus, vovemus, & juramus.* Academiae Granatensis Votum accipe Anno 1618. emissum: *Voveo me perpetuo defensurum Illibatae Deiparae Virginis Conceptionem ab originalis peccati labe divinius praeservatam &c. Et pro hac piissima VERITATE Sanguinem, si oportuerit, profundere, & mortem subire non recusabo.* Equites de Calatrava Anno 1652. vovebant, se semper defensuros ac propugnatos, gloriosissimam Virginem Mariam Dominam nostram absque ulla originalis peccati macula fuisse conceptam &c. In qua CERTISSIMA VERITATE TUENDA ob honorem sanctae Virginis, Deo favente, usque ad Mortem decertabimus. Equites etiam S. Jacobi: *Votum nuncuparunt D. O. M. &c. tenendi ac defendendi hanc VERITATEM animo, & ore, vita, & morte &c. Qualis ergo sit Votentium mens, habes. Scilicet Sanguinis sui effusione palam facere ac testari, Piam Sententiam Veram Certamque evalisse. Quum vero Certitudinem ab hac Sententia, alioqui Probabili, abesse ipsa Romanorum Pontificum Decreta testentur: inde necessario consequitur, *Vitam profundi pro tutela Opinionis: quod ipsemet Parthenotimus illicitum non uno in loco fatetur, atque nos minime ferendum contendimus. Itaque illudiur Christiano orbi, quum dicuntur Voti Sanguinari affectae mortem eligere, non pro Veritate, sed pro Pietate Sententiae suae.**

Verum Parthenotimus in naufragio ad alteram se recipit tabulam contendens Diss. II. Cap. 9. num. 212. etiamsi ponamus, nondum e finibus Opinionis excessisse Piam Sententiam, id tamen nihil officere, quominus sit vera *Pietas*, sit certe *Pietas*, sive respiciat actum Opinativum, sive respiciat actum Certum. Consequens igitur est secundum illum, honeste Vitam impendi posse pro tutela Piae Sententiae, quan-

quam ipsa adhuc in Opinione versetur; nam, ut is ait num. 224. *Votum praecipue respicit actum Voluntatis imperantem: qui quidem actus est honestus, & certe honestus, quando etiam Certus non esset prior actus Intellectus, quo Vovens sibi suadet, fuisse Deiparam sine nota Originali conceptam: quandoquidem ex doctrina Angelici Praeceptoris, Virtutes appetitivae non excludunt totaliter Falsum.* Ita ille, Conclusionem repetens, quam & Lampridius admisit, ubi agatur de Pia Sententia voce tantum & calamo defendenda. Tunc enim etiam si fallatur Intellectus, Deus tamen gratum habet Affectum filialem Christiani putantis, ad honorem Virginis eandem spectare Sententiam. At aliud est, exponere etiam velle vitam suam pro Pietate, quae nitatur actu tantum Opinativo, sive ut Parthenotimus aiebat pag. 18. prioris sui Opusculi, *pro Pietate, quae certo inest actu Opinativo.* Voluntas enim imperare nequit, aut non debet Intellectui, ut Certum credat, quod ipse Incertum ac Probabile duntaxat apprehendit. Et quando etiam hoc imperet, uti aliquando accidit in ferventibus animi perturbationibus, tunc venit culpanda Voluntas, quam ex institutione naturae Intellectus regere debet, non vero ab ipsa regi, ac violenter perverti. Deinde quis unquam ferat hominem mori eligentem pro Pietate, quae ab una Opinione pendeat? Idem tunc esset vitam impendere pro Pietate, atque pro Opinione: quod postremum ipse Parthenotimus reprehendendum fatetur. Adeo verum est hoc, ut idemmet pius Theologus in priore Opusculo n. 43. scripserit: *Qui vovet Virginis Immunitatem tueri, necesse est, ut persuadeat sibi, quod Re ipsa Virgo immunis fuerit a macula:* hoc est persuadeat sibi, Sententiam hanc non Probabilem tantummodo esse, sed Certam: aliter enim agendo Imprudenter ac Temere vitam suam prodigeret. Quei ergo nunc nobis obtruditur, licere pro Pietate mori, quanquam haec respiciat actum Opinativum? Suo autem loco ostendam, *Persuasionem* Certitudinis honestari non posse *Votum Sanguinarium.* Deinde unum da mihi fani capitis, qui Sanguinem suum vovere velit pro Sententia Probabili, neque a formidine erroris exempta; quum enim haec Apparentiam Veritatis solum, non vero ipsam Veritatem re ipsa exhibeat, dementis foret Certissimum & grande Bonum perdere velle pro umbra duntaxat Veritatis. Et reapse, ut vidimus, nemo ejusmodi *Votum* emittit, qui non credat, hoc est sibi persuadeat, agi heic non de Sententia incerta & errori obnoxia, sed quidem de Sententia, quae *Veritatem* re ipsa complecti creditur. Certam vero Veritatem a Scotistica Sententia abesse, jam diximus. Atque heic repetendum est,

est, quod Lampridius antea Cap. VII. pag. 46. dixerat scribens: *Mori pro Pietate enormis est regula, & fallacissima doctrina, quae aut stoliditatis, aut Superstitionis, aut Fanaticismi dedecus ac reorum, aut saltem Imprudentiae culpam SAEPE in nos derivare possit.* Error est, sine ulla distinctione regulam generalem constituere asserendo, honestum Semper esse atque laudabile Vitae nostrae sacrificium pro tutela *Pietatis*. Si Pietas ad dandam Vitam impellitur ob tuenda Certissima Dogmata, Praecepta, & Consilia a Revelatione Dei profecta, nisi obstat materiae parvitas in exercitatione ejusdem Consilii seu Praecepti: tunc rectissime, & sine dubitatione datur, & danda est Vita pro tutela Veritatis, quae certissime inest aut in Dogmate speculativo, aut in Virtutis opere, deducta ex inconcussis principiis Religionis Catholicae. At quoties *Pietas* ab Objecto tantum Probabili ac Opinativo movetur, tunc Sanguinis profusio pro ejusdem Opinativi Objecti incerta Veritate, aut stolidum, aut Superstitiosum, aut Fanaticum, aut saltem Imprudentiae facinus est. Statue tibi ante oculos tot Reliquias, tot Miracula, atque Historias Sanctorum, tot etiam Scholarum Opiniones: prudenti *Pietate* ad adjungendam fidem objectis hisce Probabilibus movemur. At quis pro Objectis ejusmodi, sive pro *Pietate* respiciente *Actum Opinativum* de istis, vitam laudabiliter voveri, ac prudenter dari posse, nos umquam docuit, aut in posterum doceat? Exempla haec attulerat Lampridius. Munus Parthenotimi erat ostendere, pro his quoque licere mortem oppetere; nam & qui pro iis vitam darent, eadem ratione facinus hoc justificare possent dicendo: Nos non pro *Veritate* illius sacri Corporis, aut Miraculi mortem eligimus, sed pro *Pietate*, quae respicit actum Opinativum. Ast ille ab hisce exemplis atque ab hoc certamine abstinuit, suoque silentio fat indicavit, stare Lampridii sententiam. Ad haec Lampridius tradiderat Cap. XIII. pag. 95. aliam esse *Pietatem Intrinsecam*, aliam *Opinativam*; pro illa Vitam Merito, pro altera Immerito, atque Imprudenter dari. Verum Theologus Siculus *Pietatem* hanc *Opinativam* Diss. II. Cap. X. aliisque in locis explodit, quod eam in suorum Theologorum Libris hactenus non offenderit; immo eo progreditur num. 219. ut hanc *vocum novitatem* rem *plenam periculi* appellare non vereatur. Sed mirum est, viro tam pio & docto haec excidisse, quando is philosophari de rebus humanis ac divinis tandiu didicit, atque vidit, quid ea voce significaverit Lampridius; nempe *Pietatem*, quae actu Opinativo duntaxat nititur, ad differentiam *Intrinsecae Pietatis*, quae Revelatis a Deo nititur. Pietas, cu-

jus objectum est *Opinio*, eadem est atque *Pietas Opinativa*. Hanc autem sufficere, ut Christianus homo honeste ac prudenter Vitae suae iacturam subire velit, nondum ille, ut reor, evicit; & contra Lampridius ex nuper commemoratis exemplis evicisse se putat, nefas esse pro Pietate innixa *actu duntaxat Opinativo* usque ad Sanguinis & Vitae effusionem pugnare. Recole heic, quae supra nobis edifferebat Parthenotimus, inquiring n. 192. non ideo esse Pium tueri Sententiam Immaculatae Conceptionis, quia *Affectus Pietatis respiciat Opinionem*, sed quia *Sententia propugnans Mariae Sanctitatem in primo instanti, est eidem perbenorifica*. At hoc ipsum est *Opinari* & tueri *Opinionem*; neque enim a Scientia, neque ab Evidentia, neque a divina Fide habemus, *Honorem* hunc revera deberi Deiparae, & Ecclesiae liberum nobis relinquit contrarium credere, & *Sanctificationem* potius eidem tribuere. Rursus ait Parthenotimus ibidem: *Votum usque ad Sanguinem non fertur in Sententiam, seu in Opinionem de Immaculata Conceptione, ut Opinio est; sed quia deferret Honorem Sanctissimae Dei Parenti, est Pietas, est Cultus, est Virtus*. Egregia profecto verborum involucria ad confundendam minus peritorum mentem. At animadvertite: hoc ipsum *deferre Honorem* Virgini, nihil aliud est nisi *Opinio*; neque enim ulla Certitudine ducimur ad id credendum, sed quidem a nostra imaginatione, sive ab Opinione Probabili, reputante id evenisse, quod fortasse secundum Dei voluntatem aliter accidisse potuit. Ergo semper eo recidit oratio, *Voti Sanguinari auctores vitam daturos fore pro tutela Opinionis*. Quum vero Parthenotimus nobiscum asserat, non licere pro *Opinionibus* mortem oppetere: is etiam damnet *Votum Sanguinarium* oportet.

Haecenus loquutus fuerat Romanus Abbas; quum vero conticuisset: At fodes, aiebam ego, tu quidem vagatus hucusque mihi visus es; nullum namque responsum dedisti ad argumentum Parthenotimi primo loco propositum, quod peremptorium, ut fatear, putavi. Videlicet, *Virtutem* esse tueri voce & calamo Immaculatam Conceptionem; & quum pro *Virtute* mori honestum ac laudabile sit, consequens est etiam, rite pro ea tutela Sanguinarium Votum emitti, & si occasio ferat, etiam impleri. Ad haec ille: Minime hoc e mente mea fugit, sed crastino die negotium hoc reservatum volo. Ego vero domum regressus omnia literis consignavi, atque ad te, mi Azevede, perferenda curavi. Vale.

Neapoli XIV. Kal. Febr. MDCCXLII.

*Egregio Amico, & Domino semper colendo Gregorio Azevedo
Ferdinandus Valdesius S. P.*

EPISTOLA DUODECIMA.

UBI illuxit, quanquam sub placidissimo hoc Caelo praeter consuetum rigidus aer videretur, ad Romani Abbatis aedes me contuli, illumque rogavi, ut sincere ediceret, an Parthenotimi Syllogismus in praecedenti colloquio propositus rimas ex aliqua parte contraheret; mihi enim fortissimus, & nullo ariete concutiendus videbatur. Repetamus, tunc ille ait, Parthenotimi argumentatum. *Communi Doctorum calculo honestum est mori pro quocumque Bono faciendo, seu pro actu Virtutis. Atqui (Lampridio ipso fatente) tueri, Immaculatam Conceptionem voce & calamo cum vera Pietate concordat, ac propterea Vera Pietas, & vera Virtus est. Ergo mori pro tutela Immaculatae Conceptionis honestum est, & per consequens honestum est etiam Votum ejusdem tutelae.* Majorem distinguo: Honestum est mori pro quocumque Bono faciendo, seu pro actu Virtutis, si fiat cum debitis circumstantiis, & non contra Prudentiam, quae forma est Virtutum Moralium, uti Cajetanus scripsit in 2. 2. quæst. 124. art. 5. Concedo. Aliter nego. Vide Cap. IV. Lampridii, ubi exempla attulit, ex quibus constat, non semper licere pro Bono faciendo mortem oppetere. Minorem vero concedo, dum agatur de tuenda Pia Sententia rationibus, voce, & calamo: nam hoc Prudenter agitur. Ergo Mori etiam pro eadem Sententia honestum est: Nego consequentiam, quia non amplius agitur de tuenda voce & calamo Immunitate Virginis, sed Sanguine; tunc autem contra Prudentiam homo operatur. At quæ fieri potest, ego tunc reposui, ut actus verae Pietatis sit Immaculata Conceptionem voce & calamo tueri, & non sit etiam morte nostra eandem ei tutelam impendere? Quia, inquit Romanus, quæ Virtus erat antea, consistente Pietate in rationum usu, definit esse Virtus, quoties Sanguine eam Sententiam tuendam suscipis. Aequivocatio heic latet, quam, ut spero, facile intelliges, ac sincere fateberis. Inter Defectum & Excessum (optime jam nosti) mediae procedunt Virtutes Morales. Si ultra hosce terminos & extremitates dilabun-

labuntur, desinunt esse Virtutes, & Vitia evadunt. Ita *Fortitudo* in *Temeritatem* declinare potest; *Liberalitas* in *Prodigalitatem*; *Humilitas* in nimiam sui *Dejectionem*. Certum pariter est, indigere Virtutes cunctas connexionem & directionem *Prudentiae*, quae circumstantiis rite expensis praescribit agenda atque fugienda, ita ut hac sublata aut contempta, non Virtus, sed Vitium in humanis actibus occurrat. *Nulla Moralis Virtus potest esse sine Prudentia*, ad quam spectat eligere quae sunt ad finem; & quum inter vitiosa extrema sit Virtus, hoc *medium determinatur secundum rectam rationem Prudentiae*, uti Sanctus Thomas, Aristoteles, ac innumeri alii docent. Nulla autem dubitatio est, quin & *Pietas*, uti *Moralis Virtus*, si *Prudentiam* ducem aut comitem habere noluit, rapi in vitiosos excessus, atque in ipsam transilire possit *Superstitionem*. Idque necessarium in ipsius *Intrinsicae*, nedum *Opinativae* Pietatis exercitatione. Dogma Fidei est, placere Deo cultum & honorem Sanctorum, Imaginum piarum venerationem, sacrarum aedium decorem. Si quis ad hoc opus conferret universas fortunas suas, ita ut Parentes & Filios ad mendicandum panem cogeret: vitiosa ejus foret Pietas, quia *Prudentiae* suffragio destituta, & oblita Praeceptum Dei & Naturae de alendis Liberis ac Parentibus egenis. Imprudentem hujusmodi Pietatem Vitii arguit ipse Legislator noster Christus Matthaei Cap. XV. Rursus Orationi insistere in Templo, sanctum esse opus ex Fidei doctrina novimus. Si qua tamen Materfamilias pervicaciter integrum ferme diem ibidem orando agat, quum interea Filiorum & Filiarum, sine custodia & vicariis relictorum, pessum eat: ejus Pietas vitio laborat, atque est damnanda, quia a *Prudentiae* regulis deviat, dum divinum Praeceptum de Filiis educandis, statui suo impositum, contemnit, & Consilium Praecepto anteponit. Itidem a doctrina Fidei laudatur, nobisque commendatur moderata Corporis castigatio, *quatenus non carnem, sed vitia carnis occidas*, uti Gregorius Magnus docuit Lib. 30. Cap. 14. *Moralium*. Sed ubi intemperans mortificatio, neglecto aut spreto consilio Prudentum, pervicaciter incurabiles plagas, ac mortem pariat: in excessum ea Virtus ruens, Virtus esse desinit, & in Vitium & Peccatum convertitur ob ipsum *Prudentiae* defectum, & ob laesum Praeceptum Dei de Vitae custodia. Ab aliis exemplis, quae multa adferri possent, abstineo.

Age vero iterum fateamur, tueri Piam de Conceptione Deiparae Sententiam cum *vera Pietate* consentire, dum rationibus, voce, & calamo res peragatur. In eam, quamquam *Opinionis* fines nondum super-

supergressam, legitima Probabilitatis motiva, in eam Academicarum complurium calculus, in eam Apostolicae Sedis favor concurrunt; nihil autem ex parte Religionis, aut ejusdem Sanctae Sedis obstat illius patronis; immo laudem a Romanis Pontificibus, a doctis innumeris, & a Lampridio quoque, illius tutela reportat. Itaque Prudentiam comitem habens hujusmodi *Pietas*, quamvis *Opinativa*, verae Pietatis munere fungitur, uti & Votum de ea Sententia voce & calamo tuenda. Formidinem certe Falsi atque Erroris neutiquam excludit Probabilitas istius Sententiae, quum adhuc pendeat, atque in ancipiti sit judicium Ecclesiae: attamen in ea talis Apparentia Veritatis est, ut quandiu Veritas, aut Falsitas ignota sint, Prudenter eisdem Sententiae patrocinium dicari possit, ac Votum concipi de illius tutela. Verum ubi velis non argumentis tantum, ac voce, & scriptis tueri Praeservationem Virginis a labe Originali, sed etiam Sanguinem & Vitam pro ea tuenda vovere, & profundere: tunc (attentas aures praebere) non amplius vera Pietas, non Virtus est, ut in aliis colloquis antea monui, sed Vitium atque Peccatum, quod mihi videtur *Superstitionis*, tibi vero *Imprudentialae*, aut *Temeritatis*, aut alio aliquo nomine, certe Vitium indicante, designare liceat. Et quare? Quia tunc verificatur, quod Sanctus Isidorus Lib. II. Sentent. Cap. 35. scribit inquit: *Saepe Virtutes in Vicia transire, dum suum modum excedunt.* Et profecto desideratur *Prudentia* in hujusmodi Voto, quia Praeceptum Dei atque Naturae violatur, quo conservare certum ac pretiosum Vitae nostrae pignus jubemur; neque enim domini, sed custodes Vitae constituti sumus a Deo, eamque ob imaginationes nostras, quamvis Pias, aut ad arbitrium nostrum projicere nefas est. Jam vidisti, contendere Parthenotimum, quamquam demus Piam Sententiam nondum ex Opinione finibus excessisse, recte tamen impendi Vitam posse pro *Pietate certa*, quae inest *actui Opinativo* adhuc incerto. At Pietas ista, sive hic filialis Affectus in Deiparam, ex quo Mortem voveret pro tutela istius actus Opinativi, in Vitium continuo degenerat; quippe contra Prudentiae monita Certissimum Bonum vult perdere, ut Incertum assequatur. Gravius etiam Prudentiae documenta laesa agnoscas, dum consideres, non dicam unius, sed ne millium quidem hominum Sanguine fieri posse, ut quod Certum non erat, Certum evadat. Dicat quaeſo pius iste Theologus, an quidquam Certitudinis possit in Piam Sententiam derivari ex effuso Sanguine ob ejus tutelam. Nunquam is, ni fallor, istud affirmabit. Tantuminodo is, ut arbitror, dicet, se nullo validiori experimento quam isto testaturum suum

suum filialem Affectum, sive Pietatem suam erga Deiparam. Sed simul dicat oportet, se Imprudenter testaturum, dum Bonum tam pretiosum, quale Vita est, profundit, & ejus profusione nihil consequitur, unde Certa evadat Sententia, quam tuetur. Scilicet tunc ingens detrimentum, quo nullum majus inter Bona temporalia mihi ostendas, in Voventem redundat; & contra Piae Sententiae nullus obvenit fructus. Aliquem propone tibi, qui regnantem nunc Christianissimum Francorum Regem Ludovicum XV. recta linea descendentem opinetur, aut e Ferreolo, qui Anno Christi 400. Praefecti Praetorio Galliarum munere fungebatur, aut a Sancto Arnulfo, aut a Mero-veo Rege, aut a Carolo Magno, aut a Welfone Altorfii Comite, aut ab alia vetustissima stirpe. Dum voce & scriptis Probabiliorem ex hisce Opinionibus tueatur, rem ipsi Regi gratam, aut saltem non ingratam peraget. Sin ita pertinaciter in ea Opinione hic persisteret, ut mortem pro illa tutanda se subiturum diceret, & revera subiret, caussatus se id facere ad testandum erga Regem singularem suum amorem: hominem hunc vel ipse Rex Imprudentiae, immo Dementiae argueret. Exempli hujus vim certe Parthenotimus evitare se posse censeret dicendo, nunquam in Opinionem quamcumque de Genealogia Francorum Regum concurrere posse tot motiva Credibilitatis, quot in Piam Sententiam confluunt. At quandoquidem Parthenotimus contendit, etiamsi Pia Sententia adhuc in Opinione versetur, licitum esse Vitae sacrificium: in hoc supposito fateri opus est, tam pro Sententia ista, quam pro illa, *Imprudenter* Sanguinem fundi; in utroque enim casu verum est, per Sanguinis effusionem Opinativum actum in Certitudinem minime posse converti, & Sanguinem sine ullo emolumento Sententiae, ac tantummodo cum gravissimo morientis detrimento profundi. Quousque igitur Pius iste vir non evincat, Piam Sententiam eo progressam, ut Certitudinem adquisierit praeponendam Certitudini Vitae nostrae, nunquam pro Bono hoc Incerto Prudenter commutabimus Bonum Certissimum Vitae nostrae, & piaculum erit commutare. Antea vero me ostendisse satis mihi persuadeo, neque ex Festo, neque ex aliis Sedis Apostolicae favoribus Certitudinem hanc erui posse, quum ipsi Summi Pontifices rem haecenus indecisam fateantur, & contrariam Opinionem sine ulla damnatione vigere sinant.

Luculentius autem intelliges, in Sanguinario Voto Imprudentiam deprehendi, ubi animadvertas habere nos *Praeceptum* naturale ac divinum de Vitae nostrae conservatione, & Suicidii, hoc est Peccati gravis reum esse, quicumque illam sine justa causa, pervicaci consilio,

lio, atque Imprudenter prodigit. Hoc autem in casu nostro accidere, si nondum visum est piissimo Parthenotimo, aliis sine praeoccupatione aliqua de hac re judicantibus patuit. Primo nullum existit Praeceptum aut divinum, aut Ecclesiasticum, de credenda & tuenda Immaculata Virginis Conceptione. Eam tueri Pius tatummodo Affectus est, persuadentium sibi, Sententiam hanc ad honorem Deiparae pertinere. Neque dicas, Praeceptum haberi de defendenda Sanctitate Deiparae, de ejus Honore vindicando. Praeceptum hoc tantummodo respicit veram certamque illius Sanctitatem, atque Honorem a Fidei doctrina indicatum, cui derogare Peccatum revera atque Haeresis foret. At quando agitur de Honore incerto, atque a pia tantum imaginatione nostra excogitato, neque hactenus ab Ecclesia praescripto: tunc nullum occurrit Praeceptum. Et profecto neminem Ecclesia adigit ad Piae Sententiae professionem; ejus quidem Cultum, ac tutelam laudat, non praecipit. Hoc posito, Votum Sanguinarium perpende. Nullum existat Praeceptum de asserenda Praeservatione Virginis; contra exstat de Vitae nostrae conservatione. Cuinam in concursu isto parendum est? Nonne Deo praecipienti, cujus mandata transgredi nefas est? Itaque Temere agat, neque a Peccato excusandus erit, quicumque pervicaci animositate Opinionem, sive imaginationem suam Praecepto Dei anteponeere velit. Atque heic iterum vides, *Pietatem veram*, quam agnovimus in tuentibus voce & calamo Deiparae Imunitatem, in manifestum Extremum, sive Vitium deflectere. Quousque Fidelis Christi credit, colit, tuetur rationibus Piam Sententiam, & tot Sanctorum Reliquias, Miracula, Historias, aliasque Pias & Probabiles Opiniones: nullum is Praeceptum Dei aut Ecclesiae violat. Contra in casu nostro, nullum Peccatum est in desistendo a tutela Immaculatae Conceptionis; immo contrariae Sententiae adhaerendo non peccatur ex Decreto Apostolicae Sedis. Et ex adverso, ubi Vitam pervicaciter dare velis pro hujusmodi tutela, certissimum Dei Praeceptum transgredieris, prodigendo Bonum, cujus te non dominum, sed custodem Deus ipse fecit. Ergo non solum Imprudenter ac Temere tunc Vita prodigeretur, sed etiam Peccati reus eam prodigens foret. Atque heic locum habet doctrina Angelici Doctoris 2. 2. quae est. 121. art. 1. quam Parthenotimus memorat num. 210. *Pietas*, inquit; *est habitualis dispositio animae, quae prompte mobilis est a Spiritu Sancto ad habendum filialem affectum ad Deum, ut Patrem, eumque colendum & amandum ea ratione, qua ipse vult a nobis coli.* Ostendendum igitur restat, an Filialis Affectus voventium Sanguine suo tute-

iam Praefervationis, Deum ac Virginem colat, *ea ratione qua Deus ipse vult a nobis coli*. Ecclesia quidem, & Evangelium certos nos faciunt, recta ratione, ac Prudenter coli Deum, mortem subeundo pro Veritatibus Fidei, quas negare sine omnium gravissimo Peccato non possumus. At mortem oppetere velle pro tutela Opinionum, nunquam fuit aut erit ratio, *qua Deus vult a nobis coli*, quando is jubet, ne temere vitam nostram projiciamus. In eo casu, rursus ajo, Filialis Affectus noster, sive pietas, in Vitium declinat, quia contra Prudentiam peccat. Neque licet dicere: ego nunc *pro Pietate, pro Virtute* morior, quum *Pietas* appellanda amplius non sit, contra Dei Praeceptum abjicere velle vitam, ut certum faciamus, quod Incertum est, neque ullam e Sanguinis nostri effusione Certitudinem consequi unquam poterit.

Congerit autem Parthenotimus Diff. II. Cap. IX. multos Theologos concordēs in asserendo, *Virtutes appetitivas non totaliter excludere falsam Opinionem de eo, circa quod agitur. Et potest aliquis secundum justitiam agere, habens falsam Opinionem de eo circa quod agit*. De hujus doctrinae rectitudine & veritate nulla nobis est controversia. Hanc & ego deosculor, & de hoc ipso alias egimus; sed nullus dubito, quin doctus & pius iste vir, majori attentione adhibita, agnoscat, frustra illam in Quaestionem nostram pertrahi. Quotiescumque homo agit secundum Dogma aliquod Fidei, sive secundum Praeceptum, aut grave Consilium Dei, is recte agit, quanquam in applicatione hujus Dogmatis, Praecepti, sive Consilii falli possit, aut fallatur, quum a certo Religionis principio illius animus ad agendum moveatur, & in illa actione nullum aliud Dei praeceptum violetur, nullaue inde fluant incommoda in doctrinam Fidei, neque in Ecclesiam, neque in Rempublicam. Proinde, uti Suarez docuit de Fide Disp. 3. Sect. 15. num. 1. atque alii tradunt, Recte ac Prudenter Fidelis Hostiam ad adorationem oblatam adorandam credit, & adorare debet, quamvis certa sibi non sit illius Hostiae consecratio. Praeceptum quippe habemus & Dogma de adorando Christo Domino, quem Prudentissime praesentem in illa Hostia credimus. Danda etiam vita foret, si ad hujusmodi Dogma negandum nos cogere quisquam vellet. Verum Imprudentiae hominem argueres, quotiescumque is mortem eligeret, pervacaciter hoc unum asserendo, scilicet Hostiam illam esse consecratam. Eadem ratione recte ac meritorie agit, stipem pro amore Dei dans ficto Pauperi, quia Certissimum Consilium, & quandoque Praeceptum de Eleemosina tunc ille sequitur, &
Vir-

Virtus Intrinseca, atque ad Fidem spectans, est Misericordia in Pauperes. Bonae huic Voluntati, tam firmo principio innixae, nihil obest, nihil meriti detrahit, si forte fallatur in agnoscenda Pauperis persona. Similiter Judices iuste fures, homicidas, & scelestos damnant, quia ex institutione & debito muneris sui ad id obligantur; & dum Prudentiae legibus, quas complures Sapientes praescripserunt, faciant satis, in tuto eorum conscientia est, quanquam contingere possit, ut aliquando fallantur in executione ex ignota malitia testium, aut ex alia sibi incognita causa. Exempla haec Parthenotimus pro se laudat, ut dixi, Diff. II. Cap. IX. In iis, uti dixi, Prudenter agit Virtus, quum congruis modis in operando utatur; sed ipsa desinit esse Virtus, ubi utatur incongruis, atque a Prudentia improbatis. Verissimum ergo est, *Virtutes Appetitivas non excludere Falsum*; sed simul verum est, Prudenter eas agere debere, ne in Vitium ruant: quo defectu siue Vitio sine dubitatione laborat illa Pietas, quae mortem oppetere vult, ut Certum ostendat id, quod Falsum esse potest, & Certum ostendi per Vitae iacturam nunquam poterit, quum interea certum Dei Praeceptum transgrediatur. Sed pergit Parthenotimus Cap. X. Diff. II. urgere exemplum obsequii & Pietatis, quam exercere Liberi debent erga Patrem, quanquam Probabili duntaxat, non Certo iudicio credant, virum illum esse Parentem suum. At hi ipsi a Praecepto Dei ac Naturae obligantur ad amandum & colendum Patrem; & quum legitima praesumptio, aut rationes solidae Probabilitatis, aut Certitudinis Moralis, concurrant ad persuadendum, hunc esse verum Patrem suum: Prudentissime eum colunt, immo ad colendum obligantur; ita ut Imprudenter, temere, & non sine Peccati gravis reatu a colendo abstinere, hanc unam excusationem obtinentes, minime esse Certum, se ab eo generatos. Nunc autem animadvertendum est, tum in memoratis exemplis, tum in *objurgatione Visiorum*, quam uti laudabilem Parthenotimus memorat num. 296. *quavis objurganti non constet certo & evidenter de Visio*, atque in similibus aliis, quae excogitari possunt, ideo honeste recteque hominem ad actionem moveri, quia praecedit Praeceptum Dei aut Consilium Evangelicum, certo indicans, Virtutis opus esse illud, quod agitur; per accidens vero contingere posse, ut in praxi & applicatione hujus Praecepti, siue Consilii, is nolens fallatur. Prudenter enim homo ille operatur, meritumque sibi apud Deum parat ita agendo, quia obtemperat Praecepto certissimo Dei, aut ejus Consilia sequitur. Prudenter, inquam, agit in exequendo Praeceptum siue Consilium, quia

Probabilibus rationibus ductus Verum existimat Obiectum sibi propositum, quod tamen potest esse Falsum; in humanis autem actionibus Certitudinem Bonitatis aut Veritatis assequi neque facile, neque semper possumus, & ad Prudenter agendum in praxi sufficit Probabilitas. In his autem dum Prudenter agatur, etsi per accidens fallatur homo, nullum incommodum redundat in operantem, aut in Rempublicam, aut in Ecclesiam. Rogarem nunc Parthenotimum, si adesset, quippe eum vel cum a Vero abludit, Veritatis cupidissimum censeo, ut serio animadvertat, nihil simile, immo contrarium deprehendi in Vo- to Sanguinario. Nihil in memoratis exemplis de Vita hominum agitur, uti in casu nostro. Duo autem in Sanguinarium Votum concurrunt. Alterum est Praeceptum Dei & Naturae de servanda neque prodigenda Vita nostra. De hoc Praecepto nulla dubitatio est. Alterum est tutela Piae Sententiae, quam ex supposito, per ipsum Parthenotimum nobis permisso, Certitudine carentem statuimus, & Probabilibus tantum rationibus nixam, quae formidinem Falsi nequam tollat. Iustumne unquam, & Prudentiae legibus consonum esse poterit, Praeceptum divinum certissimum abjicere atque violare, ut Probabilem tantummodo Sententiam, fallaciae per consequens obnoxiam, tuearis? Vitae nostrae tutelam praecipit Deus; non praecipit tutelam rerum, quae in Opinione adhuc versantur. Recte ac Prudenter agunt Fideles in exemplis nuper allatis, quia ex Praecepto aut Consilio Dei operantur; in nostro autem casu non ex Praecepto aut Consilio Dei agitur, immo contra manifestum Dei Praeceptum homo operatur, ac proinde Imprudenter ac Temere. Neutiquam tibi Deus imputabit in Peccatum quod non credas, aut non tuearis Piam Sententiam; nam ex decreto Romanae Ecclesiae nemo peccat adhaerendo contrariae Opinioni, & nullo Praecepto adigimur ad illius tutelam. Imputabit quidem, quod tu Praeceptum tibi notissimum transgrediaris, de quo dubitare non licet, ut Probabilia seceris, de quibus, uti diximus, non immerito dubitamus, & quae ne Sanguine quidem tuo efficere Certa poteris.

Sed Parthenotimus Diss. II. Cap. XII. num. 233. duo adfert celeberrima exempla Sanctorum, qui mortem subiere non pro Fide, sed pro Virtutis opere, nempe Sancti Joannis Baptistae, & Sancti Thomae Cantuariensis. Joannes non ex Certitudine Fidei certum habebat *Adulterium Herodis, sed a publica Fama, quae facere nequit nisi summum judicium moraliter Certum*. Et nihilominus is pro reprehensione Herodis, sive pro Justitia aut Caritate occisus, Martyr in Ecclesia ha-

habetur. Sapientius vero Thomas pro nulla re, quae certa esset Certitudine Fidei, interemtus fuit, sed quia licitum, honestumque est fortiter mortem tolerare pro tutela Immunitatis Ecclesiasticae: quidquid revera sit, an solum Probabile, an Probabilius, an moraliter Certum sit, Ecclesiarum Vacantium fructus, non Regi, sed Ecclesiae deberi &c. Alius Virtutis est tueri Immunitatem Ecclesiasticam, & pro hujus tutela mortis discrimini Vitam exponere & licitum est, & laudabile. Quae ego ad postremum caput respondissem, ingeniose praecupavit Parthenotimus ipse, dum sibi objicit, Sanctum Thomam ex vi sui muneris obligatum fuisse ad custodiendas leges Ecclesiasticas; quum contra nemo Fidelium teneatur tueri Immaculatam fuisse in suo Conceptu Deiparam. Et profecto palmare est istud discrimen. Duo Praecepta in casum Sancti Thomae concurrunt, alterum de tuenda Immunitate Ecclesiastica, ad quam ex Lege ministerii sui, ex gravissimis Ecclesiae Legibus, & ex juramento obligantur Episcopi; alterum de Vitae custodia. In concursu praevalere primum debet, quia Constantiam in non consentiendo violatoribus Immunitatis Ecclesiasticae ipsa Ecclesia recipit uti veram Virtutem, neque Opinativam, sed Intrinsecam; atque insuper docet, in casibus a Prudentia praescriptis praeposendam eam esse Vitae, & Martyrii lauream per istud adquiri; aut saltem laudabile esse eam praeposere: id quod constat tum ex Thomae Cantuariensis exemplo, tum ex aliis, quae concessit Eminentiss. Cardinalis Lambertinus Lib. III. Cap. 19. de Serv. Dei Beatif. Pretium enim Intrinsecae Virtutis pretium superat Vitae nostrae. Simili ratione Joannes Baptista, missus a Deo, ut poenitentiam praedicaret, & pararet viam Domino, quia ex sui muneris obligatione Regem iniquum de scandalo monuit & arguit, Martyrii palmam est consequutus. Manifestum omnibus erat scelus & scandalum Herodis, neque is factum redargutus negavit; manifesta in Anglorum Rege fuit Immunitatis & Libertatis Ecclesiasticae violatio. Utroque Praeceptum gravius occurrit, quam Praeceptum de Vita tuenda; ac propterea utroque jugulum honeste, & cum ingenti merito apud Deum, fieri oblatum fuit. Toto autem caelo ab hisce exemplis Sanguinarium Votum differt. Heic nullum Praeceptum de tuenda Pia Sententia; heic nulla Certitudo, Honorem Virginis ab hac Sententia pendere; potuit enim Deus aliter decrevisse; ipsaque Ecclesia Anathemate ferit dicentem, eos peccare, qui contrariam fovent Sententiam. Neque illa unquam probavit mortem eligentes pro tutela hujusmodi Sententiae, sive Pietatis Opinativae. Contra solum in hoc Voto suffert

perest Praeceptum naturale ac divinum de nostra Vita non prodigenda. Hoc viget, hoc observandum est; & qui illud ex arbitrio suo violat, Suicidii Peccatum excusare non potest. Scribit quidem Parthenotimus num. 95. Votum & Juramentum de tuenda Pia Sententia esse licitum, honestum, & Pium; & non eo tantum nomine, quia *Omne Votum, Omne Juramentum, quandoquidem ad Religionem attinet, non potest non esse Pium; sed illo etiam, quod versatur circa Honorem Cultumque Dei.* Sed miror excidisse viro tam docto: *Omne Votum, ac Juramentum non posse non esse Pium.* Quenam quaeso Theologia sine ulla distinctione & modificatione hoc tradit? Certe Votum Sanguinarium ab ista universali Regula est excipiendum, uti & alia, de quibus Theologi loquuntur, Imprudenter nempe conceptis.

At ille pergit dicere in eadem Diss. II. Cap. XII. num. 241. disputari inter Theologos, *An Canonicae Leges obligent cum periculo vitae;* & nihilominus, sublata etiam ista obligatione, laudabiliter operari, *qui mortem oppetat ad servandum Consilium.* Suarium praeterea adducit haec scribentem Lib. VI. Cap. 11. num. 14. de Defens. Fidei: *Non enim solum homo operatur Justitiam, quando obedit Praecepto, sed etiam quando operatur propter Christum, & Dei gloriam, licet tunc non obligetur. Ergo qui patitur, ne hanc Justitiam ut sic dicam, idest non necessariam hanc ex Praecepto, Deo autem gratam, & proximis utilem, omittat: revera propter Justitiam patitur, Ergo si interficiatur propter eandem causam, vere occiditur propter causam Religionis.* Ad Canonicas Leges quod attinet, dari possunt casus, in quibus eae circumstantiae occurrant, ut non solum Prudenter possit, sed necessario debeat impendi Catholici Praefulis Vita. Ejusmodi fuit Sancti Thomae Cantuariensis, Praeter Canones, & juramentum ab eo praestitum de tuenda Libertate & Immunitate Ecclesiae, particulari Praecepto Alexandri III. summi Pontificis, & in virtute obedientiae, jussu ille fuerat non consentire Regi jura Ecclesiae usurpanti, uti constat ex ejusdem Pontificis Epistola, a Cardinali Baronio ad Annum 1163. producta. Nihil ergo Prudentiae desideratum est in Sancto Thoma, tolerante ea occasione mortem, Et quando Ecclesia ejus acta, & gloriosum exitum solenni Decreto probavit: de hoc nobis disputandum nihil amplius superest. Alii autem permulti casus contingere possunt, in quibus merito excusantur Episcopi a tuenda Sanguine suo Immunitate Ecclesiastica; immo Temeritatis interdum ii forent arguendi, si pervacaciter vitam dare vellent, quando circumstantiae concurrant, in quibus Prudentia monet, parcendum esse vitae.

tae. Ipsa haec ergo observatio Parthenotium potius perducere debuit ad agnoscendum, quanta Votum Sanguinarium deformitate laboraret. Tanti pretii est hominum Vita, ut quamvis Praecepta Ecclesiastica aliquid faciendum jubeant, attamen cum periculo Vitae saepe non obligent; & qui non obligatus voluntarie mortem oppetere vellet, contentis Prudentiae documentis, arguendus, non laudandus foret. Praecepto & Lege Ecclesiastica (parce quaeſo repetenti) jubemur audire Sacrum festis diebus, jejunare, & carnibus abstinere certis aliis diebus. Ubi periculum vitae occurrat aut ab inimicis, aut a latronibus, aut ob gravem aegritudinem, aut ob alterius cibi defectum: tunc Ecclesia docet, pluris esse faciendam nostrae Vitae conservationem, quam Praeceptum suum; & qui pervicaci consilio secus operari vellet (secluso semper contemptu Religionis, & Scandalo) Imprudentiae ac Temeritatis culpam minime effugeret. Redi nunc ad Votum Sanguinarium. Ex concessione Parthenotimi ipsius, nulla divina aut Ecclesiastica Lex praecipit tutelam Piae Sententiae; non agitur heic de re Certa, neque de Pietate Intrinseca, cujusmodi est audire Sacrum, & Jejunare: & nihilo secius in mortem irruere quidam volunt pro hujusmodi Sententia, sive ut ajunt Pietate, quum sateri cogantur, nihil opus esse eandem tueri; & contra Deus & Ecclesia nos doceant, opus esse Vitam nostram conservare atque tueri. *Prudentiam* indicet heic mihi Parthenotimus, si potest. *Temeritatem*, & *Peccatum* heic omnes deprehendent, qui sine praepjudiciis, sine studio partium de hac re judicabunt. Frustra etiam is adhibet num. 290. exemplum Filii tuentis cum periculo vitae suae vitam Patris: quod certe licitum est. Nam praeterquam quod uti Filius ex divino Praecepto obligatur ad obediendum sac honorem deferendum Patri, quanquam non sit ab omni formidine erroris libera illius Paternitas: ita Prudenter illius vitam tueri potest ac debet. Adde tamen, tunc Filium defendere Bonum Certum Patris; sive hominis illius, quicumque sit, Vitam. Voti vero Sanguinarii professores neque jubentur a Deo credere ac tueri Piam Sententiam; neque tuerentur Sanguine suo Honorem Certum Deiparae; immo ita operando, Imprudentissime tuerentur, uti toties diximus, quum ineptus, ac improprius, & per consequens Imprudens modus tuendae Immunitatis Marianae sit Sanguinis humani effusio.

Ceterum frustra doctus iste vir praesidium sibi ex optima Suarii doctrina conquirat. Agit eximius ille Theologus in loco supra memorato de Anglicanis Legibus *vetantibus actus exteriores BONOS*, &

en *FIDE & RELIGIONE CATHOLICA* profectos, ut sunt *Sacra* facere, seu *Missas* privatas dicere, *absolvere* Poenitentes, *Carbolicos* exhortari &c. Qui ob iniquarum hujusmodi Legum transgressionem occumberet, merito Martyr esset habendus. Addit insuper. *Licet talia opera Lege humana prohibita, possint aliquando omitti sine transgressionem Praecepti divini, vel quia sunt tantum de Consilio &c. vel quia si cadunt sub affirmativum Praeceptum Dei, vel Ecclesiae, vel illud non obligat pro tali tempore, vel cum tot periculis &c. Nihilominus si quis propter zelum Fidei illos actus exerceat eo modo, quo sibi licent, & judicat ad Dei gloriam, & utilitatem animarum expedire: si propterea occidatur, erit vere Martyr. Non enim solum homo operatur Justitiam cum reliquis a Parthenotimo supra memoratis. Loquitur, uti vides, Suarius de faciente Actus Bonos, & ex Fide & Religione Catholica profectos, pro quibus mortem honeste sine dubitatione subit. Quid haec, rogo, ad Quaestionem nostram, quum ipse Parthenotimus ubique fateatur, Piam Sententiam nequaquam pertinere ad Fidem, & pag. 92. num. 51. prioris Opusculi agnoverit ipsam non spectare ad Religionem, inquires: Non enim Religionem spectant Carabolicam, quae de Immaculata Virginis Conceptione inter Carbolicos disceptantur. Hoc est ad nullum certum Dogma, cum detur OMNIBUS facultas hinc inde disceptandi, uti is explicat num. 172. alterius sui Libri. Ingenti hoc discrimine posito, Suarius invitatus heic in scaenam educitur. Ast idem Suarius, Parthenotimo monente eod. num. 241. scribit Lib. IV. de Legib. Cap. 30. num. 10. *Observandum est, aliud esse obligari ad observationem Legis humanae, non obstante mortis periculo; aliud vero posse licite eam observare, eodem periculo non obstante. Plus enim ad prius requiritur, quam ad posterius. Licet enim ad utrumque necessaria sit aliqua ratio valde gravis & iusta; quia non potest homo pro quacumque levi occasione vitam prodigere: nihilominus multo major causa requiritur, ut ad hoc possit obligari per Legem, vel Praeceptum Superioris humani, quam ut id possit homo sua spontanea voluntate honeste facere; quia non omnia honesta possunt nobis praecipiri, quando sunt valde ardua, nisi ex speciali necessitate, sine qua nos possumus illa libere facere. Sed & ista extra chorum. Potest interdum Magistratus Civilis Leges condere, ad Bonum commune Reipublicae spectantes, quae obligent etiam cum periculo vitae; conservatio enim, atque utilitas Reipublicae inter Leges naturae & societatis humanae refertur, & praepositur conservationi vitae privatorum. Aliae autem sunt Leges, ad quarum observantiam Cives tenentur, sed censentur Legisla-*
tores*

tores non eos obligasse, quoties concurrat periculum vitae. Attamen in casu etiam, quo Lex non obliget ad hujusmodi periculum, honeste propter utilitatem publicam potest aliquis aggredi opus cum magno periculo vitae, etiamsi non sit tanta necessitas Boni communis, in qua posset obligari. Tempore belli, pestis, ac seditionum, haec potissimum contingere possunt. Qui pro salute aut utilitate Patriae, sive Reipublicae, sponte arduum quid, non temere, sed prudenter aggreditur, quamvis mortem incurrat, honeste ac licite incurrit, quia pro Virtute, non Opinativa, sed Intrinseca, qualis est Rempublicam suam tueri, & publicam utilitatem promovere, objecto certo sibi proposito, is periculum vitae subit. In casu autem nostro aliter sese res habet. An ad publicam Religionis utilitatem spectet tutela Piae Sententiae, res est adhuc disputationi obnoxia, quia nondum certum est, an eadem Sententia Veritate nitatur. Sed hoc etiam supposito, nonne vides, Sanguinarium Votum nihil ad publicam Religionis utilitatem conferre posse, quando etiamsi mortem oppetas pro Immaculata Virginis Conceptione, Opinativa tua Pietas, tuaque mors nihil Piae Sententiae prodest; nulla enim inde in eam influere potest Certitudo, eademque Sententia restat qualis erat? Tantummodo ex Rationibus ab Ecclesia probatis, non vero e spontanea nostri Sanguinis effusione, resultare potest illius Certitudo. Ut quid ergo perire vis, & Praeceptum Dei ac Naturae contemnis, quando nihil utilitatis in Religionem, neque in Sententiam ex morte tua consequitur, & in dispendium duntaxat Reipublicae ipsa mors tua convertitur?

Ad haec regulas exige nunc Votum Sanguinarium. Ex Theologorum consensu Votum esse debet de meliori Bono; Votum nullum est, aut etiam Peccatum est, si sit de re peccaminosa. Quisquis pacato animo haec perpendat, nequit quin perspiciat, nihil Boni, uti toties diximus, sequi ex morte tolerata pro assertionem Veritatis & Certitudinis perperam excogitatae in Pia Sententia; nihil enim Certitudinis ei ex hominum morte accedere potest. Contra nemo neget, quin Bonum grande sit Vita hominis. Ergo in hoc casu temere agis, Bonum nempe melius & majus prodigendo, ut minus, sive nullum Bonum consequaris. Rursus peccat, qui Imprudenter & pertinaciter Vitam projicere vult, quia Praeceptum Dei & Naturae violat. Temere autem atque Imprudenter eum operari ostendimus, qui sine ullo Dei aut Ecclesiae Praecepto de tuenda incerta Immunitate Virginis, Praeceptum Dei certum transgreditur de custodia Vitae. Ergo Sanguinarium Votum, utpote de re peccaminosa conceptum, nullum

est, immo in pervacaciter vovente Peccatum est. His dictis, disputationi suae finem fecit Romanus Abbas, quam tibi, mi Azevede perspectam volui. Perge tu interea me amare, ut facis; de meo erga te amore certus. Vale.

Neapoli X. Kal. Febr. MDCCXLII.

Dilectissimo Azevedo suo Ferdinandus Valdesius S. P. D.

EPISTOLA DECIMATERTIA.

ELAPSIS a proxime praeterita disputatione quinque diebus, iterum convenimus Romanus Abbas, & ego. Haec autem is dicere exorsus est. Una superest doctissimo Parthenotimo anchora ad eripiendum naufragio Votum Sanquinarium, *Persuasio* scilicet de Certitudine Piae Sententiae. Atque is profecto in priore Libro pag. 78. dixerat: *Qui voverit Virginis Immunitatem tueri, necesse est, ut persuadeat sibi, quod re ipsa Virgo immunis fuerit a macula.* Tum in altero Libro Diff. II. Cap. 6. num. 187. *Ponamus, inquit, quod plerique Cives Panormitani sibi firmiter suaserint, B. Virginem fuisse maculae originalis expertem; si a Tyranno interrogarentur, quanam sit ipsorum mens circa Conceptionem B. M. Virginis: possentne contra mentem dicere, B. M. Virginem in peccato originali fuisse conceptam? Nequaquam. Vetarent id lex naturalis & divina; atque adeo ne mentirentur, deberent jugulum offerre carnifici.* Sed nullus erit in posterum certamini huius finis, si argumenta jam refutata iterum prodeunt, nulla refutationis facta mentione. Cap. XIV. Lampridius huiusmodi *Persuasionem* jam ex tritis Theologiae principiis fallacem esse posse, atque interdum damnandam ostenderat. Scilicet fieri quidem posse, ut Christianus rudis credens Invincibili Ignorantia aliquid ad Dogma Fidei pertinere, quod non pertineat, immo quod contra ipsam Fidem militet, non solum licite posse, sed ex Praecepto debere vitam dare pro falso illo Dogmate; quia donec perdurat Invincibilis ea Persuasio atque ignorantia, mortem perferens invincibiliter putat, se peccaturum, & Fidem negaturum, si Dogma illud neget. Haec autem doctrina vim habet in discrimine vitae, quories neque locus, neque tempus adest consulendi viros, ad quod rudis ille homo tenetur, ut ediscat, an
pro

pro supposito illo Dogmate, opus sit, aut liceat mortem oppetere. Edoctus de Veritate fac ut nihilominus pertinaciter is mori velit: tunc illum a gravissimo Peccato nemo excusare poterit. Idem de casu nostro dicas. Antequam Christianus Votum Sanguinarium concipiat, & postquam etiam conceperit, obligatur a Caritatis & Prudentiae Legibus ad sedule inquirendum, an *Persuasio* haec sufficiat ad honestandum periculum ac detrimentum Vitae, idest certi & eximii inter temporalia Boni, quod sub poena gravis Peccati custodiendum nobis Deus dedit. Is facile rescire poterit, & docti ignorare non possunt, ejusmodi *Persuasionem* a Fallacia, sive a formidine Falsi, liberam haecenus non esse, eamque a Probabilibus tantum rationibus suaderi, quum contra Opinio non sit Vita hominum, & certis ac evidentibus rationibus nitatur Praeceptum de eadem Vita servanda. Neque ullus *Invincibili Ignorantiae* est heic locus, ex quo lis adhuc sub Judice pendet, & Ecclesia contrariam Opinionem liberam finit, ac praecipit, ne eam *Erroris* & *Peccati* infimulemus; & laudat quidem uti Piam & Probabilem, sed Certam nequaquam agnoscit Scotistarum Sententiam. Inconsultam ergo in hoc casu, Imprudentem, ac temere agentem dicas Pietatem, immo Pietatem, quae in Vitium degenerat, dum imperat Intellectui, ut Certum credat, quod nondum revera Certum est, & posita fallaci hac *Persuasione* Vitae jacturam sponte ac pervicaciter eligit, hoc est eligit frangere Praeceptum Dei, de cujus Certitudine & vi nulla est dubitatio, ut Sententiam tueatur Certitudine, uti diximus, carentem. Superfluum autem puto alia addere de froenis *Persuasioni* nostrae adhibendis, sine quibus in multa incommoda errores & abusus abripi posset Christi Fidelis. Quod si Parthenotimus num. 147. haec Eminentiss. Cardinalis Lambertini, nunc Sanctissimi Romani Pontificis BENEDICTI XIV. verba ex ejus Lib. III. Cap. 17. de Beatif. Serv. Dei adducit: *Qui renuit aliquid facere putans INVINCIBILITER id esse Peccatum, licet revera Peccatum non sit, si ob hanc causam moriatur, meritum sane consequitur, sed Martyr nequaquam est.* Quibus haec addit Parthenotimus: *Et non consequitur ille meritum, qui moriatur Pietatis exercendae causa in Deiparam?* Quis discrimen non videt in illo *Invincibiliter*? Redi ad ea, quae nuper diximus, neque pluribus est opus.

Ad hoc ipsum argumentum referendum est, quod Lampridius Cap. VI. attulerat ex Alphonso de Castro, & Gabriele Vasquezio, contententibus, *Haereticum* esse censendum hominem tam pertinaciter adhaerentem alterutri Opinioni de Virginis Conceptione, ut illam puta-

ret esse Fidem Catholicam, & quamquam admonitus, pro illa esset Mortem subire paratus. Quid ad haec pius Scriptor Siculus? Diff. II. Cap. 15. num. 273. is Suarium adducit Tom. II. in 3. Part. quæst. 27. art. 2. Disp. 3. sect. 6. cui sententia hæc non placet. Quia is non errat in iis, quæ Deus revelavit, nec Ecclesia dicit esse revelatum a Deo, aut esse de Fide, hoc esse Incertum. Sed solum docet isa esse ex ipsa rerum evidentia, præcipisque isa doceri ad scandala atque schismata vitanda. Esset ille Temerarius, & Inobediens, non tamen Haereticus. Pariter ex sententia Bordonii in Manuali Consult. sect. 6. num. 89. hic non esset Haereticus, sed Mendax, & Inobediens. Fateatur autem Parthenotimus, se non habere Piam Sententiam pro se spectante ad Fidem divinam. Idem professuros Voti Sanguinari assclas reor. Et nihilominus ii pro Sententia ista sunt mortem subire parati, hoc est ad actum venire, quo nullus major ostendatur ad testandas Veritates Fidei; atque hoc pollicentur, quamquam, dante Parthenotimo, statuamus in Opinione, & actu Opinativo versari Immunitatem Deiparae. Nonne & in istos cadat saltem Temeritatis Censura, quando contra mentem Ecclesiae effusione Vitæ suæ Certum probare volunt, quod adhuc illa pro Certo non agnoscit? Si non prodest in priori casu dicere: Pium est, immo ad Fidem hoc spectare puto: nonne pari ratione damnandi, qui mortem eligunt, Persuasionem ducti, Certitudinem inesse in Pia Sententia, quam tamen abesse Ecclesia ipsa hæcenus sat prodidit? Fieri forte potest, ut Siculi voventes, fidem adjunxerint, aut adjungant temerariis Gabrielis Saavedrae Conclusionibus, a Lampridio Cap. XII. confutatis, qui asserere ausus fuit, ex eo quod Pia Sententia sit Proxime definibilis ab Ecclesia, Necessario inferri, tum illam jam esse Revelatam a Deo, tum esse de Fide priori modo, quo illam explicuimus. Rursus, si Pia Sententia est jam Revelata non est improbable asserere, quod etiamsi non sit ab Ecclesia definita, formaliter loquendo esse Fidei Objectum. Si hoc voventes credunt, eos praeaudati Theologi jam damnarunt. Sin Moraliter Certam tantummodo reputant Piam Sententiam: fallax, uti vidimus, si ve a periculo Erroris nondum exempta eorum Persuasio est; ac damnandi sunt, quod Temere sint mortem subire parati pro Sententia, quam non ipsi, sed duntaxat Ecclesia Certam præstare potest. Attulerat insuper Lampridius Cap. XVI. pag. 129. Theophili Raynaudi Conclusionem ex Par. II. Cap. 3. num. 18. de Martyrio per Pestem. Statuendum est: Vitam Temere, nec absque SCelere, atque adeo sine Martyrii fructibus, abjiciendam pro assertione alicujus Propositionis,

nis, cujus VERITAS non sit in Ecclesia Prorsus rata, ita ut non sit exploratum, quod ejus assensus a FIDE exigatur. Quam feliciter Parthenotimus telum hoc effugiat, aut eludat, animadvertete. Ex praecedenti num. 12. is haec Raynaudi verba producit: Si autem affirmant (Martinus de Magistris, & Angelus) nefas esse pro vili honestate non violanda, aut honeste capranda, mortem appetere, & mortem pro ea honestatis indemnitate, vel honesti studio appetitam, Martyrii decore vacare, non sunt audiendi. Quamobrem Parthenotimus Raynaudum inter defensores suae Opinionis recenset. Sed bone Deus, quam facile nobis, nostrisque Opinionibus assentiamur! quam facile in favorem nostrum omnia interpretamur, quum enixe aliquid cupimus! Pugnante contra se ipsum Parthenotimus exhibet Raynaudum; at ille nihil contra se, sed unice contra Parthenotimum pugnat. Aliud est, aliquid ad honestatem & Virtutem spectans in se considerare; aliud in exercitatione. Primum, quantumvis exile, vel cum periculo vitae sustinendum est. Recitare Salutationem Angelicam, sive Ave Maria, Templum ingredi orandi causa, candelas accendere. ad Sanctorum Reliquias, honestum est, & Virtutis sive Pietatis opus, ad Fidei doctrinam referendum. Si quis me adigere velit ad negandam honestatem hujusmodi operum, mortem potius tolerare debeo, quam negare, etiamsi exile & minutum Virtutis opus hoc sit dicendum, ne in grave Peccatum incurram. Majus est pretium cujuscumque Veritatis ad Fidem spectantis, quam Vitae nostrae pretium. At seposita consideratione & negatione intrinseci istorum pretii, & ad exercitationem tantummodo respiciendo, stultum ac temerarium foret Mortem potius eligere, quam ab iis actibus abstinere. Ad primam partem quod attinet, apertam Raynaudi mentem ex his illius verbis intelliges. Omnis, ait num. 13. Supernaturalis Honestas, quantumvis minuta, immo quaevis Honestas Moralis, prout Supernaturali Honestate convectata, & per FIDEM proposita, si vel mors obeunda, vel honestatis illius dispendium incurrendum cum Visio sit, potest idoneum motivum ad veri Martyrii acceptionem subministrare &c. Hisce explicantur verba a Parthenotimo producta, & rectissime a Raynaudo stabilita. Quod est ad alteram partem, ipsum Raynaudum iterum audi: Subscribendum, inquit, eris, si tantum affirmant, stultum fore Visam abjicere pro minuto Virtutis opere, cujus exercitatio nulla tunc lege praescribatur, & absque dispendio omitti possit, ac denique sit tale, ut Prudentia dicat, consultius esse in eo rerum statu tale opus praetermittere. Qui enim Imprudenter ac Temere discrimen mortis ultro adiret, ut tali

tali operi intempestive daret operam, improbandus esset &c. Itaque duo statuit Raynaudus, Alterum est, *Vitam Temere, nec absque scelere abjici pro assertione alicujus Propositionis, cujus Veritas non sit in Ecclesia prorsus rata, ita ut non sit exploratum, quod ejus assensus a Fide edicatur.* Alterum est, quanquam opus Virtutis ad Fidem pertineat, si tamen exile ac minutum sit, in exercitatione non careret *Temeritate*, ac *Suultus* foret, qui ne illud omitteret, Mortem potius subire vellet. Hoc & Lampridius Cap. III. & IV. memoraverat, Parthenotimus vero negare non est ausus. Si ergo imprudenter ac temere vita interdum impenderetur vel pro ipsis operibus Pietatis Intrinsecae, & quorum Honestas ad Fidem refertur: quanto Imprudentius, ac magis Temere vita profundatur pro tuenda Pia Sententia, quae Probabilis tantum est, neque ad Fidem pertinet, & quam tueri a nulla Ecclesiae Lege jubemur? Et quandoquidem stat Raynaudi sententia *non absque Scelere Vitam prodigi pro assertione Propositionis, cujus Veritas non sit in Ecclesia prorsus rata &c.* Jam intelligis, quo in loco habendum sit Votum Sanguinariū, eodem vitio patentissime scatens.

Ex his, quae hactenus disseruimus, palam factum reor, plura quidem, sed nihil revera Parthenotimum attulisse, quod idoneum sit ad honestandam ejusdem Voti deformitatem. Restat nunc diluenda spes etiam victoriae, tum ab ipso, tum ab aliis Lampridii adversariis sita, ut opinor, in constanda quantum possunt eidem Lampridio invidia, quasi is Decreta Romanorum Pontificum violaverit, & Piissimam & doctissimam Hispaniarum gentem ignominia oneraverit, Pietatem & Devotionem erga Sanctissimam Virginem Dei Matrem extenuarit. Inanium hujusmodi accusationum fragore dum Lector concutitur, aversum a Lampridio animum, mentemque ad dignoscenda Voti Sanguinarii vitia imparem, fortassis ii se reddituros sperant. Jam tibi in praecedentibus colloquiis ostendisse me puto, quam injuste hoc hominum genus in ejusmodi accusationes erumpat; quare ad paucula procedo, quae in Parthenotimi Dissertationibus sparsa occurrunt, neque sine animadversione sunt dimittenda. Agnoscit ille Diss. I. Cap. 6. contra Piam Sententiam militare auctoritatem Sancti Bernardi. Si tamen is in vivis nunc esset, eidem faveret. Quare petis? Quia Sanctus ille vir *Romanae Ecclesiae judicio paratus erat emendare judicium suum.* Praeterea pro Sancto firmissime habebas *Festum Nativitatis, & Assumptionis Beatae Mariae*, quia utrumque ab Ecclesia universali celebratum. Quum vero inquit Siculus Theologus, *Concep-*
tionis

*ptionis Festum hac nostra tempestate non solum possit, sed debeat celebrari: oporteret ut Bernardus emendationem promissam impleret. Somnia haec in aliis colloquiis discussimus. Repetere liceat. Nulla mihi dubitatio est, quin Sanctus ille vir, si viveret, se conformaret Romanae Ecclesiae Magistrae nostrae: & quod illa credit & docet, ipse quoque crederet ac doceret. Romana vero Ecclesia num Certam credit Piam Sententiam, quam indecisam relinquit; nonne eadem finit, ut contrarie Opinioni adhaerere liceat? Et ad Festum quod attinet, non semel ostendimus, nihil inde Certitudinis emanasse in Piam Sententiam. Equidem video, a Lampridii adversariis Festum hoc centies memorari, quod veluti Palladium Sententiae ejusdem suspiciunt. Parthenotimus ipse non uno in loco Palladium istud exerit, & potissimum num. 72. & num. 105. & sequ. nihil recogitans, celebres viros Bellarminum, Suarium, Vasquium, Valentiam, Raynaudum, e Festo Conceptionis nullam deduxisse Certitudinem Piae Sententiae. Num. etiam 274. scribit: *Festum Conceptionis sub nomine Sanctificationis celebrabant contrariae Opinionis patroni. Hoc interdictum fuit primum a Gregorio XV. & postea ab Alexandro VII. cum declaraverint Festum Conceptionis non nisi sub nomine Conceptionis esse celebrandum.* Paria is etiam tradit, alibi Pie sentientes ita ratiocinantes inducendo: *Suasi sumus, ut ipsa Deiparam fuisse sine labe Conceptam, quod Romani Pontifices Festum instituere, & illud instituere sub nomine Conceptionis juxta Piam Sententiam.* Sed quantopere heic hallucinantur Piae Sententiae patroni, in superioribus colloquiis satis ostendimus. *Conceptionis* nomen aequè complectitur *Praeservationem*, & *Sanctificationem*, Laudantur ab Alexandro, qui sub significatione *Praeservationis* Festum illud celebrant; at nullo verbo vetantur alii idem celebrare sub altera *Sanctificationis*. Nam aliam esse Pontificum mentem evincit Gregorii XV. Constitutio, quam Alexander VII. innovavit, ubi praecipit, *non alio quam Conceptionis nomine* utendum esse in Missa & Officio. Interdicentibus iis adjicere in sacris nomen *Sanctificationis*, aut adjungere titulum *Immaculae* nomini *Conceptionis*: nonne patet, constrictum minime ab iis fuisse *Conceptionis* nomen ad unam significationem, sed extendi etiam ad alteram? Dolendum mehercle est, falsis hisce suppositis ad perdendam Vitam suam incitari Christi Fideles. Mirum porro est, exspatiari Parthenotimum quoque ibidem, ut ostendat *Immaculatam* posse appellari *Conceptionem* Virginis. At ubinam Lampridii verbum id negantis? In sacris duntaxat eam appellare non licere *Immaculatam*, ex Gregorii XV. Con-*

Constitutione manifeste resultat, & ex Clementis XI. uti Cardinalis Gœttus scriptum reliquit. Quae Cardinalis Bellarminus de Festo Conceptionis dixerat, Parthenotimus denuo num. 69. inania nostris temporibus tradit; sed immerito, quum adhuc a Thomistis sub *Santificationis* nomine Festum Conceptionis celebretur, uti jamdiu animadvertimus.

Auctoritatem quoque Angelici Doctoris Parthenotimus Diff. I. Cap. 7. atque alii adhibent ad comparandam Piae Sententiae Certitudinem, quaedam ejus loca adducendo, & Manuscriptos nonnullos Codices laudando. Supervacaneus labor foret in quaestionem hanc ingredi. Salmaticenses Theologi, Carmelitae scilicet Excalceati, pro me responsum dabunt Tom. XIII. de Vitiis & Peccatis Disp. 15. Dub. 5. num. 204. *Haec autem loca, ajunt, sincere considerantibus, sive quae idem S. Thomas juvenis super Sententias, sive quae senior in Summa Theologiae, aut aliis locis scripsit, ita pro Peccati contractione sunt perspicua, & sibi ipsis cohaerentia, ut coram propria conscientia non audeamus illa de solo Debito intelligere. Legimus saepenumero praedicta loca, seriem, verba, & apices attente meditati sumus, summopere cupientes, & inquirentes viam, ut sine Veritatis praesudicio enuntiare possemus, D. Thomam Piae Sententiae non refragari: illam tamen (quod non sine animi dolore profiteamur) usque modo invenire non posuimus.* Anno 167*. Venetiis iterum edita sunt Salmaticensium volumina, & pacifice per Italiam versantur. Quam alienus fuerit a Certitudine Piae Sententiae Johannes Maldonatus celebris Theologus e. Soc. Jesu, Lampridius Cap. XII. pag. 85. ex Ricardo Simone indicaverat. Parthenotimus Diff. I. num. 48. auctor est, ipsum tantummodo contendisse, eam Sententiam non pertinere ad Fidem. Ita sane; sed nostra interest meminisse, tunc Patres Societatis Jesu contra Decretum Parisiensis Facultatis de Conceptione Virginis certasse, & tunc Archiepiscopum Parisiensem Petrum Gondii stitisse Pro Maldonato, ac decretum edidisse, quo saltem tacite improbatur sententia Parisiensis Facultatis. Quod si eadem Sententia, quae in languorem aut desuetudinem postea abiisse videbatur, Anno 1736. renovata dicitur: nihil nobis de eorum decreto curandum est; immo iis irascendum, qui quum de honore Tridentini Concilii, & Romanae Ecclesiae solliciti esse debeant, auctoritatem non verentur extollere Concilii Basileenfis, quanquam in Schisma prolapsi, unanimes cum Parisiensibus Doctoribus, qui nostris praecipue temporibus illud exaltant, ut Sanctae Romanae Ecclesiae auctoritatem, dignitatemque imminuant, ne dicam

dicam pessumdent. Quod si Parthenotimus num. 97. monitos nos vult, *quantum Parisiensis Academiae valeat auctoritas*: noverit ille, magni a nobis fieri celeberrimae illius Academiae iudicium, ubi cum Apostolicae Sedis iudicio concors pergit. At ubi adversatur, quemadmodum evenit, dum Basileenſis Synodi Schismaticae decretum de Conceptione adversus Sanctam Sedem tueri audet: nos cum ceteris Catholicis illius Academiae consilia averſamur.

Alibi, hoc est Diff. I. num. 62. Parthenotimus litem Lampridio intemat, quod pag. 105. *Componere visus sit Persuasionem, quam de Immaculato Virginis Conceptu omnes fere Catholici habent, cum Persuasionem, quam retinent Lucenses de vera Salvatoris e Cruce pendentis Imagine a Nicodemo efficta; cum Persuasionem Messanensium de Epistola ipsiſ a Sanctissima Dei Genitrice conscripta &c.* Hoc ille miratur, quum Persuasio de Praeservatione Deiparae nimium distet ab eorum Populorum Persuasionem. Certe id nemo neget, neque parem Persuasionem Lampridius unquam somniavit. Somnia quidem haec sunt (veniam quaeso huic voci impertire) ipsius Parthenotimi, qui apertam Lampridii mentem confundit atque pervertit. Scripserat idem Parthenotimus pag. 78. num. 43. prioris sui Libri: *Qui voveret Virginis Immunitatem tueri, necesse est, ut Persuadeat sibi, quod re ipsa Virgo immunis fuerit a macula.* Lampridius autem, ut ostendat Persuasionem, quamvis Pia sit, nihil conferre, ut Sententia defendenda excludat formidinem Falsi, eamque in multos errores obripere posse hominem Christianum, si Persuasionem hac fretus Sanguinem suum pro aliqua Pia Opinione voveret: exempla nuper memorata adfert. Nulla haec comparatio. Istis tantummodo evincitur, *Persuasionem* generice sumptae non esse fidendum, ut quis Vitam suam obligare iuste possit pro tuendis, quae adhuc sub Opinione detinentur. Si argumenti huius rectitudinem non assequitur Parthenotimus, assequuntur quicumque sine partium studio de hisce iudicium instituunt. Lampridium scribentem: *Messanensibus itidem persuasum est, apud se servari Epistolam a Sanctissima Dei Genitrice conscriptam*, subinde ille eodem num. 60. aliis excipit, & refellit verbis, inquit, *Autographum illarum Litterarum apud Messanenses adſervari, neminem dixisse.* At tu jam animadverteris, ne Lampridium quidem id asseruisse. Addit ille: *Haec de re cum Virum sapientem ex illa nobili Urbe consuluisse: mibi respondit, quod toti Orbi publicum facerem: Messanensibus persuasum est, apud se non servari illam Epistolam.* Si Autographum significare vult, concordare sumus: neque enim Messanensium ullus hoc sibi tribuit.

At Sole clarius est, Messanae adservari Epistolam ad eos, ut fertur, scriptam, & pendentem ab Imagine Deiparae, & pueri Jesu, quam a Sancto Luca nonnulli depictam ferunt. Non esse eam figmentum, sed veram Mariae Epistolam, ii sibi *persuadent*, atque alii longe antea sibi *persuaserunt*, quorum scripta prostant. In primis vero Melchior Inchofer e Soc. Jesu eam sibi protegendam suscepit. Immo pro eadem Persuasionem ac Traditionem contra Rocchum Pirrum doctissimi quidam nobilesque ejus Urbis Cives, Libro edito in folio Anno 1740. certarunt, dum vetustas geminas Clavas illustrarent, in quibus ejusdem Epistolae mentio occurrit. Haec ignorare nequit Parthenotimus, & nihilo secius scribit persuasum esse Messanenensibus, *apud se non servari illam Epistolam*. Autographum non servatur; sed nunquid negari potest, quin Epistola, quae conscripta creditur a Deipara, apud eos fervetur? A cavillationibus quaeſo abſtineamus. Non de Autographo, sed de *Persuasionem* heic agitur.

Audias etiam velim Parthenotimum Diff. II. Cap. 7. num. 195. & 196. exerentem exemplum Christiani hominis mortem tolerantis, ut Virginitatem custodiat: quod sane laudandum. Et nihilominus nulla Lege jubentur Fideles ad eam servandam, quum Consilium tantummodo spectet. Tum pergit dicere: *Idcirco etiamsi non obligentur Catholici tueri Virginem sine Originali Conceptam: si eam tuerentur, hujusmodi tutelae ad Leges Sanctissimas Consiliorum spectant; ad quas item recte dicitur attingere spontanea mortis tolerantia pro confessione Fidei, & custodia Virginitatis*. Sed mira heic narrantur, neque diu immorandum est, ut quam dispar sit casus intelligas. Virginitatem praeferre Nuptiis ob amorem Christi, quanquam Consilii res sit, & non Praecepti, opus tamen Virtutis est ad Dogma Fidei spectans, ut omnes norunt. Proinde pro Certa & Intrinseca Virtute, in quam formido Erroris, quod est ad objectum, non cadit, mortem oppeteret, qui ne violaret Virginitatis Votum, atque ut a gravi Peccato caveret, se occidendum potius sineret. Immaculatam vero Conceptionem credere, atque tueri, laudandum sane est, sed nullum ostendas Praeceptum aut Consilium Fidei de ea credenda sive tuenda. Et quando etiam velis, non deesse Consilium Ecclesiae de hujusmodi tutela: Consilium hoc Ecclesiasticum tantummodo est. Porro nos antea animadvertimus, ne ipsa quidem Praecepta Ecclesiae plerumque esse observanda cum periculo Vitae. Quanto ergo minus Consilia? Objectum primi Voti in Consilio & Dogmate Fidei fundatum est. Alterum in Consilio Ecclesiastico, & Pietate Opinativa. Pro illo, hoc est.

est pro Fidei opere, & pro vitando peccato, vitam dare licet; nequaquam pro altero, quod ab Opinione pendet. Dixerat Lampridius Cap. VII. pag. 51. ex decretis Apostolicae Sedis *peccare Judicem sequentem in iudicando sententiam Probabilem, contenta tutiore ac Probabiliore: uti & Medicum exhibentem aegro Pharmacum Probabile, quando alterum novit, ac praesto habet, Probabilius & tutius ad salutem aegrotanti adserendam*. Hinc ille inferebat, ratione pari damnandos, qui relicta Probabiliori sententia Vorum Sanguinarium concipiunt. Quid ad haec Parthenotimus? Is in Diss. II. num. 257. *duplicem propositionem contradictoriam* statuit, scilicet: *Deipara in primo instanti suae creationis Originale peccatum contraxit. Deipara in primo instanti suae Creationis Originale peccatum non contraxit*. Utra est Probabilior? Posteriolem dicas. Ergo haec in praxi sequenda ab eo censetur. Iterum mira proferuntur. Non ita est efformanda argumentatio, uti quisque dignoscere potest. En geminas propositiones quales proferre opus erat. Videlicet: *Licet Sanguinem & Visum vovere pro tuenda Pia Sententia. Non licet id vovere pro eadem Sententia*. Equidem Certam arbitror posteriorem; eam saltem dabis altera tutiorem & Probabiliorem. Ubi vero agitur de humanae vitae evidenti periculo, tunc Probabilior sententia Probabili duntaxat est praeferenda.

Contendit Parthenotimus num. 261. Probabilem appellari non posse Opinionem de Sanctificatione, cui Thomistae adhaerent. *Falso enim Medina docet, Ecclesiam vel Pontifices tradere hanc Opinionem esse Probabilem. Numquam si hoc dicunt, sed solum non esse Erroneam, neque esse Peccatum mortale illam asserere: quod valde diversum est. Adde, quod uno tempore est Probabile, discursu temporis posse Improbabile fieri*. Sunt haec postrema verba Suarii Tom. II. in 4. p. Disp. 3. Sect. 6. quasi Sixtus IV. non idem decreverit de Scotistica atque de Thomistica Sententia, damnans illos, qui affirmare praesumerent, eos, qui crederent, aut tenerent, eandem Dei Genitricem ab Originalis peccati macula in sua Conceptione praeservatam fuisse, propterea alicujus Haeresis labe pollutos fore, vel mortaliter peccare. Ad autem aliquid rationum, aut monumentorum post Sixtum IV. adinventum fuerit, per quod Thomisticae Opinioni erepta fuerit sua Probabilitas, meum non est inquirere. Tum Parthenotimus subdit: *Quid scriberes eximius Doctor (Suarius) post Bullam Alexandri? Profecto in Decreto Gregorii XV. pro Opinione Conceptionis hoc solum habetur: Per huiusmodi tamen provisionem Sanctitas sua non intendit reprobare alteram Opinionem (scilicet Thomistarum) nec si Ullum praecjudicium inferre,*

*eam relinquens in eisdem statu & terminis, in quibus de praesenti re-
peritur, praeter quam ad supra disposita.* Postrema haec verba, sci-
licet praeterquam ad supra disposita, Parthenotimus a Lampridio o-
missa ait, quia suae Opinioni de macula neusquam conducentia. Insul-
sis hisce querelis puderet me respondere. Prostant Bullae. Tricas a
Parthenotimo heic feri, nullo negotio unusquisque intelliget. Pergit
deinde is scribere: *Quae Clausula est in Decreto Pauli V. sed omissa
in Bulla Alexandri VII. ut animadvertit Platelius,* cujus verba dein-
de profert. Sed rursus dicere cogor, inconsulte haec Parthenotimo
excidisse, signaque duntaxat esse nutantis caussae. Rotundis Literis
Alexander VII. in eadem Bulla ait: *Innovantes Pauli V. & Gregorii
XV. superius memoratas Constitutiones sive Decreta.* Quid est, quod
in mentem venit pio illi Theologo tradere omissam ab Alexandro
Clausulam illam? Qui integram Constitutionem Gregorii XV. *inno-
vat,* manifestissime cuncta innovat, quae in ea continentur. Quum
ergo Romani Pontifices tam disertis verbis in suis Constitutionibus
Piae sententiae faventibus, protestentur, se non reprobare Thomisticam
Sententiam, nec ei Ullum Praejudicium inferre: continuo intelligis,
quam merito Lampridius pag. 112. scripserit de iisdem: *Ita vero u-
nam* (Sententiam scilicet Scotisticam) *commendarunt, ut alterius ta-
men jura non laeserint.* At Siculus Theologus insurgit heic, & num.
274. ait: *Qua veritate potuit Lampridius asserere, quod Romani Pon-
tifices non laeserint jura Opinionis contrariae? In ejus favorem nulla
porest esse publica disceptatio &c.* Ita sane factum, & prudentissime,
a summis Pontificibus, ad evitanda scandala, dissensiones, & discor-
dias in Populo Christiano, uti Gregorius XV. praecipue testatus fuit,
non vero ut Thomisticae Opinioni sua Probabilitas eriperetur. Et
potissimum quod idem Pontifex sub eisdem Censuris praeceperit, ne
Piae Sententiae patroni aliam Opinionem impugnent, nec de ea aliquo
modo agant, seu tractent. Si contrariam hanc prohibitionem ignora-
vit Parthenotimus, non levis incuriae & omissionis arguendus est.
Sin noverat, gravioris criminis reum habemus. Porro constat, nun-
quam postea laesse fuisse jura Thomisticae Sententiae, quum eandem
Gregorii XV. Constitutionem Alexander VII. innovaverit, & idem
Gregorius confirmaverit Constitutionem Pii V. Praeipientis, ne qui-
quam Erroris damnet eorumdem Thomistarum Opinionem.

Adduxerat in priori Libro suo Parthenotimus exemplum Chri-
stiani hominis, qui pro arcendis a Lauretano Virginis Templo hosti-
bus, armis sumtis periculo mortis sese exponeret, ex ejusmodi justa

ac ho-

ac honesta tutela deducere se posse putans Voti Sanguinarij honestatem. Pag. 48. disparitatem exempli indicarat Lampridius. Sed rursus pugnam instaurat vir doctissimus num. 267. scribens: *Profecto Christianus piusque miles, qui ad arcendos hostes in sacram Aedem Lauretanam irruentes viriliter pugnaret, & in bello fortiter occumberet: pro defensione sacrae Lauretanae Aedis, pro Pietate in Deiparam censetur occumbere, non pro virium robore, nec pro peritia artis militaris: quamquam virium robore, & artis militaris peritia quaereretur ea defensione. Ergo similiter Voventes Immaculatam Deiparae Conceptionem, qui adversus hostes illius Immaculati Mysteriorum decertarent, & decertando morerentur: pro defensione Immaculatae Conceptionis Marianae, pro Pietate in Deiparam perhiberentur mori, non pro Opinione Scotistica, nec pro argumentis Scotisticae Opinionis, licet his defensione Immaculatae Conceptionis intenderetur. Nihil horum omissum volui, ut denique perspicias, reliquum esse nihil spei de persuadenda hominibus quam doctissimis deformitate Voti Sanguinarij, quando pervicaciter adhuc insistant in usu hujus exempli, cujus disparitatem, uti Lampridius aiebat, nemo non videt. Sed haec est deploranda Veritatis conditio. Fac ut alte animo quisquam vir doctus Opinionem quampiam infigat, ne forcipibus quidem adhibitis, eam avellas, & vel ipsa contraria argumenta quamvis fortissima, eidem straminea apparebunt. Ex Physica & Morali Evidentia Certissimum est, praesertim Lauretanum Templum esse celebrem Pietatis Christianae locum, uti & copiosum adervari ibi Thesaurum ad Deiparae cultum & honorem. Heic etiam Fidei doctrina de Templis locum habet. Si licet domum suam, suasque fortunas non levis pretii cum periculo vitae ab injusto aggressore tueri: quanto magis licebit Dei Domum, ac tantae venerationis locum? Objectum tutelae Certissimum est, a nemine revocari potest in dubium; ac tanti pretii, ut Prudenter ac juste pro eo possit periculo vitae pii militis exponi. Pietas in casu isto a Certissimo Objecto commota, honeste ac laudabiliter ad certamen erumpit. At in quaestione nostra millies diximus, desiderari Certitudinem in Objecto Voti Sanguinarij. Destituta ejusmodi Certitudine Pietas, Imprudens, Temeraria, vitiosaque fit, si Vitam Certissimum Bonum commutare cum Incerto Bono velit. Idem de innumeris exemplis dicas, in quibus Pietas mortem eligeret pro Reliquiis, pro Miraculis, pro piis Historiis Certitudine carentibus. Addit Parthenotimus: *Sapientibus satis est perspicuum, quod carior Deiparae sit Immunitas ab Originali labe, ac proinde hujus tutela, quam sacra Lauretana Aedes, & hujus defensio.*
Egre.*

Egregie sane, quasi hoc non sit pro certo & constituto adsumere, quod adhuc in quaestione est. Quis pio isti Theologo revelavit, gratiorem esse Virgini tutelam Immunitatis, quam Templi? Si Deus aliter de illius Conceptione statuisset (hoc tamen obcurum esse pergit) non solum gravior desineret esse, sed ne grata quidem foret temere suscepta cum periculo vitae Immunitatis tutela, quippe voluntati Dei opposita. Contra falli nemo possit in credendo, Lauretanum Templum Deo in honorem Virginis dedicatum, ipsique Deiparae gratissimum esse, se coli in eodem sacratissimo loco, ac proinde gratissimum quoque fore, si quisquam armis & periculo vitae certet, ne idem violetur, ac diripiatur.

Dixerat Lampridius, Sanguinarium Votum *cedere in Apostolicae Sedis injuriam*. Contra Parthenotimus num. 277. *hoc intellectu difficile*, ait, postquam *Festum Conceptionis à Romana Ecclesia institutum & praeceptum celebratur*. Hinc nulla est *Apostolicae Sedis injuria, cum potius Voventes eidem Apostolicae Sedi praestent obsequium*. Scotisticum hoc Palladium ubique recurrere vides, quo tamen fulcro quam incalsum nitantur Scotistae, ut Certam praestent Piam Sententiam, non semel animadvertimus. Laudat Romana Ecclesia Piam Sententiam; praecipit etiam Festum Conceptionis; sed neminem cogit illud celebrare sub significatione *Præservationis*; nunquam vero in mentem venit Romanis Pontificibus probare Voventes Sanguinem suum pro tutela ejusdem Sententiae. Et quando ad supremum ejus Tribunal unquam praesens controversia deferretur, male actum de Voto Sanguinario esset, ut mihi persuadeo. Certe quod est ad Veritatem, quae una tantum esse potest, nihil haecenus definivit Ecclesia de geminis hisce Opinionibus, ac tam unam, quam alteram reliquit in statu, in quo erant tempore Sixti IV. Nihilo tamen fecius saepe audimus Populo nuntiantes, ad tantam Certitudinem fuisse evectam Piam Sententiam, ut nulla amplius de ea dubitatio superstit; immo, ni fama sit mendax, quidam Panormi *Haereticos* appellare eos non vererent, qui aut hujusmodi Certitudinem negant, aut contrariae adherent Sententiae. Estne hoc praestare obsequium Apostolicae Sedi, quae ab hac Certitudine longe abest, & sub Censuris vetuit, ne quis *Erroris*, nedum *Haeresis* damnet contra sentientes? Quod plus est, invexere illi Votum Sanguinarium; hoc autem quid aliud dicas, nisi hac de re judicandi potestatem usurpare, quam summi Pontifices sibi reservarunt, quasi tam sublimem Certitudinis gradum assequuta fuerit Pia Sententia, ut non secus ac pro Dogmatis Fidei vita recte pro ea possit impen-

pendi? At istud pugnat contra Constitutiones & mentem Romanae Ecclesiae, atque adeo injuriam eidem inrogat. Profiteretur quidem Parthenotimus num. 277. non fuisse ab Ecclesia definitam de Fide Immaculatam Deiparae Conceptionem. Tum subdit: *Dixi, eum honeste mori, qui pro tuendo primaevo Virginis Candore moriendi periculo se objiceret, non secus ac qui moritur pro Fide. Sed hoc probat tutelam illius primaevi Candoris esse opus Virtutis, non esse Fidei Catholicae Dogma.* Ego vero jamdiu aequivocationem hanc sustulisse me puto ostendendo, non amplius esse opus *Virtutis*, sed quidem *Temeritatis*, ac *Superstitionis*, pro re Incerta jacturam velle pati vitae, quod Bonum ab Opinione minime pendet; vitae, inquam, nobis a Deo tantopere commendatae: tunc enim Pietas in Vitium transit. Recriminantem vero audire juvat Parthenotimum, qui in haec verba loquitur: *Videat Recentior, an ipse sit Apostolicae Sedi injurius, ubi ait apertissimis verbis, non esse contra mentem Alexandri VII. Festum Conceptionis sub alio, quam Conceptionis nomine celebrare. Afferit argumenta, & ea relinquit insoluta. Praerogativa Immaculae Conceptionis per ipsum est Probabilis, & simul dubia: dum interdicatur ab Alexandro, ne Pia Sententia revocetur in dubium.* En plura in paucis verbis accusationum capita, quae is etiam num. 283. refricat. Sed primo falsum est, somniasse unquam Lampridium, alio nomine quam *Conceptionis* celebrandum esse Festum Conceptionis. Is inhaerens Pontificiis Decretis hoc unum contendit, sub nomine Conceptionis in eo Festo venire tum *Praeservationem*, tum *Sanctificationem*. Secundo si qua erant argumenta, quae Lampridius insoluta reliquisset, indicanda fuerant, neque sine testibus erat instituenda accusatio. Quod si is loquitur de argumentis a Lampridio propositis contra *Certitudinem* Piae Sententiae, haec profecto solvenda non erant, neque solvi a Parthenotimo posse reor. Ecclesia *Piam* tantummodo & *Probabilem* nos agnoscere jubet Scotisticam Sententiam, qualem etiam Lampridius ipse ubique fatetur. At quod pertinet ad *Certitudinem*, cum Ecclesia concors ille procedit; eam quippe Decreta Pontificia excludunt: & si quando a nonnullis temere investam Ecclesia Romana animadvertet, ut ab subeundam mortem pro ea inducantur Fideles, aegre id latura credenda est. Tertio accusatur Lampridius, quod pag. 102. *Probabilem, simulque Dubiam* dicat *Piam* Sententiam. Idem reperit pius ille vir num. 283. At nonne idem est esse *Probabile*, ac *Dubium*? Quod enim nondum est Certum, Dubitationi locum relinquit; & quamvis Intellectus in unam partem inclinet, id cum formidine erroris faciat

opor-

oportet. Verum subdit Parthenotimus, *interdictum fuisse ab Alexandro, ne Pia Sententia revocetur in dubium*. Sed quae sit Pontificis mens, e praecedentibus accipiendum est, scilicet non licere *eandem Sententiam, Festum, seu Cultum in Disputationem revocare*. Alioquin si ex Apostolicae Sedis Decreto revocari nequit in *Dubium Pia Sententia*, eadem Certa erit, litemque deciderit Alexander, qui tamen diserte protestatur, se eam noluisse decidere. Ad haec quum Lampridius *Probabilem* fateatur *Piam Sententiam*, suo munere functus est; neque enim eam nisi uti *Probabilem* commendat, eique uti *Probabili* favet Ecclesia. Hoc est, in dubium revocat Certitudinem ei sine bonis tabulis tributam, non vero Probabilitatem: quae est mens Summorum Pontificum. Quod si *Dubiam* is etiam appellat, id ille eruit ex supposito, quod Parthenotimus ipse heic amplecti non detestatur, dum ait, *Certum non esse, quod Maria fuerit Concepta sine labe*. Si non est Certum, sed tantummodo Probabile, consequitur ex supposito vel ipsius Parthenotimi, Incertam restare ac *Dubiam* eandem Sententiam. Sed quod omnino radices hujus accusationis amputat, illud est, non impugnari, sed laudari a Lampridio ubique *Piam Sententiam, Festum* secundum illam celebratum, & *Votum* sine Sanguine pro ejus tutela conceptum. Unum ille persequitur, scilicet improbandum esse *Votum Sanguinarium*. Quamobrem necesse fuit, imaginariam hanc *Certitudinem* eis eripere, atque ostendere, *Probabilitatem* quidem in ea deprehendi, sed dubitationi & formidini erroris adhuc obnoxiam esse eandem Sententiam. Quis arguendus heic? num qui novam ac perniciosam invehit doctrinam, an qui secundum Ecclesiae mentem falsam hanc, ut ipse arbitratur, doctrinam improbat?

Per *Votum Sanguinarium Doctrinam ac Prudentiam Ecclesiae Catholicae irridendam hostibus praeberi*, scripserat Lampridius, si quando ii viderent Catholicos pro Immaculata Conceptione Virginis jugulum carnifici offerre, quum Certa nondum sit in Ecclesia Dei haec Sententia. Sculus Theologus num. 279. nobis ante oculos statuit exemplum Monialium, ac Religiosorum, qui mortem generose subirent, ne *Votum* custodiendae Castitatis effringerent. Immerito isti deriderentur; ita & morientes pro *Pia sententia*. *Opus enim Virtutis est porinde Votum Castitatis, atque Votum Immaculae Conceptionis*. O quot mira audire cogimur? Antea jam diluimus paritatem exempli, atque hanc disparitatem nobis confestim objicerent hostes ipsi Ecclesiae Catholicae, dicendo: Secundum vos Dogma Fidei est, praestare Nuptiis custodiam Virginitatis & Continentiae, susceptam ad honorem Christi,

sti; atque ad doctrinam Fidei Consilium hac de re spectat. Igitur moriens pro Virginitate seu Continentia sacrata Deo, vitam daret pro Opere Virtutis ad Fidem spectantis. Contra vos fatemini; indecens adhuc esse controversiam de Conceptione Virginis; ac proinde tutela Immunitatis Marianae ad Fidei doctrinam referri nequit a vobis; sed est Opus Virtutis Opinativae, sive Pietatis ab Opinione pendens. Nonne ergo irridenda est Ecclesia vestra, in qua homines in mortem irruere volunt non pro Pietate nixa Dogmatis Fidei, sed pro Pietate, cujus Objectum Opinio est, dum honorificum Deiparae credunt, quod adhuc dubitationi obnoxium Ecclesia ipsa fatetur? Horrerent ejusmodi carnificinam vel ipsi Catholici a Sanguinario Voto alieni, quod cernerent Imprudenter ac Temerè eligi in casu isto mortem, sine ullo pari exemplo; neque enim ullum Historia Ecclesiastica suppeditat; & sine suffragio aliquo Romanae Ecclesiae, quae Piam quidem laudat Sententiam, quippe nullum inde incommodum emanat in Ecclesiam, in doctrinam Fidei, neque in Rempublicam; sed nullo unquam indicio probavit pro ejus tutela mortem oppetere volentes. Putat heic Parthenotimus amoliri se posse horrorem istius carnificinae exemplo bellorum & proeliorum tam saepe occurrentium. *Non horrent animi*, inquit is num. 280. *quod plura hominum millia jam sint caesa in bellis; horrentne, si solum amore Virtutis, atque Pietatis causa caedi possent?* Sed expectanda non erat a viro tam docto & pio id genus responso. Itaque regerendum est, horrere etiam animos, quoties tot millia Fidelium Christi in proeliis cadunt. Sed haec infelicia sunt corruptae Naturae Mala, quibus mederi, & quae avertere nulla ratione possumus. Ad haec ingemiscit Ecclesia; & concordiam quotidie curat, quotidie a Deo precatur inter Christianos Principes. Plus ipsa praestare non potest. Verum in casu nostro si Christi Fideles tormentis & securibus expositos cerneremus, sine ulla necessitate, sine suffragio Ecclesiae, pro Pietate, ut ajunt, sed revera pro Opinione, sive pro Pietate vitiosa: quis non horreret? Et quum in manu Ecclesiae sit inconsultum hoc Vitae sacrificium impedire, donec ipsa Quaestionem dirimat: sperandum est fore, ut scandalum hoc tandem ipsa animadvertens, salubri Decreto hujusmodi Imprudentiae ac Temeritatis prospiciat. Interea a me minime expectes, ut resellam, quae habet Parthenotimus Diff. II. Cap. 8. ubi ostendendum suscipit, *nec parvae Necessitatis, nec parvae Utilitatis esse Pietatem in Voto tuendi Immaculatam Deiparae Conceptionem usque ad Sanguinem.* Aerea quippe ejus argumenta facile unusquisque agnoscat, innixa nem-

pe falso supposito, quod legitimum & laudandum *Pietatis* opus exerceat, qui pro ea Sententia moriatur; & acceptum esse Virgini ejusmodi sacrificium, quum incertum adhuc sit, an Deus Virginem præservaverit, & quum ipsa Deipara probare non possit, nos una *Persuasione* ductos, quae Erroris formidinem minime excludit, violare interea Certissimum Dei Praeceptum de Vitae custodia. Denique parum Utilitatis, nihil Necessitatis esse in Quaestione de Virginis Conceptione, satis Ecclesia prodidit, quum quaestio haec a tot Saeculis vigeat, eamque nondum ipsa Ecclesia dirimere voluerit. Sin autem vera sunt, quae Lampridius, & nos haecenus differuimus, non solum nulla utilitas aut necessitas Voti Sanguinarii occurrit, sed quidem utile ac necessarium Religioni Sanctissimae foret, tam inconsultum Votum proficere. Horrorem quoque in nobis Parthenotimus num. 117. atque alii excitandum curant ex incurfu Peccati originalis. Quis tamen hoc in Virgine horruisset, aut horreret, si jamdiu apparuisset, aut appareret, aliam fuisse Deo voluntatem, quam quae a patris Piae Sententiae traditur? Neque heic horrorem concipiunt contrariae Opinionis affectae, quanquam Devotione erga Deiparam nemini concedant, quia in ipso eodem primo, aut saltem in secundo instanti *Sanctificata* immediate a Deo Mariam credunt. Ceterum nolo mihi excidat laudare sinceritatem Patris Candidi Parthenotimi, cujus sunt haec verba num. 286. *Ego numquam Votum ad Sanguinem usque emis- si, licet quotannis, sine illa clausula, post professionem Fidei consueverim illud emittere. Et haec est praxis in Academia Panormitana Societatis Jesu omnium, qui Theologica, aut Philosophica Laurea donantur, videlicet sine clausula ad Sanguinem usque Votum illud emittere, nulla tamen obstricti sunt lege Academiae aut scripta, aut tradita. Neminem ad illud Votum cum laudata clausula emittendum hortatus sum.* O utinam Prudentiam, & in operando circumspectionem piissimi hujus Theologi, atque ejus sodalium, omnes imitati fuissent, aut imitarentur; non vero illorum, qui Novitates periculosas in Ecclesiam Dei invehendas interdum; & praesertim in casu nostro curant: Lampridio nulla fuisset cum eo disputatio, nullaque necessitas inquirendi, sitne, an non, conjuncta cum Probabili Pia Sententia Certitudo. Quod si in nobilissima Urbe Panormitana post litem motam ii novos Profelytos sollicito studio sibi quotidie conquirunt, & re ipsa ad se trahunt: hoc nihil mirum est, uti neque mirandum, vel ipsos piissimos Reges tam saepe eorum consiliis adductos fuisse ad nihil omit- tendum, quò victoria sibi in hoc certamine decernatur. Notum quip-

pe est, quam nullo negotio in Fidelium corda invehantur, quaecumque speciem Pietatis gerunt, & animosa Eloquentia deprædicantur, & præcipue si una cum Pietate gloria Nationis, decus Ordinis sui conjungatur. Panormitana autem Civitas laudanda profecto est, tum quod semper suis Regibus fidelissima fuerit, tum etiam quod singulari erga Deiparam, atque erga Immaculatam illius Conceptionem, Devotione ferveat. Verum ubi pateat, a vera Devotione abesse, atque in Superstitionem ferri, Vitam quoque vovere velle contra Prudentiae regulas, & contra Ecclesiae mentem, pro tuenda Pia eadem Sententia, sperandum est fore, ut ab eo abstineat, illudque tandem execretur, & singularitate indiscretæ Devotionis abjecta, tot Urbium & Provinciarum ab eo abhorrentium, aut ablinentium, exempla sequatur.

Unum restat, quod Parthenotimi venia refricandum reor. Adhuc ille Granadum censentem, *posse divina Fide credi, quod Christus sit Filius Naturalis Dei, sed non inde licitum esse inferre, quod sit Haereticus, qui illud negaret.* Sententiam hanc, & commemorantem illam, improbarat Lampridius Cap. XX. Parthenotimus vero ad eam tuendam aut excusandam multa adfert Diff. II. Cap. 27. Frassenium, Gonetum, & paucos alios commemorans, qui aut Haeresis inculcare non audent consentientes cum Felice Orgellitano, & Elipando Toletano, aut aliquo modo illorum sententiam honestandam suscipere. Quod controversia hæc ad illud, quod agimus, nihil pertineat, brevibus ab ea nos expediam. Primo fatetur Parthenotimus, excidisse sibi in ea assertionione distinctionem prorsus necessariam, quum non addiderit *ut Homo*. Jure propterea in assertionem illam investus est Lampridius. Secundo patet, Communem esse in Scholis sententiam, *Christum, ut Homo est, non esse Filium Dei Adoptivum, sed Naturalem.* Videndi in primis Suarius, Vasquius, Petavius, Thomassinus &c. Gonetus ipse, quem pro se Parthenotimus adfert, Tom. 12. Disp. 23. Art. 2. hæc habet: *Christum ut Hominem in sensu materiali & idemico esse Filium Dei Naturalem, fatentur omnes Theologi, nec ab aliquo potest negari; est enim Veritas Fidei, eadem Certitudine tuenda, qua credimus Mysterium Incarnationis.* Scholasticorum vero quorundam subtilitas argumentum hoc versans Dogma istud in ambages pertraxit, docens, *Christum, in quantum Homo (ly in quantum reduplicante Humanitatem Verbo unitam) non esse Filium Naturalem Dei filiatione fundata in Humanitate, quatenus Verbo unita, aut in sanctificatione Humanitatis a Verbo.* Hæc idem Gonetus, qui postea in hanc alteram Conclusionem definit: *Christus in quantum Ho-*

mo, per gratiam unionis est Filius Dei Naturalis formaliter, ly in quantum determinante in recto, non Naturam, sed suppositum ut in illa subsistens, non reduplicative, sed specificative. Quousque processerit Scholasticorum subtilitas, manu tenes. At quid Catholicis agendum? Non hasce subtilitates novit Ecclesia. Eadem Felicem & Elipandum Haeresis damnavit, quod Christum, ut Homo est, Adoptivum Dei Filium deprædicerent. Plenarium Francofordiense Concilium, aliaque Concilia, Hadrianus I. Romanus Pontifex, Paulinus Aquilejensis, Alcuinus, & alii anathema in eos pronuntiarunt. Felix ipse in Romana Synodo errorem hunc abjuravit. Peto nunc ego: Romani Pontificis Infallibilitatem creditne, an non, Parthenotimus? Si credit: ecquando liceat auctoritati Hadriani Summi Pontificis, quocum concors pergit Communis Theologorum sententia, paucos opponere Theologos, eosque tanti momenti venditare, ut ab Haeresi excusari possint cum Felice & Elipando sentientes? Si haec licent, aeternum est paene dixi, de doctrina Fidei. Sed insurgit Parthenotimus num. 303. suspicionem movens cum Binio de veritate Actorum Concilii Francofordiensis. Tum num. 305. Romanam Synodum in dubium revocat, atque in haec verba definit: *Eadem huius Synodo: (Si qua est) addibetur responsio, quae addibita est Foro-Julienſi: nimirum non sunt divina Fide credenda, quae non definiuntur a Papa ex Cathedra docente, vel a Concilio Generali.* Equidem repeto, si ejusmodi effugiis locus futurus est in sacra Theologia, nimis multis in quaestionibus Fidei doctrinam intemperantia ingenia pervertere, aut eludere possent. Certissimum est, proscriptos fuisse variis in Conciliis errores Felicis & Elipandi. Concilii Ratisponensis, Romani, Francofordiensis meminere Historici, & Scriptores coaevi. Summus Pontifex Hadrianus, uti constat ex ejus Literis, & ex ejus Legatis ad Francofordiense Concilium missis, eandem Haeresim perculit; atque de ejus Romana Synodo testem habemus Poetam Saxonicum. Leo quoque III. Romanus Pontifex in altera Romana Synodo Anno 799. idem praestitit. Vide Baronium, Natalem Alexandrum, Pagium &c. Quis nunc audeat dicere, Papam haec minime decrevisse *ex Cathedra docente*? Faveatne, an detrahat auctoritati Romanae Ecclesiae, qui ejus definitionem ex Cathedra negat in causa Felicis & Elipandi, aliorum esto judicium. Neque plura loquutus est Romanus Abbas, silendi veniam deprecatus. Quae autem ille disseverat, a me in commentarium conjecta, accipe mi Azevedæ, ac de iis tu quoque judicium tuum interfere. Vale.

Neapoli IV. Kal. Febr. MDCCXLII.

*Dottissimo & amantissimo Azevedo suo Ferdinandus
Valdesius S. P. D.*

EPISTOLA DECIMAQUARTA.

ULTRA duos menses abesse Neapoli suis praepeditus negotiis coactus est Romanus Abbas. Quum vero fuisset regressus, ac satis otii nactus, ad ejus aedes me contuli, & consueta humanitate exceptus, ab eo tandem sciscitatus sum, jure ne an injuria objecta a quibusdam Lampridio fuerit Pontificiorum Decretorum transgressio, quando is Quaestionem de Immaculata Conceptione Virginis jamdiu sopitam excitavit, & Piam Sententiam tacite saltem, sive indirecte, convellere nisus est. Ille vero manu in peram immissa aliquot folia utrinque scripta eduxit, iisque mihi commonstratis dixit: Nullus nunc erit hodie nobis labor, hunc enim ipsemet Lampridius praeoccupavit. E publicis namque typis exiit Epistola Anonymi cujusdam ad Anonymum S. R. E. Cardinalem Italice scripta adversus Lampridium, cujus Auctorem si praene a Furiis actum dicas, non injuria dicas. Suum proinde duxit Lampridius alteram reponere Epistolam, cujus exemplum nuper accipi & legi, legendumque tibi nunc exhibeo. Italico sermone & ista conscripta fuerat, sed minime typis data. Quod censerem tibi quoque, Azevede amantissime, gratissimum fore, eandem habere perspetam, in Latinum a me postea conversam nunc ad te mitto. Ita ergo Lampridius Apologiam suam contextit.

„ Eminentissime Princeps.

„ Delata est ad me Epistola quaedam *ad Cardinalem N. N.* exarata, proeloque commissa, cujus Auctor mihi ignotus nullum non movet lapidem, ut meum de *Voto Sanguinario* judicium non delirantis tantummodo, sed impii etiam hominis foetum ostendat. Non diu post certo rescivi, Eminentiam vestram eam esse, cui me tam nigris coloribus nigrior ille Anonymus pingere non est veritus: quod mihi molestum in primis fuit. Nam etsi nulla unquam mei erga te, Eminentissime Princeps, obsequii professione patrocinium gratiamque tuam paraverim, ab amplissimo tamen amico quo-

„ dam

dam viro monitus fueram, honestum aliquem locum in mentis tuae
sacrario meo quoque nomini antea datum fuisse. Si bonam hanc
de me opinionem, & falsis quidem accusationibus, ab Eminentia
vestra averteret Anonymus, sortem meam profecto dolerem. Sed
quae est Sapiencia vestra, aut nullam Declamator ille fidem in tri-
bunali vestro impetrarit, aut saltem quando unam ei aurem con-
cesserit Eminentia vestra, nullus dubito, quin alteram mihi quo-
que reservaverit. Sit igitur mihi venia a benignitate vestra, ut ea
fidenter exeram, quae tutela non minus Veritatis, quam Honoris
mei in contentione ista exposcit. Quot gravibus contumeliis tum
Anonymus ille, tum nonnulli ejus commilitones debacchati in me
fuerint, perquam notum est: quae an viros deceant Religiosos, vi-
ros Theologos, atque depraedicantes e sacro suggestu Virtutes Chri-
stiano homine dignas, ipsi viderint. Porro quod iidem Censores
me ineruditum, indoctum appellent, & nihili me faciant, id me
neutiquam angit, utpote qui reor, mecum eos liberaliter agere,
qui me infimis, si tantum impetrare possum, Literarum cultoribus
accenseant, & vires nisi modicas ingenio meo tribuere nunquam
consuevi. Me quoque, prout vult, posterior Declamator num. 68.
Senem capularem, jamque in *Demensiam ac Deliria* prolapsum di-
xit. An gravis hujusmodi contumelia, in Evangelio ipso damna-
ta, excusari possit, judicabunt ii, qui Librum ipsum *de Superstitione*
vitanda sine affectu partium legerint. Fortassis etiam defuturi
non sunt, qui contumelioso huic homini in mentem revocent au-
tiquum adagium: *Bos lassus forsitus pede figit bimum*. Haec, in-
quam, me neutiquam perturbant; neque enim heic situm Hono-
rem meum ducō, sed quidem in Honestate actionum, & in offi-
ciis Sanctissimae Religionis, quam profitemur. Ubi me in his de-
ficientem arguere iuste possint adversarii mei, tunc non eos tan-
tum, sed & me ipsum mihi succensere aequum erit. Verum eos
injuria agere, brevi, ut spero, Eminentia vestra, intelliget. Atque
utinam pacato animo refellere haec possim, ita ut de me quoque
dicere liceat, quae Sanctus Augustinus ad Petilianum scribebat Lib.
III. Cap. 1. *Si ego tibi vellem pro maledictis maledicta repende-
re, quid aliud quam duo maledici essemus, ut ii, qui nos legerent,
alii detestatos abjicerent sana gravitate, alii suaviter haurirent mali-
vola voluntate?*

„ Duo igitur consideranda heic sunt; alterum est controversiae
nostrae status; alterum accusationes in me ab adversariis instructae

„ ob

„ ob ejusmodi controversiam. Ad primum quod attinet, en quid ego
 „ sentiam. Pia est, & Probabilis Sententia asserens *Praeservationem*
 „ Deiparae ab originali macula in sua Conceptione. Probabilior etiam
 „ videtur, quam contraria. Eidem Catholicorum plerique favent, &
 „ praecipue Romani Pontifices, ac proinde laudandi, qui Devotionem
 „ erga Virginem Immaculate Conceptam laudant & promovent, Cul-
 „ tumque illius, & Festum sub ea significatione celebrant. Hanc i-
 „ psam Devotionem ego quoque commendo, ac semper Populo com-
 „ mendavi, & suasi, nullique unquam ob eam molestus fui, neque
 „ ero, dum inde excessus absint. Verum Sententia haec inter Proba-
 „ bilitatis fines adhuc constricta est, & nondum ad Certitudinem e-
 „ vecta, qualia sunt innumera in Religionis & Pietatis Regno. Mi-
 „ hi id affirmanti, aliisque secus clamantibus, non est credendum.
 „ Magistrum nostram consulamus Romanam Ecclesiam, cujus voce
 „ & exemplo tum nostra Fides, tum nostra Devotio regenda est, ne
 „ in errores prolabamur, & a qua discedere, aut impietas, aut res
 „ plena periculi est. Pontifices iidem, qui Piae Sententiae multum
 „ favoris sunt impertiti, & quotidie impertiuntur, ipsi palam profi-
 „ tentur, etiam tenebris circumseptam Veritatem intimam Immacu-
 „ latae Conceptionis. Nimirum Probabilitatem duntaxat, idest Appa-
 „ rentiam Veritatis, in ea agnoscunt, dum Quaestionem inter Scoti-
 „ stas & Thomistas a tot Saeculis agitatam, indecisam adhuc reliq-
 „ uunt, ac Thomistas suae Opinioni adhaerere pacifice sinunt, quam-
 „ vis laudabili Disciplinae Ecclesiasticae consilio ad scandala & jurgia
 „ vitanda eorum vocem & calamos ad silentium adegerint. Quum
 „ hoc ipsum silentium Thomistis Romani Pontifices indixere, prote-
 „ stati sunt, se eorum Opinioni nullum *Praejudicium* inferre velle,
 „ ut legitur in Bulla Gregorii XV. quam *innovavit* Alexander VII.
 „ postremus scilicet eorum Pontificum, qui fraenos Thomistas impos-
 „ suit, sed simul testatus, *ab Apostolica Sede nondum decisam fuisse*
 „ *Quaestionem, prout ne ipse quidem decidere voluit.*

„ Ego heic iudicium Eminentiae vestrae appello, ut audiat at-
 „ que perpendat, quid Anonymus nuper memoratus scripserit pag. 4.
 „ Epistolae suae. *La vera Teologia insegna, che chi ammette nella*
 „ *Vergine il reato originale, SI OPPONE alla mente del Sagro Con-*
 „ *cilio di Trento.* Immo, ajo ego, Falsa tantum Theologia docere
 „ hoc potest, uti mox ostendam. Pergit ille, asserens Concilii verba
 „ Sess. V. ubi de Peccato originali actum est: *Declaras tamen haec.*
 „ *ipsa Sancta Synodus, non esse suae intensionis comprehendere in hoc*

„ De-

„ Decreto, ubi de Peccato originali agitur, Beata & Immaculatam
 „ Virginem Mariam Dei Genitricem. E qui rinova il Santo Concilio
 „ le Costituzioni e le pene Ecclesiastiche di Sisto IV. contro gli Oppo-
 „ sitori dell'Immacolata Concezione &c. Che più vi vuole per opporsi
 „ alla mente, all'intenzione del Concilio? Ita ille, ingenti contentu
 „ Eminentiae vestrae, quem inscium Veritatis, & facile fallendum
 „ supponit, & cum gravissima deceptione Populi Christiani, quem ad
 „ hasce ambages extricandas ineptum nemo nescit. Quidnam ignara
 „ gens de me non dixerit, quasi in Deipara originale reatum ad-
 „ miserim, quod nunquam feci; & quod pejus est, contrariam Tri-
 „ dentini Concilii Decreto doctrinam tradiderim? Piget dicere: gran-
 „ dis flagitii rationem Deo, & Christianae Reipublicae redditurus
 „ est, qui talia publicis etiam typis tradere; & quidem Italico ser-
 „ mone, nihil veritus Suspensionis poenam a Pio V. P. M. ipso facto
 „ sibi inflictam, atque in ipsa media Urbe aeterna, disseminare non
 „ erubescit. Post adducta verba leguntur haec alia in Tridentino
 „ Concilio. Sed observandas Constitutiones felicitis recordationis Sinti
 „ Papae Quarti sub poenis in eis Constitutionibus contentis, quas in-
 „ novat. Probe novit Eminentia vestra quid Sixtus decreverit. Is vi-
 „ delicet Anathemate perculit statim incurrendo, qui affirmare prae-
 „ sumeret, Piae Sententiae assertores alicujus Haeresis labe pollutos fore,
 „ vel mortaliter peccare. Tum simili poenae ac Censurae subiecit eos,
 „ qui ausi fuerint contrariam Opinionem tenentes (scilicet Thomistas)
 „ Haeresis crimen, vel peccatum incurrere mortale, cum Nondum sit a
 „ Romana Ecclesia & Apostolica Sede decissum. Ergo Sixti Constitu-
 „ tionem innovante Concilio Tridentino, nunquam ejus mens fuit
 „ Immunitatem Virginis statuere, aut Opinioni de Sanctificatione prae-
 „ judicium inferre: Subsequeuti Pontifices, in rei substantia nihil a Prae-
 „ decessoribus discordes, idem Sixti Decretum confirmarunt. Confir-
 „ mavit etiam postremus inter eos Alexander VII. Rursus Theologia
 „ vera (diversa sane a Theologia istius Anonymi) docet, Pon-
 „ tifices, & Patres Concilii Tridentini, integrum Fidelibus reliquisse,
 „ ut quam velint parsem (de Conceptione Virginis) sequantur, uti
 „ inquit Vasquez Tom. II. in 3. P. qu. 27. Art. 2. Disp. 117. Cap.
 „ 14. quo cum concors pergit Suarez Tom. II. in 3. P. quae. 27.
 „ Art. 2. Disp. 3. Sect. 6. Gregorius de Valentia Tom. IV. Disp. 2.
 „ qu. 1. pun. 2. ut alios Theologos omittam. His positus, decernat
 „ tandem Eminentia vestra, quam notam incurrerit, qui tam enor-
 „ mi Sententia illudere se posse arbitratus est tum ipsi Eminentiae

„ vestrae, cujus eruditio perspecta est, tum incautis Ecclesiae Catholi-
 „ cae Fidelibus. Quum vero *Haeresis* crimen a se amoliri non pos-
 „ sit, qui Decretis & menti Concilii Tridentini in re Dogmatica au-
 „ deat adversari; & quum in ipsos quoque Thomistas contrariae O-
 „ pinioni adhaerentes venenatum Anonymi telum cadat: decernat e-
 „ tiam Eminentia vestra, annon is demum insultaverit Pio V. alii-
 „ sque Romanis Pontificibus, ipsique Concilio vetantibus, ne *Haere-*
 „ *sis*, immo ne *Erroris* quidem insimulentur sectatores Thomisticae
 „ Sententiae.

„ Neque ex Conceptionis Festo ulla Certitudo in Piam Senten-
 „ tiam redundat. Telum hoc veluti ineluctabile exeruerat doctissi-
 „ mus Pater de Luca, suisque commilitonibus suasit, in eo potius
 „ victoriae spem esse repositam. Eodem in vestibulo suae Epistolae
 „ utitur Anonymus Declamator, & Rhetoricis Figuris in me invehi-
 „ tur, *Certam Certissimam* avalisse ex eo Festo Sententiam contem-
 „ dens, quia Festi hujus Objectum est primum instans *Praeservatio-*
 „ *nis* Marianae, & sub ea significatione Festum ab universa Ecclesia
 „ est celebrandum. Neque perspiciunt tam docti viri, se non dicam
 „ Picininorum, aliorumque Haeticorum, sed Fidelium ipsorum ri-
 „ sui exponere ejusmodi commentis Apostolicam Sedem? Si *Certam*,
 „ ac *Certissimam* per Festi hujus institutionem Romani Pontifices de-
 „ crevere Piam Sententiam, & *Errare nequis Ecclesia*, uti Pater de
 „ Luca, & Anonymus Declamator num. 22. docuerunt, in *praescri-*
 „ *bendo publico cultu Sanctorum*: quid est quod iidem semper prote-
 „ stati sunt, se nolle dirimere controversiam, liberumque unicuique
 „ dimittunt contrariae etiam adhaerere Opinioni? Nonne hoc foret
 „ una manu destruere, quod altera aedificasset? Aut ergo Impruden-
 „ tia, si Superis placet, damnandi sunt summi Pontifices, aut in nu-
 „ bibus fabricata est Theologorum istorum argumentatio. Neque e-
 „ nim prodest dicere, non *Certam* de Fide: sed *Certitudine* absoluta
 „ donatam jam fuisse Scotisticam Sententiam. Si enim tantam in ea
 „ *Certitudinem* deprehendissent Pontifices Maximi, aut modicae De-
 „ votionis ac Pietatis erga Deiparam, aut alicujus alius parum lau-
 „ dabilis affectus incusandi jam forent, quod licet tot precibus piissi-
 „ morum Regum pulsati ac fatigati, a contraria tamen Opinione dam-
 „ nanda, & Pia inter articulos Fidei referenda abstinerint. Posita
 „ *Certitudine* alicujus Sententiae, quae definiri de Fide possit (cujus-
 „ modi est utraque de Conceptione Opinio) ministerio suo defuissent
 „ Concilia & Pontifices, si ejus Veritatem statuere post tot Saecula

Tom. V.

H h h

„ no-

„ noluissent. Sed aequivocationes hinc removeamus. Volens Pius ad
 „ universam Ecclesiam extendere Missam & Officium a se constituta,
 „ ita eadem composuit, qualia nunc habemus, ut qui alteram Opini-
 „ onem amplectuntur, Festum celebrarent sine ejusdem suae Opini-
 „ onis detrimento. Qua ratione cum illi sub significatione *Praeser-*
 „ *vationis*, tum isti *Sanctificationis*, cultum Sanctissimae Virgini prae-
 „ starent, uti adhuc praestant; propterea Gregorius XV. *praecepit*, ut
 „ in sacrosancto Missae Sacrificio, ac divino Officio celebrandis, tam
 „ publice quam private, non alio quam Conceptionis nomine uti de-
 „ beant. Quibus verbis mirum est, quei nunc nonnulli sibi persua-
 „ deant, Immaculatam tantummodo Conceptionem per illud Festum
 „ designari, quum contra manifestum sit, cautum hac via fuisse, ut
 „ utrique factioni Festum Conceptionis aptaretur, & unusquisque se-
 „ cundum suam Opinionem illud celebraret. Nihil heic immutavit
 „ Alexander VII. idque nemo non agnoscat, illius Constitutionem
 „ attente legens. Laudat ille tantummodo Pie credentes, Virginem
 „ sine labe fuisse Conceptam; laudat colentes eandem secundum hanc
 „ Piam Sententiam, eorumque Cultum nunquam immutatum a ne-
 „ mine impugnandum decernit. Sed falsum est, unicum Festi Obje-
 „ ctum declarari ab eo *Immunitatem* Deiparae. Falsum, juberi uni-
 „ versam Ecclesiam sub ea significatione celebrare Festum Conceptioni-
 „ nis. De hoc nihil inde exculpas. Qui secus sentiat, Romanum iste
 „ quoque Pontificem incaute cachinnis inimicorum exponit, quasi is
 „ ex una parte liberum sinat Thomistis in sua haerere Sententia, &
 „ ex altera eos in celebrando Festo cogat contrariam corde profite-
 „ ri. Quamobrem Eminentia vestra jam videat, Anonymum; eju-
 „ sque conjuratos, falsis suppositis usos, Certitudinem nunquam a sum-
 „ mis Pontificibus in Festo illo probando somniatam, voluisse nobis
 „ obtrudere. Superfluum porro est alia addere ad ostendendum, tot
 „ alia Festa in Ecclesia Dei celebrari, quorum non est Certum obje-
 „ ctum; sed quia ex Probabilibus rationibus Apparentia Veritatis in
 „ eorum objecto elucet, satis est id Prudentiae Pontificum & Eccle-
 „ siae, ut ea non solum permittant, sed etiam laudent, & favore
 „ prosequantur. Denique insignes Theologi Bellarminus, Suarius, Va-
 „ squius, Valentia, & Raynaudus jamdiu tradiderant, nihil ad sta-
 „ tuendam Certitudinem Piae Sententiae conferre Festum Conceptioni-
 „ nis; & nihil, ut dixi, immutatum in eo postea fuit sub Alexan-
 „ dro VII. Sed quid pluribus moror Eminentiam vestram, quando
 „ ipsi Piae Sententiae Patroni ante paucos annos supplici Libello a
 „ Cle-

„ Clemente XII. P. M. petierunt, ut declararet Myſterium Immacu-
 „ latae Conceptionis vel *ut res de Fide*, vel *ut Certa infra Fidem*,
 „ *ſed cum Certitudine Aliqua infallibilis Veritatis*. Ergo ipſi conſeſſi
 „ ſunt, nondum ab Apoſtolica Sede Certitudinem agnoſci in Pia
 „ Sententia.

„ Ingentem Anonymus Declamator deinde congeriem Pontificia-
 „ rum Conſtitutionum exerit a num. 23. uſque ad 49. in quibus
 „ ſummi Pontifices laudarunt Piam Sententiam, Confraternitates, Or-
 „ dines militares, Eccleſias, Monaſteria &c. ſecundum eandem inſti-
 „ tuta Indulgentiis, aliſque favoribus ſunt proſequuti. Sed in quem
 „ finem iſta? Si ut palam fiat, Romanam Eccleſiam favere Piae Sen-
 „ tentiae, & Cultui ſecundum eam Deiparae exhibitio: jam concor-
 „ des pergitur. Idem profeſſus fuerat Alexander VII. Sin Declama-
 „ tor putavit, emergere ex eis poſſe Certitudinem ejuſdem Senten-
 „ tia, male rationes iniit. Lauretano Templo, quod ibi conceptus
 „ credatur Chriſtus; Compoſtellano, quod ibi quieſcere ſeratur Jaco-
 „ bi majoris Apoſtoli Corpus, aliſque innumeris locis, Reliquiis,
 „ Ordinibus Religioſis ſub aliqua particulari Devotione erga Virgi-
 „ nem Sanctiſſimam inſtitutis, plurimos favores, Indulgentias, Privi-
 „ legia Romani Pontifices contulerunt. Certum tamen nunquam eva-
 „ ſit eorum Objeſtum, ſed inter Probabilitatis, & laudabilis Opinio-
 „ nis fines adhuc detinetur. Quamquam quid ajo? Poſtquam diſertifi-
 „ ſimis verbis tot ſummi Pontifices edixere, indeciſam ſe relinquere
 „ ſortem utriuſque Sententiae, ſive Opinionis, atque in eo ſtatu eas
 „ adhuc verſari, in quo Sixti IV. aevo jacuere; & neminem pecca-
 „ re, qui Thomiſticam foveat: nihil aliud agit, niſi contra mentem
 „ Romanae Eccleſiae certare, ejuſque auctoritatem deſpectam habe-
 „ re, quicumque *Certitudinem* in Piam Sententiam, invita & relu-
 „ ſtante eadem Eccleſia, invehere nititur. Neque haec expeſtanda
 „ ex Academia plerique, eandem Sententiam profitentibus; neque
 „ enim illae niſi Piam & Probabilem ipſam depraedican, paratae
 „ ſemper ſequi Apoſtolicae Sedis Decreta; atque ideo ad illam unam
 „ tuendam ſeſe adſtringunt, ut diſſidia & ſcandala vitentur, libertate
 „ cuique reſiſta ſentiendi in corde ſuo, quod veritatis magis conſo-
 „ num credunt. Certe nulla ferme ex iis Votum Sanguinarium con-
 „ cipit, de quo nunc controverſia fervet; neque inter nos diſputatur,
 „ an Prudenter Academiae adhaereant Piae Sententiae; id enim Pru-
 „ dentiffime ab iis factum lubens, & ego agnovi, ruſuſque agnoſco.
 „ Quod ſi Anonymus pertrahit huc Facultatem Sorbonae, quae An-

no 1736. Votum sive Decretum de Immaculata Virginis Conceptione renovavit: quaerendum est, an Theologos deceat, atque hunc praefertim, qui ad Eminentissimum S. R. E. Cardinalem scribit, exaltare Schismatici Concilii, & Parisiensis Facultatis hac de re Decreta, quamquam manifestum sit, illa Tridentino Concilio ab omnibus recepto, ista vero tum ejusdem Concilii Decreto, tum Constitutionibus Sixti IV. & subsequentium Pontificum apertissime adversari. Notum est, vel ipsum Joannem Launojum, quamvis ejusdem Facultatis membrum, circiter Annum 1677. in illa Basileensium & Parisiensium de Conceptione Decreta palam dimicasse, ostendendo, eadem contraria Scripturis divinis, Traditioni Patrum, Ecclesiae Romanae documentis, ipsiusque Tridentinae Synodi Decreto; atque insuper Parisiensem Academiam recessisse a sententia Praedecessorum suorum, quorum amplum Catalogum texit; illi quippe *Praeservationem* Virginis excluderunt, *Sanctificationem* vero tantummodo sunt amplexi. Exploratum pariter habemus, postremis hisce temporibus Parisienses (multis tamen reclamantibus) neglectum illud Decretum restaurasse, atque honorem Schismaticis Basileensibus conciliandum curasse, ut ejus ope deinde uterentur ad imminuendas atque infringendas Apostolicae Sedis praerogativas. Nihilo tamen secius Theologos videmus, atque in ipsa Urbe Roma, ad tuendas imaginationes suas ea inculcare, quasi nemo, & neque Eminentia vestra, animadvertere possit, in quantum dedecus Ecclesiae Romanae eadem vergant, Praeterea ingeniosus Declamator num. 18. *Sanctum Bernardum*, si nunc in vivis ageret, recessurum ab Opinione contraria Immaculae Conceptioni contendit. Quid facturus foret Sanctus ille Abbas, neque ego, neque Anonymus novimus. Illud quidem certum mihi videtur, institutionem Festi de Conceptione, qualis revera est, uti vidimus, & non qualis falso supponitur ab eodem Anonymo, non coacturam Bernardum renuntiare praconceptae Opinioni, quandoquidem ne ullus quidem nunc ejusdem Festi causa adhaerere cogitur Piae Sententiae. Sanctum quoque *Thomam Aquinatem* a contraria Opinione abfuisse, quibusdam memoratis Codicibus, se posse suadere ille arbitratur. Quasi Scotisticae Sententiae quidam additi in describendis ante Typographiam ejus Libris non potuerint, quae ipse nunquam excogitavit supplere. Sed alii Codices ejus doctrinae testes supersunt; cum illius principis Scotistica pugnat; & in Parisiensibus Scholis illius aevo Communis erat contraria Piae Sententiae

„ tiae Opinio. Proinde ejus vestigiis insistentes discipuli ejus Fratres
 „ Praedicatores eandem tueri perrexerunt, ipsamque adhuc in corde
 „ suo profitentur. Multos quidem ex eo Ordine commemorat Anonymus a num. 50. usque ad 62. Piam Sententiam amplexos: immo, si ei credimus, uno de più impegnati a favore della Concezione Immacolata è stato il dottissimo, e del pari Santissimo Ordine Domenicano fin dalla sua prima Concezione. Voglio dire fin dal gran Patriarca S. Domenico &c. Sed quam lepida sit, quantumque a veritate absit assertio haec, non est meum, neque hujus loci ostendere. Interrogentur ipsi Fratres Praedicatores, qui etiam narra- bunt, quot turbis ob hanc causam obnoxii in Hispania fuerint, & quot Cathedris identidem spoliati; a multo enim tempore violentia & humanae artes in hujusmodi controversiam pedem intulere. Quot autem ex ipsis Academiis, aliisque Ordinibus Religiosis, doctisque aliis viris, Thomisticam etiam nunc foveant de Sanctificatione Sententiam, quis dicere possit? Audimus enim Scotisticam asserentes, negantes audire non possumus.

„ Quum igitur nondum Pia Sententia ad ullum Certitudinis gradum assurrexerit, praeunte heic nobis Romana Ecclesia Magistra nostra: quid tamen factum fuerit, animadvertendum nunc restat. Postquam in Hispania emerfere nonnulla Chronica spuria, ac Laminae Granatenses sub finem Saeculi XVI. & principium sequentis, Novitas non una invehi coepta est in laudabilem, ac certe Piam atque Probabilem Scotistarum Sententiam de Immunitate Deiparae a labe Originali. Antea apud Theologos ipsius Praeservationis patronos Communis Sententia fuerat, immunem quidem fuisse Deiparam ab ea labe, non vero a Debito illius contrahendae; neque enim alia commodior via occurrebat ad explicandos Sanctos Patres, Peccatum originale excludentes a Solo Christo Domino. Invalescere nihilominus coeperunt, qui Debitum hoc in Virgine inficiabantur. Crescente deinde licentia, quod hincere contra nemo auderet, quamquam ad veteres rationes nihil novi accessisset, inventi sunt, qui traderent, Piam Sententiam Certitudinis fastigium attingisse, atque ejus Certitudinis, ut pro ea tuenda Sanguinem & vitam dare non solum liceret, sed & meritorium foret; atque inde natum Votum Sanguinarium. Nec desuere, qui lauream quoque Martyrii hinc occumbentibus pollicerentur. Ad Postremum denique confidentiae sive licentiae gradum nonnulli postea processere, scilicet Cusentini, qui magnificum & heroicum facinus supra cete-

„ ros meditati, suae vitae periculo sese obligarunt ad tuendam Im-
 „ munitatem Virginis vel ab ipso *Debito* culpae originalis. Tria igitur
 „ habemus Novitatis capita postremis hisce temporibus in Eccle-
 „ siam Dei confidentissime investa, & quidem de gravissimis rebus.
 „ Ex prima vero Opinione perniciēs imminere potest Doctrinae Fi-
 „ dei, quando, ut postea dicam, sacra Patrum Traditio in discrimen
 „ per eam adduceretur. In geminis subsequentibus Opinionibus non
 „ solum puritati Doctrinae Catholicae detrimentum adferri potest,
 „ sed etiam agitur de Temere prodigenda mortalium Vita: quod in
 „ humanis rebus quanti momenti ac ponderis sit, nemo non novit.
 „ Perspectum Eminentiae vestrae est, quam periculosa non raro sit
 „ Novitas Opinionum in Fidei ac Morum doctrina, & Vincentium
 „ Lirinensem Cap. 21. Commonitorii execratum tandiu fuisse eorum
 „ *Vesaniam, Impietatem, ac errandi Libidinem*, qui non contenti *tra-*
 „ *dita semel & accepta antiquitus credendi regula, Nova ac Nova in*
 „ *diem quaerunt, semperque gestiunt Aliquid Religioni addere, mutare,*
 „ *detrabere.* Inter hosce adnumerandos esse, qui tria illa Novitatis ca-
 „ pita in Ecclesiam intulere, res ipsa clamat. Quod plus dolendum est,
 „ perniciosam doctrinam novae eadem Opinionis complexi mihi vi-
 „ dentur: idque me satis ostendisse in Opusculo de *Superstitione vi-*
 „ *tanda* mihi persuadeo. Ad Sanguinarium quorundam Siculorum Vo-
 „ tum quod attinet, jam pro ejus tutela non unus prodiit Libellus,
 „ ac praecipue illud honestandum altero Libro suscepit doctus piusque
 „ vir P. Candidus Parthenotimus, non insolenti Declamatione (hanc
 „ enim gloriam Saguas tantummodo, & Anonymus nuper memora-
 „ tus sibi quaerunt) sed moderato stylo usus, qualis Theologum de-
 „ cebat. Verum haec ipsa disceptatio, ut arbitror, majori in luce
 „ collocavit ejusdem Voti deformitatem, postquam nihil aliud, prae-
 „ ter quam aequivocationes & exempla dissona, adlatum fuit, ut ar-
 „ gumentis contra militantibus sua vis eriperetur. Liceat mihi, Emi-
 „ nentissime Princeps, haec paucis persequi.

„ Quandoquidem animadvertit adversantium acies, Sanguinario
 „ Voto praesidium non posse parari ex imaginaria *Certitudine* Piae
 „ Sententiae, sincereque confessi sunt, nefas esse pro Opinionibus
 „ quantumvis Piiis tutandis animam suam ponere: alium ex arma-
 „ mentario Granadi clypeum sunt mutuati. Secundum eos non more-
 „ rentur Voventes pro Objecto, sive pro *actu Opinativo*, quod idem
 „ est ac dicere pro Opinione de Immunitate Virginis, sed quidem
 „ pro *Pietate*, quae certo habetur in illius Opinionis tutela.

„ est

est amplecti, Pium tueri Immaculatam Deiparae Conceptionem. Pietas Virtus est Voluntatis; mortem vero oppetere pro Pietate, sive pro actu Pietatis, sive pro Virtute, ex omnium Theologorum sententia non solum licet, sed gloriosum est. Votum autem de tuenda voce & calamo Piam Sententiam cum *vera Pietate* consentire egomet confessus fueram: ergo idem dicendum de Voto eandem Sanguine quoque tueri volentium. Sed mira in his aequivocatio est, quia falsum omnino est, Vitam voveri pro *Pietate*, quum res ipsa clamet, Votum concipi pro tuenda *Veritate*, quam voventes in ipsa Sententia inesse sibi perperam persuadent. Ad haec exploratum habemus. *Pietatem* ipsam, more ceterarum Virtutum, in Excessum & Vitium ex defectu, aut contemptu Prudentiae declinare posse; quo casu Virtus desinit esse Virtus. Nam, uti aiebat Gregorius Magnus Moral. Lib. 2. Cap. 46. *Nisi Virtutes sapientiae epulis repletæ, ea quæ appetunt, Prudenter agunt, Virtutes esse nequaquam possunt.* Nullo autem negotio apparebit, Excessum hunc deprehendi in Sanguinario Voto. Donec pius Fidelis Deiparam colit & invocat uti in Conceptione Immaculatam, & Pia Sententiae adhaeret, eamque rationibus exornat & protegit: Prudentiae nihil in ejus credulitate, & opere desideratur; quia Probabilia suppetunt motiva ita agendi; eique praesto est vox & exemplum Romanae Ecclesiae hujusmodi Pietatem probantis & commendantis, dum pender illius judicium de Veritate Sententiae. Ast ubi Pietas ista eo progreditur, ut Vitam quoque vovere velit pro ejusdem Sententiae defensione, in Excessum enormem & Vitium ipsa probabitur ex Prudentiae defectu, & ex Temeritate aperta. Est enim Imprudens ac Temeraria illa Pietas, quae Certissimum Dei ac Naturae Praeceptum de conservanda Vita violare vult, ut rem Incertam tueatur. Rursus Imprudenter ac Temere agit ista Pietas, quum Sanguinis profusio numquam facere possit, ut Certum fiat quod Incertum est. Quisnam quaeso Imprudentiam non agnoscat in homine, Certissimum ac pretiosum Vitae Bonum perdente, quando nunquam is consequi possit iactura Vitae suae id quod consequendum sibi proponit? Ergo non amplius in isto casu verum est, Pium esse tueri Honorem Virginis. Pium desinit esse, quotiescumque modum tutelae adhibet a Deo, a Natura, ab Ecclesia vetitum. Et quando etiam daremus, tunc Voventem pro Pietate mori, is certe morietur pro Imprudenti & vitiosa Pietate: quod minime ferendum est. Sed quicumque Sanguinarium Votum intime perpendit,

„ uti

„ uti aiebam, probe intelligit, Voventes ad vitam dandam paratos,
 „ ut *Veritatem*, quam Certo inesse in Pia Sententia imaginantur,
 „ Sanguine suo testentur; ac propterea Parthenotimus *necessariam* ait
 „ in Voventibus *Persuasionem* de Certitudine Sententiae. Hoc etiam
 „ ex eorum Votis manifeste colligitur. Quum vero, uti jam dixi-
 „ mus, Certitudo haec absit, & Honor virginis in casu nostro *Opi-*
 „ „ *nativus* tantummodo sit, pro quo ipsi certare Sanguine suo profi-
 „ tentur: eo semper res recedit, illos occumbere velle pro *Opinione*:
 „ quod vel ipse Parthenotimus non licere confessus est. Neque ullum
 „ hastenus exemplum prodiit, cujus ope & paritate honestari Sanguini-
 „ narium Votum queat. Ut enim vita Prudenter, & non sine meri-
 „ to apud Deum detur, necesse est, ut praecedat Praeceptum aut
 „ Consilium a doctrina Fidei propositum, aut gravissimum Ecclesiae
 „ mandatum, quo innixus Fidelis mortem sustineat: cujusmodi sunt
 „ exempla Sanctorum Joannis Baptistae, Thomae Cantuariensis, Joan-
 „ nis Nepomuceni, aut eorum qui mortem pati mallent, quam sa-
 „ crum Votum Virginitatis violare. Quod vero pertinet ad casum
 „ nostrum, divino quidem Praecepto jubemur Honorem verum Dei-
 „ parae, inter Dogmata Fidei recensitum tueri; ac pro ejus tutela,
 „ si occasio se offerat, fortiter dandus est Sanguis. At nullum aut
 „ Dei aut Ecclesiae Praeceptum est de tuendo Honore Opinativo, si-
 „ ve Incerto ejusdem Dei Genitricis. Et quando etiam velis, exi-
 „ stere de hoc Consilium Ecclesiae: laudandum sane erit tueri voce
 „ & calamo Immaculatam ejus Conceptionem, non autem pro ea
 „ impendere vitam. Non enim Consilia Ecclesiae solum, sed & ipsa
 „ ejus Praecepta plerumque cessant, quotiescumque agitur de pericu-
 „ lo vitae, immo & de incommodo gravi salutis, uti videmus in
 „ Praeceptis de jejunando, abstinendo a carnibus, audiendo sacrum.
 „ Excluso contentu Religionis & scandalo, Imprudens & stultus fo-
 „ ret, qui periculum vitae pertinaciter incurrere vellet, ne hisce Prae-
 „ ceptis deesset. Quanto ergo gravior Imprudentia illorum erit, qui
 „ Consilium Ecclesiae, respiciens patrociniū Piae Sententiae, tan-
 „ tummodo peragendum corde & rationibus, praeponeret divino Prae-
 „ cepto de nostrae Vitae custodia? Innumera sunt in Religione, quae
 „ Pie credimus, Pie colimus, laudandaque in his est Pietas nostra;
 „ neque enim ullum, etiamsi in Objecto falleremur, incommodum
 „ in Religionem, nullum in Reipublicam effluere potest. Quis ve-
 „ ro docere audeat, etiam Prudenter pro incertis iis Objectis subiri
 „ mortem posse?

„ Pro

„ Pro Voto Sanguinario se nequaquam in aciem venisse nos
 „ monet Anonymus Declamator. Attamen temperare sibi non potuit
 „ num. 9. quominus sibi persuaderet, unico brachii sui ictu exterminari
 „ posse quaecumque adversus ejusmodi Votum ego disserueram:
 „ *Non cessa*, inquit ille, *per tutto ciò di minacciar ferro e fuoco il*
 „ *glorioso Lampridio contro Coloro, che stendono fin'allo spargimento,*
 „ *ove bisogni, del Sangue il Voto di difendere l'Immacolata Concezio-*
 „ *ne. Non riflette il poverino, che qui trattasi di difendere l'Onore*
 „ *della Madre di Dio, e nostra comune Padrona e Madre? Domando:*
 „ *avrebbe egli difficoltà di difendere bisognando usque ad Sanguinem*
 „ *l'Onor di sua Madre, qualora d'adulterio stata fosse tentata, o in-*
 „ *famata? Io voglio e debbo credere onestissima la Signora Madre Lam-*
 „ *pridia: tuttavia, a dirla come sta, l'onestà di essa non ha poi nè*
 „ *tanta certezza, nè tanti Voti a suo favore, quanto l'Onore della*
 „ *Madre di Dio &c. Non sembri intanto a noi così strano e barbari-*
 „ *co per l'Onore della Madre di Dio quel Voto, quel medesimo Sacri-*
 „ *ficio cruento della Madre di Dio, che l'onorato Lampridio accorderebbe*
 „ *all'Onore della sua illibata Signora Madre. Certum est mihi,*
 „ *fieri non potuisse, quin Eminentia vestra haec legens in iracundiam*
 „ *eruperit adversus hominem, qui contemnens Apostoli praeceptum scri-*
 „ *bentis Ephes. V. 4. Nec nominetur in vobis stultiloquium, aut scur-*
 „ *rilitas, quae ad rem non pertinet, in opprobrium sanctissimae Reli-*
 „ *gionis, & Instituti sui tam pii ac celebris, scurriliter pertractat gra-*
 „ *vissima Theologiae & Religionis negotia; ac tam improvide com-*
 „ *parationem nobis obtrudit inter privatam Mulierculam, & augu-*
 „ *stissimam Angelorum Reginam, ut re diligenter inspecta (pudeat*
 „ *ipsum) melior in hac parte dici possat abjectae hujus mulieris con-*
 „ *ditio, quam Sanctissimae Dei Genitricis. Temere suspicari de foe-*
 „ *mina quacumque honesta, Peccatum est. Fatetur ipse scribens: Io*
 „ *voglio e debbo credere onestissima la Signora &c. At quandonam*
 „ *Fideles peccant, non solum suspicando, sed etiam credendo, im-*
 „ *munem non fuisse. Beatam Mariam ab originali macula? Anathe-*
 „ *ma jam indictum fuit audentibus insimulare Peccati Thomisticae*
 „ *Opinioni additos. Insipientiam quoque Scriptoris hujus animadver-*
 „ *sat Eminentia vestra, dum ille commendat Filium pugnantem u-*
 „ *sque ad Sanguinem contra struentem calumniam suae Matris Ho-*
 „ *noris. Egregium hercle Theologum! Damnavit Innocentius Papa*
 „ *XI. Propos. 30. afferentes, fas esse viro honorato invasorem occide-*
 „ *re, qui nistur calumniam inferre. Idem dicendum de eo, qui ar-*

„ reptis armis, ut calumniam sibi aut Matri inlatam depellat, peri-
 „ culo necis vitam suam exponat. Imprudens, illegitimus est hic mo-
 „ dus ad Honorem laesae mulieris faciendum, & in detestabili Duel-
 „ lantium schola tantummodo probatus. Neque enim tollitur calum-
 „ niae vis, quod cadat Calumniator, aut Tutor. Principes sunt no-
 „ bis, sunt & Judices, ad quos in ejusmodi casibus recurrendum est,
 „ non vero ad sanguinariam pugnam. Quare videat Eminentia ve-
 „ stra, quam inani & damnabili exemplo utatur Declamator iste, ut
 „ Sanguinarium Votum de Conceptione Virginis minime improban-
 „ dum ostendat; & quam egregiis Theologis commendata fuerit il-
 „ lius Voti tutela. Quod si ille passim *Honorem* Deiparae crepat, id
 „ pro certo statuens, quod adhuc in quaestione est: repetere liceat,
 „ pro Honore Virginis Certo ex Fide, lubentissime dandam esse vi-
 „ tam; at eam dare pro Honore Opinativo, qui demum in Opinio-
 „ nem resolvitur, Imprudentiae ac Temeritatis facinus esse. Neque
 „ *Persuasioni* de Certitudine Piae Sententiae, quam Parthenotimus
 „ in praesidium suum adduxit, ea vis esse in casu nostro potest, ut
 „ Vitae sacrificium Temeritate absolvamus. Potest illa quidem in im-
 „ proviso casu, & concurrente *Ignorantia Invincibili*, honestare mor-
 „ tem hominis credentis de Fide id, quod minime ad eam spectat,
 „ immo & quod contra eam militat. Se quum superest tempus a-
 „ ptum ad consulendos Sapientes, quisquis nolit eos consulere, & per-
 „ vicaciter mortem, malorum temporalium maximum pro male con-
 „ cepta *Persuasioni* sua oppetere velit, is temere, & non sine Pecca-
 „ to, se finet occidi. Habemus Constitutiones Romanorum Pontificum
 „ de Conceptione Deiparae. Eae consulendae, eae auscultandae, non
 „ vero privatorum hominum Phantasia. Et quandoquidem ex iis re-
 „ sultat, carere adhuc Certitudine Piam Sententiam, quicumque con-
 „ traria fallaci Persuasioni, atque Ignorantia Vincibili, pro ea tuen-
 „ da iacturam suae vitae eligat, non Pietatis Prudentis laudem, sed
 „ Pietatis Temerariae ac Vitiolae crimen incurret.

„ Restant geminae aliae Novitates, quas supra memoravi, alte-
 „ ra de Immunitate Dei Genitricis a *Debito* culpae originalis, alte-
 „ ra de *Voto Sanguinario* pro istius etiam Opinionis tutela a paucis
 „ emissio. Unus Saguas, velitatione tantum facta, pro prima dimicare
 „ visus fuit; nemo tamen haec conferre signa est ausus. Illud
 „ certum est, usque ad finem Saeculi XVI. *Communem* fuisse Senten-
 „ tiam Theologorum, atque eorum praesertim, qui Praeservationem
 „ Virginis tuentur, ejusmodi *Debito* Virginem fuisse constriictam. Et
 „ quan-

„ quanquam aliquis ante id tempus aliter sensisse videri possit, aut
 „ is obiter de hac re loquutus fuit, aut revera cum reliquis sensisse
 „ deprehenditur. Neque credendum imperterrito Saguas, aliquot vo-
 „ cultiores pro ea Opinione commemoranti, qui tamen plerique ali-
 „ ter docuere, uti eorum Libri testantur. Ejusmodi vero Novatorum
 „ licentiam minime ferendam esse eo tantum titulo, quod *Communi-*
 „ *nem* Theologorum Sententiam evertere conata fuerit, facile qui-
 „ quis intelligit; non enim res ad Religionem spectantes fas est ea
 „ licentia susque deque miscere, & nova quotidie invehere, quam si-
 „ bi tribuunt Physicae, & Juri Civili operam dantes. Accedit, quod
 „ nulla divinatorum Librorum, Sanctorumve Patrum auctoritate nova
 „ haec opinio nitatur, sitaque tantum sit in piis illorum Phantasma-
 „ tis, dum in penetralia Divinitatis irrumpentes, Decreta sibi fin-
 „ gunt, eaque postea venditant tanquam suae Opinionis firma funda-
 „ menta, quae tamen nihil aliud sunt, nisi unius suae imaginatio-
 „ nis figmenta. Quod tamen gravius est, excluso a Deipara *Debito*,
 „ nulla honesta sive commoda ratio superest explicandi tot Sancto-
 „ rum Patrum loca, quae *Praeservationem* ipsam aut negasse, aut
 „ minime agnovisse videntur. At haec Fidei doctrina est, Deiparam
 „ ipsam *Redemptione* indiguisse. Si non solum *Culpa*, sed etiam *De-*
 „ *bitum* ab ea tollatur, inanes tantum ratiunculae adhiberi poterunt,
 „ ut eam *Redemptam Vere* ostendamus, & damnationem minime effu-
 „ giet, quicumque pro Apostolicae Sedis, & Sanctorum Patrum Tra-
 „ ditione, imaginationes suas Christiano Populo propinat. Jam Sua-
 „ rius, Vasquius, & alii, memorarunt praegnantia Zosimi Romani
 „ Pontificis verba, a Sancto Augustino in Epistola 190. olim 157.
 „ adducta, scilicet: *Nullus enim, nisi qui Peccati servus est, Liber*
 „ *efficitur, nec Redemptus dici potest, nisi qui VERE per Peccatum*
 „ *fueris ante CAPTIVUS, sicut scriptum est: Si vos Filius liberavero-*
 „ *ris, Vere Liberi eritis.* Subdit Augustinus: *In his verbis Apostoli-*
 „ *cae Sedis tam Antiqua, atque Fundata, Certa, & Clara est Casbo-*
 „ *lica Fides, ut Nefas sit de illa dubitare.* Porro multis aliis in lo-
 „ cis idem ab ipso Augustino confirmatur, ac potissimum in Pl. 70.
 „ Conc. 2. inquiens: *Ipsa Redemptio clamat Captivitatem nostram.*
 „ *Unde Redempti, si non antea Captivi?* Et Lib. XX. Cap. 6. de
 „ Civ. Dei: *Omnes itaque mortui sunt in Peccatis* (idest peccave-
 „ runt) *Nemine excepto, sive Originalibus, sive Actualibus, & pro-*
 „ *omnibus Christus mortuus est.* Accedat & Sanctus Leo Magnus, qui
 „ Serm. 62. de Pass. Dom. Cap. 1. haec habet: *Libertatem itaque*

„ innocentiae naturalis, quam primorum parentum praevocatione per-
 „ didimus, Nulla per se Sanctorum praecedentium merita receperunt;
 „ quia lata in transgressores sententia Omnem progeniem Captivae po-
 „ sterioris obstrinxit, & Nemo exiit exors a Damnatione, quia Nul-
 „ lus fuit Liber a Crimine. Sed Redemptio Salvatoris destruens opus
 „ Diaboli, & rumpens Vincula Peccatorum, ita magnae Pietatis suae
 „ disposuit sacramentum &c. Magnus quoque Gregorius Pontifex Ro-
 „ manus Lib. 18. Cap. 40. edit. Benedict. paria tradidit scribens: O-
 „ mnis namque qui Redimitur, ex aliqua procul dubio Captivitate Li-
 „ beratur. Unde ergo quilibet iste Redemptus est, si prius non fuit sub
 „ Culpa Captivus? Neque aliter S. Hieronymus in Cap. 1. Epist. ad
 „ Ephes. ad verba illa: In quo habemus Redemptionem per Sanguinem
 „ ipsius, Remissionem peccatorum, ait: Ille Redimitur, qui Captivus
 „ est, & in hostium veniens potestatem Libor esse desivit. Theophy-
 „ lactus in I. ad Cor. I. 30. de Christo Domino scribit: Nos liberos
 „ fecit. Hoc enim est Redemptio, nempe Revocatio a Captivitate. Ber-
 „ nardus in Tract. de Error. Abaelardi Cap. 8. vim Redemptionis ex-
 „ pendens, Ubi, inquit, Reconciliatio, ibi Remissio Peccatorum. Et
 „ quid ipsa; nisi Justificatio? sive igitur Reconciliatio, sive Remissio
 „ Peccatorum, sive Justificatio sit, sive etiam Redemptio, vel Libera-
 „ tio de vinculis Diaboli, a quo Captivi tenebamur ad ipsius volunta-
 „ tem: intercedente morte Unigeniti obtinemus, justificati gratis in san-
 „ guine ipsius, In quo, sicut ipse dicit (ad Ephes. I. 7.) habemus
 „ Redemptionem per Sanguinem ejus, & Remissionem Peccatorum se-
 „ cundum divitias gratiae ejus. Si vero Redemptionis idea actualem
 „ supponit Captivitatem & Servitutem Peccati, ipsaque Beata Virgo
 „ Redemtionem indignisse creditur: quid est quod contra luculentam
 „ Traditionem Patrum labente Saeculo XVI. erupere Theologi, qui
 „ non contenti actualem Captivitatem exclusisse a Virgine Beatissi-
 „ ma, ipsam quoque exemerunt a *Debitori Captivitate*, nullum, in
 „ ea relinquentes Redemptionis verae vestigium? Haec tam praegnan-
 „ tia Pontificum & Patrum loca sola *Debitori* confessione posse tempa-
 „ rari, ne Piae Sententiae officiant, censuerunt antea complures do-
 „ ctissimi viri. Tum quasi parum hoc esset, inventi sunt alii, Cu-
 „ sentini scilicet, qui pro hac fallaci, minimeque ferenda Opinione
 „ Sanguinem suum obligarunt, & alii, qui uti magnanimum hoc ip-
 „ sum Votum deformare venditare sunt ausi.

„ Quo ergo progressa fuerit quorundam Theologorum Novitas,
 „ ac intoleranda licentia, jam tenet Eminentia vestra, & quousque

„ etiam

„ etiam progredi possit; nisi eos Ecclesia compescat, imaginari fas
 „ est. Sunt enim, qui ex fervore sincero Devotionis erga Deiparam
 „ nova semper excogitant, neque perspiciunt, se in Excessus inter-
 „ dum rapi. Sunt & alii, qui novare non desinunt, ut se Ingenio;
 „ simulque Pietate in Virginem Sanctissimam praestare ceteris osten-
 „ dant, & veluti pro aris ac focus pro novis Opinionibus suis decer-
 „ tant; & si quando eos rationes deficiunt, praesto eis semper sunt
 „ convicia, atque ars constandi invidiam sibi adversantibus, & decla-
 „ mandi ad raucedinem, quo fiat ut imperita gens a dignoscendo
 „ Veritatis aspectu abstracta, vera incaute credat, quae tanto verbo-
 „ rum aestu ab iis propugnata animadvertit. Expendat, rogo, Emi-
 „ nentia vestra, an ullo cum pudore adversus me usurpata fuerit po-
 „ strema haec ratio pugnandi, quam non Christiana, sed Sophistica
 „ Schola docet, videlicet concitando in me invidiam & odium indo-
 „ ctæ gentis, Libellis etiam Italico sermone conscriptis: quod, uti
 „ jam animadverti, contra manifestum Pii V. praeceptum audent. Si
 „ eos audimus, ac praecipue Anonymum, contra Immaculatam Con-
 „ ceptionem a me adferantur argumenta, eaque insoluta relinquun-
 „ tur. Immo Anonymus idem num. 64. ait: *Si producono senza scior-
 „ si gli argomenti Quanti mai ve n'ebbe contrari all'Immacolata Con-
 „ cezione.* Sed Theologum istum, aumquamne mordet conscientia
 „ sua, dum haec tam aliena a veritate ad Eminentiam vestram scri-
 „ bit, immo ad universos Christi Fideles? Dixerat etiam ille nu. 5.
 „ brevi palam faciendum, Lampridium valedixisse honestati & bonæ
 „ fidei *con falsare, o mutilare le Bolle Papali, e quasi tutti i testi
 „ de' Santi Padri.* Horribilia haec sunt. Verum ubi quae is minita-
 „ tur, publicis typis intra discretum tempus non confirmantur (quod
 „ numquam fieri poterit, nisi mendacia mendaciis aggregando) nemo
 „ non intelligat, quam gravis flagitii sit reus, qui me adeo atroci
 „ calumnia onerat, & Christiano Populo tam audaci ac falsa osten-
 „ tatione grande mendacium divenditat. Praeterea me injurium piis-
 „ simae genti Hispanicae venditant, quod imposturas quasdam famo-
 „ sas, apud eos natas pro stabilienda Veritate Piae Sententiae, in
 „ scaenam pertraxerim: quasi rem vulgatissimam non adhibuerim, &
 „ usus non fuerim auctoritate insignium duorum Scriptorum, quos
 „ Hispania protulit, & maxime commendat, scilicet Nicolai Anto-
 „ nii, & Cardinalis de Aguirre. Denique me contempsisse ajunt De-
 „ creta summorum Pontificum, qui unicuique interdixere Piam Sen-
 „ tentiam directe vel indirecte impugnare, meque detrahere Honori
 „ „ San-

Sanctissimae Virginis, atque in Devotione erga illam caespitare. Habet Eminentia vestra accusationes, quibus tamen, ut ipsa probe intelligit, nihil juvatur Sanguinarii Voti temeritas, sed mea tantum persona impetitur. Ut aequas etiam aures mihi det, demisse nunc rogo.

„ In Quaestione hac tria consideranda mihi videntur, scilicet Honor Beatissimae Dei Genitricis, Dignitas Apostolicae Sedis, & Catholicae Ecclesiae firmitas. Nihil horum laedendum est, omnia amicabili nexu jungenda, ac defendenda sunt homini Catholicam Religionem profitenti. Quod est ad *Honorem Deiparae*, ineptior & iniquior accusatio adversus me institui non poterat; eamque mature praecipuavi, commendata quibus potui viribus Devotione erga illam, deprædicationis ineffabilibus ejus meritis, Anathemate etiam praenuntiato in eos, qui *Devotionem ac Pietatem veram erga Deiparam & Sanctos improbant, aut minuunt*. Haec patent ex Cap. 2. pag. 14. & 16. & Cap. 7. pag. 43. & Cap. 14. pag. 100. & 103. Quod autem verbis protestatus sum, operibus etiam semper complevi. Prostant innumerae personae, quibus palam ac privatim Devotionem hanc supra ceteras Sanctorum commendavi, & ad tantae Virginis imitationem, immo & ad ipsam Immaculatam illius Conceptionem colendam excitavi. Et quamquam ego Virtutibus unicuique concedam, in obsequio tamen erga Sanctissimam Domini nostri Parentem me infimum non tenere locum arbitror. Quod est etiam ad Honorem Opinativum ejusdem, hoc est ad Piam Sententiam, norunt omnes, saepe illam in Opusculo meo fuisse laudatam, & commendatam eorum Pietatem, qui secundum ipsam cultum Virgini exhibent, Piamque & Probabilem numquam negavi. Quid est ergo, quod Parthenotimus, ejusque gregarii objectare mihi non desinunt *Monita salvatoria B. V. Mariae ad suos cultores indiscretos*, a Sancta Sede proscripta, quorum Auctor Fideles a Devotione erga Deiparam dehortari videtur, ipsamque Devotionem, Parthenotimo monente, uti *Vanam* depingit? Ubinam talia a me quisquam accepit, quum contrarium diserte non uno in loco praedicaverim? Ast, inquiunt, Honorem *Opinativum* appellas, atque adeo Piam Sententiam minime Certam, neque e finibus Opinionis egressam contendis. Ita sane contendo, immo non aliter sentiendum reor, quando ipsi Romani Pontifices indecisam, incertamque adhuc controversiam fatentur, neque libertatem aliter sentiendi cuiquam adimunt, immo impugnantiam contrariam Thomistarum

„ Opinio-

„ Opinionem, & Erroris, & Peccati arguendam vetuerunt. Romanae
 „ Ecclesiae vox audienda, quam sequentes falli non possumus, non
 „ clamores eorum, qui sibi persuadentes, jam *Certam ac Certissimam*
 „ evasisse Piam Sententiam, uti Declamator jactitat, atque in ea si-
 „ tum esse paene dixi praecipuum Deiparae Honorem, in furias a-
 „ guntur, & spernentes, immo conculcantes patentia fumorum Pon-
 „ tificum Praecepta, *Impietatis* crimen, aut Devotionis erga Deipa-
 „ ram contemptum impingunt, si quis eandem Sententiam adhuc Cer-
 „ titudine destitutam tradit. Quid est quod ii pro Certo adsumunt,
 „ quod adhuc Incertum est, & formidinem erroris involvit? Neque
 „ animadvertunt, non in me unum, sed in quosque Thomisticae O-
 „ pinioni addictos intolerandas eorum accusationes converti? Equidem
 „ nunquam inficiatus sum, quin Sanctissima Dei Genitrix immunis
 „ ab originali labe fuisse potuerit, neque negavi, quin fuerit. Id In-
 „ certum tantummodo statui; atque hoc unum satis est, ut inique
 „ adversus me dignoscatur tentata accusatio. Verum tot alii sunt,
 „ qui contrariae Opinioni omnino adhaerent. Hos temere, & contra
 „ Apostolicae Sedis decreta, dicas derogare Honori Virginis, eisdem-
 „ que *Monita salutaria* calumniose objicias. Parum dixi. Si a Pia
 „ Sententia Honor Deiparae pendet, censuram ne ipsi quidem effu-
 „ gient Sanctissimi viri complures. Quanto amore, quanta Devotio-
 „ ne erga Dei Matrem serverent Anselmus, Bernardus, Bonaventura,
 „ Thomas Aquinas, Antoninus, aliique in Ecclesia Dei insignes
 „ Sancti, exploratum est. Ii tamen minime praeservatam credere
 „ Deiparam, ut praetermittam Sanctos Leonem Magnum, Gregorium,
 „ aliosque Romanos Pontifices, Augustinum, aliosque Patres, aut
 „ Theologos celebres, qui paria sensisse videntur, ut revera senserunt.
 „ Numquid (dicam cum Sancto Bernardo in Epistola ad Can. Lugd.)
 „ *Patribus doctiores, aut devotiores sumus? Periculose praesumimus*
 „ *quidquid ipsorum in salibus Prudentia praeteriit.* Superest ergo,
 „ ut pendente judicio Ecclesiae, Honori Virginis, ac Devotioni er-
 „ ga illam nihil detrahant amplectentes Thomisticam de *Sanctifica-*
 „ *sione* sententiam; eoque minus (ut ego feci) *Certitudinem* tan-
 „ tummodo non agnoscetes in contraria Scotistarum. Atque his po-
 „ sitis, Honorem verum ipsius Deiparae nihil laedi in impugnando
 „ Sanguinario Voto, Eminentia vestra probe intelligit, & fucum fie-
 „ ri Populo Christiano inanis hac de re adversariorum querelis at-
 „ que calumniosis declamationibus. Utrum vero sollicite curent ipsi
 „ adversarii, curem & ego, Dignitatem Apostolicae Sedis, & Eccle-
 „ siae Catholicae Honorem & firmitatem, perpendendum restat.

„ Nulla dubitatio est, quin obtemperandum nobis sit praeceptis
 „ Romanorum Pontificum, quorum Prudentia potissimum regitur Ec-
 „ clesia Dei. Prae ceteris Alexander VII. inhibuit quamcumque di-
 „ sputationem adversantem Piae Sententiae, Festo, cultui, & favori-
 „ bus in eam a Sancta Sede conlatis. Hoc autem in Opusculo meo
 „ me praestitisse confido; Probabilitatem namque ejusdem Piae Sen-
 „ tentiae, ac Pietatem tot in locis confessus, Festum, Cultumque
 „ pium secundum eam Deiparae exhibitum saepissime commendavi.
 „ Quod unice demonstrandum ego suscepi, uti aiebam, in eo situm
 „ fuit, nempe *Certitudinem* in Pia Sententia desiderari, atque hanc
 „ neque ex institutione Festi, neque ex Academiis, salisve a Parthe-
 „ notimo argumentis adhibitis posse deduci. Indicet mihi, si potis
 „ est, quisquam, ubinam Romani Pontifices praecipiant, ut *Certitu-
 „ dinem* eidem Sententiae tribuamus; aut vetent, ne Incertam dica-
 „ mus. Quid a Clemente XII. paucos ante annos petierint illius pa-
 „ troni, supra indicavi. Alexander vero Septimus *Pietatem* Fidelium
 „ ei adhaerentium, Festumque sub ea significatione celebrantium tan-
 „ tummodo laudat; hoc est qui *Pie credunt*, qui *Pie colunt* Virgi-
 „ nem Sanctissimam sine labe Conceptam. Quod quum & ego prae-
 „ stiterim, praeceptis ac menti Sanctae Romanae Ecclesiae fatis me
 „ fecisse mihi persuadeo. Contra ii censendi sunt illius mentem at-
 „ que intentionem fraudati, & mandata sprevisse qui *Certitudinem*,
 „ repugnante ipsa Ecclesia, in Piam Sententiam obtrudere nituntur,
 „ & contrariam Opinionem consequenter ita deprimunt, ut non Pro-
 „ babilitate duntaxat carentem, sed *Erroneam* appellare non verean-
 „ tur; & *jampridem enectam & profligatam* (quod Pater de Luca,
 „ ut alia illius disteria omittam, ausus est dicere) & *spallata*, uti
 „ eam Declamator nominat, & *malviventi*, o *malcredenti*, qui Piae
 „ Sententiae non adhaereat, uti eos num. 69. idem effraeni temeri-
 „ tate pronuntiant: quum tamen Sanctus Pius V. in sua Constitutio-
 „ ne praeceperit, ut pendente judicio Ecclesiae, *neutra pars Quaestio-
 „ nis hujus veluti Erronea praedicetur*. Quod repetitum videas a Gre-
 „ gorio XV. scribente: *Dum tamen neutra veluti Erronea aut Haere-
 „ tica damnetur*: Gregorii vero XV. Decretum postea innovavit Ale-
 „ xander VII. Jam ergo manifeste laesam ab iis tenemus auctorita-
 „ tem summorum Pontificum. Ad haec idem Declamator, & Par-
 „ thenotimus, atque alii, ductore Patre de Luca, *Certam*, *Certissi-
 „ mam* evasisse Sententiam Piam, quanquam nondum de Fide, ex
 „ institutione Festi grandibus buccis tradunt; atque adeo Certam vo-
 „ lunt,

lunt, ut inde formido Erroris sit omnino sublata, quum in praescribendo Festo & Cultu Sanctorum *Ecclesia errare non possit*. Hoc autem nihil aliud est, nisi irridendam dimittere Apostolicam Sedem Haereticis, quasi haec *deciderit*, & *non decideris controversam*, ut illi ajunt; simulque Catholicis illudere, dum ex timore Anathematum fingitur nondum *de Fide* Sententia eadem definita, quum tamen, posito quod Ecclesia id statuerit, *in quo errare non possit*, oporteat illud credere *de Fide*: certe enim ea spectant ad Fidem, in quibus stabiliendis immunitatem ab Errore Christus Dominus Ecclesiae suae pollicitus fuit. Num his curae est Dignitas Apostolicae Sedis, qui eandem norunt protestantem, se noluisse decidere controversiam, & nihil, quod est ad substantiam, detraxisse Thomistarum Opinioni; & nihilominus eam exhibent veluti sui oblitam quasi in institutione Festi Certissimam pronuntiarit Scotistarum Sententiam? Sed postquam de hoc Festo supra egi, falsaque confectaria inde ab adversariis ducta repuli, nihil ultra addendum est.

Perpendamus potius, num hisce Theologis multum curae fuerit de Honore Catholicae Religionis. Si vera, si firma sunt, quae pluribus ego disserui de Imprudentia ac Temeritate Voti Sanguinari Sicali, eoque magis Cusentini: nemo non videt, quale lolium in doctrinam Sanctissimae Religionis nostrae importare, atque in dies dilatare improvida istorum Devotio satagat. Glorietur ipsemet Declamator num. 69. multos nuper ad illud emittendum adductos, ac propterea *augeri quotidie triumphos & gloriam Immaculae semper Virginis*. Sed quando stent meae rationes, latius propagari dicenda est Pietas vitiosa, & inconsultus atque damnabilis Deiparae colendae modus. In absurdum hoc Votum me insurrexisse, aegerrime tulerunt illius patroni, atque huc pertrahunt Sedis Apostolicae Decreta de non impugnanda *directe vel indirecte* Pia Sententia. Verum non ego, ut dixi, adversus eam Sententiam certavi, sed quidem contra perniciosam Novitatem, & contra additamentum pravam eidem Sententiae factum ab intemperanti nonnullorum Pietate, nunquam ab Apostolica Sede probatum, & secundum verae Theologiae principia improbandum. Opus autem fuit ad detegendum ejusdem Voti vitium, ostendere, abesse a Pia Sententia *Certitudinem*, eamque contra Romanae Ecclesiae mentem statui, hoc est dejicere fundamentum, supra quod fabricatum fuit Votum; ac nimium falli, qui quamquam concedant, Sententiam illam intra pomoerium Probabilitatis & Opinionis adhuc conclusam

„ licite nihilominus posse concipi Votum Sanguinarium arbitrantur.
 „ Quum Sancta Sedes Thomisticae Opinionis professoribus silentium
 „ indixit, num censenda est liberum quoque fecisse Piae Sententiae
 „ affectis alias comminisci Opiniones, quae in perniciem doctrinae
 „ Catholicae, atque in suum ipsius dedecus verterentur? Quotiescun-
 „ que laeditur doctrina Ecclesiae, jus unicuique est in arma pro ea
 „ profligare. Si ii pro incerto Honore Deiparae putativae Matris no-
 „ strae tanto fervore decertant: nonne & Ecclesia Dei Mater nostra
 „ spiritualis est, & quidem propria ac vera? Nonne pro certo illius
 „ Honore, si occasio poscit, decertandum est? Jam Sanctitati insigni
 „ Virginis Beatissimae nihil detractum, neque derogatum vidimus,
 „ etiamsi Piae Sententiae non accedat Fidelis. At certum est, can-
 „ dori Ecclesiae illos insidiari, qui perversas Opiniones procudunt, at-
 „ que disseminant; ac propterea ejusdem Ecclesiae magni interesse,
 „ Filios pro tutela Sanctissimae suae Matris insurgere. Impudent er-
 „ go sibi auctores & patroni Voti Sanguinarii, si abutentes silentio
 „ Thomistis indicto, novas postremis hisce temporibus Opiniones pro-
 „ cuderunt, & confidentissime disseminare non cessant: quae si Dog-
 „ matis Ecclesiae Catholicae adversentur, ut ego me evicisse reor,
 „ nunquam excogitandum est, eidem Ecclesiae displicere posse; immo
 „ censendum Deo & Ecclesiae gratissimum esse, uti in tot aliis casu-
 „ bus, ita in isto quoque, certamen initum pro tuenda puritate do-
 „ ctrinae, quam Catholici profitentur. *Privilegium omnino meretur a-*
 „ *mittere, qui permessa sibi abutitur potestate,* uti habemus ex c. *Pri-*
 „ *villegium* 11. q. 3. & ex Legibus etiam civilibus, quas omitto.
 „ Quod si Politicis quibusdam, quorum nunquam inopia est, forte
 „ videatur, satius fuisse sinere, ut quisque abundet in sensu suo, ne-
 „ que laudandos, qui turbas movent: serio perpendat quaeso, non
 „ agi heic de Opinionibus, e quarum disputatione nullum in Eccle-
 „ siam, & Rempublicam detrimentum formidari potest: quales quam-
 „ plurimae in Scholis doctorum hominum ingenium exercent. Agi-
 „ tur de re summi momenti, nempe de Vita hominum, tempora-
 „ lium bonorum maximo, cujus custodiam Deus imperat, & quam
 „ Reipublicae summopere interest, ne nos temere perdamus. Agitur
 „ de inferenda in Ecclesiam inaudita & perniciofa Opinione, scilicet
 „ licere occumbere pro Opinionibus quamquam Pius, e quarum sane
 „ regno nondum exilivit Pia Scotistarum Sententia. Si haec levis
 „ aut nullius momenti Politicis videntur, ac toleranda creduntur: il-
 „ li hercle (dicenti ignoscant, rogo) neque Ecclesiam, neque Rem-
 „ publi-

publicam amant, quarum Honor & conservatio tam parum cordi sibi est. Aliter profecto judicabunt meliores. Ex eorum sententia si Votum Sanguinarium licitum atque laudandum demonstretur, ero ego damnandus. Sin illud temere conceptum atque damnandum appareat, laudanda erit tutela a me suscepta Ecclesiae, simulque Reipublicae in re tanti momenti. Neque expectandus Tyrannus, qui hoc hominum genus ad melius sapiendum, & ad perspicendam deformitatem Voti adducat. Si non liceret mori pro asserenda Praeservatione Virginis, ne nunc quidem licet Votum illud emittere; ac proinde praesenti errori prospiciendum, ne pejora aliquando succedant.

Omiffam heic nolo alteram adversariorum querelam, nimirum me multa Sanctorum Patrum loca protulisse, quae adversus Piam Sententiam militare videntur. Eadem profecto protuli, non ut officerem Piae Sententiae, sed ut evincerem ab ejus patronis eximi non posse Deiparam a *Debito* contrahendae maculae originalis, quemadmodum fecere Theologi Salmaticenses Carmelitae Excalceati in Tom. IV. Disp. XV. Cursus Theologici, ubi de *Virginitate & peccatis*. Eorum Libris suus est honor in Hispania, neque minor in Italia, ubi Anno 1678. Venetiis recusum fuere. Nemini autem interdictum hucusque fuit impugnare Opinionem negantium in Deipara *Debitum* illud. Eoque justius in eam arma fuerunt & sunt arripienda, postquam Novatorum inverecunda licentia eo usque progressa est, ut Votum Sanguinarium emiserit pro hac etiam Opinionem tuenda, quamvis adversus eam stet Communis Theologorum sententia, ipsamque gravissimi viri, Piae Sententiae cultores, sustineri non posse sine *Errore* asserunt. Et potissimum quod sine *Debiti* asseritione tot Sanctorum Patrum loca nemo tolerabili ratione poterit conciliare cum Pia Sententia. Exploratum porro est, duo esse dogmatum Catholicorum fundamenta, divinas nimirum Scripturas, & legitimam Sanctorum Patrum Traditionem. Si in Scholasticis Opinionibus cuiquam liceret contemnere ejusmodi Traditionem, aut solis argutiis & somniatis ratiunculis eandem eludere: nae is, quantum in ipso est, Religionem, & Ecclesiam prorsus prosterneret. Et qui id faceret, ut Opinionem falsam aut fallacem promoveret, quam Deiparae honorificam & gratam crederet, in Ecclesiae ruina ipsam quoque involveret Dei Genitricem Sanctissimam. Nam si in uno duntaxat Dogmate Ecclesia Dei a consensu Traditionis Patrum discederet (quod ex promissione Christi

nunquam fiet) actum esset de Infallibilitate Ecclesiae; & non tantum Haeretici, sed & ipsi Catholici de aliis quoque Ecclesiae Dogmatis in posterum dubitare, aut licentia simili oppugnare eadem possent. Itaque de Virgine Beatissima male mereri dicendi sunt Cusentini, qui ut Honorem Opinativum eidem tribuant, religioni sibi minime ducunt imaginationes suas praeponere Patrum Traditioni, & incaute fundamenta Ecclesiae Catholicae contemnere, minime animadvertentes, quid scriptum reliquerit, testibus ipsis Salmaticensibus, Laurentius a Ponte, cujus verba sunt: *Non sic Honori Mariae Sanctissimae additi esse debemus, ut splendorem & maiestatem Sanctorum Patrum denigremus &c.* Sic nos *Virginem Sanctissimam defendamus, ut semper facta sectaque sit Sanctorum auctoritas.*

Instant tamen Piae Sententiae patroni, contententes, exerenda non fuisse mihi ea Patrum loca sine solutione, ne Lectoribus dubitatio crearetur de veritate Piae Sententiae. At quandonam insoluta dimisi, postquam Cap. 25. pag. 203. disertissime Lectorem monui, attribuendo *Debitum* Virgini, curare Scotistas, ut haec minime Sententiae suae adversantia ostendant? Eos praeterea urit, me subdidisse: *An autem sit haec revera mens Literarum sacrarum, & an sufficiat interpretatio ista, ad rite explicanda tot loca Patrum, ac veterum Theologorum, erit Apostolicae Sedis nos infallibili iudicio edocere, si quando controversiam a tot Saeculis inter Scotistas & Thomistas ferventem, ad accuratum examen deducere, & quid firmissime de ea credendum sit, edicere voluerit.* En ut apud delicatos hosce Theologos crimen evasit vel ipsa mentio reservati sibi ab Apostolica Sede hac de re iudicii: quod a Romanis Pontificibus toties repetitum videmus. An ferenda sit huiusmodi querela, quisque facile intelligit. Erumpit heic Declamator, minitans num. 22. *In breve si vedrà, come di Secolo in Secolo i Santi Padri o non parlano del Mistero, quando ancora non agitavasi, o ne parlano a favore &c.* Certamente i Santi Padri, come regolati dal medesimo Spirito della Chiesa di Dio, son sempre stati unisoni, labii unius, con la Chiesa di Cristo. Atque utinam magnifica isthaec promissa completa aliquando videremus, neque spuria, neque dubia, neque inania proferrentur: quod haftenus a compluribus factum fuit, uti Petavius vir Clarissimus antea monuit, Equidem fateor, me sincero amore veritatis exquisivisse in scriniis Patrum, quatenam hac de re fuerit eorum sententia, summopere apud eos invenire cupiens decantatum hoc Deiparae Privilegium: quis enim nisi perdit ma-

n lignus

„ lignus & impius Sanctae Dei Genitrici Honorem hunc invidet,
 „ si certa ratione constare possit, illud a Patribus eisdem fuisse tribu-
 „ tum? Moerens dico: ne unum quidem reperi: quod & antea con-
 „ tingerat praelaudato immortalis nominis viro Dionysio Petavio. Aut
 „ Privilegium istud se ignorasse ii produnt, aut etiam negasse viden-
 „ tur. Eorum autem verba tametsi Probabilitatem non adimant Piae
 „ Sententiae, quippe ad ea explicanda Probabiles interpretationes ab
 „ illius patronis adhibentur: attamen a Certitudine detegenda in ea-
 „ dem Sententia nos avertunt. Nisi hoc obtinisset, Ecclesia de cultu
 „ ac honore Sanctissimae Matris Dei sollicita, jamdiu litem sustulif-
 „ set. Sed quia nondum post tot annos a Sixto IV. usque ad tem-
 „ pora nostra exclusa est formido, ne Traditio, necessarium in Ec-
 „ clesia Dei Veritatis fundamentum, aut desit, aut obstat: propterea
 „ Romanae Ecclesiae vigilantissima Prudentia a finali sententia ha-
 „ stenus abstinuit, & liberam cuique facultatem reliquit opinandi hujus
 „ controversiae quamlibet partem, prout vel magis Pium, vel magis
 „ probabile esse judicaverit, uti statuit Sanctus Pius V. Hoc idem a-
 „ nimadverterunt Salmaticenses Theologi supra laudati Tract. 13. de
 „ vitiis & peccatis Disp. 15. Dub. 5. num. 211. scribentes: *Sane*
 „ *cum videamus, Sedem Apostolicam fere ab hinc ducentis annis pro*
 „ *hujus articuli (scilicet de Conceptione Immaculata) declaratione*
 „ *iterum atque iterum summis precibus exorant, nihilominus eam su-*
 „ *spondere: expectare credenda est, ut ea quae ex Scripturis & Patri-*
 „ *bus difficultatem ingerunt, sufficienti Probabilitate omnino evincantur.*
 „ Ita illi, quanquam addictissimi Piae Sententiae. Certe, si Sancti
 „ Patres, uti venditat Declamator, unisoni hac in re forent cum
 „ Ecclesia: nemo non intelligit, nos jamdiu habituros fuisse perem-
 „ torium de Pia Sententia Ecclesiae ipsius iudicium; & nunc Aposto-
 „ licam Sedem aut supinae negligentiae, aut caecitatis tacite argui,
 „ quae concordiam hanc Sanctorum Patrum in asserenda Pia Senten-
 „ tia post tot Saecula nondum perspexerit.

„ Quapropter quum idem Declamator Eminentiae vestrae gratias
 „ agit, quod auctor nuper fuerit Sanctissimo D. N. BENEDICTO
 „ XIV. Pontifici Maximo de *Nihil innovando* in hac re, is fortasse
 „ fallitur, sibi que facile est adulatus. Nemo litem movet Piae Sen-
 „ tentiae; nemo oporat, eoque minus suadet, ut de ea quidquam no-
 „ vetur. Fruatur illa suis Privilegiis, favoribus Ecclesiae Romanae,
 „ amplitudine sua. Eam ego semper laudavi, & dummodo a teme-
 „ ritate *Sanguinarij Voti* separetur, me semper atque alios laudatores

„ ha-

„ habebit. Pro tuendo eo Voto, quod causam controversiae, inter
 „ me, & Parthenotimum virum doctum & pium agitatae, dedit, ni-
 „ hil fere Declamator adfert. Is unice furem stilum (nemini, ut
 „ puto, probandum) exercet pro tutela Piae Sententiae, aerem ver-
 „ berans, atque Eminentiae vestrae falso supponens, me ejus Proba-
 „ bilitatem, aut Pietatem eidem adhaerentium impugnandam susce-
 „ pisse. Fretus decretis Romanorum Pontificum (centies repetam)
 „ *Certitudinem* illi tributam duntaxat negavi; idque necessitate du-
 „ ctus, ut vitiosam Pietatem, ac Votum super ea structum in dede-
 „ cus doctrinae Catholicae, & perniciem Reipublicae, minime feren-
 „ dum demonstrarem. Quum vero diversa duo omnino sint, *Pia Sen-*
 „ *sentia*, ac *Votum Sanguinarium*: meridiano Sole clarius est, intacta
 „ Sententia, posse abrogari, atque damnari Votum. Quod ubi acci-
 „ deret, nihil de Pia Sententia novaretur, sed improbanda tantum-
 „ modo Novitas Voti illius auferretur. Veri igitur similis multis
 „ est visum, nunquam cogitasse Eminentiam vestram de commen-
 „ dando *Nihil innovari*, quasi ullum Piae Sententiae periculum im-
 „ mineret, sed ut obviaret periculis ipsius Sanctae Sedis. Invaluerat
 „ enim; & adhuc perdurat vox, caelum & terram, & praesertim
 „ piissimos Reges commovendos, ut a Sanctissimo Pontifice, qui bo-
 „ no Reipublicae Christianae natus nunc regnat, enixius quam antea
 „ petatur atque impetretur decretum, per quod ad Certitudinem, qua
 „ adhuc caret, Pia Sententia evehatur. Igitur sollicita Eminentia
 „ vestra de Honore Romanae Ecclesiae, ac de tutela sacrae Tradi-
 „ tionis, consiliaffe creditur, ne hac in re *Novitatis* quidquam fiat;
 „ & quod complures Sanctissimi Pontifices post natam de Conceptione
 „ Virginis controversiam, & ipsius Tridentini Concilii Patres, sibi
 „ faciendum minime duxerunt, & quod antea doctissimi & infi-
 „ gnes S. R. E. Cardinales in consilium toties adhibiti, faciendum
 „ negarunt, ne nostris quidem temporibus fiat, quum nihil rationum
 „ additum hucusque fuerit, ob quas a prudentibus Praedecessorum
 „ Pontificum Constitutionibus sit recedendum. Quod certum est, an-
 „ te paucos annos sub Clemente XII. P. M. Piae Sententiae patro-
 „ ni, teste Patre de Luca, nervos omnes intenderunt, ut Romanam
 „ Ecclesiam ad *Novitatem* in Quaestione ista pertraherent: id quod
 „ eis non bene cessit. Gratulandum est, quod iidem contrariis pre-
 „ cibus ac votis *Nihil innovari* nunc cupiunt, reliquis concordēs, qui
 „ nullo partium studio perturbati, quanti momenti sit causa haec,
 „ intelligunt.

„ Ve-

„ Verum quod est ad *Votum Sanguinarium*, nihil obstat, quomi-
 „ nus ad ejus Censuram procedi possit ac debeat, si a doctrina Ca-
 „ tholica alienum, ut ego puto, deprehendatur. Interest enim Ca-
 „ tholicae Ecclesiae, amoveri quidquid contra Sanctissimae Religio-
 „ nis principia pugnat, & vitas hominum temere in discrimen addu-
 „ cit. Excessus autem irrepere posse in nobilem Virtutem Pietatis,
 „ unusquisque fatetur. Nam, uti ajebat summe pius Cardinalis Bo-
 „ na Lib. II. Cap. 17. n. 7. Rer. Liturg. *Perpetuae mutationi obno-*
 „ *xiae sunt res humanae, nec quidpiam tam sancte institutum est, quin*
 „ *aliquando in SUPERSTITIONEM & pravae usus degeneret.* Si
 „ ex his unus sit ejusmodi Votum, cur diutius ferendum est? cur si-
 „ nendum ut latius dilatetur: quod nunc tentari, & feliciter succe-
 „ dere, testatus est idem Declamator? Nihil enim facilius, quam in-
 „ docto Populo persuadere, quaecumque lineamenta Pietatis gerunt.
 „ Immo vel docti viri a fallacibus hisce umbris non satis interdum
 „ sibi cavent: quod antea monuit Sanctus Pius V. de Quaes-
 „ tione hac in sua Constitutione loquens, dum eos arguit, *qui stul-*
 „ *tas & sine disciplina quaestiones movent, quae generant lites, quas*
 „ *nec frequens multisitudo intelligere, nec Viri Sapientes, qui capiunt,*
 „ *utiliter percipere valeant: praesertim quoniam, ut experimento didici-*
 „ *mus, ipsorum Concionatorum, qui ad Quaestiones huiusmodi propo-*
 „ *nendas facilius erumpere solent, Major Numerus Difficultatem Pro-*
 „ *sus Ignorantes, neque Intelligentes quae loquuntur, aut de quibus as-*
 „ *firmant, Simplicium animos Indiscretae Devotionis obtentu, vel po-*
 „ *tius loquacitatis & ostentationis affectu, ad tumultus & similitates*
 „ *concitant &c.* Quod mirari subit, iidem se posse fucum facere con-
 „ fidunt vel Eminentiae vestrae, cujus tanta est perspicacia mentis,
 „ tanta Catholicae doctrinae peritia. Habeo Declamatorem, qui in
 „ calce Epistolae suae certum Deiparae patrocinium Eminentiae ve-
 „ strae in hora mortis pollicetur, exemplum *Judithae* proferendo, &
 „ supponendo de Virgine Sanctissima pronuntiatum: *Qui elucidant me,*
 „ *vitam aeternam habebunt:* Gemmae istae sunt rudi populo servan-
 „ dae; non autem Eminentiae vestrae, cui perspectissimum est, nihil
 „ ad hanc rem conferre *Judithae* exemplum; neque ad Deiparam
 „ proprie pertinere illa Ecclesiastici verba, uti jam innui Cap. II.
 „ circa finem de Superst. Vit. Divinus enim Ecclesiastici Auctor, uti
 „ sacri Expositores docent, eos tantum laudat, qui praecepta Sapien-
 „ tiae explicant, suisque discipulis tradunt; cui Sancto operi spes &
 „ praemium vitae aeternae promittitur. Denique, uti diximus, agi-
 „ tur

„ tur heic de Honore hastenus incerto Deiparae; proptereaue sine
 „ certis tabulis offerri heic nequit a Declamatore Certitudo *Vitae aet-*
 „ *ernae*. Et potissimum in casu nostro, in quo quis audeat patrocini-
 „ nium Virginis negare tuentibus contrariam Opinionem, quod *San-*
 „ *ctificationem* purent (an jure ipsi videant) Traditioni sacrae ma-
 „ gis consonam, ac Virgini, si talis sit, gratiorem? Certe Devotio
 „ erga Beatissimam Dei Matrem, uti justissima, & a doctrina Fidei
 „ commendata, laudanda est, promovenda est; plus enim ex ejus in-
 „ tercessione, quam reliquorum Sanctorum, nobis sperandum est. Sed
 „ ab hujusmodi Devotione excessum omnem removendum, Ecclesia
 „ ipsa nos docet. Neque id satis inculcari potest a zelatoribus purae
 „ doctrinae (quam praerogativam in Eminentia quoque vestra omnes
 „ agnoscunt, atque suspiciunt) quando videmus propugnatores Voti
 „ Sanguinarij neque illius excessum discernere, & alios in excessus
 „ ruere, atque incauto Populo intoleranda axiomata nunc etiam pro-
 „ pinare. Audiat Eminentia vestra, quid alter ex iis, Panormitanus
 „ nempe Saguas, in Epistola adversus me typis tradita pag. 12. scrip-
 „ serit, inquit: *Eh via persuadetevi, che non è Eccesso dir, che*
 „ *Dio abbia dato alla sua Madre la chiave de' suoi Tesori, sicchè a*
 „ *sua richiesta si concedan le divine Misericordie*: ita ut superfluum
 „ futurum sit deinceps ad reliquos Sanctos confugere, ut orent Deum
 „ pro nobis, & nihil nobis sperandum sit a Deo per Jesum Chri-
 „ stum, nisi accedat Matris intercessio. Haecine ferenda sunt in Ec-
 „ clesia Dei? Ille tamen hoc persuadere se nobis posse arbitratur ex
 „ Sancto Bernardo scribente: *Omnia nos habere voluit per Mariam*:
 „ quae egregie dicta sunt, quum Deus non nisi per Mariam nobis
 „ dederit Christum, auctorem gratiae, atque omnis Boni Spiritualis,
 „ non vero quod ex unius Deiparae intercessione omnia in nobis
 „ identidem caelestia beneficia emanatura sint. Subdit Saguas haec
 „ alia verba, quae Sancto Thomae Aquinati tribuit. *Virgo Beata di-*
 „ *midiam Partem Regni Dei impetravit, ut ipsa sit Regina Miseri-*
 „ *cordiae, cujus Filius est Rex Justitiae*. Ubinam Thomas haec dix-
 „ erit, non prodit ille, Rosignolium Ascericum Scriptorem tantum-
 „ modo memorans testem hujus dicti, quod quantum abfit ab incom-
 „ parabilis Sancti illius viri mente & circumpecta Theologia, qui-
 „ sque Theologus continuo intelligit. Si collecti in unum heic fo-
 „ rent omnes Catholicae Ecclesiae Theologi, provolutus ego ad eo-
 „ rum pedes unumquemque precarer, ut edicerent, quid de Proposi-
 „ tione hac ad Lydium verae Theologiae lapidem exacta sentiendum
 „ sit

„ fit. Nonne omnem Temeritatis gradum excedit, tantam rem pro-
 „ ponere Populo Christiano sine ullo divinarum Literarum, sacrae-
 „ que Traditionis suffragio, immo contra patentia illarum Dogmata?
 „ Certe nullus dubito, quin Theologi omnes una voce testarentur,
 „ recte in Deiparam conlatum fuisse titulum *Marris Misericordiae*;
 „ nam confluentibus in eam cunctis Virtutibus, hanc prae ceteris
 „ habuisse, & adhuc exercere credenda est. Verum ii continuo adde-
 „ rent, ita ei tribuere velle veluti proprium ac peculiare illius mu-
 „ nus *Misericordiam*, ut divino ejus Filio tribuatur tantummodo mu-
 „ nus *Justitiae*; & unum dimidium Regni Deiparae assignare, alter-
 „ rum Christo Domino; neque nos nisi per invocationem Sanctae
 „ Mariae ullas sperare posse gratias ac dona a Deo; idque asserere
 „ in Libello Dogmatico: esse Theologi nondum scientis, quis sit Re-
 „ demtor noster, aut a suis affectibus in nimis abrupta praerepti.
 „ Certe non sine horrore Propositio haec audiri potest; utpote quae
 „ nimium derogat honori ac dignitati Mediatoris nostri Jesu Christi,
 „ & Spei Confidentiaeque nostrae in ipsum, quasi non & ille sit
 „ *Pater Misericordiarum*, qualis ab Apostolo consubstantialis ejus Pa-
 „ ter appellatur; quasi Misericordia non eum traxerit ex Caelo; qua-
 „ si non adhuc quaerere & ad se invitare pergat peccatores; & qua-
 „ si post mortem pro nobis misericorditer toleratam, ineffabili Mife-
 „ ricordiae & amoris sui invento quotidie nobiscum non versetur in
 „ Altaris Sacramento. Uno verbo, nonne Christianus quisque videt,
 „ ab ejus Corona abstrahi omnium speciosissimam gemmam, si *Ju-
 „ stitiam* ei tantum tribuimus, *Misericordiam* negamus; sive hanc ei
 „ adscribimus non uti proprium illius Attributum, sed a Matris pre-
 „ cibus dependens? Nonne assertionis hujus deformitatem unusquisque
 „ Sacerdos sentit, dum ferme quotidie in Horis Canonicis ab Eccle-
 „ sia haec dicere jubetur: *Ipsius Pietas & Misericordia nos adjuvet,*
 „ *qui cum Patre & Spiritu Sancto vivit & regnat,* & in incruento
 „ Sacrificio, ubi toties ipsius Filii Dei *Misericordiam* imploramus?
 „ Sed pluribus opus non est, ut Eminentiae vestrae gravissima con-
 „ fessoria Propositionis hujus edisseram, quando ipsamet melius quam
 „ ego eadem statim perspexit, & sine monitore ullo intelligit, non
 „ parcendum ejusmodi excessibus Pietatis, quibus Catholicae Eccle-
 „ siae purissima doctrina infici potest, & perversis dogmatis miser Po-
 „ pulus imbuatur, nisi eisdem obfistatur. Panormitani vel hinc edisce-
 „ re possunt, quam infidis ducibus se commiserint in amplectendo
 „ Voto Sanguinario. Quod profecto si inter Excessus intolerandos

„ connumerandum est, uti mihi videtur, quum hoc sit grandis mo-
 „ menti facinus, quia de hominum vita agitur: sperandum est fore,
 „ ut ad illud excindendum zelum suum Eminentia quoque vestra
 „ armet, prout postulat munus amplissimae Dignitatis suae, & sacrum
 „ Tridentinum Concilium jamdiu mandavit. Alioqui nobis insulta-
 „ bunt Heterodoxi, quod apud nos non solum toleremus, sed & am-
 „ plificari sinamus Opinionem & Votum de Vita hominum Temere
 „ prodigenda, quum haec nos ipsi fateri cogamur a Sanctissimae Re-
 „ ligionis doctrina abhorrere. Ceterum pergat Eminentia vestra fove-
 „ re, tueri, commendare Piam de Conceptione Virginis Sententiam.
 „ Bona est causa, laudabilis haec Pietas. Verum Declamatori non
 „ credat, quum *Certam ac Certissimam* ex falsis suppositis deprae-
 „ dicat eandem Sententiam; hoc enim est velle sapere plus quam sapiat
 „ Romana Ecclesia nostra Magistra, & in dedecus vergit tot summo-
 „ rum Pontificum, eos culpando, quod aut Certitudinem hanc prae-
 „ ignorantia (si Superis placet) nondum animadverterint, aut ani-
 „ madvertentes, prae languida erga Deiparam Devotione nondum
 „ controversiam dirimere voluerint. Tunc solum nobis Certa ac Cer-
 „ tissima esse incipiet Pia Sententia, quum Romanus Pontifex, aut
 „ Concilium una cum eo, satis prospectum credens divinorum Libro-
 „ rum, & sacrae Traditionis veritati, definitivum hac de re judi-
 „ cium pronuntiabit. Ego interea singulare meum erga Eminentiam
 „ vestram obsequium professus, & sacram Purpuram deosculatus, eni-
 „ xis precibus me illius gratiae commendo.

Dabam Mutinae X. Kal. Martii MDCCXLII.

„ Eminentiae vestrae

Humillimus & Obsequentissimus Famulus
 Antonius Lampridius.

Quid post hujus Epistolae lectionem, mi Azevede, colloquuti
 fuerimus Romanus Abbas, & ego, nihil est quod memorem. Ego
 certe in Lampridii sententiam ambobus pedibus abii. An tu idem sis
 praestiturus, incertum habeo. Si quid novi in posterum prodibit,
 labori non parcam, ut tu quoque conficius fias. Vale.

Neapoli VI. Kal. Majas MDCCXLII.

Praeclarissimo viro Azevedo suo Ferdinandus Valdesius S.P.

EPISTOLA DECIMAQUINTA.



NTE complures dies, Azevede amantissime, vulgatum fuit in amplissima hac Urbe, ad clementissimum hunc Regem Carolum Panormo advectum fuisse Librum laureatum, Phrygioque opere mire exornatum. Innotuit tandem, Libro huic, sub finem proxime praeteriti Anni 1741. edito, hunc esse titulum: *Lampridius delectus & castigatus, Auctore Laurentio Migliaccio Panormitanae Ecclesiae Canonico*. Liber ipse Regi dicatus, & grandi voce in Epistola ipsa ad Regem memoratur *Mariani Conceptus propugnandi, vel usque ad Sanguinem, Magnanimum Votum, quod Pietatis Hispanicae Praecipuum Decus est, atque ornamentum*. Nunquam conquievit Romanus Abbas, quocum mihi arcta & dulcior in dies est familiaritas, quousque ejus Libri exemplo potius fuit; neque is mihi, quale foret suum de eo judicium, revelare unquam voluit, nisi & ego eum antea legissem. Equidem commodatum ab eo legi, sed fateor, per saltus potius, quam continuata lectione legi, toedium nempe perpeffus, sive quod Logodiarhoeam in eo deprehendere mihi videret, sive quod inhonesta nimis appareret observata ab eo pugnandi ratio adversus Lampridium. Dubius tamen quum essem, an aliquo praeoccupatus affectu de hoc Libro judicasset, quum primum adii Romanum Abbatem, quid ipse sentiret, sum percontatus. Tum ille: Tibi nulla dubitatio futura est, quin ii, quibus piperata scripta prae ceteris palatum mulcent, & potissimum qui Scoticisticae factioni nomen dedere, in Migliaccii Libro bellaria sint deprehensuri; sed aliud eorum, qui medii stant, judicium futurum esse arbitror. Ecquando enim gravissimae res Theologicae scurriliter ac mimice sunt pertrastandae: quod factum in Migliaccii Libro vidisti? Sanctum profecto Hieronymum is in Praefatione exemplum sibi statuit, qui *apologetico jure liberalius est usus: nec propterea Christianam Caritatem neglexit, aut Literati viri officio defuit, postea adveniens: Quanto igitur potiori jure integrum nobis esse debuerat, qui semel atque iterum provocari illatas nobis injurias, neque illas leves, festivis dumtaxat salibus propulsavimus? Nam ut notavit Horatius,*

L l l 2

.... ri-

..... *ridiculum acri*
Fortius & melius magnas plerumque fecat res.

Injuriarum postulat Migliaccius Lampridium, quod Sanguinarium Votum antea a paucis Panormitanis conceptum improbarit; reliquos omnes interea Panormitanos, quorum ingenia semper suspexit, & erga quos suum semper testatus est obsequium, ab hujusmodi prava, ut is putat, Opinione avertere contendens. En *injurias, neque illas leves*, Opinione dissidere ab aliis; & crimen hoc multandum *festivis salibus*, idest inhonesta ac perpetua irrisione, quamvis insulsa, in qua *Caritatem Christianam* omnino contemtam agnoscis, ipsaque Theologia gravior, quam Lampridius, laesa dicenda est, dum e gravitate & majestate, quae ipsam decet, in pueriles nugas & probra conjicitur. An ferendum sit hoc proeliandi genus, sive cacoethes, in Grammaticis, in Poetis, aliisque de humanis Literis inter se contententibus, nolo in praesentia inquirere. Certe in Theologo homine, atque in novo isto Hieronymo, damnes, quem argumenti sublimis, & ad Religionem spectantis dignitas in officio continere debuit, & a ludicris abstinere jubebat, ita ut quemadmodum Apostolus praescripsit II. ad Tim. II. 25. *cum modestia corripere eos*, quos *veritati resistere* credebatur, & Opiniones, quas pravas arbitrabatur, insectaretur, non vero fratrum personas conviciis & disertiis proscinderet. Eoque minus ferendus hic Scriptor, quod ubique ingenio suo mirum in modum blandiatur. Is Theologiae ad ostentationem peritus; in ea Lampridius infans. Is in Dialectica Hercules; Lampridius pumilio. Eo quoque progressa est hominis istius intemperantia Diss. VI. pag. 161. ut carchinnis minime temperaverit, quod unum offenderit locum in Lampridii Libro, a Grammaticae suae regulis discordem. Dixerat Lampridius Cap. 14. fol. 102. *Per me sane liceat Parthenorimo, & cuiusque Sententiam Scotisticam propugnanti, persuadere sibi certam ex illius tutela laudem relaturum, dum tutela in verbis, & in scriptis consistat. Sub ista condicione, cuiquam molestum esse nolo. Quid ad haec Migliaccius? Ita enim, inquit, Latine loqui amat Moderator ingeniorum.* Quanta sit prurigo censoria Scriptoris hujus, hinc habes. Certe, si ei animus fuit censoriam virgam heic agere, eratne, quae-so, honesto homini iusta causa insultandi, quasi Lampridius ex hoc uno ne Latini quidem sermonis gnarus sit habendus? Quando hic in integro hoc Libro, atque in aliis, si non elegantiam, certe regulas Latinae Linguae probe se tenere ostendit: poscebat honestas, ut hoc potius

potius in Typographi incuriam, quam in Auctoris sphalma refundetur. Hoc idem profecto praestitit honestissimus Theologus Pater Parthenotimus, dum hunc ipsum Lampridii locum memorans, *molestus* pro *molestum* scripsit, nullo addito epiphonemate, quo insultaret adversanti Lampridio. Sed quid si ridendus hanc ob causam foret non jam Lampridius, sed sciolus ipse Censor? Parce tantisper tricis hisce immoranti, ab argumento nostro perquam nimium alienis. Franciscus Sanctius, quem inter Grammaticae Latinae Auctores pluris certe facias, quam Migliaccium, hac habet Lib. IV. Cap. 12. Minervae suae: *Cupio esse clemens. Laboras videri doctus, ita risus est Helenismus, ut Grammatici Latini regulam constituerint, quam non intelligunt. REGULA VERA est, ut semper post huiusmodi Infinita sequatur Accusativus, ut Cupio dici doctum.* Ita quoque Vossius de Arte Gram. Lib. VII. Cap. 20. ita Budaeus & alii. En exempla. Plautus in Cistell. sc. 1. *Quia ego Nolo meretricem dicier.* Et Mere. Act. 1. sc. 2. *Vin' tu te mihi esse obsequentem?* Epid. Act. 1. sc. 2. *Sed operam Epidici nunc me emere pretio pretioso velim.* Ita Lucretius Lib. 1. *Quippe etenim quam multa tibi me fingere possum somnia.* Aliis exemplis parco, neque enim pluribus opus est ad retundendam Censoris hujus puerilem jaçantiam.

Quod potissimum nostra interest, quaerendum restat, num ad Votum Sanguinarium censurae eripiendum Migliaccius satis rationum atque argumentorum attulerit, contrariaque rite disjecerit. Is profecto sibi palmam atque triumphum hac in re non semel decrevit. Merito ne, an immerito, aequum minime est, nos pari facilitate statuere. Doctorum hominum, nulli factioni addictorum, erit hoc suo tempore iudicium. Interea constare arbitror, quidquid rationum alicujus ponderis a Migliaccio ad causam istam adductum fuit, ex Parthenotimi armamentario fuisse desumptum, atque aliis verbis in aciem deductum. Igitur si quae nos antea adversus Parthenotimum differuimus, bene compacta & solida appareant, cum Parthenotimi, tum Canonici ipsius fundamenta collapsa dicenda jam erunt. Ulteriori proinde pugna superfedere possemus; sed juvat levi saltem brachio nonnulla excutere, quae peculiari conatu aut ab aliis Migliaccius in hoc certamen derivavit, aut in cerebro suo construxit. Reliquas ejus phaleras dimissas volo hominibus, quos terere tempus delectat. Is ergo Diss. III. Cap. 4. exemplum *Cultus sacrarum Imaginum* urget. Si ei fides, Patribus Concilii VII. Oecumenici, dum earumdem venerationem constituerunt, non solum nulla clara Traditio Patrum adfuit, sed

sed etiam contraria Traditio obstat: quam in rem testes profert Minucium Felicem, Tertullianum, Concilium Illiberitanum, ac Serenum Episcopum temporibus Gregorii Magni Romani Pontificis. Et nihilominus in eo Concilio sancita fuit sacrarum Imaginum veneratio. Ex quo deinde infert, nihil ob stare debere *Traditionis* defectum ad referendam in Dogmata Catholica Piam Scotistarum Sententiam. Sed homini isti, Haereticorum hac de re calumnias adversus Catholicam Ecclesiam juvanti, & illudenti Catholicis, dum fingit, *Dogma istud de Imaginibus cum Ecclesia natum, sed occulte alitum*, ac postea Patres ab ea sententia averfos supponit, negatque *Traditionem* Dogmatis hujus: nihil aliud respondendum, nisi quod Bellarminus Lib. II. Cap. 6. de Imagin. Sanctor. reposuit Alphonso de Castro scribenti, *Serenum & Epiphanium excusari ab haeresi, quia res nondum erat determinata. Satis res*, inquit Bellarminus, *determinata erat usu totius Ecclesiae; sed nihil isti contra Fidem aut Veritatem egerunt, vel docuerunt. Ac praesertim Epiphanius, qui purgatur ab omni suspitione erroris circa Imagines in VII. Synodo. Et certe non sine TEMERITATE, & PRAEJUDICIO Catholicae Fidei, tam crassi errores tam magnis viris tribuuntur.* Certe vel primis Ecclesiae Saeculis sacrae Imagines in usu ac veneratione fuerunt, quod praeter alios evincunt Aringhius, Bonarota, Boldettus, atque alii, qui de Romanis Coemeteriis egere. Earum usum, utilitatem, ac honorem Ecclesia probabat, uti constat ex multis Patribus, & praestandum hunc honorem solidae rationes persuadebant. Quare ubi Iconomachi in eas saevire coperunt, Orthodoxi omnes pro iis continuo steterunt, ac Traditionem hostibus opposcentes, legitime sui etiam Sanguinis profusione certarunt. Sed superfluis heic te detinere nolo. Haec nihil ad rem nostram. A quinque Saeculis in disputatione est Deiparae Conceptio. Nunquam Ecclesia improbavit oppositam Scotistis Thomistarum Opinionem, immo a duobus & ultra Saeculis interdixit, ne quisquam ei *Impietatem* aut *Error*em objiceret, neve *Peccati* ejusdem professores argueret. Quid simile unquam excogitet Migliaccius cum sacris Imaginibus, ita ut sibi licere putet pro Pia Sententia mortem obire?

Porro si exspatiari luberet, atque ad stateram appendere, quas idem Censor Diss. III. Cap. 3. pro sua eruditione profert, quasi integrum Ecclesiae sit Dogmata statuere, *Traditione Patrum* inconsulta, immo eadem etiam repugnante, quum in his ei satis sit *Prudentia* sua uti: facile mihi foret ostendere, quam falsas merces novus hic Theologus ad mercatum adducat. Unum dicam. Quicumque talia

ven-

venditat, nihil aliud agit, quam Ecclesiae ipsius fundamenta covel-
 le. Certum quippe est, nunquam ab Ecclesia disjungi, neque esse
 disjungendum Prudentiae praeiudicium, sive Dogmata speculativa aut
 moralia statuat, sive Disciplinae capita praescribat. Ad Disciplinam
 statuendam satis est ei unam plerumque Prudentiam adhibere in con-
 silium. Verum in Dogmatis stabiliendis tum Prudentia suadet, tum
 Regula Fidei praecipit, ut non cuiusquam arbitrio, sed Revelatione
 Dei decreta nitantur. Haec autem Revelatio non aliunde haurienda
 est, nisi e Libris divinis secundum interpretationem Sanctorum Pa-
 trum explicatis, aut ex Traditione eorumdem Patrum, qui Revela-
 tionem non scriptam nobis conservarunt, aut ex utrisque fontibus
 deducendo per legitima certaue confectaria sententias. A mente, at-
 que ab usu perpetuo Ecclesiae aberrat, si quis aliter docet. Neque
 nodi isti secantur lepidis iis depromtis e Tirocinio Eloquentiae figu-
 ris, aut versibus, quibus orationem suam veluti flosculis exornat Mi-
 gliaccijs, dum exempli causa eodem Cap. III. Diff. 3. pag. 71. in
 Tulliana haec verba erumpit: *At quousque tandem abutere patientia
 nostra Lampridi?* Theologorum nemo hasce ineptias invidet novitio
 isti Theologo, quae imberbem juvenem in ludo literario garrien-
 tem, non virum gravem decent. Lectoribus deinde imponit illius
 Eloquentia Diff. III. Cap. 4. ubi fingit, a Lampridio generali sen-
 tentia contemni Populorum Fidelium consensum & Traditionem :
 quod ille nunquam somniavit. Immo non levis habita ratio fuit
 huiusmodi suffragii contra Arianorum pestem, atque Iconomachorum
 furorem. Hoc ille tantummodo ait de Populorum consensu in Piam
 Sententiam; neque enim *Traditionis* nomen tribuas doctrinae, cujus
 exordium post mille annos a condita Ecclesia unusquisque fateri co-
 gitur; & Populus Christianus ex frequenti praedicatione illius, & ex
 Probabilibus lineamentis Pietatis ad eam amplectendam adductus dein-
 de fuit. Quærimus heic Traditionem Sanctorum Patrum, qui sex
 primis Ecclesiae Saeculis floruerunt, non Traditionem, ut ita dicam,
 heri natam. Quamquam quid ajo? Insurgit heic eloquentissimus Ca-
 nonicus, & pag. 93. longe alia bonam gentem docet, scribens: *Po-
 pulorum iste confluxus in Piam Sententiam non ab heri, aut nudius
 tertius coortus est, sed POST HOMINES NATOS vetustissimus est.
 Argumento est igitur hanc SEMPER Traditionem viguisse in Eccle-
 sia, cujus plerumque simplicitas Populorum fidelior custos est, quam
 Theologorum factiosae contentiones.* Nisi hinc agnoscas, quale sit pugi-
 lis hujus ingenium felix, locuples doctrina, obrusam mentis tuae a-
 ciem

ciem cave ne dicam. Haecenus sacrae Theologiae, sive Theologorum Scholis grandis honor est habitus. Fallebamur: neque enim a Theologis, qui veritatem suis *contentionibus* proscindunt, sed *PLERUMQUE a simplicitate Populorum* vera Ecclesiae doctrina experienda est. An toleranda haec monstra sint in Ecclesia Dei aliorum erit decernere. Deinde fallor ne ego, an recte interpreter voces illas *post homines natos*, idest *a creatione Mundi*? Ergo, si Theologum hunc auscultamus, nata est una cum primis hominibus Traditio de Immaculata Virginis Conceptione, eaque in posteros propagata per tot Saecula, felici cursu ad nostros usque dies inconcussa pervenit. Quin & hoc monstri simile omnibus rei istius gnaris videri possit, nullus dubito. Quid ergo non expectandum ab homine, qui aliena adeo a veritate tam placide confingit, atque aliis vult persuadere? Haec quaeso perpende, ac de huiusmodi capite quae tua sit sententia, mihi revelabis.

Totus deinde est eruditus Canonicus Diff. IV. & V. in ostendendo nihil officere Piae Sententiae loca Patrum, quae Lampridius produserat ad refellendam *Debiti* exemptionem, quam Virgini tribuunt quidam posteriorum temporum Theologi. Uinam id illi bene cedat. Tum loca congerit Scripturarum, Sanctorum Patrum, ac Theologorum, ab Apostolorum temporibus exordio ducto, ut evincat, minime deesse vetustissimam eidem Piae Sententiae Traditionem. Ejus consilium probo, conatum laudo; & quoties ei animus sit conciliare duntaxat aut augere Piae ipsius Sententiae *Probabilitatem*, ego quoque lubenti animo fateor recte usurpatum in eum finem tantae Eruditionis cumulum. Verum ubi quisquam contenderet, per ea posse etiam suaderi *Certitudinem* ejusdem Sententiae, & Voti Sanguinari auctoribus animos hinc esse addendos: auctor ei forem, ut ipsum Migliaccium adiens, ab eo clam sciscitaretur, ipse unquam huiusmodi *Certitudinem* sibi persuaserit, an more Legulejorum causae aliorum serviens ea coacervaverit, quae ipsemet inepta ad eam Certitudinem statuendam in corde suo probe agnoscat. Is certe pag. 4. se quidem professus est Voto obstrictum de tuenda Pia Sententia, addens tamen: *Fateor vero, non haecenus usque ad Sanguinem*: quod non personae dictum, nobisque praeferri notandum est. Fieri potest, ut reliqua etiam amico perenti fateatur. Scilicet se, uti ad Lectorem ait, *impar suis viribus opus* aggressum fuisse, ut votis obsecundaret Alphonsi Fernandez de Medrano eximii viri, atque ut paucorum qui Sanguinarium Vorum concipiunt, conscientiae pro sua etiam virili parte solatio esset. Sed quidem aggregasse ea. Patrum loca (quod &

P. Fer-

P. Ferdinandus de Salazar Anno 1622. aliquæ antea præstiterant) non quod ullam Piae Sententiae *Certitudinem* accedere posse ex iis locis arbitraretur: quando Romana Ecclesia vel post illorum aciem productam perrexit esse constans in relinquendo indecisam atque incertam huiusmodi controversiam; sed ut Thomistis demonstraret, ne in vetustis quidem Saeculis desiderari, qui Immaculae Conceptioni favisse videantur. Ceterum non se adeo in Eruditione & Critica Arte hospitem esse, quin subodorarit, ad Apostolica tempora minime pertinere Acta Passionis *Sancti Andreae*; atque ex *Immaculae, Impollutae*, aliisque huiusmodi titulis a Graecis aut Latinis Scriptoribus Deiparae tributis, nihil certi extundi posse, ut *Immaculata* etiam credatur illius Conceptio. *Sancti Irenaei* verba fortasse fateretur a se producta, ut apparatus cresceret, quamquam conscius foret, nullum eis locum esse in praesenti controversia. Nimis sero se animadvertisse, adulteratam a se incaute fuisse *Tertulliani* sententiam, quasi is scripserit de Eva: *Us abjecta pareret, & in doloribus pareret Verbum, Diaboli semen illi fuit*, quum ille haec habeat: *Us abjecta pareret, & in doloribus pareret, verbum Diaboli semen illi fuit*. Scilicet ibi comparatio instituitur inter verbum Serpentis, sive Diaboli ad Evam, & verbum Angeli ad Mariam, *Crediderat Eva Serpenti, credidit Maria Gabrieli*; ac proinde se vigilantem somniasse, dictum a Tertulliano, *Mariam non habuisse in carne antiqui seminis semen antiquum*; quibus verbis, *peccatum originis utrique Evidenter excludit, hoc enim est Tertulliano semen Diaboli*. Praeterea in Homilia tributa *Origeni* eandem duntaxat occurrere comparisonem inter Evam Serpenti credentem, & Mariam Angelo credentem. Se profecto non ignorasse, Librum de Cardinalibus Christi operibus foetum esse *Arnoldi Abbatis Bonae Vallis*, qui Sancti Bernardi aevo floruit; attamen se id dissimulasse, sperando futuros, qui *Sanctum Cyprianum* adhuc crederent ejusdem Libri Auctorem. Haec atque alia horum similia, quae praetereo, dicturus ille fortassis est.

Quod si aestuantem eum deprehendimus pag. 151. in Lamprium, quod hic negarit, ex Libro contra quinque Haereses, Praeferentem Virginis certo deduci posse: ille fortassis re melius perspecta in aliam postea sententiam concessurus credendus est. Et certe mirari cogeremur, quei homines docti iis utantur locis, quae non solum a Sententia sua abhorrent, eamque laedunt, sed etiam doctrinae Ecclesiae adversari videntur: nisi notum foret, quousque abripere ingenium hominum possit praeconceptus cordis vehemens affectus. Haec

Tem V.

M m m

funt

sunt de Christo Domino antiqui Auctoris verba contra Manichaeum. *Quid est, quod te promouet in mea Natiuitate? Non sum Libidinis conceptus cupiditate. Ego Matrem, a qua nascerer, feci; ego viam meo itineri praeparavi, atque MUNDAVI. Hoc est Spiritu Sancto obumbrante eam, ab omni inquinamento purgavi, quum Matrem meam feci, atque in ea conceptus fui. Hanc, quam despicias Manichae, Mater mea est, sed manu fabricata est mea. Si posui inquinari, cum eam facerem (idest cum eam facerem Matrem) posui inquinari, cum ex ea nascerer. Sicut transitu meo illius non est corrupta Virginitas, sic mea ibi non est maculata maiestas. Si Solis radius cloacarum sordes desiccate novit, eis inquinari non novit quanto magis splendor lucis aeternae, in quo nihil inquinamenti incurrit, quocumque radiaverit, MUNDARE potest, ipse pollui non potest? Scire, unde sordes in Virgine, ubi non est concubitus cum homine patre? Unde sordes in ea, quae nec concipiendo libidinem, nec pariendo est passa dolorem? &c. Sicut ille natus est SOLUS, inter mortuos Liber: sic istius, ex qua natus est, Moris pudor Solus est integer. Eva inobediens meruit poenam, Maria obediendo consecuta est Gratiā. Illa gustando prohibitum maledicta; haec credendo Angelo est benedicta. Haec omnia attente perpendantur. Nihil aliud inde exculpere possis, nisi Beatam Mariam in Conceptione Christi ab omni sorde fuisse Mundatam: quam sententiam tradidisse videtur & Nazianzenus in Orat. 38. de Christi Natiuitate, ubi sic de Christo ait: *Humana omnia, excepto peccato, suscepit: conceptus quidem ex Virgine, corpore & animo praepurgata.* Idem quoque tradiderunt alii, quos memorat Ferdinandus Salazar Argum. XII. Cap. 41. Can. 4. Paria insuper insinuassee videtur nuper memoratus Arnoldus Abbas Bonae Vallis in verbis ab ipso Migliaccio sub Cypriani nomine productis, ubi Deipara dicitur post partum satisfacisse Legi Purificationis, quasi cum aliis mulieribus esset ei in hoc opere ratio similis, quum ipsa in Conceptione Christi caruerit voluptate. Propterea subdit: *Nihil in hac re perit ultio, nec praecedens delectatio expetiit poenarum usum. Spiritu Sancto obumbrante, Incendium originale extinctum est; ideoque innoxiam affligi non deuit; nec sustinebat iustitia, ut illud vas electionis communibus lassaretur iniuriis, quoniam plurimum a ceteris differens, natura communicabat, non culpa.* Quae heic Culpa dicitur, non est originalis, sed quidem Puerperarum, uti Scriptura loquitur, *Peccatum*, praecipiente Domino Levit. XII. 6. ut expletis diebus purificationis deferant agnum anniculum in holocaustum, & pullum columbarum, sive turturem pro Peccato. Redeo ad*

ad Auctorem Libri contra quinque Haereses. Obijciebat Manichaeus, indignum esse Deo nasci ex Muliere, & inquinari fordidus, quibus tum in libidinosa conceptione, tum in partu foemina obnoxia est. Nihil horum accidisse ait Christianus Scriptor; nam Christus Mariam *Gratia* praecoccupaverat, quam *Gratiam* obediendo Dei mandatis per Angelum nuntiatis ipsa consecuta est; eaque ratione viam suo itinervi praeparaverat, atque Mundavit. Neque is Libidinis conceptus fuit cupiditate. Neque in partu ullae fordes fuerunt; quippe Maria intacta virginitate Christum peperit. Quando etiam daremus, referendum esse fabricata ad tempus, quo Maria concepta fuit, aditum huc non haberet Praeservatio, sed quidem Sanctificatio; inquit enim Mundavi, & Mundari potui; nihil autem Mundatur, nisi quod antea inquinatum erat. Propior tamen sensui illius Auctoris est dicere, Matrem Domini fabricatam, & praeparatam fuisse, non quando Maria concepta fuit in utero Sanctae Annae, sed quando ad eam missus est Gabriel; tunc enim illam fecit Matrem suam, quum illam Mundavis per Gratiam, quam Maria tunc solum obediendo consecuta est, & credendo Angelo facta est benedicta. Porro omnem ambiguitatem deinde tollunt ea verba de Christo, qui natus est Solus inter mortuos Liber, idest Solus a Peccato Liber; quod tot alii Patres antea & post tradiderunt. Quo ergo abeant petulantia in Lampridium Migliaccii distertia ad hunc locum, & quid de eo dicendum sit, dum postrema ea verba dissimulat, satis intelligis. Sed quia hinc aliquis inferre posset, inquinatam fuisse Virginem, quo tempore nuntius ad eam missus est Angelus Gabriel, factaque fuit Mater Filii Dei, locum heic habitura est doctrina Sancti Thomae, cujus sunt verba 3. p. Qu. 27. Art. 3. ad 3. Dicendum, quod Spiritus Sanctus in Beata Virgine duplicem Purgationem fecit. Unam quidem quasi praeparatoriam ad Christi Conceptionem, quas non fuit ab aliqua impuritate culpae vel fomitis, sed mentem ejus magis in unum colligens, & a multitudine sustollens. Nam & Angeli purgari dicuntur, in quibus nulla impuritas invenitur, ut Dionysius dicit 6. c. Eccles. Hierarch. Aliam vero purgationem operatus est in ea Spiritus Sanctus mediantem Conceptione Christi, quae est Spiritus Sancti opus. Et secundum hanc potest dici, quod purgavit eam totaliter a fomite.

Locum ab omnibus laudatum ex Oratione Sancti Joannis Damasceni de Nativitate Virginis etiam Migliaccius profert, nempe: *Natura Gratiae foetum aneverttere minime ausa est; verum tantisper expectavit, dum Gratia fructum suum produxisset. Siquidem oportebat eam*

Primogenitam in lucem edi, quae rerum omnium conditarum Primogenitum, in quo omnia coagmentata sunt, paritura erat. Subdit Canonikus: *Quid clarius pro Pia Sententia desiderari possit, penitus ignoro.* Sed quamvis & ista ad *Probabilitatem* Piae Sententiae conciliandam merito adhibeantur, nullam tamen *Certitudinem* praestare possunt: Nam si in his Migliaccius tam clare expressam videt *Praeservationem* Virginis, clare alii, & fortasse clarius, *Sanctificationem* deprehendent: Quotiescumque enim imaginemur, loqui Damascenum de Conceptione Virginis, ejus loci sensus hic erit: Natura non ausa est efformare aut animare foetum Mariae, nisi postquam Gratia Mariam produxit. Nonne heic habes hircocervum? Nondum naturaliter existebat Maria, & nihilominus in Mariam Gratia illapsa erat. Imaginationem hanc antea exposuit Sanctus Thomas in 3. dist. 3. qu. 1. art. 1. negando, *Beatam Virginem ante animationem fuisse sanctificatam*, eique adstipulantur Suarius, aliique Theologi. Mitto inquirere, an ad Naturam referri possit animatio, quum Anima a Deo creata inferatur in Corpus. Quenam ergo Damasceni mens? Mariam fuisse in utero *Sanctificatam*, antequam nasceretur; non enim ausa est Natura eam in lucem edere, nisi Gratia eandem antea sanctificasset. Et certe de *Nativitate* Virginis est titulus Homiliae, atque de ea, non vero de Conceptione, est ibi sermo. *Quoniam*, inquit Damascenus, *futurum erat, ut Dei Genitrix Virgo ex Anna Nasceretur, Natura Gratiae germen antevertere non ausa est &c. Siquidem oportebat, eam Primogenitam in lucem edi, sive Nasci.* Non ergo de Conceptione, sed quidem de *Nativitate* Virginis, heic agitur; & Sanctificata per *Gratiam* dicitur Virgo, antequam Natura eam in lucem ederet. Luculentius autem apparet, non aliam fuisse Damasceno mentem, quando cum aliis Sanctis Patribus concors & ipse scripserit Homil. in Sabbatum Sanctum Cap. 20. *Deus quippe Verbum, ipse nostri conditor, omnia nostra nostri causa in se suscipiens, nostrasque aegritudines expertus, cum similis nobis existeret sine Peccato, Legem implevit, SOLUS inter homines a Peccato Liber, ac proinde nec mori obnoxius.* Hisce verbis subtexenda sunt, quae idem Sanctus vir habet Hom. II. in Dormitionem B. Mariae Virginis, ubi ait: *Nam quae veram vitam cunctis protulit, quae tandem mori subdita fuisset? Sed cedit Legi ab eo latet, quem genuit; & ut Filia veteris Adam, Paternam Sententiam subiit.* Reliqua a Migliaccio adducta non attingo, quae emunctioris naris viri expendent, si quando hac de re judicium solenne instituitur. Praetereundum tamen non est, eundem Canonicum fortassis agnitu-

gniturum, sed ludum luisse, quum pag. 140. Aedituos Panormitanae Ecclesiae lepide in scaenam traxit, quasi ii eludere se posse putarint auctoritatem Sanctorum Patrum, qui *Solum* Christum Dominum originalis labis expertem agnovere: ex eo quod idem Christus dicatur in Hymno Angelico *Tu Solus Sanctus*, quum tamen & *Sancti* appellentur homines consummatae virtutis; ille *per essentiam*, isti *per gratiam*; & *Soli Deo honor & gloria* exhibenda sit, quum tamen & *Sanctis* honor exhibeatur. Nam is jamdiu novit, & pro comperto habet, hisce nihil evinci posse in praesenti controversia, quando Patres discrete causam memorant, cur *Solus* Filius Dei nullam in sua Conceptione maculam contraxerit; nempe quia non ex virili semine, non ex concupiscentia carnis, sed obumbrante Spiritu Sancto, Unus & Solus in Virginis utero conceptus fuit. *Nulla voluptate carnalis concupiscentiae seminatus sive conceptus, & ideo nullum peccatum originale trahens*, inquit de eo Sanctus Augustinus in Enchiridio de Fide Cap. 41. addens infra Cap. 48. *Solus potuit ita nasci, ut ei non opus esset renasci*. Idem ille repetit in aliis compluribus locis. Quam doctrinam Sancti quoque Ambrosius, Leo Magnus, Gregorius Magnus, atque alii Patres, & Thomas Aquinas tradiderunt, ac praecipue Sanctus Fulgentius docuit num. 16. & 17. in Lib. de Fide ad Petrum, qui olim Augustino tribuebatur. Sunt etiam ejusdem Fulgentii verba n. 69. *Firmissime tene, & nullatenus dubites, omnem hominem, qui per concubitum viri & mulieris concipitur, cum originali peccato nasci, impietati subditum, mortique subiectum &c. A qua ira nullus liberatur, nisi per fidem Mediatoris &c. qui sine peccato conceptus, sine peccato natus, sine peccato mortuus &c.* Quare non a ludente Migliaccio subfidium heic petant Piae Sententiae assertores, sed quidem a Salazario in Defens. Immac. Concept. Cap. 41. num. 36. a Porrecta in Comment. ad 1. 2. S. Thomae qu. 81. art. 3. atque ab aliis Theologis, qui probabilem solutionem adhibent ad hujusmodi SS. Patrum loca.

Ad *Votum Sanguinarium* (a se tamen nunquam emissum) progreditur tandem Canonicus Siculus Diss. VII. Sed nobis heic neutiquam immorandum, postquam ille nihil aliud praestitit, nisi quae in hanc rem doctissimus vir Parthenotimus Theologica gravitate dissestuerat, in aciem rursus declamatoria levitate educere, iisque addere ornamenti loco quaecumque in os incurrerunt dicteria, sarcasmos, atque convicia. Dissecta, ut reor, Parthenotimi mole, Migliaccianam quoque prostratam mihi persuadeo. Quare tantum superest, ut pauca, quae peculiaria excogitavit Migliaccius, ad examen adducamus.

Ejusdem

Ejusdem Dissertationis VII. Cap. 2. nobis exhibetur impius Tyrannus, qui in odium cultus Deiparae per Piam Sententiam exhibiti, eandem jubet a Fidei quopiam improbari, scilicet aegerrime ferens, tanto Christiani Populi plausu id Mysterium frequentari. Eo casu nemini dubium, quin Fidei Praeceptum publice profrendae nos urgeat, ut dura quaeque sustineamus, ne Piam Sententiam improbemus, in quo Martyrio perferendo, quamvis laus praecipua Fidei in Martyre esset, suas tamen partes obiret etiam Pietas, qua nec vellet, vel ubi cetera desint, Deiparae Cultum deprimi, vel labefactari. Sed quid ait insignis iste Theologus: Nemini dubium? Immo id solum nemini dubium futurum est, male haec omnia efferri, quippe sine ulla distinctione, immo ea confusione, ut Christi Fideles rapi in errorem possint. Primo: si quisquam adigere nos velit ad affirmandum, non deberi Cultum Hyperduliae Beatissimae Virgini, neque utile atque laudabile esse ad illius intercessionem confugere: danda est potius vita, quum ejusmodi Cultus & Invocatio ad Fidei Dogmata spectent, & pro ista causa moriens, Martyr erit dicendus. Secundo: ubi quis velit, me Impiam aut Haeticam appellare Piam Sententiam, tunc, uti animadvertit Lampridius Cap. XVII. pag. 130. videtur mors potius eligenda. Praestaret tamen consulere prius Apostolicam Sedem, quando mors etiam toleranda videtur, ne Impia aut Haetica dicatur contraria Thomistarum de Sanctificatione Sententia. Tertio: si tantummodo Tyrannus mortem comminaretur sustinenti Piam de Praeservatione Sententiam Veram, aut Certam esse, & Virginem sub ea significatione publice colere non cessanti: gravissime fallitur Migliaccius, dum spem Martyrii facit pro ea Veritate aut Certitudine occumbere volentibus. Vide Eminentiss. Lambertinum, qui Lib. III. Cap. 19. num. 12. & sequ. de serv. Dei Canon. docet, Martyrem non esse, qui moritur pro Opinione aut Sententia adhuc ab Ecclesia non definita. Tum num. 14. addit, quod, usquequo controversia ab Ecclesia definita non est, ille, qui tuetur Beatissimae Virginis servationem a Peccato originali in sua Conceptione, non potest non habere, Immo TENETUR habere formidinem de opposita Sententia: ex quo nimirum infertur, morientem ob dictam causam Martyrum Catalogo non esse adscribendum, usi late Hurtado &c. Addendum est, Theophilo Raynaudo praeeptum fuisse, ut expungeret id, quod scripserat, scilicet: eum futurum Martyrem, cui mors intentaretur, nisi Piam Sententiam de Conceptione Beatae Mariae Virginis Immaculata improbare: Animadvertite illud Improbare: Caveant ergo ab hujusmodi Doctore Sicali.

Ecque

Eoque magis cavendum est eis, nam si vera ac solida sunt, ut mihi persuadeo, quae Lampridius, & ego in praeteritis colloquiis statuimus, qui pro Piae Sententiae tutela moreretur, non solum Martyribus adjungendus non esset, sed etiam Imprudentiae & Peccati reus foret habendus. Nihil aliud sane eam dicas nisi *Sententiam*, sive *Opinionem*, quae *formidinem Erroris* minime excludit. Exploratum autem puto, non Licere pro Opinionum tutela mortem oppetere; & Pietatem in Vitium deflectere, ubi Piam Sententiam tueri velit Sanguinis profusione. At inquit Migliaccius pag. 205. *Constat autem per Fidem, Deo gratum esse Cultum erga Deiparam, erga Deiparam, inquam, peccati originalis expertem. Id juxta Decreta Pontificum ab ipso Lampridio non semel didicimus.* Caveant, rursus ajo, Siculi ab hujusmodi Doctore, qui ab affectibus suis seductus ad suam gentem decipiendam praecipiti cursu fertur. Neque *Constat per Fidem*, Deo gratum esse Cultum erga Deiparam uti peccati originalis expertem; neque id usquam Lampridius affirmavit: aliter nulla amplius restaret de hac re disputatio. Tunc per Fidem constabit, ejusmodi Cultum Deo gratum esse, si Apostolica Sedes definiendo controversiam, pro Pia Sententia pronuntiet. Interea Cultus est Opinativus, Pietas Opinativa: hoc est, tot motiva Probabilitatis in Piam Sententiam confluunt, ut Prudentia Ecclesiae laudabilem putet ejusmodi Pietatem, & commendet Cultum secundum eam Sententiam Virgini exhibitum. Nos autem recte Opinamur, non vero ex Fide credimus, Cultum ejusmodi Deo placere. Sed nihil refert funem contentionis longius producere cum Theologo, qui tanta cum petulantia & ostentatione ingenii ista pertractat, neque hactenus didicit, innumera esse, quae in Ecclesia Dei ad Pietatem ac Religionem spectant, dum Sanctos, eorumque Imagines & Reliquias colimus, neque tamen ad Fidei doctrinam referuntur, neque pro iis fas est Sanguinem nostrum impendere.

Subdit ille deinde Cap. III. pag. 208. occurrere posse circumstantias, in quibus Piae Sententiae Certitudinem Fidelium poene omnium mentibus alie defixam Improbare, aut cavillis laceffere, grave Pusillis mentibus Scandalum pariat. In hisce casibus, inquit, & Caritas & Pietas postulant, ut jugulum Licetoribus offeratur. Sed nugas ille nobis deprædicat. Nullum occurrere heic potest Scandalum, quando non probans Piam Sententiam dicat, se nescire, verane sit, an falsa, quum ipsa Romanorum Pontificum Decreta allegando, ostendi possit, in Incertitudine adhuc eandem Sententiam versari. Immo neque Scandalum

acci-

accidet, si adactus coram Tyranno Fidelis proteſtetur, ſe credere non *Praeſervationem*, ſed contrariam de *Sanctificatione* Opinionem, quando ipſa Romana Eccleſia interdixit, ne Impietatis aut Erroris altera haec Opinio accuſetur, aut ejus ſeſtatoribus Peccatum obijciatur. Praeterea, ut vitetur Puſillorum Scandalum, nemo teneretur ad nimis ardua, quale foret facere vitae aut fortunarum jaſturam. Immo Gregorius Magnus in Homilia 7. ſuper Ezechiel. ſcribit: *In quantum ſine Peccato poſſumus, viſare proximorum Scandalum debemus.* Peccatum vero foret, vitam, cujus domini non ſumus, ob ſtultas tantummodo Puſillorum imaginationes velle prodigere. Pergit Migliaccius Cap. IV. contendere: *Poſſe licite & cum laude ſanguinem fundi pro ruendo Feſto ab Eccleſia indicto ſecundum Piam de Intemperata Conceptione Sententiam.* Immo inſtanti Tyranno, ut Feſtum ejusmodi reprobumus, praestare millies mori, quam morem gerere. Ut hoc oſtendat, in longam diſputationem ſe conjicit a Theologis diverſo ſtudio agitatam, an Lex humana obliget cum vitae diſcrimine. Verba ſerere non heic eſt mihi animus. Id unum habeto. Si Tyrannus ſecures minetur, niſi improbes Cultum ex Fidei decretis debitum Deiparae, aut neget tributam Eccleſiae a Deo auctoritatem indicendi Feſtivities ſacras: tunc tibi mors potius eligenda. Sin ille hoc tantum velit, non celebrandum eſſe Feſtum Conceptionis, quia Sententiam Piam ille improbat, & a te aperte aut tacite improbandam jubet: tunc violentiae cedendum eſt, & Prudentia expoſcit, ut a Feſto illo celebrando abſtineas, ſervesque vitam tuam. Nam Eccleſiaſtica Praecepta, uti toties diximus, quum mortis periculum imminet, plerumque non ſolum non obligant, ſed etiam vetant, ne cum tanto Fidelium detrimento obſerventur. Eoque minus in caſu iſto mors eſt eligenda; nam Devotioni tuae erga Immaculatam Virginis Conceptionem tu alia ratione conſulere poteſ. Ad haec falſum eſt, ab Eccleſia praecipi peragendum ab omnibus Chriſti Fidelibus Feſtum Conceptionis ſecundum Piam Sententiam. Licet adhuc illud celebrare ſub ſignificatione *Sanctificationis*; proptereaque non te adigit Eccleſia ad probandum Objectum hujus Feſti ad Scotiſticae Sententiae normam; ſed quidem poſtulat, ut tempori & violentiae cedens, vitam tuam imprudenter non projicias. Audiendus eſt etiam Migliaccius, quum Diſc. VIII. Cap. 1. Patronum producit Pupilli & Viduae vitam & bona omnia in judicio tuentem. Fac, inquit, ut de maximi momenti rebus, vita ſcilicet, & bonis omnibus clientum in judicio diſceperetur, & praepoſens Adverſarius Patronum ab eorum patrocinio ſuſcipiendo morris

morsis comminatione deterreat. Quoruscunque summam ejus Caritatem laudibus non extolleret, qui se interim potius sineret, quam Pupilli aut Viduae tam grandis aleae causam deferere? Panormitanos ingeniosissimos viros fungorum loco habeat Theologus iste necesse est, quando eis ejusmodi doctrinam propinat. Si comminatio ista accideret, deferenda sane non est Patrono tutela Pupilli & Viduae, five cujuscumque alterius personae; sed is confugere ad Principem debet, qui injustum adversarium severa animadversione comprimet, periculoque Patronum eripiet. Sin Princeps muneri suo heic desit, aut Tyrannus ejus preces & querelas contemnat: tunc Patronus ille, dum Prudens sit, patrocinio renuntiare debet; & ubi pervicaciter tueri pergens clientes, Vitae potius iacturam pati velit, non Prudens, non laudandus, sed Demens dicendus erit, & ex evidenti quidem ratione. Nam ex ejus morte nihilo melior fieret clientum causa, atque is interea omnium maximum detrimentum sibi conscisceret sine ullo clientum fructu.

Haec habes reponenda Migliaccio; cetera enim, ut dixi, quae is longa oratione persequitur, petita sunt e gazophylacio P. Parthenotimi, & enormi dicacitate, miroque fastu proposita, confutatione non amplius indigent. Miratus autem fuisset, si ab eloquentissimo isto Theologo praetermissum vidissem locum illum topicum, ad quem quisque Voti Sanguinarij patronus hactenus declinavit, objiciens Lampridio aut nullam, aut exilem Devotionem & Pietatem erga Beatissimam Dei Matrem. Ejusmodi calumniae sciat sese obnoxium esse, quicumque Excessus in cultum & invocationem Sanctorum irreperentes vel levi brachio attingere velit. Quot & quanta Lampridius praemiserit in laudem Deiparae, Cultusque, & Devotionis erga illam, jam non semel audisti. Quam inique nihilominus in eum declamarint Censores, memineris. Unum restabat jaculum, quod unus Migliaccius sibi intorquendum fumsit. Videlicet a Muratorio in Spiritualibus Exercitationibus pronuntiatum: *La Divozion di Maria Vergine non è già necessaria, nè d'obbligo. Quae propositio*, inquit ille, *si coram Theologis proferatur, fatcor, nigrum usque theta, sed non imprudens, languentis atque suspectae pietatis nosam effugiet.* Sed quid si Theologi ipsi statuunt, non aliunde, quam e Synagoga malignantium & desipientium prodiisse ejusmodi censuram? Photius in Bibliotheca n. 225. Beati Eulogii Episcopi Alexandrini Librum contra Severum & Timotheum Haereticos referens, Canonem hunc ab eo statutum ait, scilicet: *Scripta dijudicare non oportere ex parte, neque fragmenta*

quendam sumendo, ex his de tota Scriptoris mente iudicium ferendum. Calumniatoribus hoc familiare esse, addebat Eustathius Antiochenus Episcopus Lib. 6. adversus Arianos. Idem quoque Sanctus Basilus cavendum mandavit, scribens: *Non decere per aliquot fragmenta & divulsiones Scriptoris Pietatem iudicare.* Quin hanc aequitatis legem conculcaverit Siculus Censor, neutiquam dubitabis, dum animadvertis, quae ille divulgavit ex Muratorii textu, & quae dissimulavit, ut color aliquis esset calumniae censurae. En integrum Muratorii textum. *Ogni Cristiano Cattolico professi Divozione a qualche Santo suo Avvocato, e specialmente alla Vergine Santissima, che più degli altri Santi è cara all' Altissimo. Tutto bene: ma ci ha da star davanti una gran verità, insegnata a noi dalla Chiesa Santa, nostra buona Madre ed infallibil Maestra. Cioè che è utile e lodevole la Divozione de' Santi, e massimamente di Maria Santissima; ma questa Divozione non è già necessaria, nè d'obbligo. Senza un tale ajuto si può tanto e tanto salvare. All' incontro non solamente è utile e lodevole la Divozione alla Sacrosanta persona di Gesù Cristo, ma è anche necessaria, e d'obbligo ad ogni Cristiano &c.* Appello nunc Theologos omnes, & Panormitanos potissimum, e quibus plerique recte sentiunt, & recta docent, ut dicant, an non in Siculum accusatorem merito vertenda sint verba Vigilii Tapfenis Lib. IV. contra Eutychen, ubi ait: *Quae cum ita sint, inbonesto uteris officio; Religiosis callide insidiaris, ut superiora demendo, ac sequentia non addendo, ita media eligis, ut verba sententiis exuens, de eorum nuditate pro arbitrio ludas. Redde igitur suis omnia locis, & propria sententiis indumenta restituas; & noli insidiosis fraudibus calumnias innectere.* Dicant etiam, rogo an non iusto omnium Iudici rationem redditurus sit accusator, qui pauca ab eo textu distraxit, & reliqua dissimulavit, ut proximo suo apud incautos & ignaros imprudentiae & suspectae Pietatis notam detestanda hac arte inureret? Denique dicant, an insipientiae & malignitatis notam effugere possit, qui suspectae Pietatis arguit fratrem suum: ex eo ipso loco, in quo is Pietatem ipsam erga Sanctos, & Potissimum erga Beatissimam Virginem, commendat, *utilemque & laudabilem* proficitur? Prope est ut dicam, nisi in mentem parum sui compotem cadere haec non posse.

Neque is profecto negare ausus est, quin orthodoxa sit Muratorii sententia; eam tamen ad Populum deferri, Imprudentiae facinus putat. Immo Christianae Reipublicae interest haec vulgari, ut populus Christianus, dum commendari audit Devotionem erga Beatos Dei

Ser-

Servos, & Praecipue erga Mariam Sanctorum Reginam, simul addiscat quid differentiae intercedat inter illam Utilem atque Laudabilem, atque alteram Necessariam, quam Ecclesia habendam docet omnium Salvatori Christo Jesu. Immo Imprudentiae arguendus, qui Concilii Tridentini doctrinam depraedicandam negat, atque Heterodoxis novas oblatrandi in nos causas ministrat. Obstruxerant eis ora Tridentini Patres, sententiam Ecclesiae antiquissimam & puram de Sanctorum intercessione, invocatione, & cultu proponentes, & *bonum atque utile esse suppliciter eos invocare* tantummodo statuentes. Quid Haeretici dicerent, immo quid non dicerent, Theologum Catholicum nunc offendentes, qui ejusmodi doctrinam evulgandam negat, & evulgantem imprudentiae & suspectae Pietatis insinuat? Et potissimum quando tot magni nominis Theologi laudarunt quidem cultum & invocationem Sanctorum (quod & Muratorius fecit) nullum tamen commune Praeceptum sive obligationem jamdiu agnoverunt in hac Religionis parte, & libere id etiam praedicarunt. En quos ego novi, Jacobus Masenius, Franciscus Suarez, Martinus Becanus, & Dionysius Petavius, insignes Theologi e Societate Jesu. Idem publicis typis protestati sunt Adrianus & Petrus Walemburchii fratres, Natalis Alexander, Joannes Pontas, Bossuetus Episcopus Meldensis, Joannes Viguerius, Joannes Baptista du Hamel, & Cardinalis Gortius in Italico celebri Opere adversus Picininum Haeticum, & nuper P. D. Joannes Chrysostomus Trombelli Bononienfis Abbas Canonorum Regularium Salvatoris in Libris de cultu Sanctorum. Num hi Imprudentes, an qui Dogma hoc occultum vellet, ut cum Siculo Sanguas, cujus anomalias antea excussimus, alienam a Tridentino Concilio doctrinam, ac propositiones quasdam piorum virorum emolliendas, non exaltandas, misero Populo inculcare pergat? Evangelium certe, puramque Ecclesiae doctrinam erubescere nemo debet. Hanc ii tantummodo erubescunt, & evulgatam aegre ferunt, qui ab ea discedunt. Neque ullum pusillus Scandalum timendum unquam erit, ubi commendatam audiant *Devotionem erga Sanctas, & Praesertim erga Sanctissimam Dei Genitricem*; sed quidem sperandum fore, ut enixius studeant Necessariae Devotioni erga Jesum Christum, qui est summa Spes nostra; *non enim est, ut Apostolorum Princeps nos docuit Act. IV. 12. in alio aliqua salus; nec aliud nomen est sub caelo datum hominibus, in quo oporteat nos salvos fieri.* Si Muratorius Tridentinum Concilium sequitur, si Lampridius Romanorum Pontificum Decretis innititur in Quaestione de Virginis Conceptione: quae fors

futura sit contrariae Migliaccii, ejusque commilitonum Sententiae, tot diseriis saturatae, non incongruum erit conjicere. Unum restat, quod solatio esse possit Lampridio, consideranti, non tantummodo in se ipsum Literatorum postreimum, sed & in ipsos rei Literariae Antistites Migliaccium debacchari. Dixerat Lampridius Cap. XXI. pag. 161. ab Hispanica Inquisitione proscriptum fuisse temporibus nostris eximium Opus, & celebre Eruditionis Ecclesiasticae pronituarium, scilicet Acta Sanctorum a P. Bollando Soc. Jesu, ejusque Successoribus collecta & illustrata quam plurimis Tomis, sed subinde pristino honori restituta. Quid ad haec Migliaccius? *Perinde*, is ait Diff. VIII. Cap. 4. pag. 266. *quasi grande piaculum admisit Inquisitio Hispanica praescribendo (is proseribendo scripserit) Antuerpiensium Opus, quod deinde emendatum permisit, cum Neminem Eruditorum lateat, quos laconae, quos INEPTIAE, quae Intemperantioris Criticae Exorbitantiae Opus illud Inficiant. Paucis ab hinc annis, quum Romae essem, ad manus habui quaedam folia incerti Auctoris, e proelo adhuc recentia, quibus amariori stylo hujusmodi Eruditorum nonnulli errores & nugae proscindebantur: quae si quis legerit, serium certe ridebit, & dicet:*

Sunt apinae, tricaeque, & si quid vilius istis.

Sed Nemo Eruditorum erit, qui non in hoc homine multum incitiae certe parum verecundiae, offendat, quando is tam claros doctissimoque viros, eorumque volumina ob saniolem Criticam, atque ob Eruditionem uberrimam a melioribus quibusque probata, cachinnis excipit, ac temere proscindit. Levium profecto ingeniorum est, eos non ferre, qui Populum erroribus ab Ecclesia improbatis, Historiam Ecclesiasticam fabulis liberare contendunt. Et immani quidem censura adversus eadem Acta Sanctorum insurrexit P. Sebastianus a S. Paulo; sed rogandus est Migliaccius, ut legat *Responsonem* Cl. P. Papebrochii; tunc enim, si sapit, fortassis eum pudebit intemperantiae suae, ac discet, Ecclesiae Catholicae deceptores & destructores non tantum esse, qui fabulas, & potissimum qui sententias verae doctrinae adversantes spargunt, sed etiam qui sparsas refellendas & eradicandas negant. Neque ultra loquutus est Romanus Abbas, cujus sensa & argumenta literis Latinis a me mandata, mi Azevede, jam tenes. Vale,
Neapoli V. Non. Majas MDCCXLII.

Azevedo suo Ferdinandus Valdesius P. S.

EPISTOLA DECIMASEXTA.

OPPORTUNE accidit, Azevede amantissime, ut dum novissimae literae tuae aliquid novi a me peterent de Voto Sanguinario, non mihi longe quaerendum fuerit, quo tuis votis obsecundarem. Ante aliquot dies amicus meus Romanus Abbas legendum mihi tradiderat Opusculum Italica Lingua conscriptum, & ex Panormitana typographia emissum, cui titulus: *La Risposta senza Maschera al Signore Lodovico Antonio Muratori del P. Attardi Agostiniano*. Auctor Libelli vir Clarissimus, utpote qui ex aliis Libris illustre sibi nomen antea quaesierat; immo is Siculorum omnium doctissimus, uti fidem faciunt Epigrammata in ejus laudem composita, ibique edita, quippe ibi legitur.

Tu il maggior dosto sei del nostro Regno.

Festivum illius stilum dicas, urbanitatem quoque praefert adhibita ab illo pugnandi ratio. Post Opusculi lectionem eundem Romanum Abbatem adii, ut quae mea de illo sententia foret, exponerem; seu potius quid ipse sentiret, acciperem. Sed ille hisce me verbis praecipuavit: Agitur heic, mi Valdesi, de egregio viro, quo cum mihi ab ineunte aetate arcta intercedit amicitia, immo & summa necessitudo. Is uti ceteros Libros suos, ita & hunc ad me misit, meumque pro sua humanitate de illo judicium poposcit. Quid ego rescripserim, quum voles, non te celabo. Me tunc rogante, ut sine mora voluptatis hujus compotem me faceret, is Epistolam suam exeruit, neque tantummodo legendam dedit, sed etiam describendam, si vellem, permisit. En ergo illius exemplum.

*Clarissimo Patri Bonaventurae Attardo Ordin. S. Augustini N. N.
bene omnia agere.*

„ **P**ROPE fuit, ut de diurno silentio tuo conquererer, celeberrime Attarde, quum anxietatem omnem mihi eriperunt literae tuae novissime ad me datae. Gratissimae eae quidem,
„ sed gratiores, quod una cum eis Opusculum nuper a te compositum acceperim. Quod solum dolui, primus legere non potui; alia
„ quip-

„ quippe exempla huc delata quam citissime fuerant, certantibus quibusque tua legere, tua mirari. Et quandoquidem iudicium meum consueta sinceritate, qua semper usus sum, paene extorques, quid mihi acciderit, fortassis legere non te pigebit.

„ Dum die quadam cum doctissimis quibusdam amicis meis versarer, in Libellum a te pro Voto Sanguinario conscriptum sermo deflexit. Erant, qui non una laude dignum asserabant; alii contra mirabantur, te, quem alioqui magni faciunt, & instituto & doctrina Sancti Augustini filium, in huiusmodi agone ab eo defecisse, quasi non omnia perspecta habeas, quae tantus Doctor tot in locis de hoc argumento scripta reliquit. Equidem jocandi causa reponeram: Putatisne, P. Attardum, tantae eruditionis virum, heic serio egisse? Mihi certe aliter videtur. Ad me quippe is scripsit, se ab huiusmodi controversia alienum, tot precibus eorum, qui Votum concipiunt, pulsatum fuisse, ut victas tandem dederit manus, & ad scribendum Opusculum hoc sese paene invitus contulerit, proditurus, non quod ipse intimo in corde sentiret, sed quod pro ea causa Advocatorum more adferri posset. Contra clamarunt omnes; ego vero in me recepi postera die ostendere, quam solida iustaque foret suspicio mea. Haec sane ludens primo loquutus fueram, ac ludum continuare animus fuit; verum, Attarde carissime, forsitan ridebis, ubi audiveris post novum Libri tui examen suspensionem meam ita adauctam, ut in certam quasi persuasionem conversa fuerit. Itaque altera die ad amicos regressus aiebam. Nemo ex vobis est, ut reor, cui perspectissima non sit P. Attardi singularis eruditio, & subactum iudicium. Ubi in ejus Opusculo offendatis rationes nullius momenti, inanes difficultates, Sanctorum Patrum verba perperam adhibita: quid aliud excogitandum est, nisi ipsum inservile tempori, & amicorum importunitati cessasse, ea tamen pugnantis specie delecta, quae vera & efficax praeoccupatis nonnullorum affectibus videretur, ficta vero & ludicra deprehenderetur ab aliis? Quod haecenus dixi, confirmandum nunc mihi suscipio.

„ Inquit is pag. 19. debuisse Lampridium imitari moderationem Sancti Augustini, qui de *Peccatis* loquens professus est, se nolle de Maria Virgine loqui. En ejus verba Lib. de Nat. & Gratia Cap. 35. *Excepta itaque Sancta Virgine MARIA, de qua propter bonorem Domini, nullam prorsum, cum de Peccatis agitur, habere volo quaestionem. Unde (sive inde) enim scimus, quod ei plus gratiae collatum fuerit ad vincendum omni ex parte Peccatum, quae concipe-*

„ re,

„ *re, ac parere meruit, quem constat nullum habuisse Peccatum.* Ad
 „ *haec verba commentarium suum addit P. Attardus, inde inferens,*
 „ *Originalis quoque labis expertem fuisse Deiparam.* Sed quis non
 „ *agnoscat, perfunctorie ista ab eo fuisse prolata?* Primo is probe no-
 „ *verat, nunquam asseruisse Lampridium, Virginem Sanctissimam in-*
 „ *currisse Peccatum originale; immo is centies agnovit uti Piam ac*
 „ *Probabilem, immo & Probabiliorem altera, sententiam eximentium*
 „ *ab eadem macula Beatam Mariam. Unum ille contendit, Certitu-*
 „ *dine carere ejusmodi Sententiam. Secundo, omnium maxime reli-*
 „ *giosissimus vir compertum habebat, eo ipso in loco Sanctum Au-*
 „ *gustinum agere de Peccatis Actualibus, scilicet mortalibus atque ve-*
 „ *nalibus, non vero de Originali. Commemorabat Pelagius eos, qui*
 „ *non modo non peccasse, verum etiam iuste vixisse referuntur, Abel,*
 „ *Enoch &c. Annam filiam Phanuel, Elizabeth, ipsam etiam Domini*
 „ *ac Salvatoris nostri Matrem, quam dicebat sine peccato confiteri ne-*
 „ *cesse esse pietati. Quid Augustinus? Si omnes, ait, Sanctos & San-*
 „ *ctas, cum beic VIVERENT, congregare possemus, utrum essent si-*
 „ *ne peccato, quid fuisse responsuros putamus? Utrum hoc, quod iste*
 „ *dicit, an quod Johannes Apostolus? Rogo vos, quantalibet fuerint in*
 „ *hoc corpore excellentia sanctitatis, nonne una voce clamassent: Si di-*
 „ *xerimus, quia peccatum non habemus, nos ipsos decipimus, & veri-*
 „ *tas in nobis non est. Antea quoque dixerat, non frustra etiam ju-*
 „ *stos in oratione dicere: Dimitte nobis debita nostra, sicut & nos di-*
 „ *mittimus debitoribus nostris. Certe Christianus quisque, sive justus,*
 „ *sive injustus, dicere potest, se Peccatum non habere originis, quia*
 „ *renatus ex aqua & Spiritu Sancto, in hoc non decipitur. Respicit*
 „ *ergo illud Dimitte nobis debita nostra, atque illud Si dixerimus quia*
 „ *Peccatum non habemus, Peccata actualia, Peccata actionis & omis-*
 „ *sionis, & Peccata, ut inquit idem Augustinus, quae subinde igno-*
 „ *rantia vel infirmitate committuntur in vita hominis, non vero Pec-*
 „ *catum originis. Ab hisce Peccatis actualibus exceptam vult Augu-*
 „ *stinus beatissimam Salvatoris Matrem, eamque revera ipsorum fuisse*
 „ *expertem, dogma est Catholicae Religionis. De hisce ergo ibi*
 „ *disputatio erat, uti reliqua evincunt, quae praetereo. Tertio, ubi*
 „ *ad quaestionem de Peccato originali venit, exceptionem praedi-*
 „ *ctam Augustinus non adfert; immo contra sensisse deprehenditur.*
 „ *Cap. 48. ejusdem Operis de Natura & Gratia Pelagius memorans*
 „ *Apostoli verba Rom. V. 12. Per unum hominem peccatum intravit*
 „ *in mundum, & per peccatum mors, ita in Omnes homines pertran-*
 „ *sit,*

„ *fit, in quo Omnes peccaverunt, contendebat, cum dicuntur Omnes,*
 „ *non semper Omnes omnino NULO PRAETERMISSO intelligi*
 „ *oportere, huc advocando Apostolum ipsum infra dicentem: Sic &*
 „ *per unius justitiam in Omnes homines in justificationem vitae, quoniam*
 „ *tamen non Omnes justificentur. At Augustinus insurgens ait: Si-*
 „ *cus dictum est: Sicus per unius delictum in Omnes homines in con-*
 „ *demnationem, ut NULLUS PRAETERMITTERETUR: sic &*
 „ *in eo quod dictum est: per unius justitiam in Omnes homines in ju-*
 „ *stificationem vitae, NULLUS PRAETERMISSUS est; non quia*
 „ *Omnes in eum credunt, & Baptismo ejus abluuntur; sed quia Ne-*
 „ *mo justificatur nisi in eum credat, & Baptismo ejus abluatur. Si*
 „ *in Omnes homines ita Peccatum originis pertransiit, ut Nullo Prae-*
 „ *termisso, Omnes eadem damnatione teneantur: quid hac de re sen-*
 „ *terit Augustinus, jam intelligimus, nullaque dubitatio est, quin*
 „ *& P. Attardus hoc ante nos viderit, ac propterea loci illius men-*
 „ *tione facta ludum duntaxat agere voluerit. Et quamvis ille pag.*
 „ *80. rursus instet, omissum a Lampridio fuisse hunc Augustini lo-*
 „ *cum, quasi sibi contrarium, jam manu tetigisti, an revera ab aliis*
 „ *suis locis discors ibi sit Sanctus Doctor, & an Certitudo Piae Sen-*
 „ *tentiae inde elici possit. Liceat quidem adhibere haec verba ad au-*
 „ *gendam illius Probabilitatem, non vero ad Certitudinem ei concili-*
 „ *andam.*

„ Non dissimili stropha pergit doctissimus vir pag. 24. & sequ.
 „ inhonesta quorundam Siculorum adversus Lampridium scripta ex-
 „ cusare, ratione hac utens: *noi non siamo stati i primi a provocare,*
 „ *provocati siamo stati.* Putatisne, haec ex animo revera pronuntiata
 „ fuisse? Equidem non puto. Non ignorabat Attardus, quum primum
 „ Lamindus Pritanius Votum Sanguinarium obiter improbavit, nul-
 „ lum de Siculis verbum fuisse factum. Opinioni illi is tantummodo
 „ est adversatus; nemo ob id in judicium vocatus; nullus ex Siculis
 „ accusatus. Quod plus est, neque Pritanius, neque Lampridius rem
 „ contumeliis & maledictis egere. Detestandum hoc pugnandi genus
 „ uni Siculi postea asurparunt, atque illud nunquam ferendum prae
 „ ceteris P. Attardus novit, dum satis perspecta habet haec Origenis
 „ verba in fine Lib. I. contra Cellum: *Ceterum quid astinet respon-*
 „ *dere homini veritatis sermonem ad maledicta conviciaque detorquenti?*
 „ *Hoc enim non est disputatoris, sed plebej & indignum Philoso-*
 „ *pho visum, & furoris indicium: quum deberes rem propositam exa-*
 „ *minare candide, & quantum fieri potest nihil alienum ab ea dicere.*

„ De-

„ Deinde religiosissimus vir demonstrandum suscipit, Sententiam Piam
 „ non amplius esse *Opinionem dubiam*, sed *Sententiam Fidei valde vi-*
 „ *cinam*, quia ut habet Alexandri VII. Constitutio, *jam fere omnes*
 „ *Catholici eam amplectuntur*. Sed ubi clam interrogare P. Attardum
 „ nobis liceret, sincere, ut reor, is fateretur, haec ad pompam dici,
 „ neque per ea Sententiam Piam ad gradum ullum Certitudinis ha-
 „ stenus assurrexisse, contra clamantibus ipsis Romanorum Pontificum
 „ Constitutionibus. Academiae vero eandem amplectentes, nihil al-
 „ liud volunt, nisi eam uti altera Probabiliorem tueri: quod de a-
 „ liis quoque Scholae Opinionibus dicendum est. Neque ullum Sen-
 „ tentiae Piae pondus addit Fidelis Populi pia in illam inclinatio
 „ mentis; Populus enim indoctus eo fertur, quo Docti viri in Pieta-
 „ tis rebus ipsum impellunt. Anno proxime praeterito integrum fer-
 „ me Panormitanum Populum nullo negotio adduxere nonnulli hu-
 „ manis artibus usi (quod non antea factum) ad Votum Sanguina-
 „ rium amplectendum. Ex illius Populi consensu, quem P. Attardus
 „ pag. 50. non paucis Rhetoricis coloribus extollit: num honestum,
 „ licitumque, & Deo ac Virgini gratum evasit hujusmodi Votum?
 „ Apage. Immo circulatorias hasce artes ne ipsi quidem Attardo pro-
 „ batas fuisse mihi persuadeo, quum nihil causae profint, & contra
 „ vix Temeritatis abfolvas, dum in discrimen hominum Vitam ad-
 „ ducunt, Populo veluti Certa ea proponendo, quae adhuc in dispu-
 „ tatione versantur, & Apostolicae Sedis judicium expectant.

„ Ut autem evidentius intelligatis, P. Attardum speciosis dunta-
 „ xat armis usum fuisse, importunis amicis negare hoc officium non
 „ ausus: animadvertite, quid is habet pag. 39. Petit ille, ut Lam-
 „ pridius diserte edicat, Prudensne, an Imprudens sit Dubitatio de
 „ Veritate Piae Sententiae. Si postremum is asserat, causam obti-
 „ nuere Panormitani. Sin primum, Panormitanos minime de ea Ve-
 „ ritate dubitantes, uti imprudentes, stultos, ac superstitiosos ille ar-
 „ guet, eosque gravius laedet, atque ad iram provocabit. Haec At-
 „ tardus, quanquam conscius, Lampridium non semel confessum fuisse
 „ Prudenter credi, Prudenter depraedicari, atque defendi a suis as-
 „ seclis Piam Sententiam, dum tutela consistat in Scholasticorum ar-
 „ morum apparatu. Nulla est hac de re Lampridii controversia cum
 „ Panormitanis. De *Certitudine* tantum disputatur, ac de ista quin
 „ Prudens Dubitatio occurrat, nemo neget, qui sine praeoccupatis as-
 „ sectibus Sanctos Patres consulat, nobis a Deo post Divinas Scriptu-
 „ ras ad Veritatem duces relictos; & praesertim consideret, quid ha-

„ etenus tum de ista Sententia, tum de opposita, summi decrevere
 „ Pontifices. Quare ubi quisquam Sanguine proprio Piam Sententiam
 „ tueri velit, tunc eo magis Prudens Dubitatio insurgat necesse est,
 „ liceatne an non hujusmodi facinus. Rationes Dubitationis hujusce
 „ a Lampridio propositas nihil attinet refricare, dum eas insolutas
 „ P. Attardus dimittit, & nondum ostendit, ea Certitudine constare
 „ Piam Sententiam, pro qua Vitam impendere liceat. Atqui P. At-
 „ tardus pag. 45. negat *Hominum Vitam pretiosum, & ingentis pre-*
 „ *tii donum* esse, uti Lampridius scripserat, quando Sanctus Augusti-
 „ nus Lib. I. Cap. 16. de Lib. Arbit. *Corpus hominis partem vilissi-*
 „ *mam* appellavit. Lampridius vero (subdit Attardus) vorrebbe trat-
 „ tare il nostro Corpo da Padrone e non da Servo; non da Schiavo,
 „ ma da Signore, ed avvezzarlo alle morbidezze, alle lusinghe. Ecco
 „ come valuta la Vita del nostro Corpo. Nisi heic deprehenditis evi-
 „ dentius quam alibi jocantem Attardum, tarditatis ingenium ve-
 „ strum accusabo. Utique componere cum Anima Corpus nostrum si
 „ velimus, *partem vilissimam* appellare licebit: Sejunctum ab Anima,
 „ plus etiam vilescere dicas. Ast ubi Corpus cum Anima copulatum
 „ incedit, quod nos *Vivere*, seu *Vitam* dicimus, tunc alia adhibenda
 „ statera est, Augustinus non *Vitam Corporis*, sed *Corpus partem vi-*
 „ *lissimam* appellat. Finge tamen de Vita id dici. Nihil facilius,
 „ quam congerere veterum dicta de misera conditione Vitae nostrae,
 „ Corporisque nostri, Declamatorum more, qui eandem rem susci-
 „ piunt modo deprimendam, modo exaltandam, pro diverso videli-
 „ cet rerum aspectu. Sed ridebat, uti opinor, Attardus haec effun-
 „ dens; uno quippe stans pede, si voluisset, fassus fuisset, vivens ho-
 „ minis Corpus, sive Vitam hominis, ceteris temporalibus bonis prae-
 „ stare. Ipsemet Augustinus praecedenti Capite haec enumerans in-
 „ quit: *Ea autem sunt: Primo hoc Corpus, & ejus quae vocantur Bo-*
 „ *na, ut integra valetudo, acumen sensuum, vires, pulchritudo, & si*
 „ *qua sunt cetera, partim necessaria bonis Artibus, & ideo pluris pen-*
 „ *sanda, partim viliora &c.* Dies prius nos deficeret, si singula per-
 „ pendere velimus, quae nobilem Corporis conditionem commendant,
 „ dum viget illius unio cum Anima, sive mirabilem Physicam ipsius
 „ structuram spectantes, de qua multa habent S. Basilii in quadam
 „ Homilia sua, S. Ambrosius Lib. 6. Cap. 9. Examer. & Cassiodo-
 „ rius Lib. de Anima Cap. 16. sive ipsum uti habitaculum Animae
 „ considerantes, cui famulatur ad innumera peragenda, atque ad i-
 „ psam Vitam aeternam consequendam, & sine cujus famulatio &

„ con-

„ consortio Anima quid agere possit, quaeso edicite. Id nunc memi-
 „ nisse sufficiat, ab Apostolo 1. Cor. VI. 15. appellari *Corpora no-*
 „ *stra membra Christi*, ac *templa Spiritus Sancti*. Silicet, uti S. Au-
 „ gustinus ait Sermon. 18. de verb. Apost. *Propter Corpus Christi Cor-*
 „ *pore nostra membra sunt Christi. Propter inhabitantem Spiritum Chri-*
 „ *sti, Corpora nostra sunt Templum Spiritus Sancti*. Eaque tantae
 „ dignitatis, ut in Caelum transferenda sint, quum corruptibile hoc
 „ induet incorruptionem, & mortale hoc induet immortalitatem. Sed
 „ quid plura quaerimus? Homicidium & Suicidium quantopere dete-
 „ stentur divinae ac humanae leges, nemo ignorat. Controversiam
 „ denique heic omnem dirimit Dominus, inquit Joann. XV. 13.
 „ *Majorem hac dilectionem nemo habet, ut animam suam ponat quis*
 „ *pro amicis suis*. Potes impendere fortunas tuas, potes & Regnum:
 „ minoris ista erunt in comparatione Vitae, si des illam pro Deo.
 „ I nunc, & Corpus, sive Vitam hominis inficiare, si audes, ingens
 „ ac pretiosum hominis Bonum, quando majus sacrificium Deo prae-
 „ stari nequit, & idcirco meritis quibuslibet Confessorum merita Mar-
 „ tyrum Ecclesia praefert. Nihil horum latet P. Attardum. Confe-
 „ quens igitur est, ut is calamum suum joci tantum causa in Cor-
 „ poris, seu Vitae nostrae contemptum excurrere siverit, quasi levibus
 „ de causis, atque ad arbitrium nostrum eandem prodigere fas sit,
 „ & pro *Opinionibus*, hoc est pro incertis rebus, tantum ac tam
 „ certum Bonum dare, Imprudentia ac Temeritate careat. Atque
 „ haec ego dicenda habui; nam quae reliqua apud eundem P. At-
 „ tardum prostant, tantummodo velitationes hominis ludentis ipsa
 „ quoque videntur, ac vobis propterea discutienda relinquo. Neque
 „ plura addidi. Subsequentum tunc fuit amicorum murmur non leve,
 „ nonnullis suspicioni sive opinioni meae *assensum* praebentibus, aliis
 „ vero negantibus. Tuum nunc est, amantissime Attarde, qualis re-
 „ vera fuerit, sive animus tuus, mihi sincere aperire; fidem enim
 „ meam obligo, si forte probes quae dixi, me nunquam confessione
 „ tua usurum, sed mihi duntaxat gratulaturum, quod praesenserim,
 „ te non aliam fovere sententiam, quam quae Augustinianum, egre-
 „ giumque virum deceat. Vale. Neapoli III. Non. Apr. MDCCXLII.

Quomodo, & quam diversis studiis procedant negotia haec, mi
 Azevede, ex istis intelliges. Mihi interea nuntiatum est, aliam nu-
 per emerisse Sicularum Dissertationem adversus Lampridium, quam
 mihi comparare non desinam. Atque heic excidit mihi vox illa *Si-*
cularum, quum tamen ea nihil aliud significet, nisi Panormitanos;

colque non omnes, Sanguinario Voto dicatos. Quid enim reliqui Siculi heic sentiant, incertum est mihi. Haec dabam Neapoli Prædie. Id. Majas MDCCXLII.

Azevedo dilectissimo Valdesius.

EPISTOLA DECIMASEPTIMA.

MULTA ante paucos dies ad te scripseram, Azevede Amantissime. Differente in dies discessum navita, cui literas eram traditurus, novas addere statui. Nam interea supervenit Liber, Panormitanis typis hoc eodem Anno 1742. proculus, cui titulus: *Lampridius ad trusinam revocatus, Auctore Josepho Ignatio Milanesi Soc. Jesu, in Panormitana Collegii Maximi Academia Theologiae Professore*. Ostendendam is sibi sumit *Inmaculatae Mariae Conceptionis Certitudinem, ejusdem Immunitatem a Debito Proximo Originalis culpa contrahendae*. Fateor, tantum mihi temporis & patientiae non fuit, ut spissum Opus continuata lectione percurrerem: quænam enim voluptas, qui fructus, aliis verbis repetita legere, quæ alii antea, neque semel, nobis exhibuerant? Paucis ergo accipe, quodnam fuerit meum de hoc Libro judicium. In isto sane Auctore neque scientiam, neque eruditionem desideres. Magistralis pro more illius stylus, & stylus quidem in iram & prope in contumelias pronus. Optandum tamen foret, ut qui Theologiam profitentur, eamque alios edocturi sunt, puriori doctrinae studerent enixius, & ab iis, quæ Superstitionis speciem referunt, diligentius sibi caverent. Sanctissimam Dei Parentem *Spem nostram* appellare, fas licitumque dixerat Lampridius. Quum enim Intercessionem Sanctorum apud Deum Ecclesia semper laudaverit, utilemque Christiano homini censuerit, iusta *Spes* sit necesse est, quam in eorum precibus collocamus, & præsertim in Deiparae praesidio, quæ supra ceteros Sanctos gratiam invenit in oculis Dei. At ipsam dicere *Spem Unicam Peccatorum*, quo nomine donatur in Sermone quodam, S. Augustino perperam tributo, Lampridius minime probaverat, atque emolliendam ejusmodi appellationem fenserat, ita ut significet *Spem grandem*, non vero *Solam* Peccatorum. Insurgit heic P. Milanesi. Cap. VI. §. 85. *delicatissimam* Lam-

Lampridii *conscientiam*, ejusque religionem ac timorem ridens, quando Sancti Patres Caelorum Portam dixere Virginem Sanctissimam, & S. Bernardus *Unicam Peccatorum Advocatam* appellavit. Sed viro doctissimo animadvertendum erat, laudabili translatione Mariam commendari uti Caelorum Portam, quippe quae Salvatorem genuit, per quem aperti sunt Caeli, nobisque aditus est ad beatissimum illud Regnum: *Unica* vero *Peccatorum Advocata* quum dicitur, emollienda & heic est hujusmodi phrasis, ut *potentem* & *grandem* significet, non vero *Solam*. Alioqui mentientem faciemus Joannem Apostolum, dum testatur (1. Joann. 11. 1.) nos, si peccaverimus, *habere Advocatum apud Patrem, Jesum Christum justum*. Rursum Catholicae doctrinae adversabimur, quae non Virginem tantummodo, sed & ceteros Sanctos agnoscit nostros apud Deum Advocatos, neque de eorum patrocinio dubitat.

Ad haec ait P. Milanesi, Academiam Parisiensem Anno 1736. instaurasse decretum de celebranda Missa solemni *die sacra B. Mariae Immaculatae Virginis Conceptioni, ut religiosam* (hoc est *religiosa*) *Populi Christiani in gloriosissimam Dei Genitricem, UNAM HUMANI GENERIS SPEM, Patronam, ac Matrem, Devotio, Pietas, & Caritas in dies magis foveatur, ac augeatur*. Subinde vero religiosus vir addit: *Facultas Sorbonica non est anicula quaedam, quae fuso assidens fabulas puellulis narret. Coetus est perillustrium virorum: quem si pro mille Lampridiis habendum dixeris, vix ullus falsi te postulaverit*. Equidem tanti ego facio scientiam & sapientiam celeberrimae Facultatis Parisiensis, ut vix ad credendum inducar, excidisse ei tam crudam, adeoque exorbitantem sententiam. Attamen quum P. Milanesius de hoc dubitare nos non sinat, atque decretum illud Parisiensibus etiam typis commissum affirmet: heic appello ego universos Theologos non summi tantum, sed & infimi subsellii, rogaturus, ut edicant, sitne toleranda, an potius recensenda inter Haereses contraria adeo divinis Scripturis, & Dogmatis Ecclesiae Catholicae, doctrina. Quis enim non illico videat ac fateatur, novum his verbis nobis obtrudi Evangelium, Evangelio Catholicae Ecclesiae nimis injurium, ac per ea verba destrui divinam *Spei* Virtutem, cujus proprium seu praecipuum obiectum *Dens* est, a cujus potentia & misericordia, atque ab infinitis *Salvatoris nostri* meritis speramus beatitudinem aeternam, & auxilia ad eam consequendam? Si *Una Spes* nostra Virgo depraedicator, & vox *Una* significat, non in alio obiecto, nisi in Virgine, collocandam esse *Spem* Christianorum:

rum: non amplius ad Deum convertenda erit Spes nostra, sed ad Deiparam *Unam*: quod quis Catholicorum excogitare audeat, immo non horreat? Ad haec passim divinae Scripturae sperare in Deo nos docent ac jubent. *In Deo Salutare meum, & gloria mea; Deus Deus auxilii mei, & Spes mea in Deo est* Pl. LXI. 8. *Domine, Spes mea a juventute mea.* Pl. LXX. 5. *Quoniam tu es Domine Spes mea.* Pl. XC. 9. Apostolus vero nos laetificat mentionem faciens 1. Tim. I. 1. *Christi Jesu Spei nostrae.* Et Coloss. I. 27. *Christus in vobis Spes gloriae.* Propterea in antiquissima Ecclesiae Romanae Liturgia, a Cardinali Bona in Liturgicis edita, Confessionem suam ita Episcopus in Missa exprimebat: *Suscipe confessionem meam, Unica Spes salutis meae, Domine Deus meus Jesu Christe &c.* Reliqua loca praetereo, uti & Sanctos Patres pari concentu idem tradentes; nota quippe haec sunt cuicumque sacris literis operam danti, & praecipuae quae S. Augustinus habet Enarr. in Psalmum LX. Quod mirum est, haec ignorare nequit, & nihilominus informi quadam Devotione eo abripi se sinat P. Milanesi, ut *Unam Spem* Christiani Populi agnoscat, aut se agnoscere fingat beatissimam Christi Domini Matrem. Et ne quis dubitet, an persuasio haec altas in illius corde radices egerit, eundem audiamus in Praefatione fatentem, se *pro Virgine Sanctissima* decertare, *quam ipse a teneris unguiculis Parentis loco habui, cui quidquid in me est, quidquid eris, refero, & referam acceptum.* Nemo Catholicorum est, qui praecipuo amore & cultu Deiparam non veneretur, invocet, atque ejus ope se plura a Deo impetraturum speret; intercessio enim ipsius apud Dominum supra ceterorum Sanctorum efficax est. Sed Ecclesia nos docet, quidquid boni est in nobis, ad Deum esse referendum, a quo beneficia cuncta procedunt per Filium ejus Jesum Christum, *qui solus noster Redemptor, & Salvator est.* Quare quid dicas de Theologo protestante, nulla Dei mentione facta, se Beatissimae Virgini acceptum referre quidquid boni in se est, atque erit, hoc est Peccatorum remissionem, Gratiam Dei, rectas cogitationes, inspirationes, atque Virtutes? Utinam & heic non exclamet Dominus per Hieremiam 11. 13. *Me dereliquerunt fontem aquae vivae.* Certe Heterodoxi, quorum mos est Ecclesiae Catholicae perperam tribuere privatorum hominum anomalias in Religionis doctrina, dum Patrem Milanesium audiunt docentem, *Unam humani Generis Spem* esse Mariam, seque ei, non vero omnium donorum largitori Deo, debere quidquid boni in se deprehendit: non aliud inde elicient, nisi Deiparam non solum *Parentis*, sed etiam *Dei* loco esse huic

huic Theologo; & saltem rudi Populo nihil aliud quam perniciosum hoc dogma aut saltem Superstitionem olens, in mentem venire posse. Nos interea animadvertentes, patentia doctrinae Catholicae documenta perverti, & neutiquam ad verae puraeque Theologiae lydiū lapidem ab ipso exigi suae Devotionis immodicum fervorem: nihil postea mirabimur, si eundem offendemus in alios quoque declinare excessus, dum *Certitudinem* Piae Sententiae de Immaculata Virginis Conceptione persuadere nobis contendit, dum *Sanguinarium Votum* dealbandum suscipit, dum e *Debito proximo* Sanctissimam Redemptoris Matrem eximit.

Ad Piae Sententiae *Certitudinem* statuendam quod attinet, multa is congerit, rationes, consensum Academicarum, Festum Conceptionis, Concilia nonnulla, Theologos quamplurimos, & quid non? Sed quae antea Lampridius attulit, quaeque & ego ad te, Azevede amantissime, scripsi; jam nihil aliud exposcunt, ut appareat, quam fluxo in loco ejusmodi Certitudinis fundamenta jacta fuerint. Rogandus autem est egregius iste Pugil, ut sincere edicat, quale sit obsequium suum erga Apostolicae Sedis doctrinam, & Romanorum Pontificum Constitutiones. Is, ut arbitror, continuo fatebitur, sibi pluris esse Romanae Ecclesiae dogmata & praecepta, quam propriae imaginationes, & subtilia foecundaeque sui intellectus cogitata. Credere par est, non aliam mentem fuisse atque esse ceteris Catholicae Ecclesiae filiis, qui Petri Cathedram tanta veneratione prosequuntur, ejusque judicium opinionibus suis quibusque praeponendum norunt. Quamobrem quicumque hactenus amplexi tutatique sunt Piam Sententiam, aut adhuc ruentur, non aliud sensisse aut sentire censendi sunt, quam quod Romana Sedes sensit & sentit. Meridiano autem sole clarius est, in Ecclesia Romana haberi quidem Piam & Probabilem, & liceat etiam dicere, altera Probabiliorem, Scotisticam Sententiam, non vero Certam. Sub gravissimis poenis vetuerunt hactenus Romani Pontifices, quibuscum concors perrexerit Tridentinum Concilium, ne quisquam *Peccati* aut *Haeresis* alterutram de Conceptione Opinionem sive Sententiam insimularet. Pius etiam V. praecepit, ne quis *Erroris* Thomisticam argueret. Vel ipse Alexander VII. Pontifex, quamvis prae ceteris favorem Scotisticae impartitus, & Academas, & omnes fere Catholicos in eam consentientes agnoscens, nihilo tamen secius Sixti IV. aliorumque praecedentium Pontificum hac de re Decreta confirmat; neque Pii V. Bullae suam vim detrahit, immo dum Gregorii XV. Constitutionem de verbo ad verbum renovat, Pianam quoque

a se confirmatam ostendit. Satis etiam in aliis literis ad te datis demonstratum arbitror, nunquam interdictam ab Apostolica Sede fuisse celebrationem Festi Conceptionis sub significatione *Sanctificationis*. His positus, quicumque habet (habere autem omnes debemus) honorem decretis & judiciis Romanae Ecclesiae Matris nostrae nequit non agnoscere, laudandam quidem esse Piam Sententiam, pro Certa vero minime esse habendam, & commendandos, qui eam amplectuntur; at nequaquam probandos, ubi ingeniis suis nimium fidentes ea se videre putant, quae nondum vidit sapientia procul dubio major, & cunctis veneranda Romanorum Pontificum.

Superfluum proinde est legere quae P. Milanese ex Historia scripta de Conceptione Deiparae, atque ex Salazario, Sfondrato, aliisque notissimis Libris erasit, sperans, se propinaturum exoptatam Certitudinem Scotisticae Sententiae incautis Lectoribus, qui momenta contrariae Opinionis aut ignorant, aut non satis accurate perpendunt, quia animo jamdiu affectibus praeoccupato in ejusmodi quaestionem invadunt. Haec profecto Romana Sedes novit; attamen quum post tantum temporis, post tot preces & conatus ipsorum Regum, dimoveri se quidquam de sententia sua non sit haecenus passa: quid aliud censendum restat, nisi summis Pontificibus in unam Veritatem, & custodiam Catholicae doctrinae intentis, Probabilitatem quidem, non vero Certitudinem, apparuisse in Scoti Sententia? Si apparuisset, tanta est illorum, totiusque Christiani Populi iusta erga Deiparam Devotio, ut pendentem tamdiu non reliquissent, neque etiamnum relinquerent hujusmodi controversiam. Conquiescamus igitur in iudicio minime fallaci Magistrae omnium Apostolicae Sedis, neque plusquam illa nos sapere & videre arbitremur. Quoniam vero P. Milaneseus protrita hac de re Eruditioni unum addidit non antea visum resem, aliquid & mihi liceat haec addere. Quo tempore floruit Joannes Duns Scotus, celeberrimus inter Fratres Minores Theologiae Doctor, idest vergente in finem Saeculo XIII. magnum quoque nomen sibi peperit *Engelbertus Abbas Admontensis* Ordinis S. Benedicti. Tractatum eximii hujus viri de *Gratiis & Virtutibus B. Mariae Virginis* luce donavit Anno 1721. P. Pezsius Monachus Benedictinus Tom. I. Noviss. Anecd. Thesauri. Ejusdem vero Engelberti Par. IV. Cap. 3. sunt haec verba a P. Milaneseo producta. *Conceptio, quam festivat Ecclesia, non est Conceptio seminalis materiae, sed est potius Conceptio Animae & Gratiae; quia Sanctificatio non fit nisi per infusionem Gratiae, quae praecedit infusionem Animae, ita quod infusio Gratiae simul*

mul tempore fiat cum infusione Animae: licet infusio Gratiae, naturali consequentia sit posterior infusione Animae. Tum Cap. 6. haec alia adjicit: Sciendum tamen, quod secundum Communem Sententiam Sanctorum & Doctorum B. Virgo successively tribus gradibus Sanctificationis usque ad summum purificata, & mundata & sanctificata fuerit. Primo in utero, quae Sanctificatio simul facta fuit tempore cum infusione Animae, & vivificatione conceptus, & haec abstulit originalem maculam & culpam per infusionem Gratiae. Post haec P. Milanesius subdit: Adnotet Lampridius, quod Piam Sententiam Communem Sanctorum & Doctorum Sententiam vocat hic Auctor Scoti Synchronus, vel antiquior. Non hoc adnotabit Lampridius, sed quidem quam verum sit, praecipua judicia vel doctissimis hominibus praenepere vim recte judicandi. En ut P. Milanesi Piam Sententiam deprehendit in hisce Engelberti verbis, quum tamen palam sit, unam ibi tradi Thomisticam Sententiam. Communis Theologorum Opinio ante Scotum fuit, Virginis Beatissimae Animam in Conceptione contraxisse labem primi parentis, & successisse illius Sanctificationem. Neque alia tunc erat sententia eximii Theologis ex Ordine Minorum, ad quorum mentem accedens S. Antonius Patavinus, Serm. in Feria V. de Passione aiebat: Sicut qui fuerunt Sanctificati in utero, de quorum numero fuit Beata Virgo. Hoc idem Engelbertus statuebat. Sanctificatio non fit (sunt ejus verba) nisi per infusionem Gratiae, quae Praeexistit infusionem Animae. Infusio Gratiae naturali consequentia est Posterior infusione Animae. Ergo Engelbertus infusam prius Animam credit, ac propterea originali macula conspersam, deinde Sanctificatam. Illud Simul veritatem rei offuscare non potest; semper enim posterior infusione Animae est infusio Gratiae. Idem Engelbertus Cap. 3. dixerat: Conceptio Animae fit in tempore vivificationis foetus & infusionis Animae. Conceptio vero Gratiae fit Post infusionem Animae, cum Anima sit subjectum Gratiae; subjectum vero oportet accidenti Praeexistere tempore, vel natura, vel utroque. Et infra: Sicut vivificationem per Animam Praecedis generatio per naturam, ita Sanctificationem per Gratiam Praecedis vivificatio per Animam. Quare non Praeservatio, uti nunc Piae Sententiae adhaerentes volunt, sed Sanctificatio subsequens Conceptionem, seu infusionem Animae, tunc erat Communis Theologorum sententia, hoc est Mundatio a culpa jam contracta. Haec Sanctificatio ABSTULIT Originalem culpam & maculam per infusam Gratiam: inquit Engelbertus. Attamen P. Milanesi haec legens, Praeservationem ibi videre se putat, quum Ausferre culpam originalem ma-

manifeste contrarium indicet; hoc est culpam jam existentem atque contractam, quae postea auferretur. Quod Engelbertus ipse etiam Cap. 4. manifestius nos docuit, scribens de Virgine: *Non in Seminali Conceptione fuit sanctificata in utero. Quae* (idest Sanctificatio) *fuit facta postea in infusione Animae; nec antea poterat fieri, quam Anima infunderetur, cuius est MACULATIO, & Infectio Originalis, & per consequens MUNDATIO ab ipso Originali, & Sanctificatio.*

Quamobrem hinc intelligas, Azevede carissime, quam bene composita sint eorum ingenia, qui tutelam suam Voto Sanguinario dicarunt, quando Piam ibi Sententiam reperisse se putant, ubi aperte contraria legitur. Simul habes, Engelberti etiam tempore, non Scoti Sententiam, ut P. Milanesi suo nimium indulgens affectui imaginatus est, sed Thomisticam *Communem Sanctorum & Doctorum Sententiam* fuisse, quod & Cajetanus, Suarez, Salmaticenses, alique veluti rem nulli dubitationi obnoxiam tradiderunt. Atque haec ex necessitate mihi dicenda fuerunt, ne quis nimium fidens Theologo isti, aliquod grande fulcrum accessisse putet Voto Sanguinario, de cuius deformitate toties egimus, & quam prodere nimium interest Catholicae Religioni atque Reipublicae. Ceterum non ex isto loco, sed ab aliis bene multis colligenda est Piae Sententiae Probabilitas. Rursus quum idem religiosus vir Engelbertum *antiquiorem Johanne Duns Scoto* fuerit suspicatus: rogandus est, ut P. Pezium consulat in Dissert. Isagog. ad Tom. I. Thes. Anecdor. pag. 62. ubi comperiet, Engelbertum Abbatem vitam cum morte commutasse Anno Christ. 1331. Norunt autem Eruditi, Joannem Scorum e vivis excessisse Anno Christ. 1308. Ex his autem discimus, non continuo (uti nonnulli censent) Scoti auctoritatem immutatam fuisse Theologorum veterum Opinionem de Conceptione Deiparae. Praeterea ediscet P. Milanesi, ipsum quoque P. Pezium jam animadvertisse, Engelbertum in controversia hac a recentioribus Theologis nimis dissidere. *Quae noster, ait, de Beata Maria Virgine miraculose concepta & sanctificata modo ab hodiernis Scholis diverso disputat, eidem tempori, quo Pia Sententia de Immaculata Deiparentis Conceptione tantum nondum obrinuit, tribuenda sunt. Quod si nunc vivens adeo vulgatam constantemque Doctorum ea super re consensionem videres, in eorum sine dubio sententiam vir, honoribus Beatissimae Virginis tantopere deditus, manibus, ut ajunt, pedibusque concederet.* Ceterum nihil est quod referam quae pauca habet P. Milanesius ad Voti Sanguinarii praesidium. Ejusmodi Votum nunc oportet, si Certitudo Sententiae, hoc est illius fundamentum dehiscit. Plura prae-

ra praeter haec is commentatur de *Immunitate a Debito*, ridenda accusatione & ipse Lampridium arguens, quod *Debitum Proximum a Remoto* minime distinxerit. Nam uti antea ad te scripsi, sat Lampridio fuit Salmaticenses Theologos pro se adferre, qui late ostendunt, ne a Proximo quidem Debito Immunitatem Virgini Sanctissimae esse tribuendam. Quod plus est, controversiam hanc tantummodo indicavit, non invasit Lampridius; & nulla distinctione opus erat pugnanti contra unos Cusentinos, qui Sanguinem & Vitam vovent (repetere liceat) pro *hac Veritate*, scilicet, *Mariam semper Virginem, Dei Matrem, & Dominam nostram, in Conceptione sua non solum non contraxisse Peccatum Originale, sed ne ipsius quidem Debitum, quum transfundi nequeat infelix haereditas Adami in illam, quae ut Mater futura Verbi aeterni praevisa fuit in signo antecedenti Adamum.* Nihil a Remoto Debito Proximum distinguunt Cusentini; immo utrumque negare videntur: cur ergo distinguendum Lampridio fuit?

Pro Cusentinis interea nemo haec clypeum, nemo censuram Lampridii aperte oppugnandam arripuit. Unice pugnat heic P. Milanese pro se, aliisque Theologis, quibus solenne est e *Debito Proximo* sacratissimam Dei Matrem eximere. Et quando pro hac sententia nemo ex iis, ut arbitror, Sanguinarium Votum concipit: nulla nobis de eorum conatibus futura est sollicitudo. Attamen res poscit, ut animadvertamus, quanta postremis hisce temporibus fuerit in Theologorum Scholis novandi licentia, quam qui sapit aegre semper ferat, immo detestetur. Sicuti Salmaticenses Theologi, quaestionem hanc omnium gravissime & fusissime pertractantes, antea ostenderunt, veteres Theologi fere omnes (etiamsi Originalem maculam in Virgine quidam ex iis non admitterent) necessarium tamen iu ea *Debitum* agnoscebant; atque ubi invalescere coepit Novatorum Opinio de Immunitate a Debito, eidem fortiter obstitere. Quid est ergo quod P. Milanese tantopere urget heic recentium Theologorum copiam, non solum Culpae, sed & Debiti Immunitatem Beatissimae Virgini tribuentium? Non inde certe ulla exsurget Certitudo Piae Sententiae, neque exclusio Debiti statuatur. Antiquos Theologos aliam de Conceptione Virginis sententiam fovescentes, immo cum SS. Patribus consentientes, nonne recentiores contempsere? Rursus Debitum culpae Scholae omnes olim Virgini tribuebant: Consensum hunc veterum posteriores postea, uti nunc videmus, flocci fecere. Antiquisne, an recentibus plus credendum est? Sed quod potissimum in tutoribus Immunitatis a Debito considerandum est, ii nobis diven-

dunt imaginationes suas, acutaque meditata ingenii sui, tanquam dogmata, ad quorum sonum procumbere debeat omnium intellectus, quum tamen unicum *Nego* ad ea in leves auras solvenda satis superque sit. Isti, ut scite S. Hieronymus de Origene scripsit, *ingenii sui adinventiones faciunt Ecclesiae sacramenta*. En ut ii ascendunt in sacrarium Divinitatis; ibi decreta, sed in cerebro suo duntaxat nata, comminiscuntur. Haec certe sine tabulis. Facta ejusmodi tantummodo a Revelatione scripta aut tradita haberi possunt; ea deficiente, in nubibus aedificatur. Sed quid ajo, desiderari haec subsidia? P. Milanesi, Cap. XIV. num. 150. & seqq. divinarum Literarum loca quaedam adfert, multos etiam Sanctos ex Salazarii officina depromptos producit, ut ex iis immunem statuatur a culpae *Debito* Virginem Sanctissimam. Ad ista quid ego? Si quando ad te illius Liber deferatur, tuum erit singula diligenter expendere; atque, ut arbitror, mecum decernes, doctissimi hujus viri eruditionem in rudem atque indigestam molem resolveri. Nullus ibi melioris Criticae usus, nullus delectus rerum. Quaecumque vel levis umbra occurrat, tanquam praconceptae opinioni favens, extemplo arripitur; & quae contra militant, caute dissimulantur. Norunt eruditi homines, nihil ex sacris Scripturis extundi posse, quo revera ostendatur Deiparae Immunitas a culpa, nedum a *Debito*: & nihilominus loca quaedam ex iis producantur. Compertum est, ut alias ad te scripti, *Alia S. Andreae* inter saltem dubia monumenta recenseret; ad *Origenem* minime spectare Homiliam I. in Matthaeum; non esse S. Cypriani Tractatum Libri de Cardinalibus Christi Operibus; facile in statuendis quorundam Sermonum, Homiliarum, & Liturgiarum Auctoribus, nos falli posse: nihil refert: ad scaenam omnia sunt apta. De Immunitate Virginis a peccatis actualibus complures veterum loquuti sunt: hos etiam juvat obtorto collo trahere ad Culpam originalem, Immo & ad *Debitum*, & Graecos praefertim, qui teste Petavio quaestionem de Originali peccato aut ignorarunt, aut minime pertractarunt. S. Anselmi dubia aut supposititia adducuntur pro Pia Sententia, quum contra in illius Operibus germanis contrarium legatur. Idem de S. Thoma inquis. Scorum agnovisse *Debitum* in Virgine tradunt Salmaticenses; & nihilo secius contra sensisse heic traditur. Joannes quoque Baconus adfertur in 4. dist. 2. art. 3. quasi is e *Debito Proximo* Deiparam exemerit. Sunt ejus verba ibidem art. 4. *Quod dicitur, quod mox post suum esse conceptum fuit Mater Dei exempta (Necessitate contrahendi) intelligendum est, quod ly Mox dicit ordinem Na-*

turac,

turas, non temporis, ut sic in eodem instanti fueris concepta sub Necessitate contrahendi, & exempta: ideo verum est dicere, & quod in Conceptione contraxit Necessitatem, & post immediate fuit exempta in ipsa Conceptione &c. Hanc eandem Sententiam tradidit Suarez in 3. p. S. Thomae qu. 27. art. 2. disp. 3. sect. 4. qui certe Immunitatem a Debito Virgini negavit. Ne te fastidiam, reliqua praetermitto peculiari examine tibi pensanda. Haec tamen tam pulchro apparatu, & quidem sine ulla contradictione, exposita, satis Patri Milanesi videntur, ut oculis imperitae gentis Opinio haec de exemptione a Debito uti probabilis suadeatur. Fortassis etiam spem victoriae, si Superis placet, eidem ingerunt.

Sed quid haec ad Cusentinorum Votum, adversus quod praecipue Lampridius pugnavit? Jam in aliis literis tibi significavi, quantopere Opinioni huic adversentur Romanorum Pontificum Zosimi, & Leonis, tum S. Augustini, aliorumque Patrum, veterumque Theologorum placita. Tute ipse legeris, quae hanc in rem summo studio congeffere supra laudati Salmaticenses Theologi, atque utinam & reliqui legerent. Probabilitatem tamen in ejusmodi Opinione fingamus: quod unum P. Milanesius contendere potest. Quid tum? Num pro Opiniosis tutela licuit unquam, licebitne in Ecclesia Catholica Sanguinem vitamque vovere? Si impium facinus, si Superstitionem una cum Lampridio appellem Cusentinorum Votum, nonne justo titulo id ego faciam? Pietas vera profecto sublimis Virtus est, Catholicae Religionis singulare decus. Oportandum nobis est, ut sollicitè foveatur, atque ut in dies crescat. Sed simul dolendum, quoties homines Novitatis amantes, sive se plus placere Deo aut Sanctis improvide credentes, sive ingenii ambitione, sive siti gloriae praerepti, ne dicam quæstus aut adulationis causa, novas invehunt sententias, sed laxas, aut temerarias, in quibus desideratur aut laeditur germana Ecclesiae doctrina; aut novum Dei Sanctorumque ejus Cultum procudunt, ab Ecclesiae documentis & disciplina abhorrentem. In Cultum hunc atque in doctrinam nemo est qui nesciat, quot abusus atque anomaliae irrepere possint. Excusanda plebs indocta; Pastorum vero, gentisque doctæ munus & obligatio est eandem monere, rectamque Ecclesiae doctrinam ad normam Catechismi Romani docere. Fucum sibi aliisque faciunt, qui vulnera Pietati inferenda timent, si ad hujusmodi abusus dignoscendos Populus adducatur; nihil enim timendum, experientia teste, dum vera Ecclesiae mens simul eis aperiatur. Sed quid si Pastores ipsi fallantur & fallant? Moralis Theologiae

giae excessus novimus; ne iis quidem Scholastica caret, ingeniis nimium ad Novitatem proclivibus. Neque perspiciunt interdum pii alioquin homines, Pietatem ipsam in luxum, in ambitionem, in fabulas posse declinare. Quod ex iis nonnulli solidis Theologiae principiis parum studeant, quod Criticam artem negligant, immo irrideant, aut etiam probis insectentur, a spuriis ac dubiis certa minime distinguunt; immo quidquid Pietatis speciem refert, licet fabulosum, confictum, ambabus ulnis excipiunt. Si quid minus recti excidit Sanctis Joanni Damasceno, Bonaventurae, Bernardino Senensi, aliisque posteriorum Saeculorum viris piissimis, sive ob immodicum devotionis aestum, sive ob parum circumspectam eloquentiae licentiam: id quidam nullo adhibito criterio, parum cauti viri non secus ac divinarum Literarum effatum amplexantur, ac super illud aedificant. Num hosce egregios Theologos dicas? Decernas etiam velim an quemquam istorum similem Sicilia nutriet, regio alioqui felicitum Ingeniorum parens & nutrix, ubi etiam cordati & melioris notae viri innumeri habentur, qui nullius artibus & blanditiis ad probandum Sanguinarium Votum passi sunt se adduci. Messanenenses potissimum inter istos adnumero. Sed plura addere neque juvat, neque vacat. Vale.

Neapoli XIII. Kal. Aug. Anno MDCCXLII.



I N D E X

E P I S T O L A R U M.



C *Larissimo viro, Amico Dulcissimo D. Gregorio Azevedo Ferdinandus Valdesius S. P.* EPISTOLA PRIMA. Pag. 235.

Doctissimo, & amantissimo Azevedo suo Valdesius S. P. EPISTOLA SECUNDA. Pag. 241.

Celebri, atque optimo inter amicos D. Gregorio Azevedo Valdesius S. P. D. EPISTOLA TERTIA. Pag. 248.

Azevedo suo eruditissimo, atque inter paucos amico, Valdesius S. P. EPISTOLA QUARTA. Pag. 263.

Nobili & doctissimo viro D. Gregorio Azevedo Ferdinandus Valdesius S. P. D. EPISTOLA QUINTA. Pag. 285.

Eruditissimo viro D. Gregorio de Azevedo Ferdinandus Valdesius S. P. EPISTOLA SEXTA. Pag. 298.

Azevedo suo Ferdinandus Valdesius S. P. EPISTOLA SEPTIMA. Pag. 313.

Egregio, atque inter paucos amico viro Gregorio de Azevedo Valdesius Sal. EPISTOLA OCTAVA. Pag. 336.

EPISTOLA. *Illustriissimi P. de A. ad Patrem I. P. &c.* Pag. 339.

Doctissimo Azevedo suo Ferdinandus Valdesius S. P. D. EPISTOLA NONA. Pag. 349.

Di-

Dilectissimo Azevedo Ferdinandus Valdesius P. S. EPISTOLA DECIMA.
Pag. 361.

Eruditissimo viro, Amico summe colendo D. Gregorio Azevedo Ferdinandus Valdesius S. P. EPISTOLA UNDECIMA. Pag. 373.

Egregio Amico, & Domino semper colendo Gregorio Azevedo Ferdinandus Valdesius S. P. EPISTOLA DUODECIMA. Pag. 389.

Dilectissimo Azevedo suo Ferdinandus Valdesius S. P. D. EPISTOLA DECIMATERTIA.
Pag. 407.

Dilectissimo & amantissimo Azevedo suo Ferdinandus Valdesius S. P. D. EPISTOLA DECIMAQUARTA.
Pag. 421.

Praeclarissimo viro Azevedo suo Ferdinandus Valdesius S. P. EPISTOLA DECIMAQUINTA.
Pag. 451.

Azevedo suo Ferdinandus Valdesius P. S. EPISTOLA DECIMASEXTA.
Pag. 469.

*Clarissimo Patri Bonaventurae Attardo Ordin. S. Augustini N. N. be-
ne omnia agere.* ibid.

Azevedo dilectissimo Valdesius. EPISTOLA DECIMASEPTIMA.
Pag. 476.

Q U I N T I T O M I F I N I S .





